



जातरा चक्र



शैव निर्मोही

जातरा-चक्र



शिव 'निर्मोही'

प्रकाशक

शिवालिक प्रकाशन

पैथल (कटड़ा वैष्णो देवी)

JATRA CHAKKAR

by

Shiv Nirmohi

© Shiv Nirmohi

जातरा संस्मरणें उप्पर आधारत

प्रकाशक	: शिवालिक प्रकाशन, पैथल
प्रथम संस्करण	: 2012
मूल्य	: 50 रुपये
पैहले पुज्ज	: 300 प्रतियां
	: शिवालिक प्रकाशन
	ग्रां-पैथल (कटड़ा वैष्णो देवी)
	फोन नं. : 01991-285541
मुद्रक	: रोहिणी प्रिंटर्ज, कोट किशन चंद, जालंधर
	94191-49293

अपनी गल्ल

मिगी बचपुनें थमां गै लूर-लूर फिरने दा चस्का हा। मेरे चचेरे भ्राऽ, जमाती जां साथी अपने सरबन्धिये दे घर जन्दे तां अ'ऊं बी उन्दे कन्ने टुरी पौंदा। बगाने घर जाइयै अ'ऊं एह दिक्खदा जे उन्दा साढ़े प्रति बतीरा कनेहा ऐ। ओह साढ़े औने उप्पर किन्ने खुश न। फही अ'ऊं जित्थें जंदा अ'ऊं एह बी दिक्खदा जे साढ़े घर जां साढ़े ग्रां दी जीवन शैली ते उन्दी तरज-ए जिन्दगी इक खास फर्क केह ऐ। अ'ऊं एह बी जानने दी कोशश करदा जे साढ़े ग्रां दे लोकें दी सोच इच ते दूएँ ग्रां दे लोकें दी सोच इच केह फर्क ऐ।

मिगी घर-घर, ग्रां-ग्रां दी रैहत-बैहत दा अध्ययन करने दा शौक जन पेई गेआ। अ'ऊं जिस बी ग्रां जन्दा उस ग्रां दे घर-कोठें बावलियें दी कंधे इच जड़ी दी मूर्ता दिक्खने, ग्रांऽ दे देहरेँ इच प्रतिष्ठित मोहरेँ, सिम्बे जां मूर्तियें गी दिक्खने इच मती रूचि दस्सदा।

अ'ऊं सतमी इच पढ़दा हा जे मेरे पिता जी दे जीवन इच इक बड़्हा तूफान आया। उ'नें गी ग्रां छोड़ियै मक्खू कलोनी इच डेरा जमाना पेआ। में सतमी पास कीती ते फहीं अ'ऊं बी उन्दे पिच्छे मक्खू जाई पुज्जा। उत्थें बी मेरे जमाती मेरे साथी बने। फही अ'ऊं पढ़ने गी फिरोजपुर गेआ तां मेरे जमाती मिगी बी अपने ग्रां-ग्रां फेरन लगे। इत्थें मिगी डोगरेँ ते पंजाबियें दी लोक मानसकता दा अध्ययन करने दा मौका मिलेआ। मिगी बझोआ जे पंजाबी मते मेहनती न।

सन 1956 इच मेरी नियुक्ति हाई स्कूल हीरा नगर इच होई। इत्थें बी मिगी मेरे साथियें मिगी इक-इक ग्रां दस्सेआ। इ'यां गै अ'ऊं चनैनी, रियासी, टिकरी, चढ़ेआई इच नौकरी करदे डुग्गर दे मते ग्राएं इच फिरेआ। इ'नें फेरे-फराटे कन्ने पता नेई मिगी की इक दिव्य आनन्द दी अनुभूति होन लगी। औखे

फ़ाड़े, जंगल जाड़े, नदी, नाले इच फिरने कन्ने मिगी बझोन लग्गा जे एह मेरे लेई खुल्लियां कताबां न।

सन 1976 इच मेरी नियुक्ति डिग्री कॉलेज कटुआ होई। इत्थें नौकरी दरान मिगी परिचर्चाएं, सेमीनारें, ते कायशालाएं इच हिस्सा लैन अपनी रियासत थमां बाहर दूए राज्यें इच जाना पेआ, फही डिग्री कॉलेज उधमपुर, एम.ए.एम कॉलेज जम्मू, कॉलेज आफ एजुकेशन जम्मू, महिला कॉलेज उधमपुर इच नौकरी दरान अ'ऊं केई राज्यें दे शिक्षा संस्थानें इच गोआ। उत्थें बी मेरा बतीरा उ'यै जेहा रेहा। में ग्रां-ग्रां दे थाहर प्रान्त-प्रान्त दे लोक जीवन, लोक मानसकता, लोक संस्कृति गी अपने अध्ययन दा विशे बनाया। अपनी पत्नी दे आग्रह उप्पर में उसगी देसै दे केई तीरथ स्थानें उप्पर लेत्ता। इस कन्ने उस दी धार्मिक-भावनाएं गी इक नमां बल मिलेआ ते मिगी थाहर-थाहर दे मंदर-स्थापत्य दा अध्ययन करने दा अवसर मिलेआ।

में देसै दे मते प्रान्तें दी जातरा करियै इक्कै निश्कर्ष कड्डेआ जे मेरा देस म्हान ऐ, मेरे देसै दी संस्कृति म्हान ऐ, मेरे देसै दे लोक म्हान न। मेरे देसै दे फ़ाड़ म्हान न, मेरे देसै दी नदियां म्हान न, मेरे देसै दी धरती पवितर ऐ, मेरे देसै दी संस्कृति रंग-बिरंगी ऐ।

मेरे मन इच एह गल्ल बार-बार आई जे में देसै दे दर्शन जिस रुप इच कीते न उसदी चर्चा कताब दे रुप इच डोगरी दे पाठकें गी भेंट करां। जातरा-दरान मिगी जेहड़े अनुभव होए उसदी जानकारी सारें गी देआं।

जित्थें तक्कर कताब दे सिरलेख दा सरबन्ध ऐ, एह में अपने दोस्ते दे एह आक्खने उप्पर रक्खेआ जे मेरे पैरें इच 'जातरा-चक्र' न।

इस कताब दी खूबियें ते खामियें दी जे विद्वान लोक समीक्षा लिखन तां अ'ऊं उन्दा अनुगृहीत होंड।

इस पोथी दी प्रूफ रीडिंग लेई भाशा विज्ञान दे शोधार्थी श्री यशपाल निर्मल हुन्दा मता-मता धन्नबाद।

शिव निर्मोही

जातरा-सूची

क्रमांक	जातरा	सफा
1.	दक्खन-भारत जातरा	7
2.	उत्कल-जातरा	26
3.	गंगा-सागर जातरा	35
4.	काठमंडु जातरा	44
5.	मुम्बई जातरा	49
6.	नासिक जातरा	59
7.	अहमदाबाद जातरा	65
8.	पावागढ़ जातरा	80
9.	सोमनाथ जातरा	84
10.	कच्छ जातरा	93
11.	माऊंट आबू जातरा	102
12.	हल्दी घाटी जातरा	105
13.	पालिताना जातरा	113
14.	बृज मंडल जातरा	117
15.	पुश्कर जातरा	121

क्रमांक	जातरा	सफा
16.	चित्तौड़गढ़ जातरा	126
17.	जयपुर जातरा	131
18.	काशी जातरा	136
19.	मगध जातरा	145
20.	प्रयागराज जातरा	152
21.	अयोध्या जातरा	157
22.	उज्जैन जातरा	161
23.	उतरांचल जातरा	165
24.	मंसूरी जातरा	174
25.	कुमाऊं जातरा	179
26.	शिमला जातरा	191
27.	मणि-महेश जातरा	196
28.	कुल्लू-मनाली जातरा	202
29.	अमरनाथ जातरा	215
30.	पैगांग जातरा	223

1. दक्खन-भारत जातरा

सरकारी कॉलेज आफ एजुकेशन जम्मू इच नौकरी दरान मेरी दोस्ती फलासफी दे प्रोफसर डॉ० देवराज वाली हुन्दे कन्ने इन्नी बधी जे अस दमैं जम्मू इच अयोजत साहित्यक ते सांस्कृतक कार्यक्रमें इच किट्ठे हिस्सा लैन जान लगे।

डॉ० वाली उ'नें दिनें 'भाषा संगम' नांऽ दी इक संस्था दी जम्मू-कश्मीर शाखा दे प्रधान हे। इस संस्था दा हैड-आफिस इलाहाबाद इच हा। कोई प्रोफसर प्रसाद नांऽ दे इक सज्जन इस संस्था दे संचालक हे।

इस संस्था नै जम्मू इच बी सन 1988 इच त्रै रोजा इक सेमीनार आयोजित कीता। इस इच हिस्सा लैन तमिलनाडु थमां बी बीह दे करीब विद्वान जम्मू आए। जम्मू दे इस सेमीनार इच गै एह घोशना कीती गई जे इस संस्था दा अगला कार्यक्रम तमिलनाडु दे कुसै शैहर इच कीता जाग। अ'ऊं जम्मू दे सेमीनार इच डॉ० वाली हुन्दे कन्ने-कन्ने रेहा इस लेई तमिलनाडु दे केई विद्वानें कन्ने मेरा बी परिचे होई गोआ।

इस सेमीनार दे इक साल बाद डा० वाली होर मिगी मिले ते आक्खन लगे जे भाषा संगम दा अधिवेशन इस ब'रै तिरु चिरा पल्ली (तमिलनाडु) इच दिसम्बर म्हीने दे खीर इच आयोजत होआ करदा ऐ। इस इच हिस्सा लैन तुसें बी मेरे कन्ने चलना होग। में दक्खन-भारत दी जातरा दा पैहलें गै मन बनाये दा हा, इस लेई में हामी भरी दिती।

दिसम्बर म्हीनै वाली साहब नै मिगी सनाया जे सेमीनार दियां तित्थां 29, 30 ते 31 दिसम्बर 1989 निश्चत होईआं न। में अपने कन्ने तुन्दी बी रिजर्वेशन करोआई लैती ऐ। असें 24 दिसम्बर गी त्रकालें जम्मू रेलवे स्टेशन थमां प्रस्थान करनां ऐ, इस लेई तुसें तेआर रौहनां।

24 दिसम्बर गी अ'ऊं पेंथल थमां तेआर होइयै जम्मू लेई चली पेआ। उ'नें दिनें मेरा डेरा चाँद नगर जम्मू इच हा। में संजा छे बजे अपना झोला चुक्केआ ते सड़कें पर आई गेआ। रस्ते इच गै मिगी वाली साहब बी मिली गे। अस दमें मेंटाडोर उप्पर बैठे ते 6.30 बजे रेलवे स्टेशन आई गे। साढ़ी रेल सिद्धे मद्रास जानी ही। जि'यां गै रेल प्लेट-फार्म उप्पर लग्गी अस अपनी बोगी इच गे ते असें अपने-अपने स्लीपर मल्ली ले। साढ़ी बोगी इच बारामुला कश्मीर थमां आए दे करीब बीह जातरी होर बी बैठे दे हे। ओह चालियें दिनें लेई धार्मक यात्रा आस्तै प्रस्थान करै दे हे। उन्दे कन्ने जेहड़े धार्मक नेता हे ओह मते गालडू ते कट्टरपंथी हे। ओह उ'नेंगी जातरा सरबन्धी मतियां गल्लां समझा करदे हे।

करीब रातीं दे नौ बजे साढ़ी रेलगड्डी रवाना होई। अस पठानकोट, जलंधर, लुधियाना, संगरूर ते झाखल थमां होंदे होई दो बजे दिल्ली पुज्जे। दिल्ली साढ़े कैबिन इच ओम प्रकाश राघव नांऽ दा इक मरीज बी आई गेआ। ओह लकबे दा मरीज हा। ओह अपना इलाज करोआन मद्रास जा करदा हा। उस कन्ने उसदे दो पुतर ते इक भ्राऽ हा।

25 दिसम्बर गी साढ़ी ट्रेन सवैरै चार बजे दिल्ली थमां रवाना होई। अस मथुरा, आगरा, झांसी थमां होंदे होई पैहलें ग्वालियर ते फही बड्डलै अट्ठ बजे भोपाल पुज्जी गे। साढ़ी रात मती शैल लंघी। मिगी नमें थाहर दिक्खने दी ललक ही इस लेई जेहड़ा बी स्टेशन आँदा अ'ऊं उट्ठियै बेही जन्दा।

26 दिसम्बर गी 8.30 बजे दे करीब अस भोपाल थमां रवाना होए। अगला सफर मता गै सुहाना हा। में पैहली बारी सतपुड़ा ते अरावाली दियां फाड़ियां दिक्खियां। रस्ते इच घने जंगल बी दिक्खे। नर्मदा घाटी दे दक्ख मिगी मते आकर्शक बझोए। एह सारा फाड़ी खेत्तर हरा-भरा हा। इस थमां अगें कोई पंजाह किलोमीटर दा इलाका खाली-खाली ते बंजर बझोआ। अस उत्थुआं दा गुजरा करदे हे तां किश स्थानी लोक बी साढ़ी बोगी इच आइयै बेही गे। उ'नें असेंगी बावा तुलसी डाकू दियां केई रोमांचक कहानियां सनाइआं। उ'नें असेंगी फाड़ी शिखर उप्पर बने दा ओह मंदर बी दस्सेआ जित्थें ओह अपने साथियें कन्ने रौहन्दा हा। खीर सन 1967 दे करीब पुलीस नै उसगी घेरेआ ते गोली मारी दिती। उन्दिंयां कत्थां सुनदे-सुनदे अस बेतुल पुज्जी गे। रस्ते इच असें

तेंदू दे केईं बुहटे दिक्खे। स्थानी लोकें असेंगी सनाया जे एह बूट्या बड़ा फायदे दा ऐ। इसदे पत्तर बीड़ी बनाने दे कम्म औंदे न। फही अस अगें गी बद्धदे गे। साढ़ी ट्रेन फाड़े थमां गुजरा करदी ही। ट्रेन नै पंज सुरंगा टप्पियां ते फही अस खुल्ले खेत्तरे दे दक्ख दिक्खदे दपैहरिं दो बजे दे करीब आमला स्टेशन इच पुज्जे। इत्थें में दैनिक भास्कर नांऽ दा इक अखबार खरीदेआ। जम्मू-कश्मीर दे बारे इच इस इच इक गै खबर ही जे 27 दिसम्बर 1989 गी नमां मंत्री मंडल सौगंध चुकग। खबर पढ़ियै अ'ऊं किश हस्सी गै पेआ। नमें चेहरे पर बतीरा उ'यै पराना।

आमला पुज्जियै असें दिक्खेआ जे रस्ते इच असें जेहिड़यां लाल ते काली मिट्टी दियां चट्टानां दिक्खियां हियां ओह हुन गायब हियां। मौसम इच बी फर्क हा। जेहड़ि असें रस्ते इच धुंद दिक्खी ही ओह छटोई गेदी ही। सूरज दियां किरणां बोगी इच बी पुज्जा करदियां हियां। उन्दे कन्ने असेंगी किश गरमैश जन बझोन लगी।

मिगी आमला ते जम्मू दा इलाका इक्कै जेहा बझोआ, निक्के-निक्के गां, ग्राएं इच निक्के-निक्के घर। खेत्तरे इच चरा करदे, मवेशी, उन्दे कन्ने हांका मारदे चरवाहे सब किश अपना जनेहा गै हा। पर खेत्तरे इच फसल किश बक्खरी ही। कपाह (कपास) दे बूहटे खेत्तरे इच लहलहा करदे हे। उस्सै ध्याड़ी त्रकालें अस नागपुर पुज्जी गे। उत्थुआं दे संगतरे दी असें बड़ी तारीफ सुनी दी ही। किश संतरे खरीदे ओह गरगल जिन्ने मुट्टे हे पर खाने गी फिक्के हे।

नागपुर दे मकानें दी छत्तें उप्पर असें सियासी पार्टियें दे झंडे झुलदे दिक्खे तां समझी गे जे इलैक्शनें दे बाद बी इत्थें सियासी म्हौल इच गर्माहट रौहन्दी ऐ। नागपुर थमां अगें बधे तां रस्ते इच में 'वार्धा' दा बोर्ड दिक्खेआ। जि'नें दिनें सन 1962 इच अ'ऊं बेसिक एजुकेशन सर्टिफिकेट दा कोर्स, रियासी इच करदा हा तां उत्थें असेंगी बार-बार एह दस्सेआ जन्दा हा जे गांधी जी नै यमुनादास बजाज दे नांऽ उप्पर निर्मित स्कूल दा दौरा लाने दे बाद बेसिक एजुकेशन दी अवधारणा बनाई ही। फही गांधी जी नै इत्थें किश चिर रेहियै अजादी दा आन्दोलन संचालित कीता। हिन्दी गी राष्ट्र-भाशा बनाने दी कल्पना बी गांधी जी नै शैद इत्थें रौहन्दे गै कीती ही।

रस्ते इच में 'पुरमंडल' नांऽ दे इक ग्रां दा बोर्ड बी पढ़ेआ। अ'ऊं डुग्गर दे पुरमंडल ते इस पुरमंडल दी तुलना करन लगा। शैद इत्थें बी कोई पवित्तर नदी प्रवाहमान रेही होग। फही अगें ग्रां गै ग्रां हे-तार गांव, कुलंग गांव, पादुरना, जरखेड़, कोहली ते, हिंगन घाट रातीं अट्ठ बजे साढ़ी गड्डी चन्द्रनगर पुज्जी। एह थाहर मिगी इक बड़्डा ओद्योगिक केन्द्र बझोआ। इस नगर गी टप्पेआ तां अगगे साढ़ी ट्रेन आन्ध्र प्रदेश इच दाखल होई। किश चिर ते अ'ऊं जागदा रेहा, फही सेई गेआ। सवरे उट्ठेआ ते दिक्खेआ साढ़ी गड्डी विजयवाड़ा स्टेशन उप्पर खड़ोती दी ही। मिगी पता चलेआ जे इत्थें गड्डी कोई अद्धा घंटा खड़ोग, में तौल कीती, स्टेशन उप्पर गै न्हाता धोता, नाश्ता कीता ते अपनी सीट उप्पर आइयै बेही गेआ। थोड़े चिर दे बाद गड्डी चली पेई। अ'ऊं रेलवे स्टेशनें दे नांऽ लिखदा गेआ- सिरपुर, कागजनगर, बेलन, मन्दमारि, मंचोरिपाल, रामगुन्द्रम, राघवापुरम्, कोलनूर, पोटका पल्ली, जमिकुटां, बरगेल, सिकन्दराबाद, हैदराबाद, कृष्णम् केनाल, मारेमपुडि, शपली, गमन बोलू, ओंगालू, सिंगराय कौडा, चाकी चला, अल्लरुरोड़, तलू मंचि, पिनार, नेल्लोरु, पालेम, वेंकटा चलम, गूडूर बगैरा-बगैरा। स्टेशनें दे नांऽ हिन्दी, तेलगु ते अंग्रेजी त्रौन्नें भाशाएं इच हे। रेल इच बैठे-बैठे गै में आन्ध्र प्रदेश दे ग्रां ते ग्राएं इच रौहने आहलें दी गरीबी बी दिक्खी। निक्की-निक्की झोंपड़ियें इच र'वै करदे आदिवासियें दी बस्तियें गी दिक्खियै बझोआ जे बकास दे नांऽ उप्पर शैहर ते कसबें दी शकल जरूर बदली पर जंगल-जाड़ें ते ग्राएं इच र'वा करदे लोकें दी दशा बक्खी सरकार नै बड़ा घट्ट ध्यान दित्ता ऐ। अ'ऊं रेल दी खिड़की थमां झांकदा जारदा हा ते भारत दी गरीबी दे बारे इच सोचा गै करदा हा जे साढ़ी गड्डी ग्राई अंचल थमां बाहर निकली ते शैहरी खेत्तर इच दाखल होई। इत्थें उच्चे-उच्चे ते आलीशान केई मंजले मकान हे। खीर गड्डी प्लेट फार्म उप्पर पुज्जी तां में स्टेशन दा नांऽ पढ़ेआ-अंग्रेजी, तमिल ते हिन्दी इच लिखे दा हा-मद्रास।

मद्रास

मद्रास रेलवे स्टेशन उप्पर अस जम्मू थमां चले दे चौथे दिन दपैहरी दे 2 बजे पुज्जे। असें अपने-अपने झोले चुक्के ते स्टेशन थमां बाहर आई गे। मेरे भनेह योगेन्द्र दी नौकरी जम्मू-कश्मीर बैंक दी मद्रास शाखा इच ही। उस

नै मिगी मद्रास इच दिक्खने आहले केई थाहें दी सूची लिखी दित्ती दी ही पर साढ़े कश समां घट्ट हा। असें इक आटो रिक्शा कीता दे मद्रास दिक्खने गी निकली पे। सभने थमां पैहलें असें अन्ना दुराई ते रामचन्द्रन दियां समुन्दरी तट कश बनी दियां समाधियां दिक्खियां। एह कश-कश गै हियां। इत्थें अस बूट खोलियै अन्दर गे। दिसम्बर म्हीनै बी इन्दा फर्श तत्ता हा। असें इत्थें फोटो खिच्चे ते फही आटो रिक्शा उप्पर बेही गे। आटोरिक्शा आहला असेंगी समुन्दर तट बक्खी लेई आया। समुन्दर दे कंढै-कंढै इक मती गै सुन्हाकड़ी खुल्ली सड़क ही। इत्थुआं दा समुन्दर दा दक्ख मता गै आकर्शक बझोआ दा हा। समुन्दर बी सड़क थमां डुगा नेई हा। साढ़ा रिक्शा सड़क उप्पर द्रौढ़न लग्गा तां में परतियै इक नजर समुन्दरै बक्खी मारी, समुन्दर शान्त हा। सड़क दे पूर्व बक्खी समुन्दर ते पच्छिम बक्खी आलीशान इमारतां हियां। असें इ'नें इमारतें इच इक मद्रास यूनिवर्सिटी दा बोर्ड दिक्खेआ ते इक प्रेजिडेन्सी कॉलेज दा परिसर दिक्खेआ। एह दोऐ भारत दे विश्व विख्यात सरस्वती भवन मिथे जन्दे न। कुसै बेल्लै सर्वश्री राधा कृष्ण पल्ली बी इत्थें पढ़ांदे हे। मिगी पता नेई की इ'नें भवनें इच दिव्यता बझोई ते में अपना मत्था इन्दे अगें झुकाई लैता।

साढ़ा रिक्शा सड़कै उप्पर द्रौढ़दा रेहा ते अस इक दे बाद इक सुन्हाकड़े भवन, बाग-बगीचे दिक्खदे गे। फही आटो आहला असेंगी स्नेक गार्डन (सप्पें दा बाग) इच लेई आया। इत्थें शीशें दे पटारें इच किसम-किसम दे सप्प प्रदर्शत हे। हर पटारे दे थल्लै सप्प दी किसम ते उसदा नांऽ लिखे दा हा।

स्नेक गार्डन दिक्खियै अस बाहर आए तां आटो आहले नै असेंगी हिन्दी इच पुच्छेआ-बाबू आगे कहां जाना है ? वाली होरें जवाब दित्ता - पांडिचरी दे अड्डे। रिक्शे आहले नै रिक्शा स्टार्ट कीता। ओह असेंगी मद्रास दे बजारें इच घुमांदा फरांदा अड्डे उप्पर लेई आया। उस साढ़े थमां सिरफ 70 रपेऽ काराया लेआ।

असें पांडिचरी लेई टिकटां खरीदियां ते बस उप्पर बेही गे। ठीक पंज बजे बस चली। इक घंटे तोड़ी बस मद्रास शैहर दी सड़कें उप्पर द्रौढ़दी रेही। फही रातीं दे दस बजे दे करीब उसनै असेंगी पांडिचरी पजाया।

पांडिचरी

पांडिचरी अस पुज्जे तां न्हेरा होई गेदा हा। असेंगी सोने लेई ठकाना

तुप्पने इच दिक्कत आई। खीर म्युनिसिपल पार्क कश गै असेंगी इक लाज इक कमरा मिली गेआ। उसदा कराया हा - पंजा रपेऽ प्रति रोज। असें अपने थैल्ले कमरे इच रक्खे। स्थानी भोजन गै उपलब्ध हा। असें खाना खादा ते सेई गे।

सवैरें उट्ठे न्हाते-धोते, नाश्ता लेआ ते सड़कै पर आई गे। इक रिक्शा कीता ते अरविन्द आश्रम दिक्खन चली गे। डॉ० वाली महर्षि अरविन्द दे दर्शन थमां मते प्रभावत हे। अस जि'यां गै आश्रम पुज्जे इक अजीबो-गरीब सकून मसूस होआ। असें सभने थमां पैहलें महर्षि अरविन्द ते श्री मां दी समाधियें गी प्रणाम कीता। फही अस ध्यान केन्द्र इच चली गे। उत्थुआं दा लाईब्रेरी गे ते फही आर्ट गैलरी दिक्खियै बाहर निकले। लाईब्रेरी थमां में किश अरविन्द साहित्य बी खरीदेआ। अस श्री अरविन्दु इन्टरनेशनल सेंटर आफ एजुकेशन, सीटी आफ डॉन दिक्खन बी गे।

असें पांडिचरी दी रिंग रोड दा चक्कर बी लाया। समुन्दर दे दक्ख बी दिक्खे। फ्रांसिसी गवर्नरें ते गांधी-नेहरु दे स्टेच्यु बी दिक्खे। अस किश चिर लेई समुन्दर दे कंडै बी बैठे। लैहरें दा संगीत बी सुनेआं ते अरविन्द मिशन कन्ने जुड़े दे केई विदवानें ते दार्शनकें कन्ने बी मिले। फही अस म्युज़ियम दिक्खन गे। उत्थें असें वास्तु कला, घरेलु वस्तां, पांडुलिपियां, तस्वीरां दे शस्त्र बी दिक्खे। जवाहर लाल भवन, बच्चेन दी लाईब्रेरी ते केई सुन्दर बाग बी दिक्खे। में बज़ार इच इक हाकर थमां 'हिन्दू' अखबार खरीदी ते जम्मू-कश्मीर दियां खबरां पढ़ियां तां पता चलेआ जे मोहन लाल सपोलिया होरें गी उन्दी डोगरी कताब उप्पर साहित्य अकादेमी पुरस्कार मिलेआ ऐ। में उत्थुआं दा गै उ'नेंगी मुबारक दी चिट्ठी भेजी।

अस किश चिर पांडिचरी बजार इच बी फिरे। उत्थें असेंगी नां कोई सिगरेट पींदा लब्धा ते नां शोर मचांदा। सब शान्त-शान्त हा। कुदै शोर नेई हा। पूरा दिन अस घूमें फिरे ते फही अपने लॉज इच आई गे। असें अपने थैल्ले चुक्के ते बस स्टैंड पर आए। साढ़ी हुन अगली पडां तरिचि ही। असें टिकटां खरीदियां ते बस पर बेही गे। साढ़ी बस रातीं दे 10.30 बजे तरिच' लेई चली। असें पांडिचरी ते छोड़ी पर इस शैहर दे चेत्ते मेरे दमाग इच बने दे रेह। अस सिर्फ 24 घंटे पांडिचरी इच रेह। 27 दिसम्बर रातीं पुज्जे हे ते 28 दिसम्बर रातीं अस उत्थुआं दा रवाना बी होई गे।

तरिचि (तिरुचरा पल्लि)

बड़्डै पैहर चार बजे अस तरिचि पुज्जे। बस अड्डे उप्पर असें भारती दासन युनिवर्सिटी दी इक बैन दिक्खी। उत्थें त्रै विद्यार्थी बैठे दे हे। ओह असेंगी पंछानी गे ते साढ़े सुआगत लेई अगें आए। उ'नें साढ़े थैल्ले चुक्के ते असेंगी इक आटो-रिक्शा उप्पर ब्हालेआ। आटो रिक्शा आह्ला असेंगी विशव हेबर कॉलेज परिसर इच छोड़ी गेआ। अस सुआगत कक्ष इच गे। उनें असेंगी इक कमरे इच ठहराया। असें अपने थैल्ले कमरे इच रक्खे ते लेटी गे। किश चिर नोंदर बी आई। सत्त बजे उट्ठे न्हाते-धोते ते नाश्ता खान हाल इच चली गे। उत्थें पंजा दे करीब प्रतिनिधि पुज्जी गे दे हे। ओह नाश्ता करा करदे हे। नाश्ता केले दे पत्तरें उप्पर रक्खे दा हा। सारे अपना-अपना पत्तर चुक्का दे हे। नाश्ते इच तमिल नाश्ता बी हा ते पूड़ियां बी हियां। असें दऊं-दऊं पूड़ियां खादियां ते चाह पीती।

इससै हाल इच भारती दासन युनिवर्सिटी, मद्रास युनिवर्सिटी ते तमिल . यूनिवर्सिटी दे वायस चांसलर बी बैठे दे हे। ओह बी पत्तर चुक्कियै नाश्ता खा करदे हे। सब किश सादा-सादा हा। कोई प्रदर्शन नेई हा। तमिलनाडु, आन्ध्र प्रदेश ते केरल दे किश विदवान अपने स्थानी परिवेश इच हे पर मते पैंट कमीज इच गै हे।

असेंगी कार्यक्रम दी सूची पढ़ने लेई दित्ती गेई। उद्घाटन समारोह 11 बजे सवरे हा। अस सारे ठीक समें उप्पर उत्थें पुज्जी गे। में उत्थें दिक्खेआ जे मेरे ते वाली हुन्दे अलावा जम्मू थमां बी पंज प्रतिनिधि होर आए दे हे जिन्दे नांऽ हे-सुषमा शर्मा, शोध छात्रा, शिवदेव सिंह मन्हास व्याख्याता, नसीब सिंह मन्हास, शोध छात्र, किरन गुप्ता शोध छात्रा, अस उत्थें इक दूए कन्नै मिलियै मते खुश होए।

इस सेमीनार दा संचालन भारती दासन विश्व विद्यालय दे तमिल विभाग दे अध्यक्ष डॉ० एम. राम लिंगम नै कीता। उ'नें त्रोन्नें उपकुलपतियें गी मंच उप्पर आदरपूर्वक सददेआ। इलाहबाद दे डॉ० प्रसाद होर बी मंच पर बैठे।

सारें थमां पैहलै मंच संचालक नै मुख अतिथियें थमां जोत प्रज्वलित

करोआई ते फही सेमीनार दा विशे घोशत कीता। विशे हा-आल इंडिया सेमीनार आन नेशनल पोइंटस भारती दासन, जयशंकर प्रसाद ते दत्तु। संचालक नै इ'में त्रोनं कवियें दा संखेप परिचे दित्ता। फही अतिथियें गी बोलने लेई गलाया। इलाहबाद दे डा० प्रसाद नै तमिल इच बोलना शुरु कीता तां हाल तालियें कन्नं गुंजन लगा। खीर इच स्थानी कलाकारें सांस्कृतक कार्यक्रम पेश कीता। दपैहरी दो बजे असें रुट्टी खादी ते फही अ'ऊं प्रो० शिवदेव सिंह मन्हास कन्ने रिजिनल कॉलेज गेआ। उत्थें उन्दा इक रिश्तेदार जागत पढ़दा हा।

कॉलेज पुज्जे तां उन्दा रिश्तेदार विद्यार्थी असेंगी तौले गै लब्धी गेआ। उसनै असेंगी अपना पूरा कॉलेज दस्सेआ। कॉलेज दा स्तर मता उच्चा हा। जम्मू दे कुसै जागत दा इत्थें पढ़ना इक गौरव आहली गल्ल ही। इ'यां असेंगी एह पता चली गेआ जे जम्मू-कश्मीर दे होर बी विद्यार्थी इत्थें पढ़दे न। अस कॉलेज थमां तौले गै परतोई आए। रस्ते इच असें डुग्गर आहला लेखा लोक देवतें दे केई थान सड़क दे कंढै दिक्खे। इ'यां ते इत्थें मते लोक कमीज ते धोती गै लाए दे लब्धे पर किश लोक नेह बी लब्धे जिन्दे कपड़े लाल रंगै दे हे, किश पीले रंगै दे कपड़े लाइयै फिरा करदे हे। पता चलेआ जे जेहड़े शाक्त न ओह लाल टल्ले लांदे न। इ'यां गै टल्लें थमां पंथ जां फिरके दी पन्थान होई जन्दी।

अस सत्त बजे दे करीब कॉलेज पुज्जे। पता चलेआ जे लोक हाल इच किट्ठे होऐ करदे न। तौले गै रियासती कलाकार सांस्कृतक कार्यक्रम पेश करने आहले न। अ'ऊं हाल इच गेआ ते इक कुर्सी पर बेही गेआ। इक दो विद्यार्थी बी मेरे कन्ने बैठे। पर्दा खुल्लेआ तां गणेश बन्दना दा दक्ख सामनै आया। जिस कलाकार नै गणेश दी भूमका निभाई ओह सच्च मुच गै कमाल दा कलाकार हा। नसीब सिंह मन्हास हाल इच कैमरा लेइयै खड़ोई गेआ। उसनै पूरे कार्यक्रम गी अपने कैमरे इच तुआरेआ। किश आइटम तमिल इच बी हियां। मेरे कन्नै बैठे दे विद्यार्थी मिगी अंग्रेजी जां हिन्दी इच उन्दे भाव समझांदे रेह। कार्यक्रम मता गै सराहने योग्य हा। अस नौ बजे हाल थमां बाहर आए। फही रुट्टी खादी ते खट्टें पर लेटी गे। अगले दिन 30 दिसम्बर गी पेपर वाचन हा। मिगी सारे पेपर पढ़ने गी मिली गे दे हे। इस लेई में 30 दिसम्बर गी मदुरै जाने दा मन बनाया।

30 दिसम्बर 1989 गी अ'ऊं बड्डलै गै मदुरै जाने लेई तेआर होई गेआ में कॉलेज थमां गै रिक्शा पकड़ेआ ते बस स्टैंड पुज्जी गेआ में टिकट लैती ते मदुरै आहली बस उप्पर बेही गेआ। जि'यां गै अ'ऊं अन्दर बड़ेआ में दिक्खेआ जे जबलपुर थमां आए दे दम्पति मेरे थमां बी पैहले बस उप्पर बैठे दे हे। सेमीनार इच में उन्दे कन्ने मलाटी कीती दी ही इस लेई पन्थान ही। हुन मिगी बी साथ लब्धी गेआ। अस त्रैवै जांरा बजे दे करीब मदुरै बस स्टैंड पुज्जे। उत्थुआं दा दक्ख बी आम बस अड्डे आहला लेखा गै हा। असें आटो कीता ते मीनाक्षी मंदर दिक्खन चली गे। मंदरै दे बाहर बूट खोलने गी अ'ऊं इक हट्टी पाससै गेआ तां उत्थें मिगी अन्ना डी.एम.के दे इक युवा नेता लब्धे। उन्दे कन्ने चार पंज उन्दे साथी बी हे। में उ'नेंगी अपना परिचे दिता तां ओह मेरी मदद करने गी तैयार होई गे। उ'नें अपना इक साथी साढ़े कन्ने भेजेआ। ओह असेंगी सुनान लगा-मदुरै पाण्ड्य राज्य वंश दी राजधानी ही। एह शैहर बैगै नदी दे कंठै बस्से दा ऐ। इस शैहर दे केई नांऽ न जि'यां-आलवाय, कडम्ब वन, कूडल, कनिपुरीशम, शिवनगर ते शिव राजधानी बगैरा, भगवान शिव नै अपने सिरै उप्पर रक्खे दे चन्द्र दे अमृत थमां नाग दे जैहर गी इत्थें कड्डेआ हा, इस लेई इस थाहर दा नांऽ मदुरै पर सिद्ध होआ। इत्थें जेहड़ी बैगै नदी प्रवाहमान ऐ उसदा इक नांऽ शिवगंगा ऐ। इत्थें तमिल कवियें 'संघम' साहित्य रचेआ हा इस लेई इसदा इक नांऽ तमिल मदुरै बी ऐ। इत्थें इक भव्य ते विशाल मीनाक्षी मंदर ऐ। फही ओह असेंगी मंदर दस्सन अन्दर लेई गेआ।

मीनाक्षी मंदर :-इक दन्त कथा दे मताबक पाण्ड्य राजा दी इक पुत्तरी दा नांऽ मीनाक्षी हा। ओह पार्वती दा अवतार ही। उसदियां अक्खां मच्छली आंगर हियां इस लेई उसगी मीनाक्षी गलांदे हे। बाद इच इस मीनाक्षी नै कैलासनाथ शिव जी कन्ने शादी कीती। उसदे चेत्ते इच गै पाण्ड्य राजा नै एह मंदर बनोआया।

मंदर इच इक गै अश्ट शक्ति मण्डप ऐ। एह पैहले कोश्ट इच बने दा ऐ। इसदी ड्योडी इच गणेश, सुब्रहमण्य ते श्री देवी मीनाक्षी दे ब्याह दियां मूर्ता न। इत्थें स्तम्भें इच कौमारी, रौद्री, वैश्वनाथ, महालक्ष्मी, यक्ष रुपिणी, श्याम जी, महेश्वरी ते मनोन्मनी दियां मूर्तियां स्थापत न। इस मण्डप इच देवी मीनाक्षी

दा इतिहास बी अंकित ऐ। इसदे बाद नायक मण्डप औंदा ऐ। इत्थें अलंकृत स्तम्भें दियां छे कतारां न। इसदे कन्ने गै इक निक्का मंडप ऐ जित्थें शिव ते पार्वती दियां भील ते भीलनी वेश इच मूर्ता स्थापत न। इसदे अगें 1008 तेल दे दियें दियां पंक्तियां न। त्रिये मंडप दा नांऽ मुतलिप्पिलै मंडप ऐ। इस इच ताकावन मुनि दी पत्नियें ते सुब्रह्मण्य जी दियां मूर्ता प्रदर्शित न। इसदे अगें स्वर्णपद्म तलाऽ ऐ। शिव जी नै इसगी अपने त्रिशूलै कन्ने बनाया हा। इस तलाऽ दी अटारी इच 24 प्रमुख संघ कवियें दियां शिला न। इस तलाऽ दे पच्छम इच झूला मण्डप ऐ। इत्थें मीनाक्षी सुन्दरेश्वर दे बन्धें गी शुक्रवारें झूले इच रक्खियै झुलान्दे न। इसदे कन्ने शुक पिंजड़ा मण्डप ऐ। इत्थें तोतें गी पिंजरें इच पालदे न। इत्थें पांडवें दियां मूर्तियां बी रक्खी दियां न। इस थमां अगें गोपुर ऐ। फही अगगे बधे तां स्वर्ण ध्वज स्तंभ, तिमलै नायक मण्डप, विनायक ते द्वारपालें दियां तांबे दियां मूर्ता लब्धदियां न। फही इन्दे पच्छम इच अर्थ मण्डप ते गर्भगृह ऐ जिस इच मीनाक्षी देवी दी दिव्य मूर्ति स्थापत ऐ।

मीनाक्षी देवी दे इक हत्थ इच शुक ते दूए हत्थ इच फुल्ल ऐ। देवी दी अक्खियां लम्मियां ते मच्छी दी अक्खियें आह्ला लेखा दिव्य न। मते लोक बुधवारें देवी दे दर्शन करदे न। उन्दा विश्वास ऐ जे बुध विद्या दा प्रतीक ऐ। इस कन्नै गै इत्थें इच्छा शक्ति, क्रिया शक्ति ते ज्ञान शक्ति दियां मूर्ता बी प्रतिष्ठित न। असें इस मंदर दे दर्शन कीते ते फही मुक्कुरुणी विनायक जी दे दर्शन करियै कम्बत्तडि मण्डप दिक्खन गे। इत्थें असें विष्णु जी दे दसें अवतारें दियां मूर्ता दिक्खियां। किश मूर्ता दुए देवी देवतें दियां बी हियां। अस श्री सुन्दरेश्वर दा मंदर बी दिक्खन गे। इत्थें शिवजी नटराज दे रुप इच लब्धे। इसदे अलावा असें इत्थें अट्ठ हाथी, 32 शेर ते 64 भूतगण दे समालम्ब दिक्खे। इत्थें मत्था टेक्कियै अस आयिरंकाल मण्डप पुज्जे। एह सारे थमां बड्डा मण्डप हा। इस दी छंत उप्पर इक बड्डा चक्र ऐ जेहड़ा तमिल भाशा दे 60 साल दे नाएं गी जाहिर करदा ऐ। इत्थें 985 स्तम्भ न। इत्थें मते देवी देवतें दियां मूर्ता बी हैन। इसदे कन्ने गै मैगयर्करसी मंडप ऐ। इत्थें हर बरै चैत्र महीनै श्री मीनाक्षी सुन्दरेश्वर दा ब्याह हुन्दा ऐ।

इत्थें मंदर दे अगें पिच्छे, नेडै-तेडै नौ छत्तें आहिलयां मीनारां न। सारे थमां बड्डी मीनार 160 फुट उच्ची ऐ। इस थमां निक्की 154 ते उस थमां निक्की 153 फुट उच्ची ऐ। इत्थें 22 निक्के बड्डे संगीत स्तम्भ न। इन्नेनै

थप-थपाओ तां मिट्ठा संगीत सनोचदा ऐ। इ नैंगी दिक्खने दे बाद अस पुदुमण्डप, राज गोपुर च बने दे शिलाखंडे गी दिक्खन गे। अस एह मंदर दिक्खियै मते रहान होए। इन्ना भव्य ते उन्नत दक्खन दा स्थापत्य साढ़े लेई इक आश्चर्य हा। असेंगी बझोआ जे भारत नै कला दे खेत्तर इच जेहड़ी तरक्की कीती ओह दुनिया इच बेजोड़ ऐ।

मीनाक्षी मंदर थमां कोई इक किलोमीटर दूर मदुरै दा राज मैहल हा। उस मैहल दी बी असें मती तारीफ सुनी दी ही। असें आटो कीता ते उत्थें बी जाई पुज्जे। एह कोई बड़डा मैहल नेई हा पर कलात्मक हा। इस मैहल दे मुट्टे ते कलात्मक स्तम्भ मिगी मते गै आकर्शक बझोए। असें उत्थें राजा दा सिंहासन, नृत्यशाला बी दिक्खी। कक्षें इच बी गे। सब किश मता गै शैल बझोआ। मैहल दिक्खी बाहर आए तां आटोरिक्षा आहला गलान लगा-बाबू जी! अभी तो तुम को मारियम्मन तेप्प कुलम (सरोवर) भी देखना है। जनवरी (पौष) महीने में यहाँ एक त्योहार होता है। मीनाक्षी-सुन्दरेश्वर की मूर्ति को रथ पर रख कर यहाँ लाया जाता है। उसे नौका में रखा जाता है। नौका को रस्सों से खींच कर तालाब की प्रदक्षिणा कराई जाती है। वहाँ जरूर चलो, पर अस नेई गे। असे तौले परतोना हा। असें उसगी गलाया तूं असेंगी बस अड्डे पर छोड़। उसनै असेंगी अड्डे पर पुज्जाया ते गलान लगा दूसरी बार आओगे तो अलगर मंदिर देखने भी जाना। वहाँ नूपुर गंगा नाम का एक झरणा है। तिरुप्पंरकुन्त्रम भी जाना। नन्मैतरु बार कोविल भी जाना, कूडल अलगर मंदिर भी जरूर जाना। में हां इच सिर ल्हाया। उसी पैहे दिते ते गड्डी इच बेही गेआ।

मेरी सीट कन्ने इक होर नौजुआन बेही गेआ। ओह पढ़े लिखे दा हा। उसनै मिगी पुच्छेआ-‘तूं कुत्थवां दा ऐं।’ में जवाव दिता-जम्मू-कश्मीर दा। फही उसनै मिगी अपना परिचे दिता-अ‘उं फलानां, पत्रकार आं, जाफना थमां। किश दिनें लेई इत्थें आए दा हा। तौले गै वापस जा करनां। फही उसनै मेरे कन्ने कश्मीर दे बारे इच गल्ल कत्थ कीती। ओह अंग्रेजी बोला करदा हा। अस गप्प-छप्प लांदे तरिचि पुज्जी गे। ओह बी बस थमां उतरेआ ते अपनी दिशा इच चली गेआ। में रिक्शा कीता ते कॉलेज पुज्जी गेआ।

सेमीनार हाल दे बाहर किश तमिल साथी बैठे दे हे। मेरी उन्दे कन्ने पंछान ही। उ‘नें मिगी सुनाया जे पेपरें दे दो सत्र होई गेदे न। पैहले सत्र इच

डोगरी दे चार पेपर पढ़े गे-सुपमा शर्मा दा पेपर हा-वीर विलास की भाषा शैली, प्रो० शिवदेव सिंह मन्हास दा पेपर हा-कवि दत्तु : जीवन परिचे ते कृतियां। त्रि'या पेपर नसीब सिंह मन्हास दा हा जिसदा विशे हा-दत्तु दी कविता इच नारी संवेदना ते चौथा पेपर किरन गुप्ता दा हा। वृजराज पंचासिका दा इतिहासक विवरण। उ'नें मिगी दस्सेया जे चारै पेपर सामान्य हे, इन्दे उप्पर कोई खास चर्चा नेई होई।

में अपनी फाइल खोली। दूआ सेशन 'जय शंकर प्रसाद' हुन्दे उप्पर हा। इस इच डॉ० एस. केशवमूर्ति नै प्रसाद दी कहानियें इच नारी दा थाहर विशे पर पेपर पढ़ना हा, ओह पेपर, पढ़ी चुके दे हे। डॉ० माधवराव रेगुलपारी दा पेपर कामायनी ते विश्वंभरा दा तुलनात्मक अध्ययन उप्पर हा। एह पेपर बी मेरे कछ हा। इक पेपर के-मुस्ताक हुसैन दा जयशंकर प्रसाद दे नाटकें इच राष्ट्री-भावना दा हा। ओह बी पेपर पढ़ी बैठे दे हे। उन्दे पेपर दी कापी मिगी बी मिली गई। कहानीकार जयशंकर प्रसाद हुन्दे उप्पर इक पेपर डॉ० एन० मूर्ति हुन्दा बी हा। में उन्दे पेपर दी कापी बी हासल करी लैत्ती।

अ'ऊं सेमीनार हाल इच पुज्जा तां डॉ० ए. दुरैस्वामी होर भारती दासन की सामाजिक चेतना उप्पर पेपर पढ़ा करदे हे। एह पेपर मता शोधपरक हा। मिगी मता पसंद आया। मेरे बैठे दे गै एम.डी. थंकप्पन नै महाकवि जयशंकर प्रसाद ते मलयालम दे महाकवि कुमारन आशान दी काव्यकला उप्पर इक तुलनात्मक अध्ययन विशे उप्पर पेपर पढ़ेआ जेहड़ा मिगी मता परिपक्व बझोआ।

सेमीनार दा खीरला सत्र खत्म होआ तां भारती दासन यूनिवर्सिटी दे विद्यार्थियें इक सांस्कृतिक कार्यक्रम पेश कीता। इस इच उ'नें तामिलनाडु इच प्रचलत लोकनाचें दा प्रदर्शन कीता। एह नाच मते गै औखे हे। इत्थुआं दे बाजीगिरें आह्ला लेखा उ'नें अपने शरीर दे बक्खरे-बक्खरे अंगें दा बक्खरे-बक्खरे ढंगै कन्ने बक्खरी-बक्खरी मुद्राएं इच प्रदर्शन कीता। किश कुड़ियें भारती नाट्य बी पेश कीता।

इसदे बाद मेल जोल कार्यक्रम शुरु होआ। सारे प्रतिनिधि बाहर आए ते बरांडे दी अटारी उप्पर बेही गे। इक-इक उठदा गेआ ते अपना परिचे दिन्दा गेआ। जे.एस. कुसुम गीता-रीडर, हिन्दी विभाग मैसूर यूनिवर्सिटी, एन मूर्ति,

हैड हिन्दी विभाग विवेकानन्द कॉलेज मद्रास, मुश्ताक हुसैन, रिसर्च स्कालर, एम.डी. थंकप्पन द स्टेट इन्स्टीट्यूट आफ इन्साइक्लोपैडिक पब्लिकेशन, त्रिवेन्द्रम्, डॉ० रवीन्द्रनाथ सिंह, क्रिश्चियन कॉलेज मद्रास, सुन्दरराजन मद्रास, ए. भवानी तरुन कृष्णा अकादमी, डा० दुरैस्वामी मद्रास, डॉ० माधवराव, काकतीय विश्व विद्यालय आन्ध्र प्रदेश, डॉ० केशवमूर्ति क्षेत्रीय शिक्षा महाविद्यालय मैसूर। बगैरा-बगैरा मिमी अपना परिचे दित्ता प्रो० शिव निर्मोही, जम्मू-कश्मीर। किश लेखक उट्ठी खड़ोते ते गलान लगे तुन्दा नांऽ मता शैल ऐ। मिलन गोश्टी दे बाद मते विद्वान मिगी मिले ते उ'नें मिगी अपने संस्थानें इच सद्देआ।

इस गोश्टी दे बाद असें खाना खादा ते सोने गी अपने-अपने कमरें इच चली गे। संयोजकें साढ़े जाने थमां पैहले घोशना कीती जे कल सारे भ्रमण लेई चलडन इस लेई अट्ठ बजे तेआर होइयै थल्ले आई जान।

अस बी सवरे सवरे उट्ठे ते तेआर होइयै थल्लै आई गे। जम्मू दे साथी नेई लब्धे तां पता चलेआ जे ओह रातीं गै गड्डी बेहियै वापस चली गे न। भारती दासन विश्व विद्यालय दियां दो गड्डियां थल्लै खड़ोती दियां हियां। असें तौले-तौले न्हारी खाद्दी ते गड्डियें इच बेही गे। चालक असेंगी मुख बजार दस्सदे काबेरी नदी पार करियै रंगनाथ जी दे मंदर लेई गे। रस्ते इच इक राक टेम्पल बी हा। ओह असें दूरै दा गै दस्सेआ।

रंगनाथ मंदर :-इस दा इक नांऽ श्री रंगम् मंदर बी ऐ। दक्खन भारत दे मंदरें इच एह इक विशाल ते भव्य मंदर ऐ। इसदा निर्माण नायक राजें समें-समें पर कीते दा ऐ। 17वीं सदी इच त्रिचनापल्ली नायकें राजें दी राजधानी ही। इ'नें राजें थमां बी पैहलें तेरमीं सदी इच पांड्य बंशी राजें ते चौदमीं सदी इच विजय नगर दे राजें इस मंदर दे वाद्धे ते वकास लेई मता कम्म कीता। खीर इसगी मजूदा रूप 17वीं सदी इच मिलेआ।

श्री रंगम् दक्खन इच शैद इकला मंदर ऐ जिस इच इक देवालय दी योजना ऐ। एह इक वैष्णव मंदर ऐ। एह उत्तर थमां दक्खन बक्खी फैले दा ऐ। इसदा निर्माण केई सदियें तोड़ी चलदा रेहा। इस मंदर दी योजना संतुलित नेई ऐ।

एह मंदर सतें परकोटे कन्ने घिरे दा ऐ। इसदे बाहरले परकोट दी रचना

विशिष्ट ऐ। इसदी लम्बाई 2880 फुट ते चौड़ाई 2475 फुट ऐ। इस इच निक्के-निक्के 21 गोपुरम न। जेहड़ा गोपुरम दक्खन इच ऐ उ'यै मुख प्रवेश द्वार ऐ। इस मंदर दा चौथा परकोटा 1235 फुट लम्मा ते 849 फुट चौड़ा ऐ। इस दे त्रै गोपुरम न जेहड़े उत्तर-दक्खन ते पूरब इच बने दे न। इन्दे इच पूरब आह्ला गोपुरम भव्य ऐ। इसदे कन्ने गै चौथे घेरे इच उत्तर-पूरब कोने च इक ज्हार स्तम्भ युक्त कक्ष बने दे न जेहड़े पंज सौ फुट लम्मे ते 160 फुट चौड़े खेतर इच फैले दे न। इस कक्ष इच लगभग नौ सौ ठोस स्तम्भ देवालय तोड़ी बने दे न। इस परकोटे दे अन्दर अश्व-सभा ऐ। इसदे बरांडे स्तम्भ युक्त न। इसदे अगें त्रि'आ प्राकारम ऐ। एह 767 फुट लम्मा ते 503 फुट चौड़ा ऐ। इस परकोटे दे बी दऊं गोपुरम न-इक उत्तर ते दूआ दक्खन बक्खी ऐ। दक्खन दा गोपुरम मुख इयोढी आह्ला लेखा ऐ। इस मंडप दे मझाटै इक देवालय ऐ। जिसदी छत्त गुंबजनुमां ऐ। गरूढ़ मंडप कश इक जलकुंड ऐ जिसगी सूर्य पुष्करिणी गलांदे न। इत्थें जेहड़ा दूआ जलकुंड ऐ उसगी चन्द्र पुष्करिणी आक्खदे न। इसदे बाद दूआ परकोटा ऐ। एह 426 फुट लम्मा ते 295 फुट चौड़ा ऐ। इस इच बी दो प्रवेश द्वार न। इसदे बाद पैहला परकोटा ऐ जेहड़ा 240 फुट लम्मा ते 181 फुट चौड़ा ऐ। इस इच इक्कै प्रवेशद्वार ऐ जेहड़ा दक्खन बक्खी ऐ। इसै दे अन्दर देवालय ते गर्भगृह मज्जुदे ऐ। गर्भगृह दे अन्दर भगवान श्री रंगम जी दी सुन्ने दी मूर्ति स्थापत ऐ। इस मंदर दी छत्त उप्पर बी सुन्ने दा गुंबज ऐ। इस कन्ने एह मंदर मता सुन्हाकड़ा बझोंदा ऐ। मंदर इच भीड़ मती ही। इस लेई असें टिकटां लेइआं ते श्री रंगम जी दे दर्शन करन अन्दर गे।

भगवान रंगम जी दे दर्शन करने परैन्त असेंगी संयोजक तमिल यूनिवर्सिटी इच लेई गे। एह यूनिवर्सिटी अजें बना गै करदी ही। इस इच बने दे भवन असेंगी द्रविड़ स्थापत्य कला दे अद्भुत नमूने बझोए। इत्थें कुलपति नै साढ़ा सुआगत कीता ते असें गी द्रविड़ शैली दा भोजन कराया। एह भोजन मता गै सुआदला हा। उत्थें असेंगी पीने लेई गर्म पानी दित्ता गेआ। इस कन्ने साढ़े गले साफ रेह ते रुट्टी बी पच्ची गेई। असेंगी पही सेमीनार कक्ष इच लेता गेआ। इत्थें सीढ़ी मलाटी इस यूनिवर्सिटी दे कुलपति ते उच्चकोटि दे तामिल विद्वाने कन्ने करोआई। उ'नै असेंगी तमिल विश्व विद्यालय दे उद्देश्यें ते उपलब्धियें बारै दस्सेआ। उत्थें मिगी तमिल लोक वार्ता ते लोक कला दे बी किश विद्वाने मिले जि'नै अपने-अपने विशे दी मिगी जानकारी उपलब्ध कराई।

सेमीनार दे संयोजक असेंगी पही बसें उप्पर ब्हालियै तंजोर लेई आए।
उत्थें असें इक विलक्षण, भव्य ते विश्वदाय स्मारक दिक्खेआ जिसदा नांऽ हा-

वृहदीश्वर मंदर :-एह मंदर चोल स्थापत्य शैली दी गौरवमयी मसाल
ऐ। एह इक भव्य शिव मंदर ऐ। मित्थेआ जंदा ऐ जे इसदा निर्माण राज राजा
प्रथम नै इक ज्हार ई० इच करोआया हा।

एह मंदर चार दीवारी कन्ने घिरे दा ऐ। इस दा प्रांगण 500 फुट लम्मा
ते 250 फुट चौड़ा ऐ। मंदर इच प्रवेश लेई दऊं गोपुरम न।

इस मंदर दी आधारभूमि आग्नेय चट्टाने कन्ने निर्मित ऐ। इस इच केई
शिला लेख उत्कीर्ण न। इस मंदर दा शिखर मता गै विलक्खन ऐ। इसदी ऊंचाई
190 फुट ऐ। पूरा मंदर त्र'ऊं हिस्सें इच बंडेआ गेदा ऐ पैह्ला हिस्सा आधार
भाग दूआ ढलुवां भाग ते त्रि'आ अंडाकार स्तूपिका ऐ। आधार-भाग दी भुजा
82 फुट ऐ ते एह 50 फुट उच्चा ऐ। शिखर दा ढलुवां भाग तेरहें परतें इच
बने दा ऐ। इस मंदर दे शीर्ष भाग दी बनावट विलक्खन ऐ। एह अंडाकार
स्तूपिका दी शकल दा ऐ।

इसदे गर्भगृह दी कन्धे इच शिव दी विशालकाय मूर्तियां सज्जी दियां
न। इसदे गर्भगृह दे अन्दर एक विशाल शिवलिंग प्रतिष्ठित ऐ। इस शिवलिंग
दे सामनै नंदी दी जेहड़ी मूर्त रक्खी गेदी ऐ उसगी इक बड्डी चट्टान गी
उत्कीर्ण करियै बनाया गेदा ऐ।

अस एह मंदर दिक्खियै परतियै कॉलेज आई गे। असें अपने-अपने
थैल्ले चुक्के ते बस अड्डे आए। हुन साढ़ी अगली पडांऽ कोयंबटूर ही। उत्थें
डॉ० देवराज वाली हुन्दा जागत हवाई ज्हाज दे रक्ख रक्खा दी ट्रेनिंग लै करदा
हा।

असें बस अड्डे थमां कोयंबटूर दी बस पकड़ी ते सवैरै त्रै बजे कोयंबटूर
पुज्जी गे।

कोयंबटूर :-सन 1990 दी पैहली तरीक गी सूरज दी पैहली किरण
असें कोयंबटूर इच गै दिक्खी। जि'यां गै लोऽ होई असें अपने थैल्ले चुक्के
ते इक लाज्ज इच गे ते इक कमरा कराये पर लैत्ता ते बिस्तर उप्पर लेटी गे।
असेंगी पूरी रात दा नींदरा हा इस लेई थोड़ी नींदर फंडी ते पही न्हाते-धोते

ते तेआर होइयै बेही गे। करीब अट्ठ बजे प्रो० वाली हुन्दा जागत अपने इक साथी कन्ने असें गी तुप्पदा लाज इच आई गोआ। उसनै असेंगी सनाया जे साढ़ी वापसी पंज जनवरी गी ऐ कि जे रिजर्वेशन उससै तरीक दी होई। ओह असेंगी घुमाने-फिराने लेई बाहर लेई गोआ। उसनै असेंगी कोयंबटूर दा शैहर दस्सेआ। इ 'यां शैहर बड्डा ते नेई हा पर साफ-सुथरा हा। पूरा ब'रा सैलानियें कन्ने भरोचे दा रौहन्दा हा। इक पर्यटन स्थल दे रूप इच मशहूर हा। अस बज़ार फिरे टुरे, बाज़ार दिक्खेआ, गलियां दिक्खियां उत्तर बक्खी फ्हाड़ें दे दक्ख दिक्खे। केई स्कूल दिक्खे, कॉलेज दिक्खे। बड्डे-बड्डे शापिंग कम्पलेक्स दिक्खे। दपैहरीं दी रुट्टी असें डा० वाली हुन्दे जागत दे इक परिचित परिवार इच खादी। तमिल इच लस्सी दा मता प्रजोग हुन्दा ऐ। असें बी लस्सी पीती।

साढ़ा प्रस्थान पंज जनवरी गी हा। मिगी बझोआ जे इन्ने दिन इत्थें अ'ऊं केह करंड। में कन्या कुमारी जाने दा मन बनाया।

2 जनवरी 1990 गी अ'ऊं अपना थैल्ला चुक्कियै बस स्टैंड गोआ। में टिकट खरीदी ते कन्या कुमारी आहली बस उप्पर बेही गोआ। बस सवरे दस बजे चली ते मदुरै बिचें हुन्दी रातीं अट्ठ बजे कन्या कुमारी पुज्जी।

कन्या कुमारी :-बस थमां उतरियै अ'ऊं इक होटल इच चली गोआ। मिगी सिंगल बैड दा कराया उत्थें 75 रपेऽ देना पेआ जेहड़ा मिगी मता जैदा बझोआ। कन्या कुमारी लेई में पढ़े दा हा जे पर्यटक समुन्दरै दे कंठै खड़ोइयै चढ़दे सूरजै दा दक्ख बड़े चाऽ कन्ने दिक्खदे न। अ'ऊं बी सतें सबेलै उट्ठेआ न्हाता धोता ते समुन्दरै कंठे जाई खड़ोता। मेरे कन्ने होर बी मते लोक खड़ोते। उस दिन पूर्व बक्खी किश बदल हे इस लेई दक्ख नेई लब्भा।

विवेकानन्द स्मारक

समुन्दर दे कंठै मती किशियां खड़ोती दियां हियां। लोक उन्दे च बहवा करदे हे। अ'ऊं बी इक किशती उप्पर बेही गोआ। ओह किशती मिगी स्वामी विवेकानन्द दे स्मारक भवन तोड़ी लेई आई। एह स्मारक समुन्दर इच दऊं सुन्दर चट्टाने उप्पर बने दा ऐ। गलांदे न जे सन 1892 ई० इच विवेकानन्द कन्या कुमारी पुज्जे तां ओह तैरियै इ'नें चट्टाने तोड़ी पुज्जे। फही इत्थें उ'नें ध्यान लाया तां उ'नेंगी किश चिर बाद आत्मज्ञान होआ। इस कन्ने उन्दे अन्दर आत्म शक्ति उदित होई ते ओह बाद इच पूरे संसार इच परसिद्ध होए।

सन 1962 इच विवेकानन्द हुन्दे सौवें बरि दे उपलख इच समारोह होन लगे तां इक प्रस्ताव एह बी आया जे उस चट्टान उपर उन्दा स्मारक खड़ेरेआ जा जित्थें उ'नें ध्यान लाया हा।

एकनाथ रानडे नै स्मारक बनाने दा बेड़ा चुक्केआ। सारे देश नै उ'नेंगी चन्दा भेजेआ। खी'र 85 लख रपेऽ दे खर्च कन्ने एह भव्य स्मारक बनेआ। एह स्मारक 82 फुट लम्मा ते 38 फुट चौड़ा ऐ। एह सिरफ पत्थरें दा बने दा ऐ। इसदी मेहराब 65 फुट उच्ची ऐ। मेहराब दें थल्लै स्वामी जी दी सवा अट्ठ फुट उच्ची कांसे दी बनी दी परिव्राजक मुद्रा इच मूर्ति संस्थापत ऐ। इस स्मारक दा उद्घाटन 2 सितम्बर 1970 गी राष्ट्रपति श्री बी.बी. गिरि होंरें कीता हा। इस स्मारक दे दर्शन करियै अ'ऊं बी अभिभूत होई गोआ। अ'ऊं उत्थें करीब इक घंटा रेहा। में ध्यानागार, श्रीपाद मंडप दे दर्शन बी कीते। पही अ'ऊं किशती पर बैठा ते समुन्दरै दे कंढै आइयै खड़ोई गोआ।

गांधी मंडप – मेरी नजर किश लोकें उपर पेई। ओह इक मंडप बक्खी जा'रदे हे। अ'ऊं बी उस बक्खी गोआ। उत्थें में गांधी मंडप दिक्खेआ। इस मंडप दा निर्माण गांधी जी दी चिता-भस्म दे चेते इच कीता गेदा हा। 12 फरवरी 1948 गी गांधी जी दे फुल्ल कन्या कुमारी दे समुन्दर इच बी प्रवाहत कीते गे हे। पही इसदी जाद इच आचार्य कृपलानी हुन्दी निगरानी इच एह मंडप 1956 इच पूर्ण होआ इस उपर त्रै लख रपेऽ खर्च आए। इत्थे मंडप इच गांधी जी दी मूर्ति स्थापत ऐ। में इस मूर्ति गी मत्था टेकेआ ते पही अ'ऊं कन्या कुमारी दा मंदर दिक्खन गोआ एह मंदर बी बड़ा भव्य हा। इत्थें गर्भगृह इच स्थापत कन्या कुमारी दी मूर्ति दिव्य बझोंदी ही। पही में कन्या कुमारी दे तीरथ घाटें दा चक्कर लाया ते बस अड्डे पर आई गोआ। मेरी अगली पडांस तिरु-अनन्त पुरम यानि त्रिवेन्द्रम् ही। अ'ऊं कन्या कुमारी थमां त्रिवेन्द्रम लेई चली पेआ।

त्रिवेन्द्रम (तिरु-अनन्त पुरम्) कन्या कुमारी थमां साढ़ी बस कोई 11 बजे चली ते 2 बजे दे करीब आऊं त्रिवेन्द्रम पुज्जी गोआ। कन्या कुमारी थमां लेइयै त्रिवेन्द्रम तोड़ी में जेहड़ी जातरा कीती ओह मती गै रोमांचक रेही। असें जि'यां गै तमिलनाडु दा बन्ना टप्पेआ असेंगी सड़कें उपर बने दे मील पत्थरें इच मलयालम, अंग्रेजी ते हिन्दी दे नांस लब्धन लगे। तमिलनाडु इच इ'यां नेई हा। उत्थें केन्द्री सरकार जां बैंक दे दफ्तरें दे बोर्डे इच गै हिन्दी लब्धदी ही,

बाकी थाहरें तमिल जां अंग्रेजी इच नांऽ पट्ट हुन्दे।

मिगी त्रिवेन्द्रम शैहर बी मता शान्त बझोआ। में इक आटोरिक्शे आहले गी गलाया जे ओह मिगी त्रिवेन्द्रम शैहर दा दिग्दर्शन करा ते पदमनाभ मंदर बी लेई चलै। इ 'यां ते उस मिगी बजार दस्सेआ, सचिवालय बी दस्सेआ पर बार-बार ओह मिगी कपड़े आहली हट्टियें दे सामनै खड़ा करै ते गला बाबू जी! यहाँ बहुत बढ़िया कपड़ा मिलता है। घर के लिए ले जाओ। जां फही कुसै स्टोर दे सामनै खड़ोइयै आक्खै-यहां विदेशी वस्तुएं मिलती हैं। सस्ती हैं, खरीद लो। मिगी बझोआ जे एह हट्टियें आहलें दा एजेन्ट ऐ। में उसी गलाया जे में होर किश नेई दिक्खना तूं मिगी पदमनाभ स्वामी हुन्दे मंदर लेई चल। असल इच इस मंदर दे बारे इच में शाम लाल शर्मा हुन्दा लेख मेरी दक्खन भारत जातरा पढ़े दा हा। मेरी ख्वाहिश ही जे अ'ऊं बी इस मंदर दे दर्शन करां।

स्वामी पदमनाभ मंदर :-केरल राज्य दे विशाल ते भव्य मंदरें इच इस मंदर दा थाहर विशिष्ट ऐ। एह इक वैष्णव मंदर ऐ ते भगवान पदमनाभ गी समर्पत ऐ जेहड़ा भगवान विष्णु दा गै इक नांऽ ऐ। इस मंदर इच सिरफ धोती लाइयै गै प्रवेश कीता जाई सकदा ऐ। अ'ऊं धोती अपने कन्ने लेइयै गेदा हा। में धोती लाई ते मंदर दे अन्दर चली गेआ। मुख मंदर दे कपाट बंद हे इस लेई में इसदा बाहरला आकार, प्रकार ते रूप गै दिक्खेआ। इस मंदर दा मंडप बी मिगी मता कलात्मक बझोआ। इसदे छत उपर मैथुन दियां कलाकृतियां अंकित हियां। इस दे खम्भे बी मते कलात्मक ते आकर्शत हे। इ 'नें खम्भें इच मूर्तियां बी उत्कीर्ण न जिस कारण एह अलौकिक बझोंदे न। इसदा गर्भगृह बी भव्य ते कलात्मक ऐ। इसदे अन्दर गै इष्ट देवता दी मूर्ति प्रतिष्ठित ऐ। मंदर इच प्रवेश लेई जेहड़े सोपान बने दे न ओह अकलात्मक बझोंदे न पर ड्योढी कलात्मक ऐ। इस मंदर दे दर्शन करियै मिगी मती खुशी बझोई। मंदर दिक्खियै अ'ऊं बाहर आया तां आटो रिक्शा आहला मिगी बलगा करदा हा। उसनै मिगी चीच दिक्खने लेई गलाया पर अ'ऊं उत्थें नेई गेआ। सिद्धा बस अड्डे आया। छे बज्जा करदे हे। में कोयंबटूर दी टिकट लैत्ती ते बस उपर बेही गेआ। बस सारी रात चलदी रेही। कोचीन दा शैहर बी में बस पर बैठे-बैठे दिक्खेआ। इ 'यां शैहर दा बजार ते बंद हा पर लाटु जगा करदे हे। सवेरे छे बजे अ'ऊं परतियै कोयंबटूर पुज्जी गेआ। अ'ऊं अपने कमरे इच गेआ, न्हाता धोता, न्हायी

खादी ते बजार दा चक्कर लान निकली पेआ।

इ 'यां वाली होर मेरे कन्ने हे पर ओह मते व्यस्त हे। कदें ओह अपने पुतर कन्ने बाहर जन्दे कदें अपने दोस्ते कन्ने। अ'ऊं इकला गै फिरदा रौहन्दा। 3 जनवरी तोड़ी ते अ'ऊं चक्कर गै लांदा रेहा। इक तमिल फिल्म बी दिक्खी पर पही बी बझोआ जे अ'ऊं खाल्ली-खाल्ली आं। साढ़ी वापसी 5 जनवरी गी ही। चार जनवरी खाल्ली ही। में ऊटी जाने दा मन बनाया।

ऊटी :-में कोयंबटूर बस अड्डे थमां बस पकड़ी ते इकला गै ऊटी दिक्खन चली पेआ। ऊटी इक पहाड़ पर स्थित पर्यटन स्थल हा, इ 'यां गै जि 'यां पत्नीटॉप ऐ। सड़क बी इ 'यां गै बल खंदी ऐ जि 'यां कुद्ध जाओ तां बल खंदी लब्धदी ऐ। फाड़ी चढ़ाई चढ़दे कोई दऊं घटे लागे। बस अड्डा आया तां उतरी पे। उत्थें बरखा बरै दी ही। किश लोकें स्वेटर लाए दे हे। गलांदे न जे इक बारी ऊटी बर्फ बी पेई ही। उत्थें दिक्खने लेई इक निक्की झील गै ही जिसदे कंठै निक्की-निक्की किशियां हियां। चलने फिरने लेई इक मीटर चौड़ा रस्ता बन्ने दा हा। इ 'यां एह थाहर घने बूहतें कन्ने भरोचे दा हा। अ'ऊं ताई तुआई लूर-लूर फिरेआ। इक थाहर मिगी कश्मीरी लभे। ओह उत्थें समान बेचा करदे हे। अ'ऊं उन्दे कश खड़ोता। उ'नें मिगी कोल गै स्थित इक बाग दिक्खने लेई गलाया पर अ'ऊं नेई गेआ। में अपनी रियासत इच जेहड़े बाग दिक्खे दे हे ओह उन्दे थमां सुन्हाकड़ा नेई हा। संजां दे चार बजे तां अ'ऊं बस पर बैठा ते परतियै कोयंबटूर आई गेआ।

वापसी :-5 जनवरी गी साढ़ी वापसी ही। अस तौले गै रेलवे स्टेशन पुज्जी गे। रेल केरल थमां आई। स्टेशन उप्पर रुकी तां अस अपने डब्बे इच बढी गे। रेल अगें-अगें बदधी गेई पर मेरा मन पिच्छें गी खचोंदा गेआ। ओह भव्य ते अलंकृत मंदर, शांत शैहर ते खुल्ला असीम समुन्दर.....।

०००

2. उत्कल जातरा

मेरे बड़्डे पुतर नलिनाक्ष नै सन 1989 ई० इच बी. एस. सी. कीती। उसदा मन टेक्नीकल कोर्स करने दा हा। फोटोग्राफी इच उसगी मता शौक हा। इ'यां बी ओह जनें-खने दियां फोटो खिचदा गै रौहन्दा हा। अगस्त 1989 इच उसदे हत्थ इक अंग्रेजी अखबार आई। अखबार इच इन्दिरा गांधी फिल्म इन्स्टीच्युट बेहरामपुर पाससेआ इक विज्ञापन छापेआ गेदा हा। इस इच बी. ए., बी. एस. सी. पास उ'नें जागतें ते कुड़ियें थमां त्र'ऊं ब'रिं दी एक्टिंग, डिरेक्शन ते सिनो मेटोग्राफी लेई प्रार्थना-पत्र मंगे गेदे हे। जिन्दी रुचि इ'नें विशे इच ही। मेरे जागतै बी सिनो मेटोग्राफी दी ट्रेनिंग लेई फार्म भरेआ ते उसगी पोस्ट करी दिता। म्हीनै बाद उसगी बेहरामपुर इन्टर्व्यू लेई साद्धा आया। ओह जाने लेई मता उत्सुक हा। उड़िसा में बी नेई हा दिक्खे दा। कोर्णाक मंदर बारै में इक कताब प्रभाकर इच पढ़ी दी ही। इस मंदर गी दिक्खने दा बी मेरा मता मन हा। में जम्मू थमां कलकते लेई दऊं टिकटा खरीदियां। असेंगी 7 सितम्बर 1989 गी सालिदाह इच रिजर्वेशन मिली गई। असें अपना लोड़चदा समान इक थैल्ले इच पाया ते रेलवे स्टेशन पुज्जी गे। रेल ठीक 6.30 बजे संजा चली ते सहारनपुर, मुरादाबाद, लखनऊ ते बनारस थमां होंदी 9 सितम्बर गी सवेरे नौ बजे गया जी पुज्जी। इत्थें ट्रेन किश चिर रुकी। इक होर इंजन इस कन्ने जुड़ेआ ते ट्रेन चली पेई। अगें चढ़ाई ही। चढ़ाई चढ़ने दे बाद अस पारसनाथ ते धनवाद थमां अगें बधे। अगें दामोदर दरिया हा। असें जि'यां दरिया पार कीता अस पूर्वी बंगाल दी सीमा इच पुज्जी गे। रस्ते इच असें सीता रामपुर बर्द्धमान ते दुर्गापुर दे रेलवे स्टेशन दिक्खे। खीर संजा दे 6.30 बजे अस सिलदाह पुज्जी गे। ट्रेन इच गै इक पनछानु नै असेंगी बड़्डा बजार दे गुरद्वारें इच ठैहरने दी सलाह दिती। असें टैक्सी पकड़ी ते बड़्डा बजार चली गे। असेंगी गुरद्वारा तुप्पने इच औख नेई आई। असें प्रवेश द्वार टप्पेआ ते दफ्तर इच अपने नांउ ते पता लखाया ते फही इक बड़्डे हाल इच आइयै लेटी गे। रातीं अट्ठ बजे

गुरुद्वारे दे इक कर्मचारी नै असेंगी प्रसाद छक्कने लेई आक्खेआ। अस उट्ठे, हत्थ मूंह धोता ते इक कमरे इच चली गे। उत्थें त्रै-चार जातरु पैहलें गै बैठे दे हे। अस बी उन्दे इच बेही गे। उत्थें थालियें इच असेंगी दाल ते फुलके खाने की थोए। असें चार-चार फुलके खादे ते आइयै लेटी गे। हाल इच किश लोक होर बी आई गेदे हे। उन्दे इच किश दार्जिलिंग दे बी हे। उ'नें असेंगी दार्जिलिंग दे बारे इच मतियां गल्लां सनाइयां। ओह उत्थें व्यापार करदे हे। असें बी किश चिर गप्पां मारियां ते पही सेई गे।

कलकत्ता भ्रमण

10 सितम्बर गी मेरी जाग कोई चार बजे खुल्ली तां में खिड़की थमां बाहर झांकेआ। मिगी निक्की-निक्की लोऽ बझोई। लोकें दे चलने दी छेड़ बी सनोची। मिगी अपनी घड़ी उप्पर जकीन नेई होआ। दूए साधियें थमां पुच्छेआ तां उ'नें गलाया इत्थें लोऽ तौले हुन्दी ऐ ते सूरज बी तौले डुबदा ऐ। अस बी, तौले-तौले उट्ठे। न्हाते-धोते, कप्पड़े बदले ते सिड़कें उप्पर आई गे। साढ़ा अज्ज दा कार्यक्रम कलकत्ता दे म्हत्तवपूर्ण थाहरें दा दिग्दर्शन करना हा। असेंगी दस्सेआ गेआ जे अस अपनी जातरा मैट्रो दी सवारी थमां शुरू करचै। मैट्रो मिगी पैहली बारी दिक्खनी ही इस लेई पुच्छदे-पुच्छांदे बड़्ढा बज़ार कच्छ गै बने दे मैट्रो स्टेशन इच आई गे। उत्थें असेंगी केरल दे दऊं गभरु मिले। उ'नें साढ़ी मदद कीती। कलकत्ता दे मशहूर थाहरें दे अते-पते दस्से। मैट्रो आई तं अस उन्दे कन्ने गै सवार होई गे। साढ़ा मैट्रो दी सवारी दा पैहला अनुभव हा। अस मते प्रसन्न होए। उ'नें असेंगी इक थाहर उतरने लेई गलाया। अस उतरे। पता लगा जे महाकाली दा मंदर कच्छ गै ऐ। अस पैदल मंदर तोड़ी गे। सवेरे-सवेरे भीड़ किश घट्ट ही। इक हट्टी थमां असें प्रसाद लेआ ते मंदर चली गे। उत्थें बझोदा हा जे मंदर परिसर इच कोई निर्माण दा कम्म चला करदा ऐ। मंदर आहला थाहर बी काफी खुल्ला हा। माता दी मूर्त बी इक निक्के मंदर दे गर्भ-गृह इच ही। मूर्ति उ'यै जेही ही जिसदी में कल्पना कीती दी ही। मेरी कल्पना बी माता दे फोटु दे अनुरूप ही। पही में निक्के हुन्दे गै इक मन्त्र सुने दा हा-काली कलकत्ते आहली, तेरा बार न जाए खाल्ली...

मंदर मत्था टेकियै अस बाहर आए। असें आटो कीता ते उसी अलिपुर दे चिड़िया घर लेई जाने लेई गलाया। ओह असेंगी उत्थें पुजाई गेआ। असें

टिकटां लेइआं ते अन्दर चली गे। चिड़िया घर मता बड्डा नेई हा। में चंडीगढ़ जेहड़ा चिड़िया घर दिक्खेआ हा उस थमां निक्का हा। इत्थें बी शेर, चित्तेरे, बाघ, बन्दर, लंगूर, हाथी, घोड़े, सप्प बगैरा सब किश प्रदर्शित हे। इक नमीं चीज़ जेहड़ी में इत्थें दिक्खी ओह 'बन-मानुष' हा। उसदी शक्ल बन्दर कन्ने मिलदी ही पर ओह बन्दर थमां मता बड्डा हा।

अस चिड़िया घर थमां निकले ते फही रिक्शा कीता ते संग्रहालय दिक्खन आए। इत्थें असें मता किश दिक्खेआ, अस्त्र, शस्त्र, टल्ले, बन्धे, पांडुलिपियां, परानियां पोथियां मूर्ती, तस्वीरां ते पराने शिलालेख। उत्थुआं दा अस किश चिर लेई गांधी मदान इच बी गे। डॉ० बी. सी. राय दा भवन, हस्पताल ते किश होर इतिहासक इमारतां दिक्खियां। इत्थवां दा गाँधी मदान बी मता विस्तृत ऐ। अन्दाज़न इक लक्ख आदमी इत्थें समाई सकदे न। असें फही रिक्शा कीता ते विक्टोरिया मेमोरियल दिक्खने लेई चली पे।

विक्टोरिया मेमोरियल : एह भवन सन 1901 ई० इच रानी विक्टोरिया दे मरने दे बाद उन्दे चेत्ते इच तत्काली वाइसराय लार्ड कर्जन दी मर्जी दे मताबक बनाया गेआ हा। इसदे निर्माण लेई वाइसराय नै चन्दा इकट्ठा कीता। इसदे बनाने उप्पर इक करोड़ पंज लक्ख रपेऽ खर्च होए जेहड़े भारत दे राजें ते महाराजे थमां दान दे रूप इच हासल होए। एह स्मारक 64 एकड़ ज़मीन इच परिसीमत ऐ। एह भवन 338 फुट लम्मा ते 228 फुट चौड़ा ऐ। इसदा नीँह पत्थर 1901 इच रक्खेआ गेआ ते एह 1921 इच पूर्ण होआ जे जनता लेई खोलेआ गेआ। एह भवन सुन्दरता इच ताजमहल दा मुकाबला ते नेई करी सकदा पर फही बी इसदा सौंदर्य अलौकिक ऐ। एह भवन दो मंजिला ऐ। भवन दे अन्दर प्रवेश करदे गै ड्योढी कन्ने दऊं विथियां न। सज़्जी दा नांऽ प्रतिकृति वीथि ते खब्बी दा नांऽ राज वीथि ऐ। इसदे अगगे इक बड्डा हाल ऐ जिसगी रानी कक्ष गलांदे न। इसदै सज़्जै-खब्बे बेहड़े (प्रांगण) न। रानी कक्ष जां हाल दा दरवाजा टप्पियै अगगे जाओ तां पूर्व बक्खी दरबार हाल ते पच्छिम बक्खी रानी मेरी दा कक्ष ऐ। सीढ़ियां चढ़ो तां दूई मंजिल औंदी ऐ। उत्थें बी केई निक्के बड्डे हाल न जिन्दे नांऽ कलकत्ता कक्ष, प्रलेख गैलरी, बालकनी, उत्तर पोर्च कक्ष ते उत्तरपूर्वी बालकनी ऐ। इसदे बगीचे इच मूर्ति संग्रह ऐ। अस इत्थें कोई इक घैंटा रुके। असें दानिथेल कक्ष, रानी मेरी दा कक्ष, हेस्टिंग्स कक्ष

ते राष्ट्रीय नेताएं दी गैलरी मती पसंद आई। इत्थें गांधी, नेहरू ते टैगोर दे चित्तर मिगी मते आकर्शक बझोए।

तारा मंडल : असें पही रिक्शा कीता ते तारा मंडल दिक्खन गे। उत्थें अन्दर जाने लेई असेंगी टिकटां खरीदना पेइआं। अस अन्दर गे ते कुर्सियें उप्पर बेही गे। थोड़े चिर दे बाद न्हेरा जन पेआ ते तारा मंडल दा शो शुरू होई गेआ। खगोल सरबन्धी मेरा ज्ञान मता सीमत हा। पही बी वक्ता आकाश मंडल दी जेहड़ी जानकारी देआ करदे हे ओह मेरी समझा इस लेई नेई आई जे उन्दी भाशा बंगाली ही। एह शो बी कोई अद्धे घंटे दा हा। पही बी मता ज्ञानबद्धक हा। मिगी अन्तरिक्ष दे बारे इच केई नमियां जानकारीयां मिलियां।

उत्थुआं दा अस पूर्वी बंगाल सरकार दी कल्चरल अकादमी दिक्खन गे। जम्मू आह्ला लेखा इसदा परिसर भव्य नेई हा। एह कोई अट्ठ-दस कमरें तोड़ी गै सीमत ही। इत्थें बंगाली-भाशा दियां कताबां उपलब्ध हियां। में सारें थमां पैहले दफ्तर इच जाइयै एह जानकारी हासल कीती जे बेहरामपुर दा इन्दिरा गांधी फिल्म इन्स्टीच्यूट इक मान्यता प्राप्त संस्था ऐ जां नेई। उ'नें मिगी दस्सेआ जे उन्दी सरकार नै उसगी मान्यता प्रदान नेई कीती दी ऐ। बाकी दी सरकारें दा उ'नेंगी पता नेई ऐ।

अस अकादमी थमां बजार आई गे। उत्थें असेंगी इक सरदार जी लब्धे। में उ'नेंगी पुच्छेआ बड़डा बाजार गी केहड़ी बस जंदी ऐ। ओह खड़ोते, उ'नें असेंगी बस उप्पर ब्हालेआ ते अस पंज बजे गुरद्वारै पुज्जी गे। असें अपना थैल्ला चुक्केआ ते पैदल गै हाबड़ा पुल पार कीता ते रेलवे स्टेशन पुज्जे। अ'ऊं टिकट खिड़की अगें खड़ोता। भीड़ नेई दे बराबर ही। टिकट मिली ते अस जगननाथपुरी गी जाने आहली रेल दे साधारण डब्बें इच जाई बैठे। थोड़ा रश जरूर हा पर बौहने गी जगह मिली गई। साढ़े डब्बे इच गै हरियाणा दा बी इक परिवार बैठे दा हा। उन्दे किश रिश्तेदार बी उन्दे कन्ने हे। ओह कलकत्ता रौहन्दे हे। अस उन्दे कन्ने हिली-मिली गे। साढ़े कन्ने उड़िसा दा पुन्य चन्द्र प्रधान बी बैठे दा हा। ओह मणि जी पुर ग्रां दा हा। ओह बी टुट्टी-फुट्टी हिन्दी बोल्ली लैन्दा हा। मिगी गलान लगा-में आप के बेटे की शादी अपने गाँव की लड़की से करवा दूँगा तू मेरी शादी कश्मीर की लड़की से करवाना। उसदी गल्ल सुनियै अस सारे हस्सी पे। रस्ते इच किश आदिवासी बी चढ़े पर पुलीस नै

उन्दे कन्ने मता दुर्व्यवहार कीता। शैद उंदे कश टिकटां नेई हियां। इ'यां किश चिर अस रातीं सुत्ते जरुर पर गूढ़ी नींदर नेई पेई। सवेरे उट्ठे तां उड़िसा दे कटक शैहर थमां गुजरा करदे हे। रेल चलदी गई। अस खिड़की थमां उड़िसा दे खेत्तर, घर-मकान, लोक ते उन्दा लाबा दिक्खदे-दिक्खदे 11 बजे जगन्नाथ पुरी पुज्जी गे।

जगन्नाथपुरी : पुरी पुज्जदे गै असें सभनें थमां पैहले इक सरांस इच कमरा लैता। उत्थें समान रक्खेआ ते समुन्दर स्नान लेई चली पे। समुन्दर कच्छ गै हा। जिस बेल्लै अस उत्थें पुज्जे तां तट उप्पर मते घट्ट लोक हे। असें टल्ले खोहले ते न्हाते। साढ़े कश इक मल्लाह आया। ओह मेरे जागतै गी समुन्दर स्नान आसतै लेई गेआ। उसनै रबड़ दी इक पेटी उस दे लक्क बन्नी ते पही उसगी समुन्दर दे अन्दर कोई इक सौ मीटर लेई गेआ। समुन्दर दी भौड़े इच ओह कदें थल्लै ते कदें उप्पर तैरदा मिगी बझोआ। समुन्दर स्नान करियै अस अपने कमरे इच आए ते मंदर दर्शन करने गी गे।

जगन्नाथ मंदर : समुन्दर दे कंठै स्थित एह मंदर सन 1030 इच कलिंग विजेता चोड़गंगा नै विजय-स्तम्भ दे रूप इच बनोआया हा। पही 1118 इच इसगी इक मंदर दा रूप दित्ता गेआ।

एह मंदर उच्ची चार दीवारी कन्ने घिरे दा ऐ। इसदा बेहड़ा (प्रांगण) आयताकार ऐ। एह मंदर उसदे मझाटै ऐ। इसदी चहार दीवारी 440 फुट लम्मी ते 350 फुट चौड़ी ऐ। इस मंदर दे अगें-पिच्छें त्रीह दे करीब निक्के-निक्के देवालय न।

इस मंदर दी बनौट विशिष्ट ऐ। इसदे बाहरली परकोटे दी दीवारें दा घेरा त्रेहरा ऐ। इ'यां बझोंदा ऐ जे एह कन्धा नेई त्रै मालां न। मंदर दा परकोटा 665 फुट लम्मा, 640 फुट चौड़ा ते 20 फुट उच्चा ऐ। इसदे चौन्ने बक्खी ड्योढ़ियां न। जगन्नाथ मंदर दी लम्बाई 310 फुट चुड़ाई 80 फुट ऐ।

वास्तुकला दी दृष्टि कन्ने एह मंदर इक अनुपम कृति बझोंदा ऐ। इस दी योजना इच श्री देवल, जग मोहन, नट मंडप ते भोग मंडप नांस दे चार कक्ष न। इस मंदर दे शिखर दी ऊंचाई 200 फुट ऐ। शिखर दे आधार भाग इच ताख न जिन्दे इच मैथुन मूर्तियां रखी दियां न। इस मंदर दी बाहरली कन्धें

इच बी अश्लील मूर्तियां जड़ी गेदियां न।

इस मंदर दे गर्भ गृह इच बी कृष्ण, बलराम ते सुभद्रा दियां मूर्तियां अधिष्ठित न। एह मूर्तियां काठ दियां न। इ'नेंगी किश ब'रे बाद समुन्दर इच प्रवाहित कीता जंदा ऐ ते इन्दे थाहर नमियां मूर्तियां स्थापत कीतियां जंदिया न। किश विद्वान इस मंदर इच बौद्ध धर्म दी वज्रयान शाखा दा प्रभाव दिखदे न पर सच्च इ'यै बझोंदा ऐ जे एह इक वैष्णव मंदर ऐ। एह गल्ल बक्खरी ऐ जे नरसिंह जी दी मूर्ति दे उप्पर पंज ध्यानी बुद्ध दियां मूर्ता ते वाराह दी मूर्ति दे उप्पर दऊं ध्यानी बुद्ध दियां मूर्ता न। इ'यां गै बाहरले परकोटे इच बने दे देवालय इच लक्ष्मी दी मूर्ति दे पिच्छें बुद्ध दी मूर्ति बी रक्खी गेदी ऐ।

रथ जातरा दे दरान इसदी मैहमा होर बदधी जन्दी ऐ। इत्थें इक उत्सव जनेहा महौल बनी जंदा ऐ।

असें मंदर मत्थां टेकेआ, प्रसाद लैत्ता ते कमरे थमां झोला चुक्केआ ते अड्डे कच्छ आई गे।

कोणार्क मंदर : पुरी थमां अस मेटाडोर उप्पर चढ़े ते कोणार्क मंदर कच्छ उतरी गे। सड़क थमां गै में कोणार्क मंदर उप्पर दृष्टि सुट्टी, एह मंदर मिगी इक दिव्य-भवन बझोआ। सन 1956 इच में प्रभाकर कीती तां मेरे कोर्स इच जगदीश चन्द्र माथुर दा नाटक 'कोणार्क' बी हा। में ओह नाटक पढ़ेआ तां सोचेआ जीवन इच इक बारी अ'ऊं इस मंदर गी दिक्खन जरुर जांड। सन 1956 दा मेरा सुखना अज्ज 11 सितम्बर 1989 गी दपैहरी दे त्रै बजे पूरा होआ।

पुरी थमां 32 किलोमीटर दूर एह समुन्दर दे कच्छ सदियें थमां खड़ोते दा अपनी कला गी बखेरा करदा ऐ। एह इक सूर्य मंदर ऐ। सूरज दा इक नांड कोणार्क ऐ। इस लेई एह कोणार्क नांड कनै मशहूर ऐ। इसदा रंग काला ऐ इस लेई इसदा इक नांड 'काला पगोड़ा' बी ऐ। इस मंदर दा निर्माण सन 1238-64 दे च उड़िसा दे राजा नरसिंह देव पैहले नै करोआया हा।

इस मंदर दी योजना सूर्यरथ दे आकार दी ऐ-जिस इच सत्त अलंकृत घोड़े रथ गी खिच्चा दे न। रथ दे थल्लै दोनें पासें पत्थर दे कलात्मक बारां पेहिये बने दे न। हर पेहिये दी उच्चाई दस फुट ऐ।

एह मंदर 865 फुट लम्में ते 540 फुट चौड़े प्रांगण दे मझाटै इक चबूतरे उप्पर स्थित ऐ। एह इक उच्ची चार-दीवारी कन्ने घेरे दा ऐ। अन्दर प्रवेश लेई त्रै विशाल इयोढियां न। मंदर दी योजना इच चार कक्ष-देवल, जगमोहन, नट मंडप ते भोग मंडप समायोजित न। इसदा शिखर जमीन थमां 225 फुट उच्चा हा पर हुन धराशायी ऐ। इसदे गर्भ गृह दे अन्दर मनुक्ख आकार इच काले पत्थर दी बनी दी सूर्य दी मूर्ति संस्थापत ऐ।

अज्ज कल कोणार्क मंदर टुट्टी-फुट्टी हालत इच ऐ। इस मंदर दा मता हिस्सा ढेई गेदा ऐ ते मते शिलाखंड बिखरे दे लब्धदे न। इ'नें शिलाखंडें गी दिक्खियै बझोंदा ऐ जे एह मंदर कला दी पराकाष्ठा हा।

इस मंदर इच नृत्य करदी नर्तकियें दियां मूर्तां बी बड़ी सजीव बझोंदियां न। इक बाहरली कन्धै इच मतियां मैथुन मूर्तियां न जेहड़ियां संकेत करदियां न जे शक्ति पुरुश दा मिलन गै महा सुख ऐ। पर जेहड़ियां मूर्तियां मंदर दे अन्दर न उन्दे इच साखिकत दे भाव झलकदे न।

में कश्मीर दा मार्तंड मंदर दिक्खे दा हा। ओह बी इक सूर्य मंदर हा। अ'ऊं दोनें दी तुलना करन लगा तां मिगी बझोआ जे मार्तंड दा अपना बक्खरा म्हत्तव ऐ ते कोर्णाक दा अपना बक्खरा म्हत्तव ऐ। कोणार्क सचमुच कोर्णाक गै ऐ।

लिंगराज मंदर : कोर्णाक मंदर थमां अस बाहर आए तां असेंगी इक सरकारी टूरिस्ट गड्डी लब्धी। अस उस उप्पर बैठे ते लिंगराज मंदर दिक्खने गी चली पे। गड्डी नै असेंगी मंदर थमां दऊं किलो मीटर उरें तुआरेआ अस पुच्छदे-पुच्छांदे मंदर जाई पुज्जे। उसलै संजा दे छे बजा करदे हे।

में एह मंदर मती रूहानगी कन्ने दिक्खेआ। एह इक पूर्ण खड़ोते दा मंदर हा। इसदा निर्माण बी गलांदे न जे उड़िसा दे सूर्य वंशी राजें इक ज्हार साल थमां बी पैहले करोआया हा।

एह मंदर बी स्थापत्य दी दृष्टि कन्ने उत्कल शैली इच ऐ। इसदा प्रांगण 520 फुट लम्मा ते 465 फुट चौड़ा ऐ। मंदर प्रांगण दे मझाटै निर्मित ऐ। एह चार दीवारी कन्ने घेरे दा ऐ।

इस मंदर दी योजना उड़िसा दे दूए मंदरें आहला लेखा श्री देवल, जग मोहन, नर मंडप ते भोग-मंडप इच समायोजित ऐ। मंदर दी हर भुजा 56 फुट ऐ। इस इच थाहर-थाहर विक्षेपण बने दे न।

इस दा गर्भ गृह वर्गाकार ऐ। इसदी हर भुजा उनी फुट ऐ। इसदे अन्दर लिंग राज स्थापित ऐ। मंदर दे चौनें पाससै निक्के-निक्के स्तूप न। एह स्तूप बौद्ध-विहार दे स्तूपें कन्ने मते मिलदे-जुलदे न। इस मंदर दी अन्दरलियां कन्थां सादियां न। बाहरली कन्थै इच अलंकृत मूर्तियां बी हैन। एह उड़िसा शैली दी इक खास विशेषतां बी न। इस मंदर दा शिखर 125 फुट उच्चा ऐ। मंदर दे प्रांगण इच होर बी निक्के बड़डे देवालय बने दे न।

अ 'ऊं एह मंदर दिक्खियै मता प्रभावत होआ। गौरव ते शालीनता इच एह इक बेजोड़ रचना ऐ।

एह मंदर दिक्खियै अस मुड़ियै सड़क उपपर आई गे। इक बस पकड़ी। उस इच मता गै रश हा। धक्के खंदे जि 'यां-कि 'यां भुवनेश्वर दे अड़डे च आई पुज्जे।

ब्रहमपुर : हुन साढ़ी अगली मंजिल बेहरमपुर ही। पता कीता तां नाईट बस जा करदी ही। अस उससै बस उपपर बेही गे ते रातीं 12 बजे दे करीब उत्थै पुज्जे। बस अड़डे कच्छ गै अनार कली होटल हा। होटल खुल्ले दा हा। इक कमरे दा कराया 25.रुपेऽ हा। असें इक कमरा कराये पर लैता ते सेई गे। सवेरे उट्ठे, न्हाते-धोते, कपड़े बदले ते फिल्मी इन्स्टीच्यूट तुप्पन निकली पे।

इन्स्टीच्यूट बैंक कॉलोनी इच हा। अस उत्थें जाई पुज्जे। करीब दस बजे इन्टर्व्यू शुरू होई गेआ। उत्तर-भारत थमां मध्य प्रदेश दे रामपुर थमां इक जागत गै आए दा हा। किश जागत मणिपुर ते असम थमां बी आए दे हे। मते जागत उड़िसा दे गै हे। ओह हिन्दी फिल्में इच कम्म करने दे इच्छुक हे। मेरे जागतै दा इन्टर्व्यू 12 बजे दे करीब होआ। उत्थें मिगी मते लोक मिले जेहड़ें कला ते साहित्य कन्ने जुड़े दे हे। उन्दे इच इक प्रदीप कुमार होटुआ बी हा। ओह कोर्णाक कला केन्द्र कन्ने जुड़े दा हा। उसनै मिगी उड़िसा दे इतिहास, कला ते संस्कृति बारै मती जानकारी दित्ती। ओह गंजुम दा हा। इ 'यां उड़िसा दे

इतिहास दे बारे इच में 'मेहताव' दियां कताबां एम. ए. एम. कॉलेज जम्मू इच बी पढ़ी दियां हियां। मिगी गोपबन्धुदास दे कम्म दा बी पता हा।

अस इन्टर्व्यू थमां फारग होए तां बेहरामपुर बज़ार इच आई गे। एह इक निक्का शैहर हा। उधमपुर थमां बी मिगी निक्का बड़ोआ। उत्थें मिगी कपड़े दी हट्टियें इच सरदार बैठे दे लब्बे। अ'ऊं उ'नेंगी मिलन गोआ। उ'ने सनाया जे उन्दा इक पुरखा तलवंडी थमां फेरा लान इत्थें आया हा ते फही इत्थें बस्सी गोआ। एह हट्टियां उस्सै नै बनाईयां। अस उस्सै दे वंशज आं।

अस थोड़ा चिर बज़ार इच फिरे-टुरे ते फही बस अड्डे पर आए। भुवनेश्वर लेई बस तेआर ह्री। अस बस पर बैठे। उड़िसा दी मशहूर झील सुखनां में बस पर बैठे दे गै दिक्खी। उस इच मछुए चला करदे हे।

मेरे कन्ने बेहरामपुर दे इक कॉलेज दे प्रो० प्रधान बैठे दे हे। उन्दी लाड़ी बी टीचर ही। ओह कुसै जरूरी कम्म लेई भुवनेश्वर जा करदे हे। मेरा उन्दे कन्ने परिचे होआ तां ओह गलान लगे। तुसें उड़िसा इच किश होर दिन रुकना चाहिदा। इत्थें केई त्योहार हुन्दे न-फागुन इच महा शिवरात्रि, माघ इच माघ सतमी, जेठ म्हीनै शीतला-अष्टमी, बगैरा इत्थें सारा साल जातरां चलदियां न, ते मेले आयोजत हुन्दे न जि'यां जोरंडा मेला, स्नान जातरा, चेत्र पर्व, चन्दन जातरा, बगैरा। खास पूजा बी हुन्दियां न जि'यां गणेश पूजा, लक्ष्मी पूजा, धनु जातरा, सुलां जातरा, दुर्गा पूजा, विश्व कर्मा पूजा बगैरा, फही गलान लगे जे तुस दूरे बारी आगेओ तां पूरा उड़िसा दिक्खेओ, इत्थें जन-जातियें दे बी केई गढ़ न ते आदिवासियें दियां बी मतियां बस्तियां न। तुस कल्चर उप्पर कम्म करा दे ओ तां उ'नें बस्तियें इच बी जरूर जाएओ। में हां इच सिर ल्हाया। 180 कि०मी० दी जातरा दा पता गै नेई लगा। अस त्रकालें भुवनेश्वर पुज्जी गे। इक डोरमैट्री इच रात कट्टी। सवेरे भुवनेश्वर दा किश हिस्सा दिक्खेआ। सवेरे 11 बजे दे करीब लोहित गड्डी पर बैठे ते चेत्तें दे पटारे चुक्कियै 16 सितम्बर गी पैंथल पुज्जी गे।

3. गंगा सागर जातरा

मेरी पत्नी दी मर्जी गंगा सागर इच डुबकी लाने दी ही। ओह बार-बार इ'यै रट ला-होर तीरथ बार-बार, गंगा सागर इक बार। अपनी पत्नी दी मन्शा गी दिक्खदे होई में कटड़े जाइयै रेलवे काउंटर थमां द'ऊं टिकटां हासल कीतियां। मेरे प्रस्थान दी तिथ 5 फरवरी 2007 ही। अ'ऊं पैथल दा उस्सै दिन चार बजे संजा चलेआ ते 7 बजे रेलवे स्टेशन पुज्जी गेआ। असें हिमगिरि एक्सप्रेस उप्पर चढ़ना हा। उसदे प्रस्थान दा समां 22.45 हा। साढ़ी सीट दा नम्बर 65 ते 66 हा। रेल गइडी दस बजे दे बाद प्लेट फार्म उप्पर पुज्जी। असें अपने थैल्ले चुक्के ते अपनी बोगी-इच चढ़ी गे। फही असें अपने-अपने स्लीपर तुप्पे। कम्बल बिछाये ते लेटी गे। स्याला दे दिन हे। ठंड बी बझोआ करदी ही। अस तौले गै सेई गे। सवेरे जाग आई तां अस सहारनपुर बी लंघी गे दे हे। फही इक दे बाद इक मेरे दिक्खे दे स्टेशन आए। फही रात पेई सुते फही जागे। इक नमां स्टेशन आया मधुपुरी। एह जैनियें दा तीरथ हा। इसदा में मता नांऽ सुनेदा हा। अ'ऊं पैहली बारी कलकत्ता गेआ तां ओह दूआ रस्ता हा। मधुपुरी थमां अस कलकत्ता दे हाबड़ा स्टेशन उप्पर संजा चार बजे दे करीब पुज्जे।

स्टेशन थमां अस बाहर आए। टैक्सी पकड़ी। धर्म तलाऽ हाबड़ा थमां कोई 12 किलोमीटर दूर हा। असें हाबड़ा पुल टप्पेआ ते केई सड़कां पार करियै कलकत्ता शैहर दा अवलोकन करदे पंज बजे दे करीब धर्म तलाऽ पुज्जे। उत्थुआं दा असेंगी गंगा सागर लेई बस लब्धी गेई। जि'यां गै अस बस पर बैठे बस तौले गै चली पेई। कलींडर नै मेरे थमां दऊं सवारियें दा कराया 64 रुपेऽ लेआ तां में समझी लैत्ता जे गंगा सागर दूर ऐ।

धर्म तलाऽ थमां बस दक्खन बक्खी सिरकी। सड़क पक्की चौड़ी ही। रस्ते इच इक दर्जन थमां बी बद्ध उपनगर आए। बस बी थाहर-थाहर खड़ोती सुआरियां उतरियां ते चढ़ियां। उन्दे इच मते हिन्दी-भाशी बी हे। में बस इच

केई बंगाली युवकें कन्ने गल्ल कत्थ कीती। मिगी मती खुशी बझोई जे उ'नें सारें मिगी हिन्दी इच गै जवाब दित्ते ते कन्ने मेरा मार्ग दर्शन बी कीता।

मानव सेवा श्रम संघ आश्रम :-

राती नौ बजे साढ़ी बस नाम खाना ग्रां इच पुज्जी तां कलींडर नै असेंगी उत्थें तुआरी दित्ता। असें उत्थुआं दा रिक्शा कीता ते समुन्दर दे कंढै स्थित मानव सेवा श्रम संघ आश्रम जय नगर इच पुज्जे। उत्थें असें एक कमरा कराये पर लैता। उसदा कराया 250 रपेऽ रोज हा। असें कमरा मल्लेआ ते रूट्टी खान बजार चली गे। रस्ते इच असें होर बी केई गेस्ट हाऊस ते धर्मशालां दिक्खियां। उन्दा कराया मता घट्ट हा पर असेंगी बझोआ जे अस आश्रम इच मते सुरक्षत आं। इ'यां एह आश्रम कलकत्ता थमां 130 कि. मी. दूर हा। अस सवेरे उट्टे न्हाते-धोते, कपड़े बदले, थैल्ले चुक्के। असें समुन्दर दी जातरा स्टीमर उप्पर कीती। ठीक 7.30 बजे अस गंगा सागर खेत्तर इच पुज्जी गे। गंगा सागर गी सागर द्वीप बी गलांदे न। एह इक निक्के जेहा टापू ऐ। एह गंगा ते ब्रह्मपुतर दे डेल्टा दे दक्खन पच्छिम इच स्थित ऐ।

गंगा सागर :-

विश्व मानचित्र इच इसदी स्थिति 21.37 डिग्री थमां 57 उत्तर अक्षांश ते 88.2 डिग्री 113 पूर्व देशान्तर दे बिच्च ऐ। एह टापू 205 वर्ग किलोमीटर इच फैले दा ऐ। इस इच 43 ग्रां अबाद न जेहड़े 9 पंचैतें इच बंडोये दे न। सन 2001 दी जनगणना दे मताबक इस इच कुल 18536 लोक अबाद हे। इत्थें साक्षरता 90 प्रतिशत ऐ। जैदा लोक करसानी दा कम्म करदे न। धान इत्थूं दी खास फसल ऐ। कृपि योग्य जमीन 15544 एकड़ ऐ। अस स्टीमर थमां जिस जगह उतरे उसदा नांऽ कंचुवेड़िया हा। उत्थूं दा कपिल मुनि दा मंदर ग्रीह किलोमीटर दूर हा।

अस इक मेटाडोर उप्पर बैठे। ओह असेंगी लेइयै कपिल मुनि दे मंदर बक्खी चली। अज्जें सवेरे दे 7.30 गै बजा करदे हे। असेंगी सूरज दियां किरणां किश त्रिक्खियां गै बझोइआं। असें शीशे बंद कीते ते सरकियै बेही गे। तोले गै गासैं उप्पर खंदोले जन छान लगे ते ठंडी-ठंडी ब्हा बी चलन लग्गी। असें परतियै शीशे खोली लैत्ते ते बाहरले परिदृश्यें दा अवलोकन करन लगे। सड़क पक्की ही। सड़क दे कंढे केई निक्के बड़्डे ग्रां, हाट, बजार, घर कोठे हे।

हर कोठे दे कन्ने इक निक्का छप्पड़ जां तलाऽ हा। ओह उ'नें मछलियें लेई रक्खे दा हा।

ग्रांए दे नांऽ बंगला लिपि इच हे। अस उ'नेंगी छैल चाली पढ़ी नेई सक्के फही बी किश नांऽ जि'यां मंदर तलाऽ, फुलाडाची, कृष्ण नगर, नरहरिपुर, इन्द्र नगर, मनसा-द्वीप-ते कमलपुर दे नांऽ पट्ट पढ़ी लैते। पूरी सड़क इक किलोमीटर थमां बद्ध खाली नेई ही। इक ग्रां खत्म हुन्दा तां दूआ शुरू होई जंदा। हर ग्रां इच किश घर कच्चे ते किश पक्के हुन्दे।

असेंगी बझोआ जे पूरे टापू इच नालें दा इक जाल बिछे दा ऐ। इक बड़डा नाला बी लब्धा जेहड़ा बारातला नदी थमां निकलदा ऐ ते फही इसदी शाखां मते इलाके गी सैलाब करदियां न। इस टापू दे खेत्तरें इच धान, पान, तरमूर्ज ते नारकेल दी शैल फसल हुन्दी ऐ। करसान सब्जी दी खेती बी करदे न। इत्थूं दे बसनीकें दा लाबा बंगाली गै बझोंदा हा। आबादी रली मिली ऐ। 80 प्रतिशत हिन्दू ते 20 प्रतिशत दूए। पर बंगाली सारे बोलदे न। इत्थें 'सागर संगम' नांऽ दी पत्रिका मती प्रचलत ऐ। इसदा प्रकाशन इत्थूं दा गै हुन्दा ऐ। इसदे इलावा, उगोसत्या, सुन्दर मंगलम्, सागर बेला इत्थूं दियां स्थानी पत्रिका न। लोक पढ़ने दे मते शौकिन न। उ'यां इत्थें पढ़ी लिखी दी मतियां कुड़ियां दिक्खियां। जेहड़ी महिला लाल पलड़े दी सफेद साढ़ी पाइयै मेटाडोर उप्पर चढ़दी अस समझी लैंदे जे एह स्कूल दी अध्यापिका ऐ।

इक अध्यापिका नै दस्सेआ जे पूरे टापू इच इक डिग्री कॉलेज, छे हायर सैकेंडरी स्कूल, 13 माध्यमिक स्कूल ते 123 प्राइमरी स्कूल न। इस निक्के जे टापू इच शिक्षा दा प्रसार मिगी इक शुभ संकेत बझोआ।

गंगा सागर :-

अस मसां इक घंटा गै मेटाडोर इच बैठे। मेटाडोर बस स्टैंड उप्पर खड़ोती तां पता चलेआ जे अस गंगा सागर पुज्जी गे आं।

बस अड़डे थमां गंगा सागर कोई अद्धा किलोमीटर दूर हा, सागर तोड़ी पुज्जने लेई पक्की, सड़क दे सज्जै-खब्बै केई भवन ते मंदर हे। अस उ'नेंगी पार करियै समुन्दर दे कढै कच्छ पुज्जे। समुन्दर थमां उरें कोई त्रै सौ मीटर रेतला मदान हा। असें एह मदान पार कीता। माघ संक्रांति गी इस मदान इच इक भव्य मेला आयोजत हुन्दा ऐ जिस इच लक्खां बद्धे लोक देस ते बदेश

थमां हिस्सा लैन औंदे न।

असें एह मदान टप्पेआ जे समुन्दर दे कंठे जाई खड़ोते। साढ़े सामने इक विशाल ते विस्तृत समुन्दर हा। समुन्दर इच उसलै भौड़ा आवा करदियां हियां। मते यात्री समुन्दर तट टप्पियै पन्द्रां-बीह मीटर अगगे जाइयै स्नान करा करदे हे। किश समुन्दर दे तट कंठे कपड़े खोलियै न्होने दी तेआरी करै दे हे। इत्थें मरद ते जनानियें लेई कपड़े बदलने दी पूरी व्यवस्था ही। थाहर-थाहर परदे बने दे हे। लोक टल्ले बदलियै समुन्दर स्नान लेई जा करदे हे।

सागर द्वीप गंगा ते ब्रह्म पुर दे डेल्टा दे दक्खन-पच्छिम कंठे स्थित ऐ। इस लेई इत्थें दोनैं नदियें दे संगम दा पानी इक-मिक होई गेदा बझोंदा ऐ। इत्थें स्नान करने इच बी किश अनौखा मजा औंदा ऐ। अ'ऊं समुन्दर स्नान करियै बाहर निकलेआ तां में दिक्खेआ मेरी पत्नी स्नान करियै टल्ले बदला करदी ही। में टल्ले बदले तां इक परोहत होर मेरे कच्छ आई खड़ोते। उ'नें मेरे थमां पितरें दे नांs दा श्राद्ध करवाया, दक्खणा लैत्ती ते पही दूए जजमान पाससै चली गे। गंगा सागर दे पंडें इच में इक खासियत एह दिक्खी जे एह मते गै सैहन-शील न एह झगड़ालू नेई न। जजमान श्रद्धा कन्ने इन्दे हत्थ जे किश रक्खग एह स्वीकार करी लैंदे न।

अस इत्थें खड़ोते दे अजें समुन्दर दी लैहरें दा दक्ख दिक्खा गै करदे हे जे इक फोटो ग्राफर साढ़े कच्छ आइए खड़ोई गेआ ते गलान लगा-इक यादगारी फोटो, सिरफ पंजा रपेs। उसनै साढ़ा फोटो लैत्ता, असेंगी सौंपेआ ते पही नमें ग्राहक दी तपाश इच अगगे गी चली गेआ।

कपिल मुनि दा मंदर

अस समुन्दर तट थमां कपिल मुनि दे मंदर बक्खी आए। एह मंदर समुन्दर थमां कोई दो सौ मीटर दूर हा। में इत्थूं दा परतियै समुन्दर बक्खी दिक्खेआ। एह मिगी परतियै बड़ा रमणीक बझोआ। इसगी इ'यां 'बंगाल दी खाड़ी' बी गलांदे न। इसदे इक बक्खी हुगली नदी ते दूई बक्खी बारातला नदी गिरदी ऐ। बंगाल दी खाड़ी इच तरदे स्टीमर मिगी मते गै आकर्शक बझोआ करदे हे।

अस मंदर दे दर्शन करने गी मंदर परिसर इच आए। मिगी एह स्थापत्य दी दृष्टि कन्ने इक सधारण कोटि दा मंदर बझोआ। एह मंदर उप्परली दृष्टि

कन्ने नागर शैली इच बझोंदा ऐ। इसदे अन्दर प्रस्तर शिलाएं कन्ने निर्मित त्रै मूर्तियां न। मझाटै कपिल मुनि दी मूर्त ऐ। इसदे सज्जे गंगा माता दी ते खब्बे सागर राजा दी मूर्त ऐ। मंदर दे सामनै खुल्ला रेतला मदान ऐ जिसदा खी'रला छोर समुन्दर गी छूहन्दा ऐ। मंदर दे कन्ने गै पच्छिम बक्खी इक निक्का जेहो बजार ऐ जित्थें धार्मिक बस्तां प्रदर्शत न।

में इक बारी परतियै पूरे मंदर दा अवलोकन कीता तां मंदर दे अन्दर मिगी इन्द्रदेव, हनुमान ते शिव जी दी मूर्त बी लब्धी।

गलांदे न जे कपिल मुनि दा पैहला मंदर सन 430 इच रानी सत्य भामा नै बनोआया हा। सन 1885 इच एह मंदर समुन्दर इच विलीन होई गेआ तां सन 1961 इच सरकार दा दिक्ख-रिक्ख इच नमां मंदर बनेआ जेहड़ा सन 1973 इच समुन्दर इच समाई गेआ। नमां मंदर नागर शैली इच ऐ। इसदा संचालन अखिल भारती मंच रामानंदीय निर्वाणी अखाड़ा पास्सेआ कीता जंदा ऐ।

इस मंदर इच इन्द्रदेव की मूर्त रक्खने दे पिच्छे बी इक लोक-आख्यान ऐ। इन्द्र दी शरारत कन्ने गै राजा सागर दे सट्ठ जहार पुतर जां आक्खो सपाही मुनि कपिल दे कोप दा शकार होइयै भस्म होई गे हे जिन्दी मुक्ति लेई सागर दे पौत्र अंशुमान दे पुतर राजा दिलीप दे आत्मज भगीरथ नै तपस्या करियै गंगा गी मृत्यु लोक इच अवतरित कीता ते अपने पुरखें दी सद्गति गंगा सागर कीती जिस बजह कन्ने एह इक म्हान तीरथ दे रूपै इच सारे भारत इच परसिद्ध होआ। इ'यां वैदक साहित्य इच इस थाहर दा नांऽ गंगा संगम वर्णित ऐ।

अ'ऊं इस मंदर दे दर्शन करियै इक केफेटोरिया इच आया। उर्थें इक बंगाली विदवान हाजरा होर बैठे दे हे। मिगी पुच्छन लग्गे - 'कुत्थवां दे ओ' में उतर दित्ता - 'जम्मू-कश्मीर दे।' फही पुच्छन लग्गे 'तुसेंगी कश्मीर दे शैव मत दा ज्ञान ऐ।' में गलाया - 'थोढ़ा मता।' उ'में फही सुआल कीता- 'कपिल दे सांख्य दर्शन दी जानकारी ऐ' में गलाया -खास नेई। ओह किश हस्से ते गलान लग्गे - सांख्य दर्शन प्रकृतिवादी ऐ। कपिल दा एह आक्खना मनासव ऐ जे प्रकृति दी विकृति कन्ने जीव ते जगत दी सृष्टि हुंदी ऐ' एह जीव ते जगत अव्यक्त रूप इच प्रकृति इच स्थित न। इस लेई कपिल नै प्रकृति गी अव्यक्त गलाये दा ऐ।

ओह किश चिर रुके ते फही गलान लगे- प्रकृति दा पैहला नतीजा बुद्धि तत्व ऐ, इस लेई जेहड़ा सांख्य-दर्शन दा ज्ञाता ऐ ओह बुद्धि जीवी ऐ। ओह किश चिर चुप्प रेह ते बोले-कपिल दुनियां दे आदि विद्वान ते उपदेश्टा हे। उन्दा कोई गुरु नेई हा। उन्दा दर्शन अनुभव ते शुद्ध ज्ञान उप्पर आधारत हा। इत्थै औने दा उद्देश्य समुन्दर स्नान नेई कपिल दे ज्ञान सागर इच डुबकी लाना ऐ। में हाजरा हुन्दे कन्ने वादा कीता जे घर जाइयै अ'ऊं सांख्य दर्शन दा अध्ययन जरूर करड ते उंदे दर्शन गी समझने दा प्रयास करड। अ'ऊं हाजरा हुन्दे थमां विदा होइयै बस अड्डे उप्पर आई गेआ। में फही पूरे इस खेत्तर दा चक्कर लाया। में किश होर नमें भवन दिक्खे। इन्दे इच इक भारत सेवा-आश्रम संघ दा यात्री निवास हा। दूआ श्री श्री लक्ष्मी नारायण मंदर त्रि'या योगेन्द्र मठ चौथा ओमंकार नाथ यात्री निवास, पंजमा शंकराचार्य मठ, छेमां चिन्ता हरणेश्वर मंदर, सतमां श्री मत स्वामी कपिला नन्द सांख्य कुटीर आश्रम, अठमां मनानन्द कपिल - आश्रम हा, इन्दें इलावा इत्थें में वासुदेव मठ, सांख्यचार्य योग-आश्रम, रामकृष्ण मिशन, बल्लभाबाचार्य सनातन आश्रम, मोहा नन्द ब्रह्मचारी आश्रम, हनुमान मंदर, बल्लभाचार्य आश्रम ते श्री श्री लोकनाथ आश्रम हे। अस किश चिर गंगा सागर दे बजार इच घुम्मे-फिरे फही बस पर बैठे ते कचूबेड़िया आई गे। उत्थूं दा स्टीमर पकड़ेआ ते बस अड्डे आई पुज्जे। असेंगी तौले गै कलकत्ते लेई बस लब्धी गई। अस बस पर बैठे ते त्रकालें सत्त बजे कलकत्ता महाकाली मंदर दे बाहरले बजार इच पुज्जी गे। बस दे कंडेक्टर गी असें पैहले गै आक्खे दा हा। उसनैं असेंगी उत्थै तुआरी दित्ता।

महाकाली मंदर : कलकत्ता दे महाकाली मंदर दे दर्शन में सन 1989 इच अपने बड्डे पुत्तर नलिन कन्ने पैहलें बी कीते हे। ऐगती अ'ऊं अपनी पत्नी अनुसूया गी कन्ने लेइयै इत्थें पुज्जा। हुन इत्थें में मंती तबदीली दिक्खी। रातीं दा समां हा। भीड़ बी ही। पंडें दी मदद लैत्ती। ओह असेंगी मंदर दे अन्दर लेई गेआ। असें महा काली दे दर्शन कीते, मत्था टेकेआ ते बाहर आई गे। असें सड़क थमां इक टैक्सी पकड़ी ते हाबड़ा स्टेशन उप्पर पुज्जे। उत्थें असें इक एजेंट दी मदद कन्ने पुरी लेई दऊं स्लीपर रिजर्व कराए ते टिकटां लेइयै अस स्टेशन दे रेस्टोरेंट इच आए। उत्थै अस खा-पिया करदे हे जे साढ़ी मुलाकात इक महिला कन्ने होई। उसदा नांऽ नीलम शर्मा हा। ओह सिक्कम दे इक उच्च-अधिकारी दी पत्नी ही। ओह असेंगी इक बक्खरे कमरे इच लेई गई। उत्थै असें किश चिर विश्राम कीता। जि'यां गै पुरी दी ट्रेन प्लेट फार्म

इच खड़ोती। असें बी अपने थैल्ले चुक्के के ते अपनी बोगी इच बेही गे। पुरी लेई ट्रेन रातीं दे 10.35 उप्पर चली ते उसनै असेंगी दूरे दिन सवेरे दे अट्ट बजे दे करीव पुरी पुजाई दिता।

जगन्नाथ पुरी : अस पुरी दे स्टेशन थमां बाहर निकले तां मैडम नीलम होर साढ़े पिच्छे-पिच्छे आई गेइआं। ओ ए. सी. दे डब्बे इच हियां। उ'नेंगी लैन इक खास कार आई दी ही। उन्दे आक्खने उप्पर इक अफसर नै असेंगी बी कार उप्पर चाढ़ी लेआ। कार बाहरली सड़क इच वाक्या इक आलीशान गेस्ट हाऊस इच जाई रुकी। मैडम नीलम कन्ने अस बी अंदर गे। उत्थै असें काफी पीती ते मैडम हुन्दे थमां रुकसत लेई। उ'नें असेंगी मता आक्खेआ पर अस रुके नेई ते उससै कार उप्पर चढ़ियै मंदर दे मुख बजार इच आई गे। इत्थै असें 250 रपेऽ प्रति दिन दे स्हाबेन इक कमरा कराये पर लैता। असें कमरे इचै समान रक्खेआ ते समुन्दर स्नान लेई चली पे। अ'ऊं पैहले बी सन 1989 ई० इच पुरी आए दा हा पर हुन मिगी पुरी दे रंग ढग बक्खरे गै बझोए। बजार मता चौड़ा हा। मते नमें होटल सड़क दे कढ़ै बनी गे दे हे। में बजार इच इक बरात दा गमन बी दिक्खेआ। बराती पंजाबी पॉप दी धुनें उप्पर नच्चा करदे हे।

अस समुन्दर दिक्खन बी गे ते उत्थे न्हाते-धोते। पत्नी नै किश समान बी खरीदेआ। समुन्दर थमां सिद्धे मंदर आए। एह मंदर सन 1989 थमां मिगी मता बक्खरा-बक्खरा बझोआ। इत्थूं दी व्यवस्था बदली गेदी ही। मंदर दा अंदरला ते बाहरला रूप बदले-बदले दा बझोआ दा हा। खैर अस मंदर दे अन्दर गे। मत्था टेकेआ प्रसाद लैता ते परतोई आए। उस दिन अस पुरी इच मते फिरे-टुरे। रेलवे स्टेशन गे। बौद्ध गया जी दियां सीटां रिजर्व कराइआं ते परतोई आए।

9 फरवरी 2007 गी अस सवेरे-सवेरे तेआर होए ते इक बारी पही जगन्नाथ भगवान दे मंदर मत्था टेकन गे। भीड़ मंती नेई ही इस लेई तौले गै दर्शन होई गे। मंदर थमां अस अपने कमरे इच आए। समान चुक्केआ रिक्शा कीता ते रेलवे स्टेशन पुज्जी गे। गया जी लेई ट्रेन प्लेट फार्म उप्पर लग्गी दी ही। अस अपनी-अपनी सीटें पर बैठे। ट्रेन तौले गै चली पेई।

अ'ऊं ट्रेन इच बैठे दे सोचन लगा जे डुग्गर ते उड़िसा इच सांझियां गल्लां मतियां न। उड़िसा दे मंदर दा स्थापत्य डुग्गर दे क्रिमची दे मंदरें इच बी झलकदा ऐ। उड़िसा इच चन्द्रभागा नदी प्रवाहत ऐ ते डुग्गर इच बी चन्द्रभागा

प्रवाहत ऐ। केई इसगी हुन चिनाव दरिया बी गलांदे न। इत्थूं दी लोक संस्कृति ते डुग्गर दी लोक संस्कृति इच किश सांझां बी हैन। इत्थै बी सोमतीर्थ ऐ ते डुग्गर दे सुद्ध महादेव कश बी सोम तीर्थ ऐ। इत्थै बी अम्बुजानिज तीर्थ ऐ ते इस्सै नांऽ दा इक तीर्थ चनैनी कच्छ बी ऐ। उड़िया गी जि'यां पैहले बंगाली दी उप भाशा मित्थदे हे इ'यां गै डोगरी गी बी किश विद्वान पंजाबी दी उपभाशा मित्थदे हे। जि'यां गोप-बन्धु दास नै बंगाली ते उड़िया गी बक्खरी-बक्खरी भाशां सिद्ध कीता ठीक इ'यां गै प्रो० राम नाथ शास्त्री जी ते उन्दे साथियें डोगरी गी पंजाबी थमां इक बक्खरी सुत्तैतर भाशा सिद्ध कीता। जि'यां उड़िसा दी संस्कृति रंग-बिरंगी ऐ उ'यां गै डुग्गर दी संस्कृति बी रंग-बरंगी ऐ। इ'नें दोनें प्रदेशें दे तला ते उन्दियां अटारियां इक्कै जेहियां न। दोनें प्रदेशें दे लोक भोले-भाले न। जि'यां हरेकृष्ण मेहताव नै उड़िसा दा इतिहास लिखियै इस दी पंछान कराई इ'यां गै सुखदेव सिंह चाड़क होरें डुग्गर दे इतिहास गी उजागर कीता। अ'ऊं ट्रेन इच बैठे-बैठे दे अपने ते उड़िसा दे पिछड़े पन दे कारण तलाश करदा-करदा सेई गेआ। सवेरे त्रै बजे उट्टेआ तां साढ़ी ट्रेन गया जी पुज्जी दी ही। अस ट्रेन थमां उतरे ते फही विश्राम करने गी उत्थें गै कुर्सियें उप्पर बेही गे। अस सवेरे स्टेशन उप्पर गै न्हाते-धोते। रिक्शा पकड़ेआ ते फालगु नदी बक्खी चली पे।

बौद्ध गया : बौद्ध गया दी पैहली जातरा में सन 1991 इच कीती दी। एह मेरी दूई जातरा ही। अ'ऊं घर थमां चलेआ तां मेरी बड़्डी भैन पुष्पा नै मिगी निर्देश दित्ता जे अ'ऊं बौद्ध गया जाइयै माऊ-बब्बे ते पितरें गी पिण्ड दान जरूर करां। अस फालगु नदी पुज्जे तां जम्मू दे पंडा होर मिली गे। उ'नें मेरे थमां पिण्ड-दान करोआया ते फही ओह मिगी दाढ़ी आहले मुख पंडे दे घर लेई गे उत्थें उ'नें मेरा नांऽ लिखेआ, दक्खना लेई, शीर्वाद दित्ता ते फही मिगी फारग कीता।

पण्डे हुन्दे घर थमां निकलियै अस सिद्धे बोध गया मंदर दिक्खन चली गे।

बौद्ध मंदर : पुराने बौद्ध मंदर दे अवशेशें गी आकार मित्थियै वर्तमान बौद्ध गया मंदर 50 फुट चौड़े ते 20 फुट उच्चे इक चवूतरे उप्पर निर्मित ऐ। इसदा शिखर शूंडाकार ते भव्य ऐ। इस इच केई मंजिलां न। हर मंजिल इच तौकड़ें दियां पंक्तियां न। गलांदे न जे कदें इ'नें तौकड़े इच बुद्ध दियां मूर्ता

हियां। हुन एह तौकड़े खाल्ली न। शिखर दे उप्पर इक छत्र ऐ। इस मंदर दा शिखर 165 फुट्ट उच्चा ऐ। शिखर दे अग्र-भाग इच रोशनी लेई इक लम्मी खिड़की ऐ।

मंदर दा मुख प्रवेशद्वार पूर्व बक्खी ऐ। इसदी पैहली मंजिल इच जाने लेई इक सीढ़ियें दा रस्ता ऐ। मंदर दे चौंनै बक्खी चहार दीवारी ऐ। मंदर दे उत्तर इच इक बिहार ऐ। दक्खन इच इक अलंकृत तोरण ऐ। इसदे गर्भगृह इच महात्मा बुद्ध दी इक उच्ची खड़ोती दी मूर्त ऐ।

इस मंदर दे चबूतरें कन्ने गै बोद्धी वृक्ष दी नमीं पोंगर ऐ जिसदे बारे इच गलांदे न जे महात्मा बुद्ध गी बौद्ध हासल होआ हा।

इ'यां गलांदे न जे इत्थै पैहला बौद्ध मंदर उपगुप्त दे आक्खने उप्पर अशोक नै बनोआया हा। उसनै इस दा नांs बोधि गृह रक्खेआ। बोधि गृह दी छत खुली ही, इसदे अन्दर बोधि मंडप हा उसदे सामनै चार अर्द्ध स्तम्भ हे। बोधि मंडप दे पिच्छें बोधि वृक्ष हा जिसदे टाल्ले गासैं अल्ल फैले दे हे। अशोक दे बाद लंका दे राजा मेघ वर्मन नै इत्थै इक बौद्ध विहार बनोआया हा। किश विद्वान एह बी गलांदे न जे इस मंदर दा निर्माण बंगाल दे राजा शशांक नै करोआया हा। किश बी हा, पर एह मंदर सदियें थमां बौद्ध स्मारक दे रूप इच विश्व परसिद्ध ऐ, एह बिहार राज्य दे गया शैहर थमां 8 कि०मी० दक्खन इच ऐ।

असैं 'बौद्ध गया इच अलग-अलग देसैं दियां अलग अलग शैली इच इमारतां दिक्खियां। केई पवित्तर सरोवर दिक्खे। मंदर बी दिक्खे।

पही अस बस अड्डै आए। उत्थै असेंगी किश देशी ते विदेशी पर्यटक लब्धे जेहड़े नेपाल जातरा दी जानकारी लै करदे हे। मिम्मी नेपाल जातरा दा मन बनाया। नेपाल जाने लेई पटना थमां बस पकड़नी ही। में गया जी थमां पटना दी बस पकड़ी। बस इच गै मिगी इक पत्रकार रीतेश राज मिले। उ'नै मेरा मार्ग दर्शन कीता। अ'ऊं रातीं अट्ठ बजे पटना दे नमें बस अड्डै पुज्जा। उत्थूं दा गै में नेपाल जातरा शुरू करनी ही।

०००

4. काठमंडु जातरा

में नेपाल जातरा पटना दे नमें बस अड्डे थमां शुरु कीती। मिगी एह दस्सेआ गेआ जे पटने थमां काठमंडु लेई कोई सिद्धी बस उपलब्ध नेई ऐ। मिगी रक्सौल दी बस पकड़ियै जाना पौग। में रक्सौल लेई दऊं टिकटां लेईआं। कराया इक सौ रपेऽ प्रति सवारी हा। अस जिस बस इच बैठे उसदा नांऽ रत्न-रथ हा। इ'यां अड्डे उपपर में रथ नांऽ कन्ने होर बी मतियां बसां दिक्खियां। ओह बक्खरे-बक्खरे थाहरें लेई खाना होआ करदियां हियां।

अ 'ऊं रत्नरथ उपपर बैठा तां में पूरी बसै दी सवारियें उपपर नजर दौड़ाई। किश स्थानी, किश, दूए प्रदेश दियां ते किश बदेशी सवारियां हियां। बस दियां सीटां अरामदायक हियां। मिट्ठी-मिट्ठी ठंड बी ही। असें अपने-अपने झोलें चा कम्बलियां कड्डियां ते उपपर लेई लैतियां।

ठीक नौ बजे रत्नरथ नै भोंपो बजाया। ड्राइवर अपनी सीट उपपर बेही गेआ। कंडेक्टर नै सिटी बजाई ते बस चली पेई। बाहर न्हेरा हा। बिजली दे बलदे लाटुएं थमां असें एह लाना लाई लेआ जे अस अज्जे पटना शैहरं इच गै घुम्मा करने आं। पही अस शैहर थमां बाहर आए। बाहर न्हेरा गुप्प हा। कुदै-कुदै बिजली दे लाटुएं दी लोऽ लगदी तां समझी जंदे जे कुसै बस्ती थमां लंघा करने आं। खी'र सवेरे दे पंज बजे साढ़ी बस रक्सौल पुज्जी। रक्सौल भारती सीमा इच हा। इसदे अगें इक दरिया हा। इस उपपर लम्मा पुल हा। पुल थमां गै नेपाल शुरु होई जंदा हा। असें इक टांगा कीता। असें हुन वीरगंज जाना हा। काठमंडु लेई असेंगी उत्थूं दा गै बस थोनी ही।

वीरगंज : अस टांगे पर बैठे तां टांगा चली पेआ। टांगा पुल दे बशकार पुज्जा तां नेपाली पुलस नै उसी रोकेआ पर टांगे आह्ला नेई रुकेआ। उसनै जोरै कन्नै आक्खेआ-‘तीरथ जातरी’। पुलस आहले डंडे गै मारदे रेह ते ओह

असेंगी वीरगंज इक ट्रेवलिंग एजेंसी दे दफ्तर इच छोड़ी गोआ। उसनै साढ़े थमां इक सौ बीहू रपेऽ कराया वसूलेआ।

वीरगंज थमां काठमंडु 285 किलोमीटर दूर हा। में ट्रेवलिंग एजेंसी थमां काठमंडु लेई दऊं टिकटां लेइआं ते किश भारती करेंसी दे बदलै नेपाली करेंसी बटाई। उसनै खरी कमीशन लैत्ती।

अट्ठ बजे इक मैटाडोर आई। ट्रेवलिंग एजेंट नै असेंगी उस उप्पर ब्हालेआ ते आपूं चली गोआ। मैटाडोर किश दूर अगें चलियै खड़ोई गई। अगें इक निक्का शैहर हा। उत्थूं दा होर सवारियां चढ़ियां तां मैटाडोर चली पेई। इ'यां भारत थमां नेपाल जाने लेई सत्त प्रवेश द्वार न जि'यां - काकडभिट्टा, विराटनगर, वीरगंज, सुनौली, नेपालगंज, धनगढ़ी ते महेन्द्रनगर। असें नेपाल इच वीरगंज थमां प्रवेश कीता। नेपाल जाने लेई पासपोर्ट जां वीजा लैने दी लोड़ नेई ऐ इस लेई भारत दे लोक नेपाल ते नेपाल दे लोक बेरोकटोक इक दूए दे देश औंदे रौहन्दे न।

अस वीरगंज थमां चले तां तराई खेत्तर थमां लंघे। एह पूरा खेत्तर असें -गी अपने नेहा गै बझोआ। इस खेत्तर दे लोकें दी रहैत-बैहत, खान-पीन इत्थें तोड़ी जे भाशा बी हिन्दी ऐ। इ'यां सारे लोक नेपाली बोलदे ते समझदे न। नेपाली दी लिपि देवनागरी ऐ इस लेई जगहें ते थाहरे दे नांऽ-पट्ट पढ़ने इच दिक्कत नेई औंदी। कोशी, कण्डकी, ते कर्णाली इस खेत्तर दियां मुख नदियां न। सड़कां खुल्लियां न। इस लेई यातायात दी समस्या नेई ऐ।

अस वीरगंज थमां चले दे संजां 5 बजे कलंकी पुज्जे। अस उत्थै गै उतरी गे। असें इक होटल इच कमरा कराये पर लैत्ता। रातीं दी रुट्टी खाइयै अस सेई गे।

10 फरवरी 2007 गी अस न्हाई धोइयै तेआर होए ते पशुपति नाथ मंदर दे दर्शन करने गी होटल थमां बाहर आए। सड़क उप्पर इक मेटाडोर खड़ोती दी ही। अस मेटाडोर उप्पर चढ़े ते ओह असेंगी काठमंडु दे मुख बस अड्डे तोड़ी लेई आई। अड्डे थमां अस रिक्शा लेइयै पशुपति नाथ मंदर परिसर इच पुज्जे।

श्री पशुपति नाथ मंदर :- पशुपति नाथ मंदर इच प्रवेश लेई दऊं रस्ते न। इक पच्छमी द्वार ऐ ते दूआ पूर्वद्वार ऐ। किश लोक पूर्व द्वार थमां ते किश पच्छमी द्वार थमां इस मंदर दे परिसर इच दाखल हुन्दे न। जेह्ड़े पूर्व द्वार थमां औंदे न ओह् पैहले बागमती नदी दे आर्यघाट इच स्नान करदे न ते फही मंदर इच प्रवेश करदे न। पूर्व द्वार थमां औने आहले तीरथ जातरी पैहले नन्दी दे दर्शन करना अशुभ मित्थदे न ओह् पैहले पशुपति नाथ दे ते फही नंदी दे दर्शन करदे न।

अस पच्छमी द्वार थमां मंदर परिसर इच गे। असें पैहले नंदी दे गै दर्शन कीते। नंदी इक चबूतरे दे उप्पर बैठे दे लब्भे। नंदी दा रंग सुनैहरा हा। एह् पित्तल दा हा ते इस उप्पर सुन्ने दा पानी चढ़े दा हा नेपाल इच एह् सारें थमां बड़्डी नन्दी दी प्रतिमा ऐ। इस प्रतिमा दे कनें गै सज्जे पाससै डेढ मीटर उच्ची हनुमान दी मूर्ति ऐ।

भगवान् श्री पशुपति नाथ दा मंदर इक विशाल प्रांगण दे मझाटै स्थित ऐ। एह् पगोड़ा शैली इच बने दा दऊं मंजिला मंदर ऐ। इसदी छत दी चादरें उप्पर सुन्ने दा पानी चढ़ाया गेदा ऐ।

मंदर दा कलश बी सनैहरी ऐ। शिखर इच डमरु ते त्रिशूल जोड़े गेदे न।

एह् विशाल मंदर इक मीटर ऊँचे चबूतरे उप्पर बने दा ऐ। मंदर दे चौनें पाससैं श्री पशुपति नाथ दी मूर्ति दे सामनै चार दरवाजे न। एह् चांदी दी परतें कने मड़ोए दे न।

मंदर दे अन्दर गर्भगृह इच श्री पशुपति नाथ लिंग ऐ। इसदे पंज मूँह न। चार मूँह चौनें दिशाएं इच न ते पंजमां मूँह उप्पर-बकखी ऐ। उप्परला मूँह इशान ते दुए मूँह साकार रूप इच न। हर मूँह दे सज्जे हत्थै इच रुद्राक्ष दी माला ते खब्बे हत्थै इच कमंडल ऐ।

श्री पशुपतिनाथ लिंग दे दक्खन दिशा आहले मूँह गी अघोर मुख गलांदे न। एह् शिव दा संहारकारी रूप ऐ। पूर्व मुख गी तत्पुरुष गलांदे न। एह् शिव दा लोक कल्याणकारी रूप ऐ। उत्तर मुख गी अर्ध-नारीश्वर रूप गलांदे न।

एह मूंह सृष्टि दा प्रतीक ऐ। शिवलिंग दे चौथे मूंहें गी सद्योजात गलांदे न एह सौम्यता दा प्रतीक ऐ। इस लिंग दे उप्परी हिस्से गी इशान मुख गलांदे न। एह निराकार दा प्रतीक ऐ। श्रद्धालु पशुपतिनाथ लिंग दे पंजे रूपें दे दर्शन करदे न। इस मंदर दे अन्दर केई काष्ठ स्तम्भ बी बने दे न जिन्दे इच देवी-देवतें दियां मूर्ता उत्कीर्ण न। इत्थें यौन मूर्तियां बी हैन जेहिङियां सृष्टि संचालन दा प्रतीक न। पशुपतिनाथ मंदर दे दर्शन करियै अस वासुकी नाग मंदर गे। एह मंदर बी पशुपति नाथ मंदर नेहा गै ऐ। इसदे गर्भगृह इच भगवान वासुकी नाग मानव शक्त इच पद्मासन लाइयै बैटे दे लब्धदे न। मूर्ति दे उप्पर शेशनाग दा फण फैले दा ऐ।

इसदे बाद असें लाल गणेश, श्री सूर्य नारायण मंदर, बी दिक्खे। इत्थें भृगी, बूढ़ा नील कंठ, मृगेश्वर, विरुपाक्ष, सरस्वती माता, सन्तानेश्वर महादेव, भगवान कृष्ण, कृतिमुख भैरव, शीतला माता, चौसट्टी लिंग, उन्मत्त भैरव, नवदुर्गा, सत्यनारायण दे दर्शन बी श्रद्धालु करदे न। अस गौरी घाट बी गे ते उत्थें असें माता श्री वत्सला, जय मंगला, राज राजेश्वरी, भस्मेश्वर दे दर्शन बी कीते।

बौद्ध चैत्य :-असें पशुपति नाथ मंदर थमां रिक्शा कीता ते चावहिल बजार कश स्थित बौद्ध चैत्य दिक्खन आए। इत्थें मिगी मते विदेशी लब्धे। इन्ना मेला में पशुपति नाथ मंदर नेई दिक्खेआ जिन्ना इत्थें हा। एह चैत्य दुनियां दे सारे थमां बड्डे चैत्यें इच इक ऐ। इस चैत्य दा निर्माण लिच्छवि राजा मानदेव नै पंजमीं सदी इच कीता हा। इत्थें में बौद्ध धर्म कन्ने जुड़े दे केई अवधान दिक्खे। बौद्ध स्तूप, गुम्पा ते बौद्ध विद्यालय दर्शनीय न। एह चैत्य दिक्खियै मिगी बझोआ जे नेपाल इच बी बौद्ध धर्म दा मता प्रभाव रेहा होग।

इ'यां गै बागेश्वरी मंदर थमां किश अगें बुद्ध दा इक विशाल चैत्य ऐ। इसदा निर्माण लिच्छवी राजा धर्मदेव नै करवाया हा। इत्थें पद्ममणि बोधि सत्व दी मूर्ति ऐ जिसदा निर्माण काल छेमी सदी मिथेआ जंदा ऐ।

बौद्ध चैत्य दिक्खियै अस काठमंडु घुम्नन-फिरन निकले। उत्थें मैटाडोरां आम लब्धदियां न। साथ बी लब्धी जन्दा ऐ। उत्तर-भारत दे मते लोक इत्थें

मिली जंदे न। अस बी उन्दे कन्ने फिरे टुरे। असें रत्नपार्क दा इक चक्कर बी लाया। पार्क दे मझाटै जेहड़ा तलाऽ बने दा ऐ ओह मिगी मता आकर्शक बझोआ।

इत्थें इक खुला मदान ऐ ते मदान इच गोल आकार दा खुल्ला मंच ऐ। इत्थें असें माओवादियें गी लाल झंडे पकड़ियै प्रदर्शन करदे दिक्खेआ।

गौरीघाट, किरातेश्वर महादेव ग्रहेश्वरी, गोरखनाथ मंदर, राम मंदर, वत्सला मंदर, राज राजेश्वरी मंदर बी अस दिक्खी बैठे दे हे। अस समां गुजारने लेई काठमंडु दे किश बजारे इच गे। उत्थें वदेसी वस्तुएं ते कपड़ें दे मते भंडार हे। अस स्वदेशी चीजां गै पसंद करने आं इस लेई असें खरीद फरोख्त नेई कीती।

मिगी नेपाल ते भारत इच कोई बक्खरापन नेई बझोआ। दोनें दी संस्कृति जीवन शैली, दर्शन, सोच इक्कै ऐ। सिरफ उत्थूं दे लोकें दी भाशा नेपाली ही। पर हिन्दी सारे समझी लैंदे हे।

अस फिरे टुरे ते त्रकालां पौने थमां पैहले-पैहले कलंकी आई गे। असें टिकटां पैहले गै लेई लैती दियां हियां। इस लेई थैल्ले चुक्के ते बस अड्डै आई गे।

असें बस पकड़ी ते सवेरे-सवेरे नेपाली सीमा इच बसे दे भैरहवा शैहर इच उतरे। उत्थूं दा सीमा पार कीती ते सुनौली पुज्जी गे। सुनौली थमां असें गोरखपुर दी बस पकड़ी ते बारां बजे दे करीब गोरखपुर पुज्जे। असें गोरखपुर दी सैर रिक्शा उप्पर बेहियै कीती। फही अस रेलवे स्टेशन पुज्जे। टिकटां गोरखपुर लुधियाना ट्रेन दियां सधारन डब्बे दियां थोइआं। जि 'यां कि 'यां अन्दर बड़े ते दिल्ली थमां होंदे दूऐ ध्याड़ै लुधियाना ते फही लुधियाने थमां जम्मू ते जम्मू थमां पैंथल 13 फरवरी 2007 गी पुज्जे।

मिगी एह जातरा मती रमणीक ते सुख-भरोची बझोई।

5. मुम्बई जातरा

(जम्मू थमां दिल्ली-आगरा-मुम्बई ते गोवा)

सन 1969 इच (जम्मू थमा दिल्ली, आगरा-मुम्बई ते गोवा) मेरा नम्बर बी.टी. दी ट्रेनिंग लेई आया। उ'नें दिनें पूरे जम्मू प्रान्त इच इक्कै सरकारी बी.टी. कॉलेज हा। मैहकमा तालीम पाससेआ गै सरकारी खर्च उप्पर ट्रेनिंग करने दा प्रावधान हा। अस ट्रेनिंग बी करदे हे ते तनखाह बी लैंदे हे। इ'यां सरकार नै साढ़े थमां बांड फार्म भरवाये दा हा जे अस निश्चत अवधि थमां पैहले सरकारी नौकरी नेई छोड़गे।

इस ट्रेनिंग दरान प्रशिक्षण लै करदे टीचरें गी इक एजुकेशन टूर (शैक्षिक जातरा) उप्पर बी लेत्ता जंदा हा। पर एह टूर सारें लेई कम्पलसरी (अनिवार्य) नेई हा।

दिसम्बर म्हीनै साढ़े कॉलेज दे नोटिस बोर्ड उप्पर इक नोटिस लगाा जे जेहड़े अध्यापक विद्यार्थी टूर उप्पर जाना चाहंदे न ओह अपने नांऽ फलानी तरीक तोड़ी देन। नोटिस मिम्मी पढ़ेआ ते मेरे साथियें बी पढ़ेआ। उ'नें दिनें साढ़े इच नेह अध्यापक मते घट्ट हे जि'नें दिल्ली दिक्खी दी ही। साढ़े मन इच इक बक्खरी गै उमंग ही जे अस अपने देशै दी राजधानी दिल्ली दिक्खन जा करने आं, आगरा ताज मैहल दिक्खन जा करने आं, मुम्बई समुन्दर दिक्खन जा करने आं।

खैर प्रस्थान दी तरीक 25 दिसम्बर ही। कुल 80 विद्यार्थियें दे नांऽ आए दे हे। इन्दे इच 50 मर्द ते 30 महिला डियां। आदेश दे मताबक अस सारे सवरे दे 10 बजे कॉलेज ग्राऊंड इच हाज़र होई गे।

उ'नें दिनें बी.टी. दा कॉलेज नमें सेक्रेटिएट दे पिच्छे हा। इस कन्ने गै

वी.ई.सी. दा स्कूल हा। कॉलेज पाससेआ साढ़े कन्ने प्रो० ओम प्रकाश बड़ ते प्रो० सुदर्शन मल्होत्रा हे। कुड़ियें कन्ने प्रो० राम प्यारी खजूरिया होर हियां। इन्तजामी अफसर महेन्द्र शर्मा हे जेहड़े आडियो-विडियो सेक्सन दे इन्चार्ज हे।

असेंगी लैन दऊं बसां आई दियां हियां। असेंगी हुक्म होआ, अस बक्खरी-बक्खरी बसें पर बेही गे। उ'नें दिनें रेल पठानकोट थमां चलदी ही। बसें थमां अस उतरे ते रेलवे स्टेशन दे अन्दर चली गे।

साढ़े लेई इक बक्खरी बोगी रिजर्व ही। जि'यां गै ट्रेन प्लेट-फार्म उप्पर खड़ोती, अस बोगी इच चढ़ी गे। केइयें गी सीटां लब्धी गेइआं केई थल्लै कंबल बछाइयै बेही गे।

रातीं रेल चली तां साढ़े मनै इच मता उत्साह हा। दिल इ'यां उच्छली उच्छली जरदा हा। अस दिल्ली जा करने आं। राजधानी दिक्खन जा करने आं, उत्थै जां करने आं जित्थै देशै दा प्रधान मंत्री रौहन्दा ऐ, राष्ट्रपति रौहन्दा ऐ।

साढ़े मते साथी रुट्टी खाइयै सेई गे ते किशं खराड़े बी मारन लग्गी पे पर मिगी नींदर नेई आई। अ'ऊं बारी आहली सीट कन्ने बेहियै रेलवे-स्टेशन दे नांऽ पढ़दा गेआ, जालन्धर, लुधियाना, अम्बाला, कुरुक्षेत्र। में कुरुक्षेत्र दा नांऽ पढ़ेआ तां मेरे सरकंडे उभरन लगे। एह ते उ'यै थाहर ऐ जित्थै महाभारत होआ हा। कृष्ण नै गीता दा उपदेश अर्जुन गी दित्ता हा। फही लड़ाई होई ही। अति भयंकल लड़ाई। कौरवें ते पांडवें दी लड़ाई। कृष्ण पांडवें दे हित-चिंतक हे इस लेई जित्त पांडवें दी होई। मिगी कुरुक्षेत्र थमां लंघदे लड़ाई दे काल्पनिक दक्ख इक-इक करियै लब्धन लगे।

गड्डी अगगे बधी तां मेरा ध्यान गीता प्रवचन बक्खी गेआ। मिगी चेता आया कृष्ण दा ओह उपदेश जेहड़ा उ'नें जुद्ध विमुख अर्जुन गी दिन्दे गलाया हा-एह आत्मा अजर-अमर ऐ। इसगी नेई अगग फूकी सकदी नेई तलवार कट्टी सकदी। एह सिरफ शरीर बदलदी ऐ। इ'यां गै जि'यां अस कपड़े बदलने आं। में फही सोचेआ जे मेरी आत्मा बी अजर अमर ऐ। अ'ऊं महाभारत जुग इच बी हा, बुद्ध काल इच बी हा, मौर्य-काल इच बी हा ते मुगल काल इच बी हा। पर मेरे रुप बक्खरे-बक्खरे हे। कदें अ'ऊं जोद्धा हा, कदें शायर हा, कदें

सन्यासी हा। मेरे काल बक्खरे-बक्खरे हे, शरीर बक्खरे-बक्खरे हे पर आत्मा
इक गै ही।

ट्रेन अगें बधी तां अ'ऊं ख्यालें दी दुनियां थमां छुड़केआ ते सोने दा
जतन करन लगा। पर नींदर नेई आई। फही सीट उप्पर बेही गोआ। फही स्टेशनें
दे नांऽ लाटु दी लोई इच पढ़न लगा। इक होर नांऽ आया-पानीपत। मेरे दमाग
इच परतियै खोदल पेई। मिगी बझोआ जे इत्थै मारो-मारी होआ करदी ऐ।
बन्दूकें, तोपें दी गड़गज्ज पेई दी ऐ। घोड़े ते हाथी दौड़ा करदे न। कोई
करलादा-पकड़ो। मारो मिगी बझोआ मिम्मी इस लड़ाई इच हिस्सा लैता हा
ते लड़दे शरीर छोड़ेआ हा पर मेरा शरीर मरेआ, अ'ऊं नेई मरेआ। अ'ऊं कल्ल
बी हा, अज्ज बी आं ते में अगें बी रौहना। बस सोचदे-सोचदे मिगी नींदर
आई गई। सवैरे उठेआ तां लोऽ होई गेदी ही। मेरे साथी तेआर होआ करदे
हे, अज्ज असें दिल्ली दी सैर करनी ही।

दिल्ली दी सैर :-असेंगी लैन इक ट्रेवलिंग एजेन्सी दियां दऊं बसां
आईआं। उन्दे कन्ने इक गाइड बी हा। अस दस बजे बसें उप्पर बैठे ते सारें
थमां पैहले लाल किला दिक्खन गे।

लाल किला :-अस बसू थमां उतरे ते गाइड दे पिच्छे-पिच्छे चले।
गाइड इक बड़्डे दरवाजे दे मंझाटे खड़ोई गोआ ते फही असेंगी सम्बोधित करदे
गलान लगा :- सुनो! मेरी गल्ल ध्यान कन्ने सुनो। एह लाल किला शाहजहाँ
नै अपने शासन दे दसमें साल बनाने दा हुक्म दित्ता हा। एह यमुना नदी दे
कंठे उप्पर ऐ। इस किले दे दऊं दरवाजे न इक लहौरी दरवाजा ते इक दिल्ली
दरवाजा। दरवाजे कन्ने जेहड़ा बजार ऐ इसगी मीना बजार गलांदे न। हुन मेरे
कन्ने चलो। अगगे दीवाने-आम ते दीवाने खास दऊं इमारतां न। शाहजहाँ
दीवान ए खास इच दरवार सजांदा हा ते तख्त-ए-ताऊस उप्पर बौहन्दा हा।
सन् 1737-38 इच नादिर शाह ने लाल किले उप्पर हमला कीता ते ओह
तख्त-ए-ताऊस अपने कन्ने लेई गोआ। लाल किले इच दऊं बाग न। इक बाग
न दा नांऽ महताब बाग हा। औरंगजेब नै इस बाग इच इक मोती मस्जिद
बनवाई ही। किले दे अन्दर इक नैहर बगदी ही जिसगी नहर-ए-बहिश्त गलांदे
हे। लहौरी दरवाजे दे उप्पर शाही नौबत खाना हा। उत्थें पंज बारी नौबत बजदी

ही। हुन इत्थें 15 अगस्त गी आजादी दा तिरंगा लहराया जन्दा ऐ।

जामा मस्जिद :-लाल किला दिक्खने दे बाद अस जामा मस्जिद दिक्खन गे। एह लाल किले दे कच्छ गै ही। एह मती गै सुन्हाकड़ी मस्जिद ऐ ते उच्ची कुर्सी देइयै इक फाड़ी उप्पर बनाई गेदी ऐ। इसदे पूरब, पच्छम, उत्तर ते दक्खन पाससै बड्डे-बड्डे दरवाजे न। उन्दे तोड़ी पुज्जने लेई सीढ़ियां न। मस्जिद दा बेहड़ा बड़ा बड्डा ऐ। इसदे मझाटै इक हौज ऐ।

मस्जिद दी इमारत दालान दर दालान ऐ। बाहरली दालान दे मेहराबे उप्पर कुरान पाक दियां आयतां लिखी दियां न। गाइड आक्खारदा हा-

जामा मस्जिद दिल्ली दे इतिहास दी प्रतीक मिथी जंदी ऐ। शाहजहाँ नै अपने नांऽ उप्पर दिल्ली दा नांऽ शाहजहाँवाद रक्खेआ हा पर एह नांऽ नेई चलेआ। उसनै इस शैहर इच केई जादगारी दरवाजे बनवाए जिन्दे इच लाहौरी दरवाजा, दिल्ली दरवाजा, काबली दरवाजा, अजमेरी दरवाजा कशरी दरवाजा मुख ऐ, फही असें इक होर मस्जिद दिक्खी जिसदा नांऽ हा-

मस्जिद-ए-कूबतुल-इस्लाम

एह दिल्ली दी सारें थमां परानी मस्जिद ऐ। एह इक संजोग गै हा जे साढ़े गाइड दी नजर इस उप्पर पेई। इस मस्जिद दी नींह कुतुबुद्दीन नै रक्खी। इसदे बेहड़ै इक स्तम्भ ऐ। इसदा रंग क्रीमी ऐ। पुरावेतें दा गलाना ऐ जे एह थाहर कोई बौद्ध-विहार रेहा होग जिसगी त्रोटियै एह मस्जिद बनाई गेई। इसदी कन्धे इच शानदार अंदाज इच नक्काशी कीती गेदी ऐ।

हुमायूं दा मकबरा :-गाइड असेंगी हुमायूं दा मकबरा दस्सन लेई आया। उसनै असेंगी दस्सेआ - एह मकबरा अकबर दी मां हमीदा बेगम ने 1562 ई० इच बनोआया हा। लाल पत्थर कन्ने बने दे इसदे दरवाजे, दीवारां ते गुंबद मते शैल न। इत्थें मते मुगल बादशाहें दियां कब्रां न।

लाल किले थमां हुमायूं दे मकबरे तोड़ी इक सुरंग ही। बहादुर शाह जफर दे पंजें पुतर्तें गी जिस दिल्ली दरबार कच्छ गोली मारी ही उसगी हुन खूनी दरबाजा गलांदे न। इस मकबरे कच्छ गै निजामुद्दीन औलिया दा जमायत खाना हा। अस इस मकबरे इच फिरे टुरे ते फही बाहर आई गे।

कुतुब मीनार :-गाइड नै असेंगी कुतुब मीनार दस्सेआ ते आक्खेआ एह

इक मजबूत लाट ऐ। इसगी कुतुब दी लाट बी गलांदे न। एह इमारत पंज मंजिल उच्चि ऐ। अन्दर सीढ़ियां ते सज्जे न। इस इमारत गी बनाने दा कम्म कुतुबदीन एबक नै शुरु कीता ते सुलतान शम्सुद्दीन इल्तुमिश नै इसगी पूरा कीता। इसी बनाने लेई लाल पत्थर इस्तेमाल होए दा ऐ। अस इस मीनार दे अगें-पिच्छे फिरे ते फही सुलतानें दे भवन दिक्खन गे जेह्दे भज्जे-त्रुट्टे दे हे।

असें दपैहरी दी रुट्टी कुतुब मीनार दे इक ढाबे इच खादी। फही गाइड असेंगी पुराना किला दस्सन लेई गेआ। हुमायूं बी इस किले इच रेहा हा ते लाईब्रेरी थमां उतरदे उसदी मौत इस किले इच होई ही। उसदे बाद अस फिरोज़ शाह कोटला गे। इत्थें असें शाही मैहल दिक्खेआ जेह्दा खंडहर होई चुके दा हा।

27 दिसम्बर गी बी अस दिल्ली गै रेह। अस राजघाट, राष्ट्रपति-भवन, इंडिया गेट, चांदनी चौक, यंत्र मंत्र, लोक-सभा दा बाहरला दक्ख, दिक्खन गे। उस दिन असें इक दऊं स्कूल बी दिक्खे जित्थें बेसिक एजुकेशन दे असूलें मताबक पढ़ाई कराई जंदी ही। 28 दिसम्बर गी अस अपनी मर्जी कन्ने फिरे टुरे। उस्सै रातीं साढ़ी ट्रेन आगरे लेई चली।

आगरा :-29 दिसम्बर गी अस सवेरे-सवेरे आगरा पुज्जे। हुन साढ़ी सारें दी इ'यै मर्जी हा जे अस तौले-तौले ताज मैहल दिक्खन जाचै। पर असेंगी लैन दस बजे बसां आईआं। उन्दे कन्ने बी गाइड हा।

आगरे दा किला :-गाइड असेंगी सारे थमां पैहले आगरे दे किलै लेई गेआ। एह बी लाल पत्थरें कन्ने बने दा ऐ। साढ़ा गाइड सारें थमां अगगे खड़ोता ते फही अपने लहजे कन्ने सुनान लगा। इस किले गी अकबराबाद दा किला बी गलांदे न। एह मुगलें दी बड़्डी यादगार ऐ। इसदियां कन्थां मतियां उच्चियां न। किले दे अन्दर शाही मैहल ऐ। इक मैहल मानसिंह दा ऐ। गाइड अगें-अगें चलदा गेआ ते बोलदा गेआ। एह किले दा दीवान-ए खास ऐ। एह असली लाल पत्थरें दा ऐ। इसदे खम्भे ते गुंबद खूबसूरत न। फही अस उपरली मंजिल गे तां गाइड नै असेंगी ओह कमरा बी दस्सेआ जिस इच शाहजहाँ गी नज़रबंद रक्खेआ गेदा हा। इसगी शाही ख्वाबगाह बी गलांदे हे। इस कमरे इच ओह शीशा बी लगे दा हा जिस इच ताजमैहल दा बिम्ब लबदा हा। एह किला बी लाल किले आंहगर यमुना दे किनारे हा। गाइड नै फही बोलना शुरु कीता।

इत्थें अमर सिंह राठौर गी नज़र बंद कीता गेआ हा, शिवा जी इत्थें नज़रबंद रेह। गालिब दे चाचा नसरुल्लाह बेग खां इसदे किलादार हे तां लार्ड लीक बहादुर दे सपाहियें इस उप्पर कब्जा कीता।

अस किला दिक्खियै बाहर आए। अस बसै उप्पर बैठे ते ताज मैहल दिक्खने गी निकले, अस सारे इस भवन गी दिक्खने लेई बेताब हे। सन 1962 ई० इच आऊं बी.ई.सी इच पढ़दा हा तां तदूं में ताज दिक्खने दा सुखना लेआ हा पर भारत-चीन लड़ाई दे कारण उस बरै एजुकेशनल टूर नेई होए हे। अज्ज साढ़ा सुखना पूरा होआ।

ताज मैहल :- 'एह दुनियां दा खूबसूरत भवन ऐ।' साढ़ा गाइड बोला करदा हा। एह सारी इमारत संग-ए-मरमर दी ऐ। इस इच मुमताज महल दी कब्र ऐ। असली कब्र थल्लै ऐ। शाहजहां दी कब्र बी मुमताज दी कब्र कन्ने ऐ। शाहजहां गी जहजाद-ए तामीर गलाया जन्दा हा। ताज महल यमुना दे कंठै ऐ। इसदी मेहराबें इच कुरान-ए-पाक दियां आयातां न। अस ताज मैहल दे अन्दर बाहर फिरे-टुरे। इस इमारत दे सामनै बगीचा हा। अस उत्थें बैठे। किश जागतें ते कुड़ियें गीत गाए। फही अस उत्थूं दा उट्ठी खड़ोते।

ताज मैहल दिक्खियै असें रुट्टी खादी ते बज़ार फिरे-टुरे।

फतेहपुर सीकरी :- 30 दिसम्बर गी अस बस उप्पर बैठे ते फतेहपुर सीकरी पुज्जे। आगरा थमां सीकरी पुज्जदे दऊं घंटे लग्गे। इत्थें बी गाइड साढ़े कन्ने हा। उसनैं असेंगी सुनाया जे अकबर नै पैहलें फतेहपुर सीकरी गी अपनी राजधानी बनाया हा। उसनै इत्थें इक मजबूत किला बनोआया हा। इत्थें हज़रत शेख सलीम चिश्ती दी मज़ार ऐ। गलांदे न जे चिश्ती दी अकबर मती इज्जत करदा हा।

फतेहपुर सीकरी इच इक खूबसूरत मस्जिद बी ऐ। इत्थें इक बुलंद दरवाजा बी ऐ। एह दरवाजा अकबर नै खान देस जित्तने दे बाद यादगार के रुपै इच बनोआया हा।

अस इक घंटा फतेहपुर सीकरी फिरे टुरे। बुलन्द दरवाजे थमां किश लोकें गी तलाऽ इच छालां मारदे दिक्खेआ।

फही अस आगरा परतोई आए।

सिकंदरा :- साढ़े किश साथियें दी मर्जी सिकन्दरा जाने दी ही। सिकंदरा आगरे दा गै इक हिस्सा ऐ। इत्थें अकवर दा मकबरा ऐ। बादशाह दी कब्र इक तैह्खाने इच ऐ। अस तैह्खाने गे। एह पूरी इमारत लाल पत्थर दी ऐ। असें एह मकबरा दिक्खेआ ते रेलवे स्टेशन आई गे।

उससै रातीं साढ़ी ट्रेन बम्बई लेई ही। रातीं ट्रेन लगी इक रात असें होर ट्रेन इच गुजारी। पैहली जनवरी 1970 गी अस मुम्बई पुज्जे।

बुम्बई (हुन मुम्बई) मुम्बई साढ़े लेई इक सपने आह्ला शैहर हा। अस फिल्मा दिक्खदे ते सोचदे जे उत्थें मते अमीर लोक रौहन्दे होंडन। बड्डियां-बड्डियां कोठियां होंडन। पर इत्थें अमीर लोक घट्ट ते गरीब लोक मते दिक्खे। अस रेलवे स्टेशन पुज्जे तां असें लैन फही ट्रेवलिंग एजेंसी दिया गड्डियां आइयां। अस उन्दे ऊपर चढ़े ते गेट आफ इंडिया पुज्जे। उत्थें किश चिर खड़ोते ते समुन्दर दे दिक्ख दिक्खे लगे। कई निक्के मुट्टे समुन्दरी जहाज ते स्टीमर समुन्दरै इच तेरा करदे हे। कच्छ गे ताज होटल हा। पैहलें असें ओह सिनेमा इच दिक्खेआ हा अज्ज साक्षात दिक्खा करदे हे। अस अन्दर नेई गे। बाहर थमां गै दिक्खेआ। उसदे कच्छ गै जहागीर आर्ट गैलरी ही। अस उसगी दिक्खन गे। अस बाहर आए तां असेंगी स्नेहा मिलेआ जे अस इंडिया गेट आई जाचै। स्टीमर तेआर ऐ। अस स्टीमर ऊपर चढ़े ते एलिफैंटा गुफा दिक्खन चले।

एलिफैंटा गुफां :- एह गुफां बम्बई थमां कोई त्रै किलोमीटर दूर धारापुरी नांऽ दे इक टापू इच न। सन 1804 इच इत्थें इक विशाल हाथी दी मूर्ति मिली ही इस लेई इस जगह दा नांऽ एलिफैंटा पेआ। इ'यां गलांदे न जे मौर्य काल इच इत्थें समुन्दर दी दिक्ख रिक्ख लेई फौजी छावनी ही।

इस निक्के टापू इच कुल सत्त गुफां न। इन्दे इच म्हत्तवपूर्ण जेह्ड़ी गुफा ऐ ओह महेश मूर्ति गुफा ऐ। इस गुफा दी लम्बाई 39 मीटर ऐ। इस गुफा दे प्रवेशद्वार दे सामनै, गुफा दी पिछली दीवार इच बी किश मूर्तियां उत्कीर्ण न। इत्थें जेह्ड़े द्वारपाल बने दे न उन्दियां मूर्तां बी मतियां भव्य न। इ'नें गुफाएं इच अर्ध-नारीश्वर, शिव पार्वती, कैलाश-पहाड़ गी चुकने दी कोशश करदे रावण, अंधका सुर वध ते नटराज दी मूर्तियां कला दी नज़र कन्ने उत्कृष्ट न।

अस इक घंटे थमां बी बद्ध समें लेई इस टापू इच फिरे-टुरे, किश जागतें कौड़ियां चुनिआं। उत्थें हट्टियां बी हियां। गर्मी बी मती ही अस उत्थें दा परतोये स्टीमर उप्पर बैठे ते गेट वे आफ इंडिया इच आई गे। अस उत्थें किश चिर रेह। फही बसे उप्पर बैठे। हुन बस समुन्दर दे कंढै आइयै खड़ोई गेई। इत्थें सड़क दे थल्लै विशाल समुन्दर हा। समुन्दर दे कन्ने बड़्डे-बड़्डे पत्थर हे ते उन्दे उप्पर कन्ध ही। सड़क कन्धै कन्ने ही। सड़क दे दूऐ कंढै दिक्खने जोग मता किश हा। मच्छली घर हा। खिलौने आहलियां हट्टियां बी हियां। अस अगें बद्धे गे ते फही पारसियें दे जंगल इच गे जित्थे ओह शव बुहटें उप्पर टंगदे न। रस्ते इच असें किश मंदर बी दिक्खे। त्रकालें गणपति दा मंदर ते देवी मुम्बा दा मंदर बी दिक्खेआ। इक चांदी दा मंदर बी दिक्खेआ। 2 जनवरी गी असेंगी बम्बई घुम्मने लेई खुल्ली छुट्टी दिती गेई। अस टोलियें इच बजारे इच फिरे टुरे। इक थाहर मुजरा दिक्खने गी बी गे।

बम्बई साढ़े सोने दा ठिकाना बोगी दा डब्बा गै हुन्दा हा। रातीं अस उत्थें आइयै सेई जन्दे हे।

3 जनवरी गी असेंगी दस्सेआ गेआ जे साढ़ी अगली पडांऽ शोलापुर ऐ। उत्थवां दा अस अजन्ता दी गुफा दिक्खन जागे। अस दूऐ दिन शोलापुर दे रेलवे स्टेशन उप्पर पुज्जे। अगगे बसें दी व्यवस्था नेई होई। हुक्म होआ जे लोकल बसां पकड़चै ते अजन्ता पुज्जचै। मेरे कन्ने 15 विद्यार्थियें गी बस थहोई। अस बेही गे ते बाकी दे बसें गी बलगन लगे पर उ'नेंगी बसां नेई मिलियां।

अस अजन्ता पुज्जे ते गुफां दिक्खन निकली पे।

अजन्ता दी गुफा :-अजन्ता इच कुल 30 गुफां हियां। इन्दे इच किश सबूरियां ते किश अधूरियां हियां। इन्दे इच पंज चैत्यगृह गुफा नम्बर नं. 9, 10, 19, 26 ते 29 इच न। बाकी दियां गुफां संधाराम न जां बिहार न। एह गुफां मता चिर अज्ञात रेहियां। इ'नें गुफें दा पता सन 1919 इच लगा। कला-पारखियें दा गलाना ऐ जे इन्दा निर्माण दऊं चरणें इच होए दा ऐ। पैहले चरण इच बनी दी गुफा ई.पू. दूई थमां लेइयै दूई सदी दियां न। यानि इनेंगी बनाने इच चार सौ साल लग्गे। जेहड़ियां गुफां दूए चरण इच बनियां ओह वाकाटक ते गुप्त कालीन न। इतिहासकारें दा मत ऐ जे गुफा नं 16 गी वाकाटक दे मंत्री हरिषेण नै बौद्ध संघ गी समर्पित कीता हा। गुफा नम्बर 17 इक राजकुमार नै बनोआई ही। गुफा नम्बर चार दी मूर्ति लेई गलांदे न जे एह मथुरा दे

अभयनंदी नै भेंट कीती ही। गुफा नम्बर 9 ते 10 दे चित्र सातवाहन कालीन न। किश चित्तर पंजमीं सदी दे न जे किश बाद दे न। इ'नें गुफाएं दा विशे बुद्ध, बोधिसत्व, बुद्ध जीवन दी घटना ते जातक कथां न। इन्दें इच केई रंगें दा इस्तेमाल होए दा ऐ जेहड़े अज्ज बी सुरक्षत न।

अजन्ता दी गुफा दिक्खियै अस बी बड़े रूहान होए। अस सोची नेई सकदे हे जे भारत इच इन्नी उन्नत कला रेही होग।

अजन्ता दी गुफा दिक्खियै अस परतोई आए। साढ़ी अगली पड़ाऽ हुन बड़ौदा हा।

बड़ौदा :-शोलापुर थमां साढ़ी बोगी बड़ौदा रेलवे स्टेशन आई खड़ोती। इत्थें अस दऊं दिन रेह। इक दिन अस यूनिवर्सिटी दिक्खन गे। उत्थें असें इक संग्रहालय बी दिक्खेआ। संग्रहालय दे इक हाल इच व्हेल मछली दा पंजर प्रदर्शित हा जेहड़ा पूरे कमरे इच समाहित हा। इत्थें अस बाजारें इच बी फिरे दुरे। इक बड़ड़ा तलाऽ बी दिक्खेआ। बड़ौदा दे जागते डांडीं नाच बी दस्सेआ।

बड़ौदा थमां अस बम्बई ते फही उत्थूं दा वाया दिल्ली जम्मू आए।

एह जातरा साढ़े सारे लेई मती ज्ञान बर्द्धक ही।

गोवा जातरा :-सन 1970 इच अ'ऊं इक विद्यार्थी दे रुप इच बम्बई दी जातरा उप्पर आया हा। सन 1985 इच अ'ऊं डिग्री कॉलेज उधमपुर दे विद्यार्थियें दे इक दल गी लेइयै शैक्षिक जातरा उप्पर आया। मेरा रुट उ'यै हा जेहड़ा 1970 इच हा। फर्क सिर्फ इन्ना हा जे 1970 इच अस बोगी इच रेह हे ते सन 1985 इच असें डेरा चिमोर दे निरंकारी-भवन इच जमाया हा। उत्थें उधमपुर दे इक सेवक हे। इस लेई असेंगी कोई असुविधा नेई होई। चिमोर मते घर डोगरें दे हे इस लेई असेंगी उत्थें ओपरा पन नेई बझोआ। अस डोगरें दे घरें इच गे। इक घर उपदेश दा हा। ओह कूटे (हीरा नगर) दा हा। उस साढ़ा मार्ग दर्शन कीता बम्बई असें मते उ'यै थाहर दिक्खे जेहड़े पैहलें दिक्खे दे हे।

बम्बई दिक्खने दे बाद मते विद्यार्थी गोवा जाना चाहदे हे। उन्दे अनुरोध उप्पर अस 5 जनवरी गी बम्बई थमां गोवा लेई चली पे। मेरे साथी प्रो० ईशरदास गुप्ता बम्बई इच गै रेह।

6 जनवरी गी अस बड़गांव दे रेलवे स्टेशन उप्पर उतरे। इक ट्रेवलिंग एजेंसी कन्ने गल्ल होई, उसनैं असेंगी इक बस मुहैया कराई ते अस गोवा दी सैर करने गी निकली पे। ट्रेवलिंग एजेंट नै साढ़े कन्ने गाइड भेजेआ ओह असेंगी चर्च दस्सने गी लेई आया। गोवा सोलमीं-सतारमीं सदी थमां गै पुर्तगालियें दे अधीन आई गोआ हा इस लेई उ'नैं इत्थें उपासना लेई केई चर्च खड़े जिनदे इच सेंट फ्रांसिस अससी दा मठ असें सारें थमां पैहलें दिक्खेआ सन 1964 थमां इस मठ गी इक संग्रहालय इच बदली दित्ते दा ऐ। इस इच प्राचीन हिन्दू देवतें दियां मूर्तियां, पुर्तगाली गर्वनरें दियां कृतियां, सोलमीं सदी दे पुर्तगाली समुन्दरी जहाजे दे माडल ते इंडो-पुर्तगाली सिक्के प्रदर्शित न। इ'यां गै असें उत्थें भॉम जीसस दा बैसी लिका (बड्डा मंदर) लेडी रोज़री दा चर्च, सेट अगस्टाइन दा चर्च ते सेंट के जोतान दा चर्च बी दिक्खेआ। असें सेंट जोवियर दे मकबरे इच भीति-चित्तर बी दिक्खे। इत्थें असें लकड़ी ते पत्थर दियां मतियां मूर्तां दिक्खियां। गाइड नै असेंगी पनजी दी सैर बी करोआई। एह शैहर गोवा दी राजधानी बी ऐ। एह मता गै साफ-सुथरा शैहर ऐ। शैहर दी योजना सुनियोजत ऐ। अस समुन्दरी बीच दिक्खन बी गे। गाइड नै असेंगी वास्गोडेगामा शैहर ते उस कन्ने जुड़े दा समुन्दर बी दस्सेआ। अस सारी ध्याड़ी घुमे-फिरे ते फही रातीं बड़गांव आई गे।

दूऐ दिन असें अपने-अपने ढंगै कन्ने गोवा दे दर्शन कीते। जिसदा मन जित्थें कीता ओह उत्थें गोआ। अ'ऊं बी पनजी दे बजारें इच फिरेआ। उ'नैं दिनें उत्थें इक त्याहार चला करदा हा। मती रौनक ही। अस बी उस इच शामिल होए।

गोवा इच मंदर बी मते हे। इक मंदर लता मंगेश्वर दे पिता दे नांउ उप्पर बी हा। असें ओह बी दिक्खेआ।

9 जनवरी गी असें समुन्द्री जहाज दियां टिकटां लेइआं। ते जहाज दा नांउ शैद अकबर हा। अस 9 जनवरी गी सवेरे चले ते दस जनवरी गी मुम्बई पुज्जे। मुम्बई थमां गै साढ़ी बापसी ही।

०००

6. नासिक जातरा

में नासिक दी जातरा कुभ महापर्व दे उपलक्ष्य इच पत्नी दे अनुरोध उप्पर कीती। एह पर्व ज्हारां साल पैहले देव ते असुरें इच घटित इक घटना गी आधार मिथियै मनाये जन्दे न। इ'यां बी कुंभ दा अर्थ घड़ा ऐ। समुन्दर मंथन करदे जेहड़ा अमृत दा घड़ा हासल होआ हा उसी देवतें छल-कपट कन्ने असुरें थमां दूर ते रक्खेआ फही बी इस दियां किश बूँदा गंगा यमुना संगम स्थल प्रयाग इच किश हरिद्वार इच किश उज्जैन ते किश नासिक इच पेइयां जिस कारण एह चारै थाहर पवित्तर होई गे ते इत्थें बारें ब'रिं परैन्त महा कुम्भ दे मेले आयोजत होन लगे जिसगी संस्कृति जां आखो धर्म कन्ने जोड़ी दित्ता गेआ। देव-असुर कथा दे इलावा होर बी केई कथां इस पर्व कन्ने जुड़ी दियां न। इक कथा महर्षि दुर्वासा ते इन्द्र दी बी ऐ। दुर्वासा नै इन्द्र गी दिव्य माला दित्ती। इस माला गी ऐरावत हाथी नै सूँड कन्ने कुचली दित्ता। इस उप्पर दुर्वासा नराज होए। इस कन्ने संसार इच अकाल पेई गेआ। फही श्री मन-नारायण दी कृपा कन्ने समुन्दर मंथन दी प्रक्रिया शुरु होई जिस थमां अमृत हासल होआ। अमृत असुरें नाग लोक इच छुपाई दित्ता। फही गरुड़ नै उसगी तुप्पेआ ते खीर-सागर पुजाया। गरुड़ नै जित्थें-जित्थें अमृत कलश रक्खेआ उत्थें-उत्थें गै कुंभ पर्व मनाने दी परम्परा चली पेई।

इक होर कथा प्रजापति कश्यप दी पत्नियें दे बछकार होए दे विवाद कन्ने बी सरबन्धित ऐ। कद्रू दे पुत्तर हे नागराज वासुकी ते विनता दे पुत्तर हे-गरुड़। वासुकी नै अमृत-कलश कुसै थाहर छपैलेआ तां उसगी गरुड़ नै तुप्पी लैता। ओह कलश लेइयै अपनी मां कच्छ आवा करदे हे तां देवराज इन्द्र नै चऊं थाहरे गरुड़ उप्पर तीर कन्ने प्रहार कीता। ओह चार थाहर ऐ-प्रयाग, उज्जैन हरिद्वार ते नासिक। इत्थें कलश थमां अमृत दियां बूँदा टपकियां। बाद इच इ'नें चोनें थाहरें अमृतपात दे चेतें इच कुम्भ पर्व मनाया जान लगा।

इ'नें कत्थें थमां इ'यै बझोआ जे प्रागैतिहासक-काल इच देवें, असुरें गी

जित्थें-जित्थें हराया उ'यै थाहर पावन बनी गे। उत्थें गै मेले लग्न लगे। एह मेले साढ़ी संस्कृति कन्ने जुड़ी पे। एह बी होई सकदा जे कुम्भ मेले दा कोई खगोलीय महत्त्व होऐ जां कोई विज्ञानक महत्त्व होऐ पर रुढ़ि ते परम्परा इच बज्जे दे अस इन्दा अनुसरण करा करने आं।

नासिक दी जातरा पर जाने दा मेरे अन्दर शैद उन्ना रूढ़िगत भाव नेई हा जिन्ना एह इलाका दिक्खने दा हा। संस्कृति दा अध्येता होने दे कारण अ'ऊं बी अपनी पत्नी कन्ने इस जातरा उप्पर रवाना होई गेआ।

अस पैंथल थमां 28 सितम्बर 2003 गी रवाना होऐ ते सर्वोदय रेल पकड़ियै 29गी अहमदाबाद पुज्जे। उत्थें मेरे जागतै दा साला धीरज वाली ते उसदी चचेरी भैन श्रुति बी आई दी ही। अ'ऊं धीरज कन्ने बस अड्डै गेआ। पता चलेआ जे अहमदाबाद थमां नासिक गी दपैहरी त्रै बजे बस चलदी ऐ। दूऐ ध्याड़ै अ'ऊं पत्नी कन्ने बस अड्डै आया में दऊं टिकटां लैत्तियां ते अस बस पर बेही गे।

साढ़े रस्ते इच इक बड्डा शैहर सूरत आया।

सूरत-सूरत दा बजार ते कोठियां दिक्खियै बझोआ जे एह इक मता समृद्ध शैहर ऐ। इ'यां एह इक बन्दरगाह बी ऐ। ताप्ति नदी दा डेल्टा बी इत्थें गै ऐ। मुगल काल इच इस शैहर दा नांऽ बांदर मुबारक हा। पैहले मते हज जातरी इत्थूआं दा गै मक्का जंदे हे। बहादुर शाह दे शासन काल इच पुर्तगालियें इस शैहर गी अगग लाई ते नष्ट करी दित्ता। फही सन 1590 इच नमां सूरत बनेया। इस दा नव-निर्माण खुदाबंद खान ख्वाजा सफर सुलेमानी नै करवाया। ओह इत्थूआं दा गवर्नर हा। उसनै इत्थें इक किला बी बनोआया। उसंदा इत्थें इक आलीशान मकबरा बी ऐ जिसगी मारजान शामी रोजा गलांदे न।

सूरत साढ़ी बस थोढ़े चिर लेई गै खड़ोती। इत्थें मतियां सवारियां चढ़ियां ते उतरियां। इत्थें इक गुजराती कुड़ी मेरे कन्ने बेही गई। ओह सिर्फ गुजराती गै बोलदी ही। उसदियां पूरियां गल्लां मेरी समझ इच नेई आइयां।

साढ़ी बस पूरी रात चलदी रेही। कुतै फ़ाड़ी औंदी, कुतै मदान। खीर सवरे पंज बजे अस पंचवटी पुज्जे।

पंचवटी :-पंचवटी बी इक तीरथ ऐ। एह गोदावरी नदी दे कंठै स्थित

ऐ। इत्थें पंज वट दे बूहटे हे इस लेई इसदा नांऽ पंचवटी पेआ। एह उ'यै थाहर ऐ जित्थें शूर्पणखा दी लक्ष्मन नै नक्क कट्टी ही। इत्थें इक गुफा ऐ। इस गुफा इच सीता रौहन्दी ही। रावण नै छल कन्ने सीता गी गुफा थमां बाहर सद्देआ ते उसदा अपहरण करियै उसगी लंका लेई गेआ। इत्थें इक शिवजी दा मंदर बी ऐ ते कच्छ गै तपोवन ऐ।

नासिक :-पंचवटी कच्छ गै नासिक शैहर ऐ। अस सवेंरे 5.30 बजे अड्डे उप्पर पुज्जे। असें इक रिक्शा कीता ते गोदावरी नदी इच स्नान करन चली गे। सवेंरे-सवेंरे भीड़ घट्ट ही। अस घाट पर बैठे ते स्नान करियै मंदरें बक्खी आए। उत्थें केई मंदर हे। इक भगवान शिवजी दा बड़्डा मंदर हा। अस उत्थें गे, मत्था टेकेआ ते फही दूयें मंदरें इच मत्था टेकन गे। स्थापत्य दी दृष्टि कन्ने एह गुजरात दे काठियावाड़ मंदरें कन्ने मेल खंदे हे। मते मंदर गर्भगृह ते शिखर तोड़ी गै सीमत हे ते उन्दे अन्दर देव मूर्तियां हियां।

गोदावरी नदी दा दक्ख उत्थें मिगी मता सुहाना बझोआ। नदी इच इक उच्चा मीनार जेहा बने दा हा ते नदी दा पानी उत्थूआं दा दऊं हिस्सें इच बंडोइयै अवै करदा हा।

नासिक नदी स्नान करियै अस बाहर आए। बाहर त्र्यंबकेश्वर जाने लेई बसां खड़ोती दियां हियां। अस इक बस उप्पर बैठे ते इक घंटे इच त्र्यंबकेश्वर पुज्जी गे। त्र्यंबकेश्वर नासिक थमां 32 किलोमीटर हा। एह इक फ़ाड़ी खेत्तर हा।

त्र्यंबकेश्वर :-एह बी इक निक्का जेहा शैहर हा। इत्थें बी मते मठ ते मंदर हे जिन्दे इच साधु-संतें दे डेरे हे। असें अपने-अपने झोले चुक्के ते रामकुंड स्नान करने गी चली पे। केई गलांदे न जे असली कुम्भ स्नान रामकुण्ड इच गै मन्नेआ जंदा ऐ।

रामकुंड इक निक्का जेहा तलाऽ हा। इसदियां केई अट्टारियां हियां। लोक टल्ले खोलियै राम कुंड इच स्नान करन जा करदे हे। असें बी टल्ले खोले। स्नान कीता ते रामकुंड दे कंठै बने दे मंदरें इच मत्था टेकेआ ते बाहर आई गे। रामकुंड इच निर्मित मंदर आकार इच निक्के हे ते एह प्रस्तर शिलाएं कन्ने बने दे हे।

रामकुंड स्नान करने दे बाद अस त्र्यंबकेश्वर मंदर दे दर्शन करने गी गे।

उत्थें असें लम्मियां-लम्मियां लाइनां दिक्खियां तां पिच्छे गी परतोए। इक आश्रम इच कमरा कराये उप्पर लैत्ता। कराया पंज सौ निश्चत होआ। असें उत्थें रुट्टी खादी। किश चिर अराम कीता ते फही लाइन इच आइयै खड़ोई गे। हुन लाइन मती लम्मी ही। अस छे बजे खड़ोते ते दस बजे मंदर दे मुख द्वार तोड़ी पुज्जे। सपाहियें असेंगी मंदर दी मूर्ति दे दर्शन नेई करन दित्ते। असें चलदे-चलदे गै गर्भगृह उप्पर नजर पाई।

मंदर दे अन्दर शिव ब्रह्मा ते विष्णु दे समन्वय कन्ने शिव दी त्रिमुखी प्रतिमा ही।

एह मंदर पैहलें मती गै जीर्ण-शीर्ण हालत इच हा। मराठा पेशवा बाला जी बाजीराव नै 16 लख रपेऽ खर्च करियै सन 1755 ई० इच इस मंदर दा दोबारा निर्माण दा कम्म करोआया। एह मंदर सन 1785 ई० इच पूरा होआ।

किश गलांदे न जे गोदावरी नदी अन्दर गै अन्दर केई जल कुंडे थमां होंदी होई इत्थें शिवलिंग (त्र्यम्बक ज्योर्तिलिंग) गी स्नान करांदी अगें बधदी ऐ। केई आक्खदे त्रिंबक, त्रिमुख लिंग दे कारण इस ज्योर्तिलिंग दा नांऽ त्र्यम्बकेश्वर पेआ। केईयें दा गलाना ऐ जे त्रयगुणात्मक गुणें दे कारण इसगी त्र्यम्बकेश्वर गलांदे न।

इस तीरथ स्थान उप्पर कुशावर्त तीर्थ, वल्वतीर्थ, गौतम तीर्थ ते ब्रह्म कुंड न जिस कारण इसदी पौराणकता ते इतिहासकता पूरे देश इच मान्य ऐ।

एह तीरथ स्थान सहयाद्रि पर्वत शृंखला दा इक हिस्सा ऐ। इसदा प्हाड़ शिवलिंग आकार दा ऐ। समुन्दर तल थमां इसदी उंचाई 711.4 मीटर ऐ। त्र्यम्बकेश्वर थमां सीढ़ियां चढ़ियै अस ब्रह्मगिरि पहाड़ उप्पर चढ़े। सीढ़िये दी सँख्या 750 ही। गलांदे न जे गौतम ऋषि नै इससै पर्वत उप्पर शिव दी कठन तपस्या करियै गोदावरी नदी गी प्रकट कीता हा। गोदावरी दे उद्गम थाहर कच्छ शिवजी दी जटा दी छाप अज्ज बी 'लब्धदी ऐ' अहिल्या बाई नै इत्थें 108 शिवलिंग स्थापत कीते हे। अस प्हाड़ चढ़े, उतरे, तलाऽ दिक्खे ते फही बस अड्डे आइयै बस पकड़ी ते नासिक लेई रवाना होए।

नासिक :- एह इक मता गै पराना शैहर ऐ। गलांदे न जे लक्ष्मण नै इत्थें सुर्पनखा दी नक्क कट्टी ही इस लेई इस थाहर दा नांऽ नासिक पेआ, एह थाहर गोदावरी नदी दे तट थमां 598 मीटर उच्चा ऐ। इत्थें कपालेश्वर, काला

राम मंदर, सीता गुफा ते केई मठ न। जिस कारण तीर्थ जातरी इस नगर गी मता पवित्तर मित्थदे न। इत्थें चार शाही स्नान हुन्दे न। पैह्ला स्नान सौन कृष्ण मस्सेआ गी, दूआ सिंह संक्रांति गी, त्रि 'या रक्खड़ी आहलै ध्याडै ते चौथा भाद्रों दी मस्सेआ गी। अस त्र्यम्बकेश्वर थमां थल्लै आए तां असेंगी छे कि. मी. पिच्छे तुआरेआ गेआ कि जे उस ध्याडै शाही स्नान हा। अस छे कि.मी. टुरे। फायदा एह होआ जे असें नासिक शैहर बी दिक्खी लैत्ता। असें शाही स्नान उपपर कुंभ स्नान कीता ते बस अड्डे पर आई गे।

भीमा शंकर

अस नासिक दे अड्डे उपपर पुज्जे तां उत्थें बिहार दे किश जातरी बैठे दे हे। ओह ज्योर्तिलिंग भीमा शंकर दे दर्शन लेई जा करदे हे। मेरा उत्थें जाने दा पैहलें कोई कार्यक्रम नेई हा। उ 'नेंगी दिक्खियै अ'ऊं बी उन्दे कन्ने तेआर होई गेआ। मिम्मी दऊं टिकटां 'लैत्तियां ते इक बस उपपर उन्दे कन्नें गै बेही गेआ। अस नासिक थमां कोई त्रीह किलोमीटर चले होंगे जे रस्ते इच इक निक्का शैहर आया। इस शैहर दा नांऽ हुन मिगी चेत्ता नेई ऐ। अस दूए तीर्थ जातरियें कन्ने उत्थें गै उतरे। त्रकालां पवा करदियां हियां। अ'ऊं बी दुए जातरियें कन्ने इक ट्रेवलिंग एजेंट कश गेआ ते सूमो लेई गलाया। उसनै सौ रपेऽ प्रति सवारी मंगे। अस मन्नी गे। अस सूमो उपपर बैठे तां त्रकालां पेई गेदियां हियां। बिहारियें कन्ने मतियां जनानियां हियां। सूमो बझोंदा हा जे कुसै फाड़ बक्खी जा करदी ऐ। बाहर न्हेरा हा इस लेई सिवा लाटुएं दे होर किश नेई लब्भा। सूमो फाड़ी सफर तैय करियै त्रऊं घंटे इच ज्योर्तिलिंग भीमा शंकर पुज्जी।

भीमा शंकर बस अड्डे कच्छ किश हलवाईयें दियां हट्टियां हियां। किश हट्टियां पूजा सामग्री दियां हियां। किश कैसटें दियां हियां। असें पूजा दी समग्री लेई ते मंदर दे अन्दर गे। रातीं न्हेरा हा इस लेई मंदर दे स्थापत्य दे बारै कोई जानकारी नेई मिली। इ 'यां बझोंदा हा जे मंदर गुजरात-काठियावाड़ शैली इच ऐ। अस इक बड्डे कक्ष इच दाखल होए। उसदे सामनै गै मंदर दे अन्दर गर्भगृह इच एह ज्योर्तिलिंग स्थापत हा। मंदर इच शिव दे किश चित्तर बी हे। मंदर दे कन्ने गै इक निक्की सरिता ही। उसदा नांऽ भीमा हा। किश गलांदे जित्थें शिवलिंग ऐ उसदे थल्लै इस नदी दा नकास ऐ। किश गलांदे जे असली ज्योर्तिलिंग कामरुप (आसाम) इच ऐ। पर एह मते मन्नदे न जे

भीमक नां५ दे इक राजे इत्थें तप कीता ते शिव जी ने प्रसन्न होइयै उसगी दर्शन दिते। पर एह सारे मनदे जे मजूदा मंदर नाना फड़नबीस नै बनाया हा। पैहले इत्थें लोक शिवरात्रि उपपर गै आँदे हे पर सड़क बनने दे बाद हुन श्रद्धालु पूरा साल आँदे न। असें इत्थें दऊं जलकुण्ड दिक्खे ते परतोई आए।

दूरे ध्याड़ै असें सवेरे-सवेरे पूना दी बस पकड़ी ते नौ बजे पूना पुज्जे।

पूना :- एह मिगी मता गै सुन्हाकड़ा शैहर बझोआ। शैहर इच प्रवेश करदे गै में निक्की-निक्की फ्हाड़ियें उपपर बने दे भव्य भवन दिक्खे तां मन खुश होई गेआ। में सारें थमां पैहले रेलवे स्टेशन जाइयै टिकट खरीदी ते फ्ही लाड़ी गी कन्ने लेइयै बजार घूमन-फिरन गेआ।

पारसी मंदर :- पूना इच मेरे लेई मुख आकर्शन पारसी मंदर हे। अ'ऊं सारे मंदरें इच ते नेई जाई सकेआ पर जित्थें गेआ उत्थें में दिक्खेआ जे ओह उच्चे थड़े उपपर बने दे हे ते उन्दा स्थापत्य किश-किश हिन्दू मंदरें कन्ने मिलदा जुलदा हा। पुजारियें मिगी अन्दर जाने दी अनुमति नेई दिती इस लेई अ'ऊं डुआठें कश खड़ोता ते मत्था टेक्कियै आई गेआ।

में इक रिक्शा कीता ते फ्ही अ'ऊं इक संग्रहालय दिक्खन गेआ। जित्थें आदिवासियें दे जीवन कन्ने जुड़ी दियां मतियां चीजा हियां।

आदिवासी संग्रहालय:- इस पूरी जातरा दे दरान अ'ऊं सारें थमां बद्ध आदिवासी संग्रहालय थमां प्रभावत होआ इत्थें आदिवासियों दे जीवन कन्ने जुड़ी दियां केई वस्तां प्रदर्शत हियां इत्थें में दऊं सीगें आहले मुखौटे बी दिक्खे जि'नेंगी लाइयै आदिवासी लोक नाच पेश करदे हे। अस बालपुनें थमां सुनदे हे जे राक्शें दे सिर सींग हुन्दे न। एह मुखौटे दिक्खियै मिगी बझोआ शैद आर्य लोक इ'ने जंगली लोकें गी गै राक्स मित्थदे हे।

में पूना इच बड़डे-बड़डे केई इन्स्टीच्यूट, स्कूल ते कॉलेजें दे भवन दिक्खे पर अन्दर नेई गेआ।

में रातीं दी ट्रेन पकड़ी। दऊं रातां ट्रेन इच गै गुजारियां ते फ्ही त्रियें दिन जम्मू पुज्जेआ।

7. अहमदाबाद जातरा

सन 2003 दे शुरु इच मेरे पुतर नलिनाक्ष दी नियुक्ति अरबिन्द मिल्लज अहमदाबाद इच होई तां मेरा उत्थें औना जाना शुरु होई गेआ।

अ'ऊं पैहली बारी अपनी धर्मपत्नी गी कन्ने लेइयै 16 मार्च 2003 गी अहमदाबाद पुज्जा। उ'नें दिनें मेरा जागत साबरमती नदी दे पार कर्णावती इच रौहन्दा हा। असें उस्सै रातीं अहमदाबाद शैहर घुम्मने-फिरने दा प्रोग्राम तेआर कीता।

दूऐ दिन 17 मार्च 2003 गी अस सारे सवेरे-सवेरे तेआर होई गे। बस उप्पर बैठे ते 'लाल दरवाजा' दिक्खन गे। अहमदाबाद शैहर दा एह इक इतिहासक थाहर मित्थेआ जंदा ऐ। इस दरवाजे कछ गै भारतीय पुरातत्व सर्वेक्षण दा कार्यालय हा। अ'ऊं उत्थें गेआ। में रामनाथ सिंह फोनिया दा नांऽ लैत्ता तांऽ दफ्तर दे लोकें मिगी मते आदर कन्ने बठाया। फोनिया साहब जम्मू थमां तबदील होइयै गुजरात आए दे हे। मेरी उन्दे कन्ने पंछान ही। दफ्तर आह्लें शैद मिगी उन्दा मित्तर मित्थियै 'अहमदाबाद' नांऽ दी इक कताब भेंट कीती। जिसदा मुल्ल मातर बारां रपेऽ हा।

कताब इच लिखे दा हा जे अहमदाबाद शैहर सन 1411 ई० इच अहमदशाह नै अपने रुहानी गुरु शेख अहमद खाट्टू गंज बख्श दी प्रेरणा कन्ने बसाया। उसनै असावाल थमां अपना दारोखलाफा चुक्केआ ते अहमदाबाद गी अपनी राजधानी बनाया। उसदे जान-नशीनें 1573 ई० तोड़ी इत्थें राज कीता। उन्दे ऐहद इच अहमदाबाद इच केई तारीखी इमारतां बनियां।

में इक होर कताब इच पढ़े दा हा जे अहमदाबाद शैहर दी हिफाजत लेई सुलतानें दस किलोमीटर लम्मी ते उच्ची दीवार खड़ेरी ही। फही सरदार पटेल होर अहमदाबाद दे मेयर बने तां उ'नें इस शैहर दे बकास लेई इस दीवार

दे किश हिस्सें गी हटाई लैता हा। मिराज-ए-अहमदी कताब इच बी लिखे दा ऐ जे इस शैहर इच दाखल होने आस्तै बारां दरवाजे हे। शैहर दे उत्तर इच शाहपुर दिल्ली ते दरियापुर नां५ दे दरवाजे हे। पूर्व बक्खी कालूपुर, सारंगपुर, ते रायपुर नां५ दे प्रवेशद्वार हे। दक्खन पाससै अस्तोदेया, जमालपुर ते धदिया नां दे गेट हे ते पच्छिम बक्खी खान-ए जहान, रेखंड ते खानपुर नां५ दे दरवाजे हे। बाद इच सन 1864 इच द'ऊं दरवाजे होर बने जिन्दे इच इक दा नां५ प्रेम-भाई गेट ते दूए दा नां५ पंचकोण दरवाजा हा। शैहर इच भद्रा नां५ दा किला बी हा। इ'यां एह पूरा शैहर किलेबंद हा। इक होर कताब इच उल्लेख मिलदा ऐ जे इस शैहर इच 139 टावर हे। इ'यां पूरा पराना अहमदाबाद मुस्लिम वास्तुकला दा इक अनूठा संग्रहालय बज्जोदा ऐ। इत्थें किश इमारतां मुगल-काल इच बी बनियां। गलांदे न जे मुगल सम्राट् जहांगीर बी इत्थें आया हा। ओह सन 1616 इच कन-कारिया झील कश ठैहरेआ हा। उसनै इस शैहर गी गरजाबाद नां५ इस लेई दिता जे इत्थें ब्हां इच गरद गै गरद हुन्दी ऐ। उसी एह शैहर पसंद नेई हा। इसलेई उसनै इसगी जहनमाबाद बी गलाया।

लाल दरवाजे कछ जेहड़ा भद्रा दा किला ऐ गलांदे न जे ओह अहमदाबाद दी सारें थमां पुरानी इमारत ऐ। इस इमारत दा निर्माण 1411 ई० इच शुरु होआ ते एह 1414 ई० इच पूरी होई। इसदे मीनार पूर्व बक्खी मैदान-ए-शाह (करंज मदान) पासै न। इसदे त्रै दरवाजे न।

अहमद शाह दी मस्जिद :- वर्तमान गुजरात कतब दे सामनै ते शाही किले दे कन्नें जेहड़ी मस्जिद ऐ ओह अहमदाबाद दी सारें थमां पुरानी इबादत गाह ऐ। एह 1414 ई० इच बनी ही।

जामि-मस्जिद :- एह अहमदाबाद दी सारें थमां भव्य मस्जिद ऐ। एह भारत दी बड़्डी मस्जिदें इच इक ऐ। इसदे बनाने दा कम्म 1412 इच शुरु होआ हा ते एह 1424 ई० इच पूरी होई ही। अस इत्थें किश चिर खड़ोते ते इसदे कलात्मक स्तम्भें ते गुम्बदें गी दिक्खदे रेह। इत्थें प्रार्थना करने लेई जेहड़ा मुलुक खाना बने दा ऐ ओह जनानियें लेई ऐ। इक होर बड़्डा हाल इबादत लेई ऐ। सन 1819 दे भूंचाल कन्ने इस मस्जिद दे मीनारें गी नुक्सान पुज्जा हा। मस्जिद परिसर दे अन्दर गै सुल्तान अहमदशाह दी कब्र ऐ जिसगी 'वादशाह नू-हाजिए' गलांदे न। सुल्तान दी बेगम दी कब्र बी कछ गै ऐ।

इसगी 'रानी-नू-हाजिए' गलांदे न।

इत्थें मुस्लिम काल दे होर बी मते भवन न जिन्दे इच आजम-खान दी सरांस ते सैद मस्जिद मतियां मशहूर इमारतां न।

अस लाल दरवाजे थमां चलदे-चलदे अगगें गै अगगै बदधे गे। असेंगी एह पूरा शैहर खूबसूरत मस्जिदें कन्ने सज्जे दा बझोआ। इस शैहर इच रानी रूपवती दी मस्जिद दी बी में मती चर्चा सुनी। हसन मुहम्मद चिश्ती दी बी लोकें मती तारीफ कीती। रानी सिपरी दी मस्जिद दे बी चर्चे सुने। मस्जिद नगीना दी प्रशंसा बी सुनी। पर अस सारियां इमारतां नेई दिक्खी सके। अस पही लाल दरवाजे कछ परतोये। उत्थें भद्रा काली दा मंदर कछ गै हा। अस मंदर दे अन्दर गे। मत्था टेकेआ ते बाहर निकले। अस थोड़ा अगगें गे तां अगगें सरकारी-भवन ऐ। इक भवन इच कचैहरी दे कार्यालय हे।

अस लाल दरवाजा दे लागे-दिगगे दे भवन दिक्खियै बाहर निकले। हुन साढ़ी अगली पड़ा सरदार बल्लभ भाई पटेल दा स्मारक हा।

सरदार बल्लभ भाई पटेल स्मारक :- एह स्मारक शाही बाग इलाके इच हा। इत्थें पुज्जदे असेंगी अर्द्धा घंटा लगा। स्मारक दिक्खियै बझोआ जे एह कोई मैहल रेहा होना। अन्दर गे तां पता चलेआ जे सचमुच एह शाही मैहल गै हा। एह मैहल शाहजहां लेई रौहने आस्तै बनाया गोआ हा। पर ओह इत्थें मता चिर नेई रेहा। इसदा इस्तेमाल सरकारी इमारत दे रूप इच हुन्दा रेहा। द'ऊं मंजिले उप्पर आधारत एह भवन केई कक्षें इच समाहित ऐ। गलांदे न जे कविवर रवीन्द्रनाथ टैगोर होर बी किश चिर अपने भ्रा कच्छ इस मैहल इच रेह हे। उन्दे भ्रा अहमदाबाद इच जज हे। आजादी दे बाद एह भवन किश चिर 'गवर्नर हाऊस' रेहा पर गुजरात दी राजधानी गांधीनगर बनी तां एह भवन परतियै खाल्ली होई गोआ। खीर गुजरात सरकार नै इसगी सरदार बल्लभ भाई पटेल स्मारक दे रुप इच बदलेआ।

इस स्मारक इच सरदार पटेल हुन्दे जीवन कन्ने जुड़ी दियां केई चीज़ा जि'यां टल्ले, वस्त्र, कताबां, अभिनन्दन ग्रैंथ ते फोटो बगैरा पंजे कक्षें इच प्रदर्शित न। इसदे हर कक्ष दी अपनी बक्खरी गै आभा ऐ। एह स्मारक देश ते बदेश दे सैलानिएं दे आकर्शन दा केन्द्र ऐ। अस इस स्मारक दे इक-इक

कमरे इच फिरे। उत्थें फोटो दिक्खे। उन्दी जीवनी दी इक कताब खरीदी ते बाहर आई गे।

सरदार पटेल दे स्मारक कछ गै मृदुला सारा भाई दा स्मारक बी हा। दरवान नै असेंगी उत्थें जाने दी अनुमति नेई दित्ती। हुन साढ़ा अगला पडांस सावरमती आश्रम हा।

साबरमती आश्रम :-सरदार पटेल स्मारक थमां साबरमती आश्रम सिरफ त्रै किलो मीटर दूर हा। इस आश्रम गी गांधी-आश्रम ते हरिजन आश्रम बी गलांदे न। अस आटोरिक्षा करियै इत्थें पुज्जे। एह आश्रम सादगी, पवित्तरता, कर्मठता ते साधना दा प्रतीक ऐ। सन 1930 दे बाद किश बरि गांधी जी इत्थें रेह हे। उ'नें देश दी आजादी दे आन्दोलन दा सफल नेतृत्व इत्थूआं दा गै कीता हा। अस आश्रम दे अन्दर गे। असेंगी उत्थें अलोकिक वातावरण बझोआ। उत्थें केई कक्ष हे जिन्दे इच गांधी जी दे जीवन कन्ने जुड़े दे केई निक्के बड़्डे चित्तर प्रदर्शत हे। उस थमां किश अगें इक मुख्ख लाईब्रेरी ही। इत्थें गांधी जी कन्ने सरबन्धित पुस्तकां प्रदर्शित हियां। किश कताबां बिक्री लेई बी हियां। मिम्मी गांधी जी दी आत्मकथा खरीदी। फही अस ओह भवन दिक्खन गे जित्थें गांधी जी रौहदे-बौहदे, सौंदे ते लोकें कन्ने मिलदे हे। असें गांधी जी दे साथियें दे कमरे बी दिक्खे। अस उत्थें इक घंटा रुके ते फही गुजरात विद्यापीठ दिक्खने गी उत्थें पुज्जे।

गुजरात विद्यापीठ :-साबरमती आश्रम थमां अस निकले तां आश्रम रोड़ थमां लंघदे-लंघदे में गुजरात विद्यापीठ दा बोर्ड दिक्खेआ। अस सारे इत्थें उतरी गे।

इस विद्यापीठ दे बारे इच में पढ़े दा हा जे सन 1920 ई० इच महात्मा गांधी नै भारती समाज गी ध्यान इच रक्खियै जेहड़ा शिक्षा केन्दर स्थापत कीता उसदा नांस उ'नें पैहलें राष्ट्रीय विद्यापीठ रक्खेआ ते बाद इच इसदा नांस बदलेआ ते नमां नांस रक्खेआ-गुजरात विद्यापीठ।

अ'ऊं विद्यापीठ दे अन्दर गेआ। में भारतीय भाषा एवं संस्कृति संस्था दे अध्यक्ष डॉ० अम्बा शंकर नागर हुन्दे कन्ने मलाटी कीती। में उन्दा पैहलें बी मता नांस सुने दा हा। ओह प्रख्यात हिन्दी लेखक हे। ओह इक बारी जम्मू

विश्व-विद्यालय इच बी आए हे। ओह गुजरात हिन्दी साहित्य परिषद दे अध्यक्ष बी हे। उन्दे नांऽ उप्पर नागर अभिनन्दन ग्रंथ बी छपी चुके दा ऐ। उ'नें मिगी परती-परती विद्यापीठ इच औंने लेई गलाया उत्थूआं दा फारिग होइऐ आऊं अहिंसा-भवन इच गेआ। पुष्पा मोतीयानी हुन्दे कन्ने मिलेआ। उ'नें मेरा निग्गा स्वागत कीता ते अपने सैहजोगियें कन्ने मलाया। उत्थूआं दा अ'ऊं थल्लै उतरेआ ते फही गुजरात हिन्दी-हिन्दोस्तानी प्रचार समिति दे सरगरदा लालू-भाई रबारी हुन्दे कन्ने मिलेआ। उ'नें सुनाया जे मते कश्मीर दे हिन्दी विद्वान इत्थें औंदे न।

इसदे बाद अ'ऊं ट्राइवल रिसर्च एण्ड ट्रेनिंग इन्स्टीच्युट दे अध्यक्ष डा० चन्द्रकान्त भाई उपाध्याय हुन्दे कन्ने मिलेआ। उ'नें मिगी अपना संग्रैहालय दस्सेआ। फही उन्दे कन्ने में मोरार जी देसाई हुन्दा स्मारक दिक्खेआ ते उत्थूआं दा अ'ऊं बाहर निकली आया। उस दिन असेंगी घर पुज्जदे चार बज्जी गे।

इस्सै ध्याड़ै संजा अस परतियै अहमदाबाद गांधी नगर मुख सड़क बक्खी गे। हुन सड़क दे कंढै बने दा भागवत गुरु कुल, स्वामी नारायाण अन्तराष्ट्री गुरु कुल, निरमा यूनिवर्सिटी, वैष्णोदेवी दा नमां बने दा मंदर, त्रि मंदर दिक्खने इच असेंगी किश मता समां लगा। एह मंदर बाबा भगवान दास होरें बनोआए दा ऐ। मंदर कन्ने इक बस्ती ऐ। इत्थूआं दा अस फही परतोए ते साबरमती नदी दे कंढे बने दे आसाराम बापू हुन्दा आश्रम दिक्खन गे। बापू होर ते उत्थें नेई हे। आश्रम इच किश चिर फिरे-टुरे ते फही अस अपने डेरै परोतोई आए।

सवेरे अस उट्ठे ते तौले गै तेआर होई गे। 22 मार्च दी तिथि ही। असें गांधी नगर अक्षयधाम दिक्खन जाना हा। मेरे कन्ने मेरी पत्नी ही। असें न्हारी कीती ते डेरै थमां निकलियै गांधी नगर सड़क उप्पर आइयै खड़ोई गे। असेंगी तौले गै बस मिली गई। अस बस पर बैठे ते नौ बजे दे करीब गांधी नगर पुज्जी गे। गांधी नगर गुजरात दी नमीं राजधानी ही। अस गांधी नगर दे बस अड्डे उतरे। इक रिक्शा कीता ते उसी गांधी नगर घुमाने लेई गलाया। ओह असेंगी सचिवालय बक्खी लेई आया। उसनै असेंगी किश नमें बने दे फ्लैट ते इमारतां दस्सियां। मिगी गांधी नगर मता शान्त बझोआ। इ'यां बी एह शैहर अज्जें विकसित होआ करदा हा। मते सेक्टरें इच अज्जें फ्लैट खाली हे। सरकार

पूरे गांधी नगर दे पर्यावरण गी ध्यान इच रक्खियै बूहटे लगवा करदी ही। बजारें इच लोकें दी आओ-जाई बी घट्ट ही। अस किश चिर होर फिरे ते अक्षयधाम आई गे।

अक्षयधाम :-गांधी नगर इच आकर्शन दा खास केन्द्र अक्षयधाम मंदर ऐ। एह मंदर उग्रवादियें दे हमले दे कारण बी मता चर्चा इच आया। टी.वी. चैनलें इच में इस मंदर दियां तस्वीरां बी दिक्खियां। अ'ऊं इस मंदर दा अवलोकन करने गी मता आतुर हा।

रिक्शे आहले नै असेंगी मंदर कछ छोड़ेआ ते ओह चली गेआ। असें मुख द्वार टप्पेआ ते मंदर परिसर इच दाखिल होई गे। एह असेंगी इक भव्य मंदर बझोआ। एह चौने पास्सेआ उच्ची चार दीवारी कन्ने घिरे दा हा। मिगी एह इक किलोमीटर थमां बी बद्ध खेतरफल इच फैले दा बझोंदा हा। इस मंदर इच इक सुन्हाकड़ी वाटिका बी ही। बच्चें लेई बाल वाटिका बक्ख ही। उस इच झूले लागे दे हे। अस उत्थें गे तां जागत नच्चा-कुद्दा दे हे। फही अस उपपर चढ़े। मंदर दे मंडप इच गे। ओह मता गै खुल्ला हा। उत्थें नारायण स्वामी दियां मूर्तां स्थापत हियां। मूर्तें लेई गर्भगृह मंडप दे अन्दर गै हा। इ'यां बी पूरे गुजरात इच नारायण स्वामी दी बड़ी मैहमा ऐ। उन्दे मंदर हर निक्के बड़्डे शैहर इच न। अस सीढ़ियां चढ़ियै दूई मंजल उपपर बी गे। उत्थें दिक्खने लेई मता किश हा। जगह-जगह तस्वीरां हियां। फही असें टिकटां लैतियां ते नारायण स्वामी दी लीला दिक्खन लागे। असें केई बनावटी गुफां दिक्खियां जिन्दे इच नारायण स्वामी गी तप करदे दस्सेआ गेदा हा। उन्दे जीवन कन्ने जुड़े दे असें केई दक्ख दिक्खे। मंदर कंटीन इच गै असें रुट्टी खादी ते गांधी नगर दे बस अड्डे उपपर आई गे।

सरखेज रोज़ा

अ'ऊं गुजरात विद्यापीठ दे अहिंसा-भवन इच गेआ। उत्थें मिगी इक अध्यापक मिले जि'नें मिगी एह सुझाऽ दिता ते मिगी, सरखेज रोज़ा बी जाना चाहिदा ऐ। ओह बी मुस्लिम तमदन दा इक केन्द्र ऐ।

अगले ऐतवारें अस सरखेज रोज़ा दिक्खन गे। एह इमारत मुस्लिम तमनद का इक केन्द्र ऐ।

‘सरखेज रोजा’ अहमदाबाद थमां सिरफ अट्ठ किलो मीटर दूर हा। अस अद्धे घंटे दे अन्दर उत्थें पुज्जी गे।

सरखेज रोजा इक विस्तृत मदान इच स्थित हा। इसगी दिक्खने लेई असेंगी इक सम्पर्क सड़क तुप्पना पेई। अस गेट टप्पियै अन्दर गे। उत्थें असें केई इमारतें दा समूह दिक्खेआ। सारे थमां आकर्शक इमारत शेख अहमद खतरु दा मकबरा हा। उ‘नेंगी गंज बख्श बी आक्खेआ जंदा ऐ। जिसदा अर्थ हा-समृद्धि देने आह्ला।

शेख अहमद खतरु दे मुरीदें इच इक अहमदशाह बी हा। शेख खतरु दी प्रेरणा कन्ने गै अहमदशाह नै 1411 ई० इच अहमदनगर दी नींऽ रक्खी।

अहमदनगर दी स्थापना दे बाद शेख खतरु सरखेज थाहर आई गे। लोक उन्दे दर्शनें गी इत्थें बी औन लगे। ओह सूफी संत हे। सारें कन्ने प्यार करदे हे। लोक बी उन्दा मता आदर करदे हे।

उ‘नें सारें थमां पैहलें इत्थें इक भव्य मस्जिद दा निर्माण कराया। अस बी सारें थमां पैहले उन्दी मस्जिद दिक्खन गे। उत्थें होर बी मते लोक हे। एह इक विशाल भवन ऐ। इसदा मुख दरवाजा पूर्व बक्खी ऐ। प्रार्थना-भवन 171 फुट लम्मा ते 150 फुट चौड़ा ऐ। मस्जिद इच प्रवेश लेई जनानियें लेई इक बक्खरा दरवाजा ऐ। इस मस्जिद दे मीनार मते उच्चे न।

मस्जिद दे कन्ने गै इक विशाल सरोवर ऐ। इसदी अट्टरियां पत्थर दियां न। इस तलाऽ दे दक्खन इच इक आलीशान मैहल ऐ। इसदे कन्ने गै जामा मस्जिद ऐ जिसदा परिसर 17 एकड़ इच सीमत ऐ।

सरखेज रोजा दे निर्माण दा कम्म सन 1446 ई० इच शुरु होआ ते 1451 इच एह पूरा होआ। इत्थे इक संग्रहालय, इक लाईब्रेरी बी ऐ। एह इतिहासक स्मारक हुन भारतीय पुरातत्व सर्वेक्षण दे अधिकार इच ऐ। इसदे बकास लेई विभाग यत्नशील ऐ। इत्थे हिन्दू-जैन ते परसिया दा मिश्रित स्थापत्य लब्धदा ऐ, इस लेई शोध कर्ताएं लेई एह स्मारक मता अहम ऐ।

मुस्लिम स्मारक :- इ‘यां पूरे अहमदाबाद इच केई मुस्लिम स्मारक न जिन्दे इच मतें दा में अवलोकन बक्खरे-बक्खरे दिनें कीता। इन्दे चा मशहूर भवने दे नांऽ न - सैय्यम आलम दी मस्जिद, अहमद शाह दी मस्जिद, हैबत

खान दी मस्जिद, त्रिपोला गेट, जामा-मस्जिद, अहमदशाह दा मकबरा, रानी दा हुजरा (मकबरा) कुतुबशाह दी मस्जिद, सरकार खान दी मस्जिद, दरिया खान दा मकबरा, मलिक शाह वेन दी मस्जिद, बीबी दी मस्जिद, शाह आलम दी दरगाह, दस्तर खान दी मस्जिद, मियां खान चिश्ती दी मस्जिद, बीबी अचुत कीकी दा मकबरा, कुतुल-आलम दा मकबरा, मुहाफिज़ खान दी मस्जिद, रेलवे स्टेशन दे कछ खड़ोते दे वशीर मनार फतेह मस्जिद, रानी रुपवती दा मकबरा, शाह खूब सैय्यद दी मस्जिद बगैरा।

अहमदाबाद इच मुस्लिम स्मारक दिक्खियै बझोआ जे मुस्लिम स्थापत्य गी इत्थें मता प्रोत्साहन मिलेआ। सरखेज रोजा दिक्खने दे बाद अस कनकारिया झील दिक्खन गे।

अहमदाबाद शैहर दी सैर

22 फरवरी 2009 गी ऐतवार दी छुट्टी ही। मेरे जागतै आपुं आक्खेआ जे अस तौले तेआर होई जाचै। अज्ज ओह् असेंगी अहमदाबाद दी इक बारी पही सैर कराग। अस तेआर होइयै कारै पर बेही गे।

कनकारिया झील :-एह् अहमदाबाद इच सारें थमां सुन्दर झील ऐ। एह् रायपुर दरवाजे थमां इक किलोमीटर दूर ही। असें एह् झील बढे चाएं कने दिक्खी। एह् त्रीह् एकड़ भूखंड इच फैली दी ही। इस झील गी सुलतान कुतुब-उ-दीन नै बनोआया हा। इसदा कम्म 1451 इच पूरा होआ। एह् सुन्हाकड़ी झील सैलानियें दे आकर्शन दा मुंख केन्द्र ऐ। इसदे कंढै इक चिड़ियाघर ऐ। इत्थें में चिट्ठा मोर बी दिक्खेआ। साढ़ा पोतरु पशु पैंछियें गी दिक्खियै मता खुश होआ। झील दे कण्ढै असें किश मकबरे बी दिक्खे जेह्ड़े किश स्थानी सामंते दे ते किश पुर्तगालियें ते अंग्रेजे दे हे। झील दिक्खियै अस माता भवानी दा कुंआ दिक्खन गे।

माता भवानी दा कुआं :-एह् कुआं अहमदाबाद दा सारें थमां पराना पुरातत्विक थाहर ऐ। किश गलांदे न जे एह् राजा कर्ण सोलंकी (1063-1093 ई०) दी निर्मिति ऐ। होई सकदा ऐ जे अहमदाबाद थमां बी पैह्ले जेह्ड़ा इत्थें कर्णावती शैहर हा एह् कुआं उसदी इक नशानी होवै। अस बी एह् कुआं दिक्खियै मते रहान होए।

माता भवानी मंदर परिसर कछ बी इक पौढ़ियें आह्ला खूह असें दिक्खेआ जिसगी हरीर सुलतानी नै बनोआया हा। एह पन्द्रमी सदी दी नशानी ऐ। गुजरात इच सीढ़ियें आहले कुएं गी वाव गलांदे न। स्थानी कलाकारें वाव निर्माण इच अपने कुशल शिल्प दा परिचे दित्ते दा ऐ। असें गांधी नगर जन्दे रस्ते इच बी इक वाव दिक्खी ही।

असें उस ध्याड़ै दिल्ली गेट दे उत्तर इच इक जैन मंदर बी दिक्खेआ जिसगी सेठ हाथी सिंह नै बनोआया हा। एह मंदर मिगी मता गै आकर्शक बझोआ। अस शाही बाग बी गे।

असेंगी इक सैलानी नै अदालाज दी वॉव दिक्खने लेई बी गलाया। इस दा निर्माण 1499 ई० वीर सिंह दी रानी रुदावाई नै करोआया हा। एह वाव किश दूर ही, अस नेई जाई सके।

अहमदाबाद इच श्री स्वामी नारायण दे असें केई मंदर दिक्खे जिन्दे इच इक गुरुकुल रोड़ इच हा। इसगी हुन नमां रूप दित्ता गोदा ऐ। अस लाईब्रेरी दिक्खन बी गे। उत्थें इक गुजरात विद्या सभा अहमदाबाद दा इक सांस्कृतक केन्द्र ऐ जित्थें उन्नत किस्म दी लाईब्रेरी ऐ। इक लाइब्रेरी असें माणिक्य जेठा भाई दी बी दिक्खी।

इक पुराने मैहल दे अवशेश नकारखाना दे कोल दिक्खे। इस मैहल दा निर्माण मुगल गवर्नर आजम खान नै सन 1637 ई० इच करोआया हा। अस अहमदाबाद फिरे-टुरे ते इस शैहर दा समृद्ध पुरातत्व दिक्खियै मते हरान होए।

अहमदाबाद शैहर दा बकास मती तेजी कन्ने होआ ऐ। सन 1872 इच इस शैहर दी आबादी इक लक्ख ठाई ज्हार ही। सन 1921 इच एह सँख्या 2.74 लक्ख होई गई। सन 1921 इच एह शैहर 5.8 वर्ग किलोमीटर तोड़ी सीमत हा सन 2008 इच इसदा फैलाऽ 46.6 वर्ग किलोमीटर होई गेआ ते आबादी 5.5 लक्ख होई गई।

अहमदाबाद गी नमां रूप देने इच सरदार बल्लभभाई पटेल दा मता जोगदान रेहा। सन 1917 ई० इच ओह नगरपालिका दे अध्यक्ष बने तां उ'नें इस नगर दे बकास लेई इक योजना दे तैहत अहमदाबाद दी पुरानी दीवार दे इक हिस्से गी तोड़ी दित्ता। उन्दा किश लोकें विरोध कीता। सरदार पटेल दा साथ प्रियतम राय नांऽ दे इक टीचर नै दित्ता। सरदार पटेल होरें इक सड़क

दा नांऽ प्रियतम राय रक्खियै उसगी सच्ची श्रद्धांजलि दिती। एह सरदार पटेल दी गै कोशश ही जे उ'नं अहमदाबाद गी साबरमती नदी दे पारले हिस्से गी बी बसाया। उत्थें केई नमें उपनगर बसे जिस कन्ने इस शैहर दी शोभा बधी।

अज्ज भारत इच अहमदाबाद इक प्रमुख शैहर ऐ। सरकार ते पूंजीपतियें इसगी भारत का मानचेस्टर बनाया ऐ। एह नगर अज्ज पूरी दुनियां इच सूती कपड़ें दे कारखानें दी वजह कन्ने मशहूर ऐ। इत्थें उद्योग-धन्धे दी भरमार ऐ। बाहरले प्रदेशें थमां ज्हारां बढ़े लोक इत्थें रोजगार दी तपाश इच आँदे न। एह बदधा गै जा करदा ऐ। सन 1961 इस इच दी जनसंख्या 11, 49, 918 ही ते हुन 2001 इच एह होर बी मती बधी गई ऐ।

अहमदाबाद गुजराती संस्कृति दा केन्द्र बी मित्थेआ जंदा ऐ। बेशक बाहरले लोकें दे औने दे कारण किश बदलाव बी आए न। योरुपीय संस्कृति नै बी इस शैहर गी प्रभावत कीता ऐ पर एह सब समें दी मंग बी ऐ।

अहमदाबाद अज्ज इक शिक्षा दा केन्द्र बी ऐ। इत्थें गुजरात यूनिवर्सिटी, निरमा यूनिवर्सिटी, गुजरात विद्यापीठ दे इलावा दर्जनें दी तैदाद इच उच्च शिक्षा केन्द्र न जिन्दे इच ज्हारां बढ़े विद्यार्थी प्रशिक्षण लै करदे न। एह साहित्य, कला ते संगीत दा बी केन्द्र ऐ। इत्थें हर रोज दस थमां मते दैनिक समाचार-पत्तर प्रकाशत हुन्दे न जिन्दे इच गुजरात समाचार, दिव्य भास्कर, संदेश, कच्छ मित्र, जयहिन्द, गुजरात मित्र मुख न।

इस शैहर इच हिन्दू-मुसलमान जैन ते पारसी रौहन्दे न। पूरे शैहर इच मुस्लिम स्थापत्य दे केई स्मारक अज्ज बी मूल अवस्था इच खड़ोते दे न। पूरा शैहर ते इसदे अगें-पिच्छें दा इलाका हिन्दू ते जैन मंदरें कन्ने सुशोभित ऐ।

इत्थूं दे लोक मते शालीन, व्यवहार कुशल ते शान्त सुभाऽ दे न। लड़ाई जप्की थमां दूर रौहन्दे न। शैद इ'यै कारण ऐ जे जेहड़ा बी इत्थें आँदा ओह परतोंदा नेई ऐ।

अहमदाबाद इच गुजराती थाली मशहूर ऐ। होटलें इच पंजाबी खाना बी उपलब्ध ऐ। लोक धार्मिक विचारें दे न ते पूजा पाठी न। पर्व त्योहार मते जोश कन्ने मनांदे न। नरातें इच इत्थूआं दा गरवा नाच दिक्खने जोग हुन्दा ऐ इस इच कुड़ियां जागत न्याने ज्याने सारे हिस्सा लैंदे न। अहमदाबाद सचमुच गुजरात दा दिल ऐ।

सूर्य मंदिर-मोंधेरा

अहमदाबाद रौहन्दे में गुजरात विद्यापीठ, गुजरात विश्व विद्यालय ते दीन दयाल उपाध्याय अध्ययन केन्द्र दे केई चक्कर लाए ते गुजरात दे इतिहास ते संस्कृति कन्ने जुड़े दे मते लोकें कन्ने मिलेआ। उ'नें मिगी सूर्य मंदर मोंधेरा दा अवलोकन करने दी सलाह दिती। छुट्टी आहले दिन अस सारे कार पर बैठे ते मंदर दिक्खन चली पे।

गुजरात दे मंदरें इच मोंधेरा दा एह सूर्य मंदर स्थापत्य दी नजर कन्ने इक अनमोल ते अलौकिक भवन ऐ। एह अहमदाबाद थमां 99 कि० मी० ते पाटन थमां कोई 31 कि.मी. दूर ऐ। एह 11वीं सदी दी रचना ऐ। सोलंकी नरेश भीम प्रथम नै इस मंदर दा निर्माण कीता। उड़ीसा दे कोणार्क ते कश्मीर दे मार्तंड मंदरें आहला लेखा एह बी त्रुट्टे-भज्जे दा ऐ। इसदा मंडप, छत ते शिखर सारे नष्ट होई चुक्के दे न पही बी जे किश बचे दा उसगी दिक्खियै बझोंदा ऐ जे एह इक भव्य मंदर हा। एह मंदर मोधा, ब्राह्मणें दे ग्रां इच ऐ इस लेई इसदा नांऽ मोंधेरा प्रचलन इच आया।

इस मंदर दी निर्माण शैली मौलिक ऐ, एह पूर्व अभिमुख ऐ। एह मंदर इक परकोटे दे अंदर ऐ। इसदी योजना इच त्रै कक्ष न - सभा मंडप, गूढ़ मंडप ते गर्भगृह। इसदी धुरी 154 फुट लम्मी ऐ। पूरा मंदर द'ऊं हिस्सें इच ऐ। पैहले हिस्से इच सभा मंडप ऐ जिस इच कलात्मक खम्भे न। दूएं हिस्से इच गूढ़ मंडप ते गर्भगृह ऐ। गर्भगृह त्र'ऊं पास्सेआ कन्धें कन्ने घिरे दा ऐ। गूढ़ मंडप ते गर्भगृह दे बछकार इक अंतराल ऐ ते प्रदक्खना पथ बी ऐ।

इस मंदर दी शोभा इसदा जलकुंड ऐ। एह जलकुंड चौरस (आयताकार) ऐ ते इसदी अट्टारियां मतियां गै कलात्मक न। इसदे चबूतरें कन्ने जेहड़े खाल्ली थाहर न उत्थें निक्के बड़्डे केई देवालय न।

इस मंदर दा सभा मण्डप 50 फुट वर्गाकार ऐ। इसदे चौने चूहकें इच स्तम्भें कन्ने जुड़े दे प्रवेश द्वार न। इन्दे उप्परले हिस्से मेहरावनुमा न। मेहरावें दे उप्पर मूर्तियां उत्कीर्ण न।

सोलंकी राज्य दे कलाकारें अपनी कलात्मक अनुभूतियें गी इस मंदर इच

साकार कीते दा ऐ। शिल्प सौंदर्य दी नज़र कन्ने इस मंदर दा कोई मुकाबला नई ऐ।

सूर्य मंदर दे दर्शन करियै अस बाहर आए। अस इक वाटिका इच घुम्मे-फिरे जिसदा बकास भारतीय पुरातत्व सर्वेक्षण नै कीते दा ऐ। एह मंदर बी इस्सै संस्था दे संरक्षण इच ऐ।

मातंगी माता मंदर :-सूर्य मंदर दिक्खियै अस बहुचरा माता दे दर्शन करन गे। एह शक्ति स्थल सूर्य मंदर थमां 16 कि.मी. दूर हा। बहुचरा स्थानी लोकें दी कुल देवी ऐ।

अस मंदर मत्था टेक्कियै मातंगी माता दे दर्शन करन गे। एह स्थान बी श्रद्धालुएं कन्ने खचाखच भरोचे दा हा। माता दा निवास इक जलकुंड इच मित्थे-आ जंदा ऐ। लोक जलकुंड दे दर्शन करियै अति प्रसन्न हुन्दे न। इत्थें केई भवन न जिन्दे इच जातरी निवास करदे न। इस मंदर दा बाहरी शलैपा दिक्खने जोग ऐ।

जलकुंड उप्पर जेहड़ा भव्य मंदर बने दा ऐ ओह दूर थमां लब्धदा ऐ।

पाटण :- मातंगी थमां इक रस्ता पाटण गी जंदा हा। पाटण उत्थूआं दा 30 कि.मी. हा। एह गुजरात दा पराना शैहर ऐ। असें पाटण जाने दा मन बनाया। अस 2.30 बजे मातंगी थमां चले ते पाटण दे रस्ते इच निर्मित केई मठ, मंदर, सांस्कृतिक केन्दर, स्कूल कस्बे दिक्खदे चार बजे दे करीब पाटण पुज्जे।

पाटण दा गुजराती इच इक अर्थ ऐ-राजधानी। एह शैहर पन्द्रमी सदी थमां पैहलें सोलंकी राजे दी राजधानी हा। इत्थें दिक्खने गी मत्ता किश हा। पराने किले दियां कन्थां अजें बी खड़ोती दियां हियां। रानी दी इक वाव (वाबली) बी असें दिक्खी जेहड़ी केई मंजिली ही। इस दियां अट्टारिकां मतियां गै कलात्मक हियां। इसदे कन्ने गै इक बड़्हा बाग हा। बाग कन्ने इक सरोवर हा। सरोवर दे कंढै केई परानियां इमारतां न।

रानी जसवां दा मंदर :-पाटण इच इक तारीखी मंदर रानी जसवां दा बी ऐ। एह सोलंकी राजें दी कुलदेवी ऐ। मंदर दे गर्भगृह इच रानी दा इक

तैल चित्तर ऐ। दूर्इ डोगरी लेखक कान्फ्रेंस दे मौके उपर कविरत्न नै जेहड़ा 'जसमां' नांऽ दा नाटक मंचित कीता हा उसदा सरबन्ध इस मंदर दी नायिका कन्ने हा।

किला :- इत्थें असें इक होर किला दिक्खेआ जिसदे अन्दर देवी दा मंदर हा। अस उत्थें बी गे। इस मंदर दे बाहर इक कनियां बैठे दा हा जेहड़ा 'कन' छट्टै करदा हा। उसनै मेरे कन बी छट्टे ते गलाया तेरे उपर देवी-देवतें दी अपार कृपा ऐ। उस कनिये नै मिगी माता वैष्णोदवी दी गुफा इच उसदे नांऽ दा नारियल चाढ़ने गी गलाया। उसनै मिगी एह बी आक्खेया जे अ'ऊं दादा-दादी दा श्राद्ध नेई करदा इस लेई पितर मेरे उपर खुश नेई न। श्राद्ध आहली गल्ल सच्च ही। पाटण इच असें मुसलमान हाकमें दे बी केई पराने मकबरे दिक्खे। सजां पौन लग्गियां तां अस उत्थूआं दा अहमदाबाद लेई परतोई आए।

डकोर :- 22 मार्च गी होली दा पर्व हा। एह पर्व ते असें अहमदाबाद इच गै मनाया। इसदे बाद जेहड़ा ऐतवार आया अस सारे डकोर जातरा लेई निकली पे।

डकोर कृष्ण भक्तें दा इक केन्द्र ऐ। द्वारिका पुरी, नाथ द्वारा ते डकोर त्रै नेह थाहर न जित्थें रणछोड़ भगवान दे मंदर न।

इस मंदर दी व्यवस्था महाप्रभु बल्लभाचार्य पास्सेआ प्रवर्तित पुष्टिमागीय शाखा दे लोक करदे न। अस अहमदाबाद दा चले ते 2 बजे डकोर पुज्जी गे। अस उत्थें पुज्जे तां पता चलेआ जे अजें मंदर दा द्वार बन्द ऐ। ओह चार बजे खुलना ऐ। कछ गै गलतेश्वर महादेव दा मंदर हा, अस उत्थें चली गे।

गलतेश्वर महादेव दा मंदर :- एह मंदर डकोर थमां मसां बीह किलोमीटर पूर्व बक्खी भीमा नदी दे कढ़ै ऐ। एह इक शिव मंदर ऐ। बझोंदा हा जे इसगी कुसै त्रोड़े दा ऐ। स्थापत्य दी दृष्टि कन्ने असेंगी एह मंदर बी मता विलक्खन बझोआ। इसदी भव्यता दिक्खने जोग ही। असें नदी इच स्नान कीता। पही मंदर मत्था टेकन गे। इत्थें बी असें भारतीय पुरातत्व सर्वेक्षण दी इक पट्टिका दिक्खी जिस इच मंदर दा इतिहास लिखोए दा हा। एह मंदर बी दसमीं सदी दा दस्सेआ जंदा ऐ।

अस उत्थुआं दा परतियै डकोर आए। मंदर दे किवाड़ खुल्ले दे हे। असें भगवान रणछोड़ दी काली मूर्ति दे दर्शन कीते। झील ते बजार दा इक चक्कर लाया ते अहमदाबाद लेई परतोई आए।

नल सरोवर :- 13 अप्रैल गी बसाखी दा पर्व हा। असें इस पर्व उप्पर नल सरोवर इच स्नान करने दा मन बनाया। एह सरोवर अहमदाबाद थमां 65 कि०मी० दूर हा। अस 8 बजे चले ते 10 बजे नल सरोवर पुज्जे। नल-सरोवर पक्षी-विहार लेई मता मशहूर ऐ। स्यालै इत्थें केई विदेशी पैंछी रैहन-बसेरे लेई औंदे न। एह सरोवर 130 वर्ग किलोमीटर इच फैले दा ऐ। अस इत्थें दऊं घंटे टुरे-फिरे। असें सरोवर इच जेहड़े पैंछी दिक्खे उन्दे इच मते देसी गै हे। स्थानी लोकें सनाया जे मार्च दे खीर इच बदेसी परिन्दे उड्डरी जंदे न। सरोवर दे कंठे सरकार नै इक सैरगाह विकसत कीती दी ऐ। अस उत्थें बी गे।

लोथन :- अस नल सरोवर थमां त्रै बजे दे करीब लोथन लेई रवाना होए। नल सरोवर थमां लोथन 45 कि०मी० दूर हा। अस केई गां टप्पियै करीब चार बजे लोथल पुज्जे। लोथल असेंगी पुरातत्व कन्ने सरबन्धित थाहर बझोआ। सारे थमां पैहलें अस लोथल दा संग्रैहालय दिक्खन गे। इत्थें खुदाई थमां जेहड़े संदर, भांडे मम्मी ते दूए समान हासल होए, उन्दा इस संग्रैहालय इच प्रदर्शन हा। संग्रैहलय कन्ने गै पुरातत्व विभाग दा इक कार्यालय बी हा। उत्थें पुरातत्व सरबन्धी केई ग्रैंथ हे। में उन्दी लाईब्रेरी थमां त्रै ग्रैंथ खरीदे ते अस उत्थुआं दा बाहर आई गे। साढ़े कन्ने जेहड़े लोक हे ओह अगें बधे तां अस उन्दे पिच्छें-पिच्छें चले। अगगे जाइयै असें इक तबाह होए दे शैहर दे नशान दिक्खे। उत्थें असें राजे दे मैहल दे अवशेश दिक्खे। मैहलै दियां नीआं ते उप्परलियां कंधां खड़ोती दियां हियां। छत्त भज्जी गोदा हा। मैहलै कन्ने होर मकानें घर कोठें दे अवशेश बी बिखरे दे हे। अ'ऊं दूर-दूर तोड़ी गोआ। नगर दे अवशेश दिक्खियै परतोई आया।

लोथल दा गुजराती इच अर्थ ऐ - लोथें दा ढेर। गलांदे न कुसै कारण एह शैहर नष्ट होआ। इत्थें लोथां गै लोथां बिकखरी गोइआं। शैहर नष्ट होने दी बजह भूंचाल बी होई सकदा ऐ ते महामारी बी होई सकदी ऐ।

किश गलांदे न एह शैहर समुन्दर दे कंठे उप्पर हा। इत्थें इक बन्दरगाह

ही। बन्दरगाह दे नशान अज्ज बी हैन। इत्थें जेहड़ा इक बड्डा तलाऽ ऐ गलांदे न जे उत्थें समुन्दरी जहाज खड़ोंदे हे। एह नगर अरब सागर दे कछ हा इस लेई किश मिश्र दी सभ्यता दे नशान इत्थें मिलदे न। इत्थें किश प्लेटें उप्पर जेहड़े चि'न्न न ओह अजें तोड़ी पढ़े नेई जाई सके। सन 1934 थमां पुरातत्व-वेता, इतिहासकार, शोध कर्ता इस थाहरै उप्पर शोध करा करदे न पर अजें तोड़ी उन्दे हत्थ किश नेई लगा।

अ'ऊं एह खंडहरें दा शैहर दिक्खियै मता रहान नेई होआ। में किश उजड़े दे शैहर डुग्गर खेत्तर इच बी दिक्खे दे हे जिन्दे इच जसरोटा बी इक हा। लोथन दे खंडहर दिक्खियै तरकालें अस अहमदाबाद परतोई आए।

०००

8. पावागढ़-जातरा

फरवरी 2008 इच में परतियै अहमदाबाद जाने दा मन बनाया। ऐतकी में उत्थें दऊं-ढाई म्हीने रौहना हा। में सर्वोदय इच आरक्षण कराया ते 14 फरवरी 2008 गी अ'ऊं जम्मू थमां चलेआ ते 15 फरवरी गी 2 बजे अहमदाबाद पुज्जी गोआ।

मेरे जागतै कर्णावती थमां डेरा चुक्की लेते दा हा। हुन ओह मेम नगर गुरुकुल दे सर्जन टावर दे फ्लैट 703 इच रौहन्दा हा। उत्थें उसदी शैल पंछान ही।

सर्जन टावर कछ गै सरकारी लाईब्रेरी ते पंडित दीन दयाल उपाध्याय अध्ययन केन्द्र हा। अ'ऊं खाल्ती हा। अ'ऊं उत्थें जंदा ते गुजरात दे इतिहास ते संस्कृति विशे दियां कताबां पढ़दा। किश कताबां घर लेई औंदा। उत्थें अ'ऊं बिच-बिच दपैहरी फिल्मां बी दिक्खी लैंदा। गांधी माई फादर ते सरदार पटेल आयरन मैन आफ इंडिया फिल्मां में सी.डी. उप्पर गै दिक्खियां। में 'जानियां' फिल्म बी दिक्खी। ओह गुजरात दे दंगे उप्पर ही।

उत्थे मेरे पुत्तर दा परिचे मंडल बी हा। डोगरा परोआर बिच-बिच मिलदे हे। 23 फरवरी गी साढ़े डेरै जम्मू दे रजनीश गोस्वामी, कटड़े थमां उन्दी लाड़ी सीमा, विशनाह थमां सुमित शर्मा, नन्दक थमां डिंपल ते किश होर लोक बी आए। एह सारे डोगरे हे। असें उन्दे कन्ने डोगरी इच गै गप्पां-छप्पां मारियां। में उ'नेंगी गलाया जे मेरा इरादा गुजरात दे तारीखी थाहर दिक्खने दा ऐ। उ'नें मिगी पावागढ़ जाने दा सुझाऽ दिता।

साढ़ी रवानगी :-दूऐ दिन 24 फरवरी गी ऐतवार हा। मेरे जागतै गी बी छुट्टी ही। अस सारे मेरी लाड़ी, पुत्तर, नूंह ते पोत्तरा सवेरे-सवेरे तेआर

होए ते कार इच बेही गे। जागतै मारुतिकार सन 2005 इच खरीदी ही।

अस अहमदाबाद थमां बाहर आए। अगें अहमदाबाद बड़ोदरा सुपर फास्ट सड़क इच कार आई खड़ोती। इस सड़क दी सिफ्त एह् ऐ जे इत्थें कार दी गति सौ किलोमीटर घंटे दी जरुरी ऐ। इत्थें बक्खरा टैक्स देना पौंदा, इस लेई इस सड़क उपपर घट्ट गड्डियां चलदियां न।

खैर अस इक घेंटे इच गै बड़ोदरा पुज्जी गे। उत्थुआं दा पावागढ़ 32 किलोमीटर हा। अस 12 बजे दे करीब पावागढ़ पुज्जे।

पावागढ़ त्रिकुटा फ़ाड़ आह्ला लेखा गै इक उच्चा खड़ोते दा फ़ाड़ हा। इस फ़ाड़ दे शिखर उपपर महाकाली दा मंदर ऐ। शिखर तोड़ी पुज्जने लेई छे किलोमीटर लम्मी बलखंदी इक पगडंडी ऐ। इत्थें उड्डन खटोले दी बी व्यवस्था ही। फ़ही सवारी दा कराया 70 रपेऽ हा। जागतै पंज टिकटां लेइआं ते अस खटोले उपपर बेही गे। में खटोले इच बैठे-बैठे दे पुराने मैहलें ते किलें दे खंडहर दिक्खे तां अ'ऊं समझी गेआ-जे पूरी फ़ाड़ी गी किलाबंद कीता गेदा ऐ। एह् कोई धार्मक थाहर गै नेई तारीखी थाहर बी होई सकदा ऐ।

अस उपपर पुज्जे तां उत्थें माता वैष्णो देवी दे दरवार आह्ला लेखा गै इक निक्का जेहा बज़ार हा जित्थें जातरा ते दर्शन सरबन्धी सारा समेआन उपलब्ध हा। में इस जगह दा शैल चालीं अवलोकन कीता। फ़ाड़ दे शिखर उपपर महा काली दा मंदर हा। अस सीढ़ियां चढ़ियै उत्थें पुज्जे। महाकाली दा मंदर गुजरात-काठियावाड़ शैली इच हा। देवी दी मूर्ति कलात्मक ही मूर्ति दा रंग काला हा। श्रद्धालु लाईनें इच खड़ोइयै अपनी बारी दा इन्तज़ार करा दे हे। साढ़ी बारी बी आई। असें दर्शन कीते ते बज़ार इच आई गे। में उत्थूआं दा पैदल ढलने दा मन बनाया। मिगी इत्थें इक-इक पत्थर तारीखी बझोआ। जित्थें मंदर हा उसदे थल्लै पैहली दूई ते त्री कन्धें दा घेरा हा। बझोदा हा जे इत्थें किला हा। इ'यां बी तारीखी कताबें इच वर्णन मिलदा ऐ जे पावागढ़ दा किला भारत दे मजबूत किलें इच इक हा। असें रस्तै ढलदे मेदी तलाब, अटक गेट बुद्धियागेट, सदन शाह गेट बगैरा दिक्खे। किश इमारतां भज्जी-टुट्टी दी हालत

इच पगडंडी दे कन्ने-कन्ने खड़ोती दियां हियां। साथियें उन्दे नांऽ मच्छी हवेली, मकेइ कोठार, पटेइ रावल मैहल बगौरा दस्से। इस फ़ाड़ कन्ने जेहड़ा दरिया प्रवाहत ऐ उसदा नांऽ विश्वामित्री ऐ। इत्थें में इक खंडहर होर दिक्खेआ जिसी 'सत्त मंजिल' गलांदे न। शैद एह मैहल दा हिस्सा ऐ। पुराने रस्ते इक लकड़ी दा पुल बी हा जिसी पतिया पोल आखदे न। साथी जातरियें असेंगी रस्ते इच जैन ते शिव मंदर बी दस्से। बझोंदा हा जे उन्दा पुर्नोद्धार कीता गेदा ऐ। अस फ़ाड़ी ढलियै थल्लै आए ते चम्पानेर दिक्खने गी निकले।

चम्पानेर :-तारीखी कताबें इच उल्लेख मिलदा ऐ जे तेहरमीं सदी इच जूनागढ़ आहला लेखा चम्पानेर पावागढ़ बी राजपूतें दे अधीन इक मजबूत राज्य हा। सुलतान महमूद शाह बेग नै सन 1484 ई. राजपूतें थमां पावागढ़ दा किला जित्तेआ ते चम्पानेर गी अपने राज्य दा दारो-खलाफा बनाया। उसदे बाद इस इलाके इच मुस्लिम स्थापत्य कला दा बकास शुरु होआ जिसदा नतीजा इत्थूआं दी नगीना मस्जिद ऐ। इस मस्जिद दी बजह कन्ने पावागढ़ विश्वदाय स्मारकें दी सूची इच आया। अस नगीना मस्जिद दिक्खन बी गे। इसदे आलीशान स्तम्भें दे कलात्मक प्रस्तर शिलाएं दी नक्काशी गी दिक्खियै मते रहान बी होए। दुनिया दे उच्च कोटि दे कला पारखियें इसगी विश्व इच इक अनौखी इमारत मन्ने दा ऐ।

अस चम्पानेर शैहर दे अन्दर बी गे। एह इक उजड़े दा शैहर बझोआ दा हा। पूरे शैहर दी किलाबंदी कीती गेदी ही पर इत्थें मैहलें दे खंडहर ते बिखरे पे दे तारीखी स्मारक उजाड़पन दा ऐहसास करादे हे। इत्थें किश हिन्दू ते जैन मंदर बी हे पर श्रद्धालुएं दी रौनक नेई लब्धी। सांचेआ कुदरती निजाम गै इ'यै जेहा ऐ अज्ज जित्थें जंगल-जाड़ न कल उत्थें शैहर बसदा ऐ। कल जित्थें शैहर हुन्दा उत्थें उल्लू बोलदे। अस उत्थूआं दा परतोए तां रस्ते इच असें हलोल इच सुलतान सिकन्दर दा मकबरा दिक्खेआ।

बड़ौदा :-पावागढ़ थमां अस परतोएं ते चार बजे बड़ौदा पुज्जे। बड़ौदा अ'ऊं पैहले बी सन 1979 इच कॉलेज टूर कन्ने आया हा ते त्रै दिन इत्थें रेहा हा। हुन साढ़ा मकसद बड़ौदा शैहर दी सैर करना हा। अस इत्थें वजारें

इच फिरे-टुरे। इत्थुआं दे मैहल, बाग ते उपवन दिक्खे। एह शैहर मता गैं साफ सुथरा बझोआ।

अजादी थमां पैहलें बड़ौदा गायकबाड़ राजें दी राजधानी हा। गायकबाड़ राजें इसगी इक नमां रुप दित्ता ते इसगी शिक्षा दा केन्द्र बनाया। इत्थें महाराजा सेयाजीराव यूनिवर्सिटी दा मता नांऽ ऐ। इत्थें इक बड़्हा म्युजियम बी ऐ। मेरी मर्जी पेंथल दे राकेश शर्मा कन्ने मिलने दी बी ही। ओह मेरे जमाती छज्जुराम दा जागत ऐ। अज्ज कल इत्थें गैं रौहदा ऐ। इ 'यां गैं उधमपुर दा बी इक परोआर इत्थें बसे दा ऐ। पर त्रकालां पवा करदियां हियां इस लेई अस अहमदाबाद परतोई आए।

०००

9. सोमनाथ जातरा

सोमनाथ दा नां५ में स्कूल पढ़दे इतिहास दी पोथी इच पढ़ेआ तां इस मंदर दा इक काल्पनिक बिम्ब मेरे दमाग इच स्थायी रुप इच अंकित होई गेआ। में मन गै मन एह निश्चा कीता जे जीवन इच इक बारी इस तारीखी ते तमदनी पावन थाहर दे दर्शन करन जरूर जाना ऐ। खीर ओह दिन आई गै गेआ। 22 मार्च 2003 गी में गांधी नगर थमां सोमनाथ दी जातरा शुरु कीती।

अस बस अड्डे पुज्जे तां असेंगी उत्थुआं दा संजा छे बजे आहली जामनगर दी बस मिली। अस बस पर बेही गे। अस अहमदाबाद पुज्जे तां पता चलेआ जे जामनगर उत्थुआं दा 308 कि०मी० दूर ऐ। असेंगी बझोआ जे रात असेंगी बस इच गै गुजारना पौनी ऐ। अस अपनी-अपनी सीटें इच दबोई जन गे। बस इच रश बी मता हा। न्हेरा बी हा इस लेई रस्ते इच जेहड़े अहम थाहर आए अस उ'नेंगी नेई दिक्खी सके।

खीर साढ़ी बस 216 कि०मी० दी जातरा तैह करियै रातीं दे दस बजे राजकोट पुज्जी। उत्थें बस रुट्टी खाने गी किश चिर रुकी। में अड्डे इच खड़ोते दे इक आदमी गी पुच्छेआ। 'इत्थें गांधी जी दा स्मारक कुत्थें ऐ।' उसनै परता दिता 'कोल गै ऐ।' पर अ'ऊं उत्थें नेई गेआ। मिगी डर हा जे मेरे परतोने तोड़ी बस निकली नेई जा।

अस रुट्टी खाइयै परतिंयै बस पर बेही गे। बस 10.30 बजे चली। उसनै रातीं दे इक बजे दे करीब असेंगी जामनगर पुजाया। रस्ते इच जेहड़े निक्के-मुट्टे शैहर आए ओह न्हेरे दे कारण असेंगी नेई लब्धे।

अस जामनगर दे बस स्टैंड पर पुज्जे तां पता चलेआ जे द्वारिका लेई असेंगी बस 2.30 बजे मिलग। अस बस अड्डे पर गै बेही गे। इक बारी चाह बी पीती। ठीक 2.30 बजे द्वारिका जाने आहली बस पुज्जी गई। असें अपने-

अपने थैल्ले चुक्के ते बसै पर परतियै बेही गे। असेंगी बस इच पिच्छलियां सीटां थोइयां। अस हिचकोले खंदे उप्पर थल्लै त्रटोंदे खीर सवेरे 7 बजे द्वारिका पुरी जाई पुज्जे।

द्वारिका पुरी

द्वारिकापुरी पुज्जदे गै असें इक सराई इच कमरा लैत्ता। तौले-तौले न्हाते-धोते, कपड़े बदले ते रणछोड़ जी दा मंदर दिक्खन चली गे। अस उत्थें पुज्जे तां मंदर आरती चला करदी ही। असें बी आरती इच हिस्सा लैत्ता।

इस मंदर गी त्रैलोक्य सुन्दर जां जगत मंदर दे रूप इच मान्यता दिक्ती जंदी ऐ। एह मंदर गोमती नदी दे कंठै उप्पर निर्मित ऐ। इस मंदर दा शिखर सत्त मंजिला ऐ। मंदर दी योजना सौराष्ट्र इच प्रचलत पीठ, मंडोवर ते शिखर उप्पर आधारत ऐ। इसदा घुम्मत अट्टे स्तम्भें इच ऐ। मंदर दे बाहरले हिस्से इच नक्काशी दा कम्म होए दा ऐ। मंदर दा मुख द्वार पूर्व बक्खी ऐ। इस इच प्रदक्खना लेई रस्ता बने दा ऐ।

मंदर दे अन्दर गर्भगृह इच रणछोड़ भगवान दी मूर्ति चांदी दे सिंहासन उप्पर विराजमान ऐ। एह मूर्त काले पत्थर दी ऐ। एह इक मीटर उच्चि ऐ। इस दियां चार भुजा न।

इस मंदर दे कछ गै त्रिविक्रम जी ते प्रद्युमन जी दे मंदर न। कुशेश्वर भगवान दा मंदर बी इत्थें गै ऐ।

अस एह मंदर दिक्खियै बजार इच आई गे। किश चिर गोमती नदी दे कंठै खड़ोते। सवेरे उत्थें पानी घट्ट हा। आखदे न जे दपैहरिं पानी चढ़दा ऐ। असें उत्थें समुन्दर दे दक्ख बी दिक्खे पर शैहर इच खास रौनक नेई बझोई। इक्के-दुक्के तीरथ-जातरी गै लब्भे। शैहर बी उजड़े-उजड़े दा लब्भा। धर्मशालां, होटल ते किश दकानां नमें ढंगै दियां बी लब्भियां पर उत्थें आओ जाई मती घट्ट ही।

खीर अस बस्स अड्डे उप्पर पुज्जे। उत्थें भेंट द्वारिका लेई इक मैटाडोर जा करदी ही। अस उस उप्पर बेही गे। भेंट द्वारिका उत्थूआं दा 32 किलोमीटर दूर ही। अस रस्ते इच किश चिर लेई गोपी तलाऽ उतरे। उत्थें तलाऽ दी मिट्टी

गी गोपी चन्दन गलांदे न। असें एह मिट्टी गंधी बन्नी ते बसै पर आई विराजे।

नागेश्वर मंदर :-गोपी तलाऽ दा चले तां अस रस्ते इच नागेश्वर मंदर कछ आई उतरे। असेंगी दस्सेआ गोआ जे एह नागेश्वर मंदर बारहें ज्योर्तिलिंगें इच इक ऐ। पर इसदा स्थापत्य ते शैली दिक्खियै बझोंदा हा जे एह मता पुराना नेई ऐ।

भेंट द्वारिका :-नागेश्वर थमां साढ़ी बस भेंट द्वारिका लेई रवाना होई। अस तौले गै कछ इच पुज्जी गे। एह रेतला इलाका हा। कछ दे अखात (खाड़ी) दे कंढै मछुआरें दियां बस्तियां हियां। इ'नें बस्तियें थमां मोई दी मच्छियें दी बदबू अ'वै करदी ही। असें नक्क बंद कीता ते भेंट द्वारिका दी खाड़ी दे कंढै आई पुज्जे। इत्थें किशितयें दियां केई लाइनां लग्गी दियां हियां। अस इक किशती उप्पर बैठे। दो किलोमीटर दा समुन्दरी सफर तैह करियै भेंट द्वारिका आई पुज्जे। इत्थें असें इक रणछोड़राय दा ते दूआ शंखोद्वार दा मंदर दिक्खेआ। अस थोढ़े चिर इत्थें टुरे-फिरे। भेंट द्वारिका इक निक्का जेहा टापू जन हा। इत्थें मते घर मछुआरें दे हे। अस परतियै किशितयें पर बैठे ते खाड़ी दे कंढै आई लग्गे।

भेंट द्वारिका दे मंदर काठियाबाढ़ शैली इच हे 'पर महाप्रभु बल्लाभाचार्य दी हवेली इक शाही मैहल बझोंदी ही। भेंट द्वारिका थमां परतोंदे असें रणछोड़राय दा इक होर पुराना मंदर सड़क दे कंढे दिक्खेआ जिसदे परिसर इच पुरातत्व विभाग दी पट्टिका लग्गी दी ही।

पोरबन्दर लेई रवानगी :-भेंट द्वारिका थमां अस इक बजे दे करीब द्वारिका पुज्जे। यकीन नेई हुन्दा हा जे एह उ'यै द्वारिका ऐ जित्थें भगवान कृष्ण नै अपने जीवन दे खीरले दिन गुजारे हे। इत्थूआं दे मंदर ते भवन पंज सौ साल थमां पुराने नेई बझोंदे हे। इ'यां बी आखदे न जे असली द्वारिका समुन्दर इच डुब्बी गई ही। किश गलांदे न जे मूल द्वारिका सौराष्ट्र दे दक्खन इच समुन्दर दे कंढै ऐ।

असें रुट्टी खादी ते बस अड्डे पर आई गे। द्वारिका थमां सोमनाथ लेई बस जा करदी ही। असें टिकटां लेइयां ते बस उप्पर सवार होई गे। साढ़ा अगला रस्ता किश-किश फाड़ी हा। असें रस्ते इच मते गां ते गाएं दे लोक

दिक्खे। लोकें दा लाबा बी किश बक्खरा हा। उ'नें जेहड़े घटन्ने लाए दे हे ओह गोडें तोड़ी तंग ते गोडें थमां उप्पर खुल्ले हे। उन्दे गलें इच कमीजा हियां। ओह मते गै पिच्छड़े दे ते अति गरीब बझोआ दे हे। उन्दे खेत्तर बी साढ़े खेत्तरें आहला लेखा कुत्तै सीढ़ीनुमां ते कुत्तै पद्धरे हे। उन्दे कोठे बी सधारण हे। समृद्धि, सम्पन्नता दा आभास कुत्तै नेई मिलेआ। लोक फ्हाड़ियें ते खेत्तरें इच डंगर चारा करदे हे। खैर असें फ्हाड़ी इलाका ढलेआ तां मदानी इलाके इच आई पुज्जे। इत्थें किश-किश बदले दा बझोई। रस्ते इच इक निक्का शैहर बी आया। नांऽ पुच्छेआ तां पता चलेआ जे इसगी 'पोरबन्दर' गलांदे न। इ'यै महात्मा गांधी जी दी जन्मभूम ऐ। इ'यै सुदामा दी नगरी ऐ। इत्थें गै गांधी जी दा स्मारक ऐ ते सुदामा जी दा बी इक मंदर ऐ।

पोरबन्दर :-महात्मा गांधी जी दी जन्मभूम होने करी गुजरात सरकार नै पोरबन्दर गी खासा म्हत्तव दित्ता ऐ। सरकार नै इत्थें गांधी जी दे चेतें इच कीर्ति मंदर दा निर्माण कीता ऐ। इत्थें कप्पड़े दियां मिल्लां न, ध्योऽ दे कारखाने न, गुरुकुल ऐ। कन्या विद्यालय ऐ। पर्यटकें दे आकर्शन दा केन्द्र तारा मंडल ऐ। जातरियें दे रौहने लेई धर्मशालां ते होटल न। अस थोढ़ा चिर गै पोरबन्दर रुके। साढ़ी बस साइढे पंज बजे सोमनाथ लेई रवाना होई।

समुन्दर दे दक्ख :-जि'यां गै असें पोरबन्दर टप्पेआ साढ़ी बस समुन्दर दे कंढै-कंढै सड़क उप्पर द्रौड़न लगी। अस खिड़कियां खोल्लियै समुन्दर दे रमणीक दक्ख दिक्खन लगे। गरूब हुन्दे सूरज दी किरणें दी लाली कन्ने असेंगी समुन्दर दियां तरंगां बी लाल-लाल बझोन लगियां। किशियां चलांदे नाविक असेंगी समुन्दर दे पुत्तर बझोन लगे। समुन्दर दी लैहरें दा नजारा साढ़ी अक्खीं लेई अभिराम बझोन लगा।

फही अस सत्त बजे दे करीब वेरावल पुज्जे। उत्थें असें मस्जिदें दे उच्चे-उच्चे मीनार दिक्खे तां अस समझी गे जे एह नगर इस्लामी स्थापत्य कन्ने सम्पन्न ऐ। साढ़ी बस थोढ़ा चिर वेरावल रुकी ते फही सोमनाथ लेई रवाना होई। वेरावल थमां सोमनाथ मसां छे किलोमीटर दूर हा। अस बस अड्डे उप्पर उतरे। कछ गै इक सरांऽ ही। कमरे दा कराया सिरफ पंजाह रपेऽ हा। असें

कमरा लैत्ता ते बजार रुट्टी खान चली गे। असें बजार दा चक्कर लाया ते अपने कमरे इच आइयै सेई गे।

सोमनाथ

24 मार्च 2003 गी अस न्हरे उट्टे। न्हाते धोते ते सोमनाथ जी दे इतिहासक मंदर दे दर्शन करने गी चली पे। उस दिन मौसम भलेआं साफ हा। गासै उपपर बदलें दा कोई खंदोला नेई हा। सवरे-सवरे गै असेंगी धुप्प किश तेज बझोई। अस मुख सड़क उपपर आई गे। साढ़े रस्ते इच केई होटल, रेस्टोरेंट, अतिथि शालां ते सराई आइयां। असें सारें दा अवलोकन कीता ते सोमनाथ मंदर परिसर इच दाखल होए। मंदर दे परिसर इच असें सारे थमां पैहलें भारत दे महान नेता ते भारती संस्कृति कन्ने लगाऽ रखने आहले गौरव पुरुख सरदार वल्लभ भाई पटेल हुन्दी मूर्ति दे दर्शन कीते। उस मूर्ति गी श्रद्धा दे फुल्ल अर्पित करियै अस दिग्विजय द्वार बक्खी बधे। एह भव्य ते विशाल कलात्मक द्वार जामनगर दी राजमाता नै अपने सुर्गवासी पति दे चेते इच निर्मित करोआया हा। इस द्वार दा स्थापत्य मता गै आकर्शक ते कावल-ए तारीफ ऐ। एह द्वार 17 मई 1970 गी लोक अर्पित कीता गेआ। द्वार टप्पियै अस मंदर दे अन्दर दाखल होए। वर्तमान सोमनाथ मंदर दी आधार शिला सौराष्ट्र दे पूर्व महाराजा दिग्विजय सिंह नै 8 मई 1950 गी रक्खी ही। 11 मई 1951 ई० इच भारत दे पैहले राष्ट्रपति डॉ० राजेन्द्र प्रसाद जी नै इस मंदर दे गर्भगृह इच ज्योर्तिलिंग प्रतिष्ठित कीता। पूरा नमां मंदर सन 1962 इच पूरा होआ। इस मंदर दी भव्यता दिक्खियै बझोंदा हा जे एह कुशल इन्जीनियरें ते माहिर शिल्पकारें दी इक अनमोल रचना ऐ। इस मंदर दे पिछले हिस्से दियां कन्धां अरब सागर गी छूंहदियां न। इसदा परिदृश्य मता गै मोहक ते दिव्य बझोंदा ऐ। इसदी कन्धें उपपर अंकित लेख इसदी इतिहासकता दे साक्षी न।

सोमनाथ दा मूल मंदर कदूं ते कुसनै बनाया हा। इसदे बारे इच विदवानें दे मत बक्खरे-बक्खरे न। स्कन्ध पुराण इच इस थाहर शिवलिंग दा उल्लेख मिलदा ऐ पर मंदर दा नेई। इकं शिलालेख दे मताबक मूल मंदर वि० सम्वत 1225 इच सोम राजे नै अपने नांऽ उपपर बनोआया हा। अल्वरुनी नै बी अपनी कताब इच लिखे दा ऐ जे मुहम्मद गजनबी नै इक सौ साल पुराने इस मंदर गी त्रोड़ेआ हा। फरिश्ता नै लिखे दा ऐ जे महमूद गजनबी मंदर दे अन्दर गेआ

तां उसनै 15 फुट उच्ची मूर्ति (लिंग) दिक्खी ही। उसनै उसगी तोड़ी दिता हा। मंदर थमां उसगी जेह्दी बेशुमार दौलत मिली उसगी लेइयै ओह गजनी चली गेआ हा।

इस घटनां दे बाद जूनागढ़, अजमेर, गुजरात, मालवा दे राजें इसदा केई बारी पुनर्निर्माण कीता पर हमलावरें इसगी बार-बार त्रुड़ेआ। खीर सन 1783 ई० इच इन्दौर दी महारानी अहल्याबाई नै इस मंदर दा निर्माण मूल मंदर थमां किश दूरी पर कीता। एह मंदर अज्ज बी मूल अवस्था इच ऐ। इत्थें तदूं थमां गै पूजा होआ करदी ऐ। इस मंदर दा स्थापत्य किश अनोखा ते बक्खरा ऐ। इक गली थमां सीढ़ियां ढलियै मंदर गी रस्ता जंदा ऐ। सोमनाथ मंदर दे पुजारी इत्थें गै श्रद्धालुएं थमां पूजा-पाठ करोआंदे न। इस मंदर परिसर इच श्री अहल्येश्वर, अन्न पूर्णा, गणपति ते श्री काशी विश्वानाथ दे मंदर बी हैंन। इ'नें मंदरें दे दर्शन करियै अ'ऊं मुख सड़कै पर आई गेआ। उत्थें टांगे खड़ोते दे हे। असें इक टांगा कीता ते अस सूर्य मंदर दिक्खन चली पे। एह मंदर कछ गै हा। इत्थें नेड़ै-तेड़ै होर बी मंदर हे। अस सारें थमां पैहलें हिंगलाज माता दे मंदर गे। फही असें सूर्यमंदर, सिद्धनाथ महादेव मंदर, बलदेव मंदर, राम मंदर, भीमेश्वर महादेव मंदर, नरसिंह मंदर ते केई होर निक्के बड़्डे मंदर दिक्खे। इ'यां इस पूरे खेत्तर इच 135 मंदर ते 19 पावन जलकुंड न। इत्थें इक त्रिवेणी घाट ऐ जित्थें हिरण्या, सरस्वती ते कपिल नदी दा संगम ऐ। गलांदे न जे हिरण्य नदी दे कंढै भगवान श्री कृष्ण दी देह दा अग्नि संस्कार कीता गेआ हा। गलांदे न श्री कृष्ण जी इक बड़ै दे बूहटे दे थल्लै बैठे दे हे जे इक शकारी दा तीर उन्दे पैरें इच लग्गा जिस कारण उ'नें देह दा त्याग कीता। इस थाहर गी अज्ज देहोत्सर्ग तीरथ गलांदे न। जित्थें त्रिवेणी दे कंढै उन्दा संस्कार होआ हा उत्थें इक नमां बने दा समाधि मंदर ऐ।

असें सोमनाथ इच ओह संग्रैहालय बी दिक्खेआ जित्थें पुरातत्व म्हतव दे पुरावशेश, मूर्तियें, स्तम्भें बगैर दे रूप इच प्रदर्शित न। इत्थें असें जामे-मस्जिद बी दिक्खी।

सोमनाथ तीर्थ दे दर्शन करियै असें इक बारी फही विशाल अरब सागर उप्पर नजर मारी ते बस अड़्डे आई गे। असेंगी तौले गै जूनागढ़ दी बस मिली। असें सीटां मल्लियां ते बस बी चली पेई।

जूनागढ़ :-सोमनाथ थमां जूनागढ़ लगभग नब्बै किलोमीटर दूर हा। अस 11 बजे सोमनाथ दा चले ते इक बजे दे करीब जूनागढ़ पुज्जी गे। जूनागढ़ बी इक इतिहासक नगर ऐ। इसदा पराना नांऽ गिरिनगर हा। इ 'यां ते एह नगर मता गै सुन्हाकड़ा ऐ। इत्थें शक्कर बाग ते सरदार बाग पर्यटकें लेई आकर्शन दा केन्द्र न। शैहरै दे कछ गै उपर कोट नांऽ दा इक किला बी ऐ जिसदे खंडहर अज्ज बी खड़ोते दे न। किले दे अन्दर राणक देवी दा मैहल अपनी खूबसूरती लेई मशहूर रेहा ऐ। जूनागढ़ इच नरसिंह मेहता दा चौरा बी जातरियें लेई श्रद्धा दा केन्द्र ऐ। नरसिंह मेहता इक भक्त कवि ऐ। ओह इत्थें बेहियै भजन-कीर्तन करदे हे। उन्दे चौरा दे बछकार इक गोल चबूतरा ऐ जिसगी रास चौरा गलांदे न। इत्थें इक हाल बी ऐ जिसदे अन्दर नरसिंह मेहता दे जीवन चरित्र दे चित्तर प्रदर्शित न।

जूनागढ़ कछ गै इक चट्टान ऐ जिस उप्पर अशोक दे समें दा इक शिलालेख उत्कीर्ण ऐ। इसदा समां 256 ई०पू० मित्थेआ जंदा ऐ। आक्खदे न जे इस शिलालेख कछ पैहलें इक सुदर्शन नांऽ दी झील ही पर हुन ओह इक जंगल इच बदली गेदी ऐ। इत्थें कछ गै सन 150 ई० दा रुद्र दमन नांऽ दे राजे दा बी शिलालेख मिलदा ऐ। इक शिलालेख सन 456 ई० दा स्कन्दगुप्त दे समें दा बी ऐ। जूनागढ़ असें मुस्लिम स्थापत्य कन्ने जुड़े दे केई भवन बी दिक्खे जिन्दे इच जाम-ए-मस्जिद बी ही।

गिरनार :-जूनागढ़ दिक्खियै अस गिरनार दे आधार शिविर इच आटोरिक्षा उप्पर पुज्जे। इत्थें असें अपना समान इक दुकान इच जमा करोआया ते चढ़ाई चढ़ने लेई तेआर होई गे। उप्पर चढ़ने लेई इ 'यां गै सीढ़ियां हियां जि 'यां अज्ज बी माता वैष्णो देवी दे दर्शन करने लेई जाने आस्तै परानियां सीढ़ियां न।

असें दपैहरीं कोई डेढ़ बजे चढ़ाई चढ़ना शुरु कींती। रस्ते इच असेंगी मते श्रद्धालु मिले जेहड़े थल्लै ढला करदे हे। उत्थें पालकियें दा प्रबन्ध बी हा। मिगी एह दिक्खियै मता दुक्ख होआ जे उत्थें जनानियें दियां पालकियां जनानियां चुक्कदियां न। अस कोई त्रै बजे पैहली 'टूक' पुज्जे। इसगी उपरकोट गलांदे न। इत्थें प्रवेश लेई इक ड्योढ़ी ऐ। असें ड्योढ़ी टप्पी। अगें जैनियें दे देरासर हे।

जैन मंदर :- जैन मंदरें गी देरासर बी गलांदे न। गिरनार फ़ाड़ इच जैनियें दे केई मंदर न। जिन्दे इच नेमि नाथ दा मंदर सारें थमां बड़्डा ऐ। एह संगमरमर दा ऐ। इसदी योजना इच गर्भगृह, स्तम्भ युक्त कक्ष ते अन्तराल ओंदे न। गर्भगृह इच नेमिनाथ दी मूर्ति स्थापत ऐ जेहड़ी खड़ोती दी ऐ। इसदा मंडप जां कक्ष कलात्मक खम्भें कन्ने सज्जे दा ऐ। इस मंदर इच कला दी सूख्मता साफ-साफ लब्धदी ऐ। इसदे अलंकरण कोमल ते कलात्मक न। इसदा शिखर बाकी जैन मंदरें आह्ला लेखा गै ऐ।

नेमिनाथ दे इलावा पारसनाथ, वस्तुवाल, तेजपाल दे बी इत्थें मंदर न जिन्दी कलात्मकता उप्पर पारखियें मती प्रशंसा कीती दी ऐ।

अस जैन मंदर दिक्खियै भीमकुंड, गोमुखी गंगा, महाप्रभु बल्लभाचार्य दा मठ, राणकदेवी दा मैहल, राजुल दी गुफा दिक्खने गी गे। उत्थुआं दा असें इक किलोमीटर चढ़ाई चढ़ी ते फ़ही अम्बा जी दे मंदर जाई पुज्जे। असेंगी फ़ाड़ी शिखर उप्पर निर्मित एह मंदर बड़ा गै सुन्हाकड़ा ते दिव्य बझोआ। इत्थें होर बी मते जातरी आए दे हे। ओह सारे देवी दे दर्शन करियै थल्लै ढला करदे हे। अस बी पिछली बक्खी थल्ले गी ढले। उत्थुआं दा इक किलोमीटर ढक्की ढली फ़ही त्रेढे होए ते अद्धा किलोमीटर होर चले ते दत्तात्रेय दे पवित्तर थाहर जाई पुज्जे। एह थाहर इक चबूतरे दे रूप इच हा। इत्थें असें दत्तात्रेय दे चरणें दे नशान दिक्खे जिनेंगी पुजारी फुल्लें कन्ने ढक्का करदा हा। इस चबूतरे कोल गै पुरातत्व विभाग दा इक बोर्ड हा जिस थमां बझोआ हा जे एह थाहर मता पुराना ऐ।

अस दर्शन करियै उप्पर चढ़े। किश थल्लै असे दत्तात्रेय सम्प्रदाय दा मठ बी दिक्खेआ। उत्थें साधुएँ दे केई जत्थे बैठे दे हे।

इत्थें दिक्खने गी होर बी मते थाहर हे। अस गुरु गोरखनाथ दे कालका दे शिखर न्हेरा पौने दे कारण नेई दिक्खी सक्के। भरतवन ते शेशवन बी असें दूर थमां गै दिक्खे। इ'यां पांडव गुफा, भरथरी गुफा, पत्थर चट्टी नेह थाहर बी नेडै-तेडै गै हे।

अस अम्बा जी दे मंदर कोई सत्त बजे परतोए। असें उत्थें रौहना मनासब

नेई समझेआ। असें ढक्की ढली ते नौ बजे आधार शिविर इच पुज्जे। उत्थूआं दा अपने-अपने थैल्ले चुक्के, आटोरिक्षा कीता ते जूनागढ़ बस अड्डे पर पुज्जे। बस अड्डे पर गै असें किश खादा-पीता। जूनागढ़ थमां अहमदाबाद लेई रातीं दे दस बजे दे करीब रवाना होए ते सवैरें छे बजे अस अहमदाबाद पुज्जी गे। उस दिन मार्च दी 25 तरीक ही।

असें आटो कीता ते सवैरें सत्त बजे कर्णावती अपने जागतै दे फ्लैट इच ठीक-ठीक पुज्जी गे। एह साढ़े लेई मती गै सुखद जातरा ही।

०००

10. कच्छ जातरा

कच्छ भूमि दे दर्शन करने दी ख्वाहिश मेरे मनै इच मते चिरै थमां ही। सन 1980 इच में नागराजा भैड़ दी कारक दा विश्लेशण कीता तां उस थमां एह निश्कर्ष निकलेआ जे उसनै बी 'कच्छ देस' दी जातरा कीती ही ते उत्यूआं दी राजकुमारी कन्ने ब्याह करियै ओह इस पहाड़ी प्रदेश इच परतोआ हा। कच्छ दा इक नांऽ पाताल लोक बी ऐ। डोगरी लोक गाथाएं इच बी इसगी पाताल लोक ते किश होर कताबें इच पातालेन बी वर्णित ऐ। मेरा अपना मत एह हा जे नागें दा मूल स्थान कच्छ देस हा जिसगी पाताल लोक बी आक्खेआ जंदा हा। नाग प्रजाति दे लोक इत्यूआं दा गै देशै दे बक्खरे-बक्खरे प्रदेशें इच फैले।

मेरा बड़डा जागत नलिनाक्ष कुमार अहमदाबाद रौहन्दा ऐ। अ'ऊं जदूं बी उस गी मिलन अहमदाबाद जन्नां तां ओह मिगी घुमाने-फिराने आस्तै लेई जंदा ऐ। सन 2009 गी अ'ऊं 30 जनवरी गी अपनी पत्नी गी कन्ने लेइयै उसदे डेरै पुज्जा तां उसनै मिगी पुच्छेआ-ऐगती तुस कुत्थे जाना पसंद करगेओ। में 'कच्छ' दा नांऽ लैता। उसनै इन्टरनेट खोलेआ। कच्छ बारै जरूरी सूचना कठेरियां ते फही गलान लगा-परसों ऐतवार ऐ। मिगी छुट्टी ऐ। अ'ऊं इक दऊं छुट्टियां होर जोड़ी लैड। अस सवैरे-सवैरे गै निकली जागे।

पैहली फरवरी 2009 गी मेरी पत्नी अनुसूया, नूंह-मोनिका ते पोत्तरा दिव्याक्ष उसदी कार उप्पर बैठे। उसनै कार ड्राइव कीती ते ओह असेंगी बाहरली सड़क पर लेई आया। असें जिला अहमदाबाद दियां हद्दों पार कीतियां ते जिला राजकोट दे अन्दर प्रवेश कीता। राजकोट दे रस्ते इच इक रेस्टोरेंट हा। उसदा बेहड़ा मता खुल्ला हा। उथें अट्ठ-दस गड्डियां ते किश कारां खड़ोती दियां हियां। मेरे जागतै नै बी उथें अपनी कार खड़ोरी। अस थल्लै उतरे ते नाश्ता कीता। उथें में इक जातरी गी पुच्छेआ ओह कुत्थे जा

करदा ऐ ? उसनै परता दिता पोरबन्दर। उत्थें जेहिड़या बसां खड़ोती दियां हियां ओह राजकोट, पोरबन्दर जां भुज्ज जा करदियां हियां। भुज्ज कच्छ दा मुख्व केन्द्र हा। में उसगी पुच्छेआ-भुज्ज इत्थूआं दा किन्नी दूर ऐ ? उसनै दस्सेआ-122 किलोमीटर। मिगी बझोआ जे हुन सवेरे दे 11 बजा करदे न। असेंगी भुज्ज पुज्जदे इक बजी जाना ऐ।

अस रेस्टोरेंट थमां अगगे बधे। हुन साढ़ी गड्डी भुज्ज जाने आहली सड़क उपपर द्रौड़न लगी। अस मसां दस किलोमीटर अगगें बधे हगे जे असेंगी इक लम्मा पुल पार करना पेआ। इस पुल दे सज्जै-खब्बै लूनै दे खेत्तर हे। इ'नें खेत्तरें इच समुन्दर दा पानी हा जेहड़ा सुक्कने लेई छोड़ेआ गेदा हा। मते खेत्तरें दा पानी सुक्की गेदा हा। उत्थें मजूर लूनै दे ढेर ला करदे हे। उन्दे कोल गै लून ढोने आहले ट्रक खड़ोते दे हे। निक्की-निक्की क्रेनां बी हियां। ओह ट्रक लददा करदियां हियां। केइयें थाहरें लूनै दी कम्पनियें दे नांs पट्ट बी लगे दे हे। साढ़ी नजर जित्थें तोड़ी जंदी असेंगी बस लून गै लून दे खेत्तर लब्धदे। इ'नें खेत्तरें दे थल्लै समुन्दर दे कंढै बिजली पैदा करने आहले पक्खें दे खम्भे लम्मी-लम्मी कतारें इच असेंगी लब्धे। एह फंगे आहले खम्भे इ'यां में पूरे सौराष्ट्र इच दिक्खे हे। पुल पार करने इच असेंगी अद्धा घंटा लगा। असें पुल पार कीता तां सौराष्ट्र दी सीमा खत्म होई ते असें कच्छ दे जिला भुज्ज दी सीमा इच प्रवेश कीता।

कच्छ दे जिला भुज्ज दा दक्ख गै किश बक्खरा हा। उत्थें किश बरै पैहलें जेहड़ा भूंचाल आया हा उस कन्ने ग्रां दे ग्रां तबाह होई गे हे। रस्ते इच असें दर्जनें दी तैदाद इच उजड़े दे ग्राएं गी दिक्खेआ। उन्दे थाहर जेहड़े नमें ग्रां बसै करदे हे उन्दे घर-कोठें दा स्थापत्य इक्कै जेहा हा। हर ग्रां दे बाहरली सड़क उपपर इक बोर्ड हुन्दा-फलाना ग्रां, फलाने राज्य पास्सेआ पुर्ननिर्मित। सारे नमें मकान पक्के हे ते आधुनिक शैली इच हे।

कच्छ साढ़े देस दा इक ऐसा खेत्तर ऐ जिसदी जमीन हिलदी गै रौहन्दी ऐ। इत्थें भूंचाल औंदे गै रौहन्दे न। सन 1819 इच इत्थें जेहड़ा भूंचाल आया हा उस कन्नै सत्त जहार घर नष्ट होए हे ते 1140 लोक मरे हे। इ'यां गै सन 2002 इच इत्थें जेहड़ा बड़डा भूंचाल आया उस कन्ने बी बड़ी बड़्डी तबाही होई ही। असें सड़क दे कंढै जेहड़े उजड़े दे ग्रां दिक्खे ओह सन 2002 दे

भूंचाल दे गै अवशेश हे। भूंचाल दी तबाही ते नवनिर्माण दे मंजर दिक्खदे-
दिक्खदे अस इक बजे कच्छ के मुख केन्दरी नगर भुज्ज पुज्जे।

भुज्ज :- भुज्ज अजादी थमां पैहले कच्छ राजें दी राजधानी हा। राव खेंजर जी प्रथम नै सन 1549 इच इसगी अपने राज्य दी राजधानी लेई चुनेआ हा। सन 1723 ई० इच राव देशाल जी नै भुज्ज किले दियां कन्धां खड़ेरियां हियां। इस नगर उप्पर बाहरली ताकतें छे बारी हमले कीते। दऊं बारी ते स्थानी राजें उ'नेंगी पछाड़ेआ पर चार बारी ओह असफल रेह्। राजधानी गी हमलावरें थमां बचाने लेई स्थानी राजें इसदे इर्द-गिर्द पैंती फुट्ट उच्ची ते चार फुट्ट मुट्टी दीवार खड़ेरी। उसदे नशान अज्ज बी लब्धदे न।

जिन्ना पुराना नगर एह ऐ उ'नें गै पुराने इत्थें तारीखी अवशेश मिलदे न जिन्दे इच किश भज्जी त्रुट्टी हालत इच अज्ज बी दिक्खे जाई सकदे न। इन्दे इच जमादार फतेह मुहम्मद दा गुम्बद, मुहम्मद पानाह दी मस्जिद, राजा परगमल जी दा मैहल, शरद बाग मैहल वर्णन जोग न।

इत्थें भारतीय सांस्कृतिक दर्शन नांऽ दा इक संस्थान ऐ। एह इक लोक संग्रैहालय ऐ। इसी दिक्खियै अ'ऊं मता प्रभावत होआ। मेरे मनै इच बी आया काश इ'यै जेहा डुग्गर लोक संस्कृति कन्ने सरबन्धित संग्रैहालय जे जम्मू इच बी होऐ तां किन्नी शैल गल्ल होग। इसी दिक्खने दे बाद अस ऐना मैहल, राव लखपत दी छतरी, रामकुंड, कलानेश्वर मंदर, परानी कचैहरी, कच्छ म्युजियम दिक्खन बी गे। अ'ऊं दऊं-त्रऊं स्कूलें इच बी गेआ। स्कूल टीचरें कन्ने मिलेआ। पही असें बजार रुट्टी खादी ते अगली पडांऽ लेई त्रै बजे दपैहरीं टुरी पे। अहमदाबाद थमां भुज्ज 410 किलोमीटर दूर हा। इत्थें पुज्जनें इच असेंगी छे घंटे लगे हे। रस्ते इच असें केई औद्योगिक केन्दर दिक्खियै एह लाना लाई लेआ जे गुजरात दी खुशहाली दा कारण केह् ऐ। सरकार नै कारखानें लेई रेगिस्तानी इलाका चुनेआ। इत्थें खुल्लियां ते चौड़ियां सड़कां बनोआइयां, बिजली दी व्यवस्था कीती। मिगी बी बझोआ जे साढ़ी सरकार जे उद्योग बक्खी ध्यान दे'यै तां साढ़े राज्य दा बी काया-कल्प होई सकदा ऐ।

मिगी इत्थें इक शैल गल्ल एह बझोई जे सरकार स्थानी तारीखी, तमदनी थाहरें दी अहमियत समझदी ऐ। स्थानी लोक कलाएं दे संरक्षण दे प्रति बी जागरुक ऐ। ऐना मैहल, द कच्छ म्युजियम, भारतीय संस्कृति दर्शन भुज्ज इच

ऐसे केन्द्र न जित्थें सदियां पुरानी पुरातत्व म्हत्तव दियां चीजां सुरक्षित न। इत्थुआं दे तलाऽ बी मिगी मते कलात्मक बझोए। में कच्छ म्युजियम इच कशीदाकारी, चित्रकारी दे जेहड़े नमूने दिक्खे, उन्दे थमां अ'ऊं मता प्रभावत होआ।

अस भुज्ज थमां नारायण सरोवर लेई दपैहरीं कोई त्रै बजे दे करीब चले। नारायण सरोवर भुज्ज थमां कोई 160 किलोमीटर दूर हा। भुज्ज थमां बीह किलोमीटर तोड़ी ते असेंगी रस्ते इच केई हट्टियां, घर मकान ते निक्के-निक्के ग्रां लब्भे। उन्दे अगें फही सुनसान ते वियावान जंगल, झाड़ियां ते रेतला इलाका लब्भन लगा। फही बीह-पंजी किलोमीटर अगें बधे तां कोई नां कोई निक्का मुट्टा ग्रां लब्भी जंदा हा। भुज्ज थमां अस चार बजे दे करीब नखराना कसबे इच पुज्जे। एह् थाहर भुज्ज थमां पंजाह कि.मी. दूर हा। इत्थें निक्का मुट्टा बजार बी हा। असें इत्थें किश खरीददारी बी कीती ते अगें बधे। अगला रस्ता बी सुनसान हा। रेतला इलाका झाड़ियां, कुदै-कुदै बूहटे फही जंगल गै जंगल। बिच-बिच फही ग्रां, फही सुन्नापन। खीर छे बजे दे करीब अस मातानू मठ पुज्जे। इत्थें असें श्रद्धालुएं दी मती भीड़ दिक्खी। अस बी कार थमां थल्लै उतरे ते मंदर माता दे दर्शन करन गे। मंदर साधारन कोटि दा हा पर स्थानी लोकें दी आस्था दा मुख्र केन्द्र हा। मंदर कन्ने इक निक्का बजार हा जित्थें खाने-पीने दियां चीजा उपलब्ध हियां। अस इत्थें कोई अद्धा घंटा रुके। लोकें दा लाब्बा दिक्खेआ, गुजरातियें थमां किश बक्खरा बझोआ। पुच्छने पर पता चलेआ जे कच्छ इच बी बक्खरे-बक्करे कबीलें दे लोक रौहन्दे न। उन्दा खान-पीन ते लाबा बक्खरा-बक्खरा ऐ।

अस थोढ़ा चिर बजार फिरे-दुरे ते फही कार उप्पर बेही गे। माता दे मंदर थमां नारायण सरोवर 60 कि.मी. दूर हा। रस्ते इच असेंगी टामें-टामें ग्रां गै लब्भे। सड़क दे दोनें कंठे दे पिच्छें जंगल-जाड़ गै बझोंदे हे। खीर रातीं दे नौ बजे दे करीब अस नारायण-सरोवर पुज्जी गे।

अस मैनेजर गी मिले। दऊं कमरे कराये पर लैत्ते ते फही रुट्टी खाईयै सेई गे। उत्थें रौहने-बौहने लेई इक दुमंजली सरांऽ ही। असेंगी उपरले छत कमरे मिले।

नारायण सरोवर :-नारायण सरोवर हिन्दुएं दा इक पवित्तर तीरथ मन्नेआं जन्दा ऐ। एह तीरथ अरब सागर दे कोल गै स्थित ऐ। इस सरोवर दा वर्णन पौराणिक-साहित्य इच मिलदा ऐ। हिन्दू ग्रंथें इच पंज सरोवर पवित्तर मित्थे गेदे न। ओह न-कैलाश सरोवर, पम्मा सरोवर, बिन्दू सरोवर, पुष्कर राज ते नारायण सरोवर। अस न्होते-धोते ते नारायण-सरोवर दे दर्शन करन थल्लै उतरे। इत्थें न्हौने लेई गर्म पानी दी व्यवस्था ही। थाहर-थाहर पानी दे ड्रम हे। उन्दे थल्लै अगग बला करदी ही। ड्रम गी टूटी लग्गी दी ही। बाल्टी भरो ते स्नान गृह इच स्नान करो। अस पूजा दा समान लेइयै नारायण सरोवर दे घाट पुज्जे। उत्थें उ'यै जेही व्यवस्था ही जि'यां दूएं थाहर हुन्दी ऐ। सरोवर दे पच्छमी ते उत्तर बक्खी अटारियां हियां। पच्छम बक्खी न्हौने दा घाट हा। सरोवर दा पानी साफ नेई हा, इस लेई मते घट्ट लोक उस इच डुबकी ला करदे हे। मिम्मी टल्ले खोले ते डुबकी लाई। लाड़ी मेरी नै पेटीकोट लाया ते ओह बी डुबकी लान आई गेई। घाट दे कंठै केई निक्के-बड्डे मंदर बने दे हे। उन्दे इच किश नमें ते किश मते पराने हे। अस मंदरें इच बी गे। उत्थें हिन्दू देवी देवतें दियां मतियां मूर्तां हियां। स्थापत्य इच कोई नमांपन नेई बझोआ। एह मंदर इट्टें कन्ने बने दे हे। कुदै-कुदै पत्थरें दियां कन्थां बी हियां। सरोवर बी कोई मता बड्डा नेई हा। अन्दाजन बीह कनाल इच फैले दा बझोंदा हा। अस उत्थें पुज्जे तां अद्धा सरोवर खाल्ली हा। इक सरोवर दे कंठै इक 'बडै' दा बूहटा बी हा। सरोवर दा इक पुजारी आया। उसनै बूहटे दे थल्लै असंगी ब्हालेआ ते साढ़े थमां पिंड बटाय।

नारायण सरोवर दे दर्शन करियै अस द्वारिकाधीश मंदर दे दर्शन करन गे। एह इक भव्य सौराष्ट्र शैली दा मंदर हा। इसदा निर्माण 1790 ई० इच कच्छ दी रानी मान कुंवर राजमां नै करोआया हा।

अ'ऊं मंदर इच फिरेआ-टुरेआ। में मंदर परिसर इच शान्त ते अध्यात्मक म्हाँल दिक्खेआ। साधु-संत किश मंगते बी मिगी उत्थें लब्धे। इस तीरथ स्थान दी व्यवस्था स्थानी ट्रस्ट करदा ऐ। इत्थें देव-दिवाली दा उत्सव हर बरै बड़े जोश कन्ने मनाया जंदा ऐ। इस इच ज्हारां लोक हिस्सा लैंदे न। इक मेला इत्थें कतक म्हीने दी सुद गी दस थमां पंदरां तरीक गी हुन्दा ऐ।

कोटेश्वर :-नारायण सरोवर तीरथ दी जातरा करियै अस कोटेश्वर मंदर

दे दर्शन करन गे। एह मंदर अरब सागर दे कंढे इक उच्चे टिब्बे उप्पर निर्मित ऐ। मंदर तोड़ी पुज्जने लेई सीढ़ियां चढ़ना पौंदियां न। असें सीढ़ियां चढ़ियां ते उप्पर गे। मंदर गी समुन्दरै दी भौड़े थमां बचाने लेई टिल्ले दे समुन्दर पास्सेआ उच्चियां-उच्चियां कन्धां चाढ़ी गेदियां न। मंदर इच प्रवेश लेई इक कक्ष थमां गुजरना पौंदा ऐ। अस मंदर दे गर्भगृह इच गे तां उत्थें असें इक उच्चा ते दिव्य शिवलिंग दिक्खेआ जिसदा रंग काला हा। मंदर दे शिखर बी मते उच्चे हे। मंदर दी भव्यता दिक्खियै इ'यां बझोंदा हा जे शिल्पकारें इसदा निर्माण करदे अपनी दक्षता ते निपुणता गी साकार रूप देई दिते दा ऐ। इस मंदर कन्ने इक कथा एह जुड़ी दी ऐ जे इसदा शिवलिंग भगवान शिव नै रावण गी लैंका लेई जाने आसै भेंट कीता हा पर कुसै मजबूरी कारण उसगी लिंग इत्थें स्थापत करना पेआ।

अस मंदर थमां थल्लै आए। कोल गै समुन्दर हा। समुन्दर इच इक दऊं ज्हाज खड़ोते दे हे। तट पर गै तटरक्षकें दा दल समुन्दर दी रक्षा लेई तैनात हा। ओह बड़ी मुस्तैदी कन्ने समुन्दर उप्पर नज़र रक्खा दे हे। समुन्दर उप्पर नज़र मिम्मी रक्खी। मिगी कच्छ दा दक्खनी सिरा कमजोर बझोआ। इस सिरे दे इक बक्खी समुन्दर हा। समुन्दर दे कन्ने-कन्ने जंगल-जाड़ न। मता इलाका सुनसान ऐ। जे दुश्मन दे आदमी इ'नें जंगलें इच दाखल होई जान तां उ'नेंगी तुप्पना बी औखा ऐ। पर में दिक्खेआ जे साढ़े जुआनें जंगलें इच बी जीप रोड़ बनाई दियां हियां। ऊंटे दी मदद कन्ने राखी करने दी व्यवस्था बी ही।

अस कोटेश्वर दे दर्शन करियै कार उप्पर बेही गे। साढ़ी अगली पड़ाऽ लखपत दा शैहर हा। एह नारायण सरोवर थमां कोई त्रीह किलोमीटर दूर हा। गलांदे न जे 1801 ई० थमां पैहले एह इक मशहूर बन्दरगाह दे नांऽ कन्ने जानेआ जन्दा हा। पर सन 1819 ई० इच इत्थें इक खतरनाक भूंचाल आया जिस कारण एह शैहर तबाह होई गेआ। हुन इत्थें सिरफ दऊं सौ मुशआरें दे घर न। एह शैहर बी पैंती फुट्ट उच्ची दीवार कन्ने घिरे दा हा। इत्थें इक मजबूत किला बी हा जिसदा निर्माण 1801 ई० इच जमेदार फतेह मुहम्मद नै करोआया हा। इत्थें इजाजत लेइयै जाना पौंदा हा, इस लेई अस एह शैहर नेई दिक्खी सके। इ'यां गलांदे न जे एह कराची कन्ने जुड़े दा हा ते इत्थूआं दा कराची पुज्जने इच छे घेंटे लगदे हे।

अस अगें नेई बधे। जागतै कार मोड़ी ते अस पही नारायण सरोवर पुज्जे ते पही उत्थूआं दा भुज्ज लेई टुरी पे। रस्ते इच जंगल जाड़ें इच असेंगी केई जंगली जानवर द्रौड़ां लांदे ते फिरदे-टुरदे लब्धे जिन्दे इच मते हिरन ते नीलगाय हियां। इक दऊं थाहरे असें जंगली खोत्ते बी दिक्खे। जंगलें इच पशु चारदे असें मते मर्द ते जनानियां बी दिक्खियां जेहड़े हत्थें इच सोटे पकड़ियै पशु हक्कै करदे हे। उन्दे लाबे बक्खरे-बक्खरे थाहरें बक्खरे-बक्खरे हे। पता चलेआ जे इत्थें बी डुग्गर आहला लेखा बक्खरे-बक्खरे कबीले दे लोक रौहन्दे न। किश कबीले इत्थें रेगिस्तानी इलाके इच बी रौहन्दे न। कच्छ इच मुख्ख दऊं रेगिस्तान न जि'नेंगी निक्का रन कच्छ ते बड़डा रन कच्छ गलांदे न। बड़डा कच्छ 4.5 लक्ख एकड़ इच फैले दा ऐ ते निक्का 2.5 लक्ख एकड़ इच ऐ। मते पर्यटक इ'नेंगी दिक्खन बी जन्दे न।

इ'यां ते इत्थें स्थानी कच्छ उपभाशा दा गै प्रचलन ऐ। एह गुजराती लिपि इच लिखी जंदी ऐ। इसदे इच केई शिलालेख उपलब्ध न। किश शिलालेख में भुज्ज दे संग्रैहालय इच बी दिक्खे।

कच्छ दा पूरा इलाका 45612 किलोमीटर इच फैले दा ऐ। एह गुजरात राज्य दा सारें थमां बड़डा जनपद ऐ।

सन 1991 इच कच्छ दी जनसंख्या 12,65,507 ही। इन्दे इच 3,87,857 लोक शैहरें इच रौहन्दे हे। इत्थें शैहरें दी तैदाद सिरफ दस ऐ। कच्छ रेल कन्ने बी जुड़े दा ऐ। गुजरात सरकार नै इस खेत्तर इच 4,943 कि०मी० लम्मी सड़कें दा जाल बिछाये दा ऐ। सड़कां पक्कियां ते पुख्या न। इ'यै कारण ऐ जे इत्थें यातायात इच कोई वाधा नेई औंदी।

कच्छ दस्तकारी ते कशीदाकारी लेई बी मशहूर ऐ।

लोक ते जन जीवन :- कच्छ इच केई प्रजातियें दे लोक रौहन्दे न जिन्दे इच मुख्ख न जाट, अहीर, राबरी, पटेल ते हरिजन बगैरा। गलांदे न जे जाट सिन्ध थमां इत्थें चरागाहें दी तलाश इच आए हे ते पही इत्थूं दे स्थाई बाशिन्दे बनी गे, एह खेती-बाड़ी दा कम्म करदे न। इन्दे बी इत्थें केई वर्ग न जि'यां धारासिया, धनेथ फकीरियानी जाट बगैरा। एह सारे मुसलमान न। अहीर आपूं गी कृष्ण दे वंशज मित्थदे न। इन्दा गलाना ऐ जे गोकुल-मथुरा थमां आए दे

न। इन्दा कम्म पशु पालन ते दुद्ध-देही दा व्यवसाय ऐ। इन्दे इत्थें चार वर्ग न-प्राणधारिया, मछोआ, बोरिचा ते सोराठिया। इन्दे इच कुड़ी दे रिश्ते लेई जागतै आह्लें थमां उपहार ते पैहे लैने दी प्रथा ऐ।

राबरी कच्छ दा इक अनौखा कबीला ऐ। इन्दे उप्पर देश-विदेश दे विद्वान शोध करा दे न। एह खाना-बदोस मिथ्ये जैन्दे न। इक थाहर एह नेई टिकदे, थाहर-थाहर घुम्मदे-फिरदे न। गलांदे न जे एह जैसलमेर थमां इत्थे आए हे। कच्छ इच में राबरी कबीले दे केई लोक दिक्खे, इन्दे कन्ने मिले। मते घट्ट लोक हिन्दी समझदे न। इन्दा परिधान बी बक्खरा ऐ। मर्द चिट्टे ते जनानियां काले टल्ले लांदियां न। इत्थुआं दे पटेल ज़मीदारें इच गनोदे न। कच्छ दे बकास इच इन्दा मता हत्थ ऐ। एह हर खेत्तर इच छाये दे न। इन्दी आर्थक दशा उन्नत ऐ ते एह समृद्ध न। पटेल स्वामी नारायण दे भक्त न ते उमिया माता जी गी अपनी इष्ट देवी मिथ्ये दे न। इन्दे बी दऊं वर्ग न-कादु बा पटेल ते लहुवा पटेल। हरिजनें इच इत्थें मते मेघवाल जाति कन्ने सरबन्धित न। एह बी जुलाहे आह्ला कम्म करदे न। केई विद्वान इनेंगी कच्छ दे मूल निवासी मिथ्ये दे न। एह रामदेव पीर गी अपना इष्ट मन्दे न।

नाथपंथ :-कच्छ इच बी नाथ पंथ दा असर रेहा ऐ। डुग्गर आह्ला लेखा इत्थें बी गुरु गोरखनाथ, राजा गोपी चन्द, राजा भरथरी ते गोगा पीर दी लोकगाथां गाईयां जंदियां न ते इन्दी पूजा कीती जंदी ऐ। गोगापीर दी इत्थें बी थाहर-थाहर मड़ियां न जित्थें सप्पै दे डंगे दे लोकें दा इलाज कीता जंदा ऐ। असें रस्ते इच पाथा पीर दा थाहर बी दिक्खेआ जेहड़ा कन्न फट्टे जोगियें दा कच्छ इच मुख केन्दर ऐ।

नाग पूजा :-असल इच कच्छ दी जातरा में नाग संस्कृति दे चि'न तुप्पने दे उद्देश्य कन्ने शुरु कीती ही। मिगी इत्थें ते डुग्गर इच नाग संस्कृति कन्ने जुड़ी दी परम्परां इक्कै जेही बझोइआं। इत्थें बी नागें दे निक्के-निक्के देहरे न जि'नेंगी पालिये गलाया जंदा ऐ। इ'नें पालियें इच कुदै कुंडली मारे ते फन चुक्के दे नाग पत्थरें इच उत्कीर्ण लब्भदे न ते कुदै इक आदमी दे हत्थ नाग पगड़े दियां मूर्तां बी लब्भदियां न। एह जेहियां मूर्तां पूरे डुग्गर प्रदेश इच न। इत्थें बी नाग पंचमी दा त्याहार बड़े जोश कन्ने मनाया जंदा ऐ।

पालिये :-(मोहरे) जि'यां डुग्गर इच मोहरे थापियै उन्दी पूजा दा विधान ऐ इ'यां गै कच्छ दी लोक संस्कृति इच बी मोहरे दी स्थापना कीती जन्दी ऐ ते उ'नेंगी पूज्जेआ जंदा ऐ। केई पालियें इच शिलालेख बी मिलदे न। पालियें गी सन्दूर लाने दी प्रथा बी ऐ।

हठग्रही :- डुग्गर आह्ला लेखा कच्छ इच बी पाड़ा प्रथा दा प्रचलन रेहा ऐ। पाड़े पर बौहने आहले गी हठग्रही गलाया जंदा ऐ। कच्छ इच बी डुग्गर आह्ला लेख कुसै गल्ल जां मंग गी मनोआने लेई हठाग्रह कीता जंदा हा। एह हठग्रह केई किसम दे हे। जिसदे खलाफ हठाग्रह करना हुन्दा हठाग्रही उसदे घर जाइयै अपना खून छिड़कियै बी हठाग्रह करी लैंदा। ओह अपने ढिड्ढे इच जां गले इच कटार मारियै बी हठाग्रह करी सकदा हा। किश लोक भुरका पाइयै बी हठाग्रह करदे हे। हठाग्रह दा इक तरीका होर बी हा। हठाग्रह करने आह्ला अपने शरीरै गी अगग लांदा ते फही इक मशाल बन्नियै उस मनुख बक्खी बद्धा जिसदे खलाफ ओह हठाग्रह करा दा हुन्दा। ओह इन्ने चिर परदक्खना करदा जि'ना चिर उसदी हत्थे दी कलाई जलियै थल्लै नेई पौंदी। इसगी कच्छ इच दगलिया हठाग्रह गलांदे हे।

इसदा इक रूप होर बी हा। किश ब्राह्मण चादर बिछाइयै सिरहाना रक्खियै बेही जन्दे। ओह हत्थै इच माला फेरदे। त्रुं दिनें दे बाद उन्दा मुखिया खड़ोई जन्दा। उस कन्ने सारा ग्रां खड़ोई जन्दा। मुखिया मंग नेई मनोने पर कटार अपने ढिड्ढ जां गले उप्पर मारने थमां पैहलें हत्थै दी माला दूए दे हत्थ इच देइयै आत्मघात करियै ढेई पौंदा। फही इ'यां गै दूआ करदा फही त्रि'या करदा। केई बारी सारे हठाग्रही इक्कै बारी कटार मारदे। केई बारी उन्दियां जनानियां बी इस इच शामिल हुन्दियां। ओह बी कटार खाईयै मरी जन्दियां हियां। एह प्रथा कच्छ इच मुख रूप इच चारणें इच प्रचलत ही।

अ'ऊं इस प्रथा दा आदि स्रोत तुप्पने दा इरादा लेइयै नारायण सरोवर थमां भुज्ज ते फही भुज थमां अंजर बिच्चे हुन्दा राती 11 बजे अहमदाबाद पुज्जा। अ'ऊं गांधी धाम ते कांडला नेई जाई सकेआ इसदा अफसोस मिगी अज्ज तोड़ी ऐ।

11. माऊंट आबू जातरा

माऊंट आबू दी जातरा असें अहमदाबाद थमां शुरू कीती। 27 मार्च 2003 गी अस अहमदाबाद थमां अपने जागते थमां विदा होए ते बस अड्डे पुज्जे।

बस अड्डे थमां असेंगी माऊंट आबू लेई सिद्धी बस नेई लब्धी। अस अहमदाबाद थमां पालनपुर दी बस पर बैठे। 9 बजे दे करीब अस पालनपुर पुज्जे। पालनपुर बी मिगी पराना ते तारीखी थाहर बझोआ। पुच्छेआ तां पता चलेआ जे एह शैहर परानी पालनपुर रियासत दा दारोखलाफा हा। इत्थें असें मते पराने मकान ते तारीखी नशानियां दिक्खियां। इत्थें जैनियें दे बी केई मंदर न जिन्दा निर्माण गलांदे न जे तेहरमीं सदी इच होआ हा।

असें पालनपुर थमां आबु दी बस पकड़ी। रस्ते इच मेरे साथी नै दस्सेआ जे फाड़ दे थल्ले इस इक पराना शैहर हा जिसदा नांऽ चन्द्रावती हा। सन 1824 इच इत्थें 20 जैन मंदर हे पर हुन सारे धराशायी न। शैहर जंगल इच तबदील ऐ। अस 11 बजे दे करीब आबु रोड़ पुज्जे। उत्थें बी केई दफ्तर ते राज योग कन्ने जुड़े दे भवन दिक्खे। आबु बस अड्डे थमां असें माऊंट आबू लेई बस पकड़ी। आबु थमां माऊंट करीब 25 कि.मी. फाड़ी उप्पर हा। अस 12 बजे दे करीब माऊंट आबु पुज्जे।

माऊंट आबु एरावली फाड़ शृंखला इच गिनेआ जंदा ऐ। एह राजस्थान दे जिला सिरोह दे अन्तर्गत ऐ। इसदी स्थिती $24^{\circ}.36$ उत्तर रेखांश इच ते 72.45° अक्षांश इच ऐ। एह सताह समुन्दर थमां 1290 मीटर उच्चा ऐ। इसदे शिखर गी गुरु शिखर गलांदे न। एह शिखर समुन्दर तल थमां 5653 फुट्ट उच्चा ऐ।

इतिहास दी कताबें इच बी इसदा वर्णन मिलदा ऐ। गलांदे न मुनि विशिष्ट ते दूए ऋषियें इत्थें इक अग्नि कुंड प्रज्वलत कीता जिस थमां चार

राजपूत कुलें दी उत्पत्ति होई। पैहले एह चालुक्य राजें दे अधिकार इच हा ते बाद इच बुंदेलें ते चौहानें दा इस उप्पर अधिकार रेहा। केई सदियें तोड़ी ऐ मेवाड़ दे राणें दे हत्थें इच सुरक्षत रेहा खीर इच मुगलें इस उप्पर जित्त हासल कीती।

अस जि'यां गै माऊंट आबू दे फ़ाड़ दे बस स्टैंड उप्पर पुज्जे सारें थमां पैहलें दिलवाड़ा इच जैन मंदर दिक्खन गे।

दिलवाड़ा दे जैन मंदर :-इस फ़ाड़ उप्पर जैनिएं दे दऊं बड़्डे मंदर न। इन्दे इच इक विमलशाही मंदर ऐ ते दूआ तेजपाल नांऽ दा मंदर ऐ। दिलवाड़ा दे एह मंदर परकोटे कन्ने घिरे दे न। एह संगमरमर पत्थर कन्ने निर्मित न।

विमल शाही मंदर :-एह भारत दे जैन मंदरें इच चूड़ामणि ऐ। इस मंदर दा निर्माण 11वीं सदी इच गुजरात दे सोलंकी राजा भीमदेव दे वजीर विमलशाह नै करोआया हा। जैन मंदरें इच एह पराना ते पूरा मंदर ऐ। इसदी निर्माण योजना जैन धर्म दे सिद्धान्तें दे मताबक ऐ। इस मंदर दा मुख भवन 145 फुट लम्में ते 95 फुट चौड़े प्रांगण इच निर्मित ऐ। मंदर दी योजना स्वस्तिकार ऐ। इस दे प्रमुख त्रै अंग न-खम्भे कन्नै युक्त द्वार मंडप, अन्तराल ते गर्भगृह। गर्भगृह इच जैन तीर्थकार आदिनाथ जी दी मूर्ति प्रतिष्ठित ऐ। कला दी दृष्टि कन्ने एह मंदर बेजोड़ ऐ। इस मंदर दी नक्कासी दिक्खने दे काबल ऐ।

तेजपाल मंदर :-इस मंदर दा निर्माण 13वीं सदी इच मित्थेआ जंदा ऐ। इसदा निर्माण सोलंकी राजे दे मंत्री तेजपाल नै करोआया हा। इस लेई इसगी तेजपाल मंदर गलांदे न। इस मंदर दे निर्माण इच तेजपाल दे भ्राऽ वस्तुपाल नै बी सहजोग दित्ता। सन 1230 गी इ'नें दोनें भ्राएं मंदर दा कम्म शुरु करोआया ते सन 1236 ई० इच एह मंदर पूरा होआ। एह बी संगमरमर दे पत्थरें कन्ने निर्मित ऐ। नक्काशी दा कम्म इत्थें बी दिक्खने जोग ऐ। इस मंदर दी बनावट, निर्माण योजना ते अलंकरण पद्धति विमलशाह मंदर कन्ने मिलदी-जुलदी ऐ।

दिलवाड़ा दे एह मंदर बाहर थमां सादे न ते अन्दर थमां कलात्मक न। इ'नें मंदरें दी कारीगरी दिक्खियै रूहानगी हुन्दी ऐ।

दिलवाड़े दे मंदर दिक्खियै असैं नाकी झील दा अवलोकन कीता ते फही अस प्रजापति ब्रह्म-कुमारियें दा केन्द्र दिक्खने गी गे। उत्थें संयोजकें असेंगी इक बड्डे हाल इच ब्हालेआ ते अपने सम्प्रदाय दे दार्शनक सिद्धान्त तस्वीरें दे माध्यम कन्ने समझाए। अस केन्द्र थमां बाहर आए तें पर्यटन-विभाग दी बस उप्पर बैठे। फही अस पूरे खेत्तर दा अवलोकन करन निकले। बस असेंगी सिद्धी अधर देवी मंदर लेई गई। एह मंदर बी चट्टाने दा अद्भुत नमूना ऐ। इस इच दुर्गा माता दी मती परानी मूर्ति ऐ। मंदर तोड़ी पुज्जने लेई सीढ़ियां चढ़ना पौंदियां न।

रस्ते इच असें इक होर शिव मंदर दिक्खेआ। मंदर थमां बाहर खड़ोते तां इक फाड़ी शिखर उप्पर अचलगढ़ किला लब्धा। इस किले इच बी इक शिवमंदर ऐ जिसगी अचलेश्वर महादेव मंदर गलांदे न। मंदरै कोल मंदाकिनी कुण्ड ऐ। मंदर थमां किले गी रस्ता जंदा ऐ। इस किले दे बारे इच गलांदे न जे इसदा निर्माण 1452 ई० इच महाराणा कुम्भा नै करोआया हा। अचलगढ़ इच बी जैन मंदर न जि'नेंगी चौमुखा बी गलांदे न। इत्थें 14 पत्थरें दे बने दे बुत्त बी प्रदर्शित न।

इत्थें दिक्खने आस्तै नाकी झील, गणेश प्वाईट, अनादर प्वाईट बी न जित्थें कुदरत दा शलैपा नमें रंग रूप इच बझोंदा ऐ। मते लोक इत्थें सूर्य अस्त दा दक्ख दिक्खन बी औंदे न। एह दक्ख मता गै रोमांचकारी हुन्दा ऐ।

माऊंट आबू दी सैर करियै अस थल्लै ढली आए। रुट्टी खादी ते रेलवे स्टेशन आई गे। दिल्ली दियां टिकटां जि'यां कि'यां मिली गेइआं। रेल उप्पर बैठे। रेल दा नांऽ सर्वोदय हा। एह आबु थमां रातीं नौ बजे चली ते दूरे दिन 11 बजे दिल्ली पुज्जी।

उस्सै दिन में पत्नी गी दिल्ली दी सैर बी कराई। उसी लाल किला, चांदनी चौक, शीश गंज, राजघाट, विजय घाट, शक्तिस्थल बगैरा दस्से ते फही त्रकालें अस लाल किले कछ आई गे।

उत्थूआं दा असें कटड़ा लेई बस पकड़ी। दूरे ध्याड़ै सवैरै-सवैरै अस कटड़ा पुज्जे ते फही कटड़ा थमां पैथल आई गे।

साढ़े लेई एह इक चेत्ता नेई भुल्लने आहली जातरा ही।

12. हल्दी घाटी जातड़ा

17 दिसम्बर 2005 गी इक बारी पही परतियै अ'ऊं पैथल थमां चलेआ ते 18 दिसम्बर गी संजा अहमदाबाद पुज्जा। मेरी धर्म पत्नी मेरे कनै ही।

उ'नें दिनें अहमदाबाद इच स्कूले इच छुट्टियां हियां। मेरी नूह मोनिका ते पोतरा दिव्याक्ष घर गै हे। उन्दी मर्जी बी बाहर घुम्मे फिरने दी ही। असें सारे मिलियै अम्बा जी जाने दा प्रोग्राम बनाया।

23 दिसम्बर गी अस अहमदाबाद थमां उदयपुर सड़क पाससै बधे। शुरु इच मता रस्ता पढ़रा हा। अस हिम्मत नगर पुज्जे तां फाड़िये दा सिलसिला शुरु होआ। इत्थूआं दा गै अस श्री अम्बा जी दे शक्ति स्थल बक्खी मुड़े।

श्री अम्बा जी

त्रकालें अस अम्बा जी पुज्जे। इत्थें इक निक्का जेहा बजार हा। होटल, गेस्ट हाऊस ते लॉज मते जैदा हे। माता दे श्रद्धालुएं दी तदाद बी ज्हारें इच ही। मते श्रद्धालु गुजरात जां राजस्थान थमां आए दे हे। इ'यां एह् थाहर गुजरात राज्य दे अन्तर्गत ऐ। असें उत्थें रात अम्बा जी भवन ट्रस्ट इच गुजारी ते सवैरै न्हाई धोइयै अस देवी जी दे दर्शन करन मंदर परिसर इच गे। मंदर परिसर दे दौनें पाससै सज्जै ते खब्बै हट्टिये दियां कतारां हियां। शैद दोनें बक्खी सौ दे करीब दकानां हियां। मझाटला थाहर चौड़ा हा। जातरिये दे औने ते जाने लेई बक्ख-बक्ख रस्ते हे। अस परिसर इच दाखल होए ते दर्शन करने आहलें दी पंक्ति इच खड़ोई गे। उ'नें दिनें भीड़ भामें मती नेई ही पही बी पंज सौ थमां बी बद्ध लोक साढे अगें खड़ोते दे हे। अस 7 बजे दे आए ते नौ बजे दे बाद असेंगी मंदर इच देवी दी मूर्ति दे दर्शन होए।

में मंदर उप्पर इक सरसरी नजर पाई। स्थापत्य दी दृष्टि कन्ने मिगी एह् मंदर गुजरात-काठियावाड़ शैली दा बझोआ। इस मंदर दा निर्माण कुशल

शिल्पियें कीते दा ऐ। गुजरात इच इ'नें कारीगिरें गी सलत जां सलवत गलांदे न। इन्दे अगगें स्थापत्य दी कोई पूर्व निर्धारत योजना नेई हुन्दी। स्थानी जन जीवन, लोक परम्परा ते पौराणिक कथाएं दी आधार भूमि गी लेइयै एह मंदरें दा निर्माण करदे न। गुजरात इच मंदर निर्माण इच सहजोग देना इक धार्मिक कम्म मित्थेआ जंदा ऐ। इस लेई सारे लोक इस इच सहजोग दिन्दे न। अम्बा जी दा मंदर बी राजें-महाराजें दे कन्ने-कन्ने जनता दे सहजोग कन्ने निर्मित ऐ। इसदी कन्धें उप्पर चांदी दी परत जड़ी गेदी ऐ। शिल्पियें अपनी कलात्मक भावनाएं दी अभिव्यक्ति इसदी कन्धें पर कीती दी ऐ। मंदर दी योजना इच गर्भगृह ते प्रदक्खना पथ समाहित ऐ। अस मत्थां टेक्कियै मंदर परिसर थमां बाहर आए। असें इक हट्टी इच बेहियै नाशता कीता ते कार उप्पर बेही गे।

कुमभारिये दा मंदर :-अस अम्बा जी थमां चले ते कुमभारिया जी दे मंदर दिक्खन आई गे। इत्थें असें पंज जैन मंदर दिक्खे। एह मंदर दसमीं ते बारमीं सदी दे बिच दे न। पैहले एह थाहर उपेक्षित हा पर हुन इस थाहर दी बी सांभ-सम्भाल कीती जा करदी ऐ।

कुमभरिया थमां अस आबू रोड़ उप्पर आए। रस्ते इच इक फ्हाड़ी टीले उप्पर साढ़ी नज़र इक होर मंदर उप्पर पेई। पैहले लोक उत्थें चढ़ाई चढ़ियै पुज्जदे हे पर हुन उप्पर जाने लेई उड्डन खटोला उपलब्ध ऐ।

अस उत्थें नेई गे। अस अगगें गी बधे। हुन साढ़ी अगली मंजल आबु हा।

हल्दी घाटी

आबू उत्थूआं दा 21 किलोमीटर दूर हा। पूरा रस्ता फ्हाड़ी ते जंगल जाड़ें कन्ने भरोचे दा हा। आबू थमां अस पिण्डबारा लेई मुड़े। एह उपनगर उत्थूआं दा कोई चाली कि.मी. दूर हा। पिण्डबारे थमां असें नाथद्वारा दी सड़क पकड़ी। नाथ द्वारा उत्थूआं दा 72 कि.मी. दूर हा। अस नाथ द्वारा जा करदे हे ते रस्ते इच चानचक्क मेरी नज़र इक बोर्ड उप्पर पेई। बोर्ड हिन्दी इच हा। उस इच लिखे दा हा-हल्दी घाटी, दूरी 25 कि.मी.। हल्दी-घाटी दा नांऽ पढ़दे गै मेरे शरीर दा इक इक अंग फड़कन लगा। में तारीख दी कताबें इच हल्दी-घाटी दी लड़ाई दे बारे इच मती तफसील इच पढ़े दा हा। मेरे लेई ते एह इक तारीखी

तीर्थ हा। में अपने जागतै गी गड्डी मोड़ने लेई गलाया। उसनै गड्डी मोड़ी ते अस हल्दी-घाटी बक्खी टुरी पे। अस आबू थमां गै राजस्थान प्रदेश इच हे। हल्दी घाटी राजस्थान दा गै इक गौरवमय थाहर ऐ।

साढ़ी गड्डी बड्डी चौड़ी सड़क छोड़ियै इक संकरी सड़क बक्खी मुड़ी। स्थानी लोकें सूचत कीता जे संकरी सड़क इच भील बस्तियें दी भरमार ऐ। अ'ऊं इसगी अपना सौभाग्य मिथन लगा जे मिगी उ'नें लोकें दे दर्शन करने दा मौका मिलग जिन्दे पुरखें महाराणा प्रताप दा साथ देइयै मुगल शासन दी दासता दे खलाफ छेड़े गोदे संघर्ष इच सक्रिय भूमका निभाई ही। मेरी नजर इच ओह सच्चे देस भक्त ते शौर्य ते वीरता दी प्रतिमूर्ति हे। उ'नें निस्वार्थ भाव कन्ने महाराणा प्रताप गी अपना नेत्ता मन्नेआ ते उन्दे इक शा'रि उप्पर केइयें अपना बलिदान दिता। देसै दा गौरव बचाने आहले एह जंगली लोक म्हेशा थमां गै उपेक्षा दा शाकार रेह। अ'ऊं इन्दी बस्तियें थमां लंघेआ तां इन्दा आर्थक पिछड़ापन दिक्खियै दुखी बी मता होआ। टुट्टियां फुट्टियां झोंपड़ियां, फट्टे पुराने टल्ले, बैर बेचदे इन्दे ज्यानें इन्दी दुर्दशा दी तस्वीर पेश करा करदे हे। खैर इ'नें नंग-दड़ग, बेबस अति पिछड़े दे भीलें दी बस्तियें थमां लंघदे खीर अस इक ग्रां पुज्जे जिसदा नांऽ हा बलीचा। एह जिला राज समंद दे अन्तर्गत ऐ। इत्थूआं दा उदयपुर दी दूरी सिरफ 38 किलोमीटर ऐ। इस खेत्तर दी मिट्टी दा रंग हल्दी आहला लेखा पीला ऐ, शैद इससै लेई इसदा नांऽ हल्दी घाटी प्रचलन इच आया। एह पूरा इलाका फ्हाड़ी ऐ ते रुक्ख बूहटें कन्ने भरोचें दा ऐ। इत्थें दऊं निक्कियें फ्हाड़ियें दे मझाटै इक दर्ग ऐ। इस दर्गे दा नांऽ ऐ हल्दी घाटी दर्ग। एह दर्ग लड़ाई दी दृष्टि कन्ने मता महत्त्वपूर्ण ऐ। शत्रु सेना लेई इसगी पार करना सौखा नेई। इस दर्गे दे फ्हाड़े इच छुप्पी दी फौज दुशमन गी मता नुक्सान पुजाई सकदी ऐ। इ'यां ते एह पूरी घाटी दुर्गम ऐ। इसगी आर-पार करना सौखा नेई। इस घाटी इच बनाव नांऽ दी इक उपनदी बी प्रवाहत ऐ। इस इच इक नाला होर बी ऐ जिसगी चेतक नाला गलांदे न। अनुमान ऐ हल्दी-घाटी दी लड़ाई इच महाराणा प्रताप दे घोड़े नै पैर जखमी हुन्दे होई बी जिस नाले गी पार कीता हा शैद एह उ'यै नाला हा। एह नाला पार करने दे बाद चेतक नै खीर 'खोड़ी-आमली' जगह प्राण त्यागी दिते हे। शैद एह

उ'यै थाहर ऐ जित्थें महाराणा प्रताप ते उन्दे निक्के भ्रा शक्ति सिंह दी मुलाकात होई ही। शक्ति सिंह अपना घोड़ा महाराणा प्रताप गी सौँपियै आपूं मुगल सेना इच चली गेआ हा।

हल्दी-घाटी खेत्तर इच दऊं होर म्हत्तव पूर्ण थाहर न। इक दा नांऽ बादशाही बाग ऐ। मन्नेआं जंदा ऐ जे मुगल सेना नै अपना डेरा इसै थाहर जमाया हा। सेना नै इत्थें जेहड़ा बाग विकसत कीता उसी गै बादशाही बाग गलांदे न। एह बाग हल्दी-घाटी दरें दे थल्लै ऐ। इस बाग थमां दऊं किलोमीटर दूर खमनोर गां कछ इक समतल मदान ऐ। इसगी 'रक्त तलाई' गलांदे न। एह ओह रणभूम ऐ जित्थें सन 1576 ई० इच महाराणा प्रताप ते मुगल सम्राट अकबर दे सिपाहसलार मानसिंह दी फौजें इच जबरदस्त टाकरा होआ हा। इस इक रोजा लड़ाई इच रण बांकुरें अपने ओह जौहर दस्से जिन्दी मसाल दुनियां दी तारीख इच नेई मिलदी। इस लड़ाई इच महाराणा प्रताप दा साथ भामाशाह, झाला मान, हकीम खां ते भील राजा राणा पूजा नै दिता। इस लड़ाई इच नां कुसै दी जित्त होई ते नां हार। मुगल सेनापति मानसिंह मूंह लटकाइयै बापस चली गेआ ते महाराणा प्रताप अपनी पटरानी ते जेठे पुत्तर अमर सिंह गी कन्ने लेइयै चाबंड चली गे। बाद इच एह रणभूम अतीत दी इक घटना मात्र गै मिथी जान लगी।

महाराणा प्रताप म्युजियम :-महाराणा प्रताप दे वंशज ते राजस्थान सरकार भामें इस समरभूम गी भुल्ली बैठे पर मोहन श्री माली नांऽ दा इक स्कूल मास्टर इसगी नेई भुल्लेआ। उसनै हल्दी घाटी दा चप्पा-चप्पा छानी फरोलेआ। उसनै उस थाहर गी तुप्पी लैत्ता। जित्थें महा संग्राम होआ हा। खीर सन 1997 इच मास्टर मोहन श्री माली ने अपने साधनें कन्ने महाराणा प्रताप म्युजियम स्थापित करने दा संकल्प लैत्ता जेहड़ा सन 2003 इच पूरा होआ। इस स्मारक दा उद्घाटन राजस्थान दे माननीय राज्यपाल कृष्णकान्त हुन्दे हत्थें होआ।

एह स्मारक बलीचा गां इच सड़क दे कंढै स्थित ऐ। इसदा प्रवेश द्वार राजस्थानी शैली इच ऐ। प्रवेश फीस बीह् रपेऽ प्रति व्यक्ति ऐ। स्मारक दा भवन दुमंजिला ऐ। उप्परली मंजिल इच मेबाड़ दे महाराणें दे आदमकद चित्तर

न। स्मारक इच इक होर बड़्डा हाल ऐ जिस इच मेबाड़ दी इतिहासक विभूतियें दे चित्तर न। इत्थें इक कमरे इच दर्शकें गी महाराणा प्रताप दे जीवन कन्ने सरबन्धित इक डाकुमेंटरी फिल्म बी दस्सी जंदी ऐ। इ 'यां महाराणा प्रताप नै 19 जून 1597 गी शरीर छोड़ेआ हा। इत्थें 'ध्वनि ते प्रकाश' कार्यक्रम दा आयोजन बी हुन्दा ऐ जिस इच महाराणा प्रताप दे जीवन उप्पर लौ पाई जन्दी ऐ। स्मारक इच निक्के-निक्के केई होर कक्ष बी हैन जिन्दे इच महाराणा प्रताप दा वनवासी जीवन गोरिल्ला, जुद्ध लेई भीलें कन्ने मंत्रणा करना, चेतक दा अंत बगैरा दे किश दक्ख प्रदर्शित कीते जन्दे न। संग्रहालय इच पुराने अस्त्र-शस्त्र ते लोक जीवन कन्ने जुड़ी दियां केई मूर्ता बी रक्खी गेदियां न। इत्थें महाराणा प्रताप उप्पर लिखित साहित्य बी उपलब्ध ऐ। में किश कताबां खरीदियां ते झोले इच पाइयां। असें हल्दी घाटी दी पावन भूमि गी नमन कीता ते गड्डी उप्पर बेही गे। गड्डी चलन लगी तां मिगी कवि नरेन्द्र मिश्र दियां एह पक्तियां चेता आइयां :-

यहाँ लेखनी ने जमीर को बेचा नहीं कभी,
 ये धरती राणा-प्रताप के स्वाभिमान की है।
 यह धरती वाणी पुत्रों के अमर-गान की है।
 शब्द साधकों के दिग्विजयी लक्ष्य दान की है।

असें हल्दी घाटी टप्पी ते सेही पर महाराणा प्रताप दे चित्तरें दे बिम्ब बार-बार मेरी अक्खीं दे अगें फिरन लगे। मिगी परतियै नरेन्द्र मिश्र दे एह बोल चेता आए :-

माई एहड़ा पूत जण, जेहड़ा राणा प्रताप,
 अकबर सूतो ओझके, जाण सिराणे साप,

नाथद्वारा

अस हल्दी-घाटी दे दर्शन करियै अगें गी बधे। अस जिस सड़क उप्पर चला करदे हे अगें चलयै ओह सड़क नाथद्वारा जाई लग्गी।

नाथद्वारा बी हिन्दुएं दा इक आस्था केन्द्र ऐ। महाप्रभु वल्लभाचार्य

पास्सेआ प्रवर्तक पुष्टिमार्ग दे अनुयायी इस थाहर गी मता पवित्तर मिथ्ये न। गलांदे न जे इस मंदर इच जेहड़ी कृष्ण मूर्ति ऐ ओह मथुरा थमां इत्थें आंदी गेई ही। गलांदे न जे महाप्रभु, इस मूर्ति दी पूजा करदे हे।

मुगलकाल इच बल्लभाचार्य जी दे वंशजें इस मूर्ति गी मेवाड़ दे महाराणा राजसिंह दे अनुरोध उप्पर घसियार ग्रां थमां इत्थें आन्दा। बाद इच उ'नैं एह मूर्ति सिंहाड़ ग्रां इच इक हवेली इच स्थापत कीती। श्री नाथ दे नांऽ उप्पर सिंहाड़ ग्रां दा नांऽ बी नाथद्वारा प्रचलन इच आया। नाथद्वारा उदयपुर थमां 50 किलोमीटर दूर ऐ।

नाथद्वारा गी एह श्रेय हासल ऐ जे इस मठ नै संगीत ते चित्रकला गी मता प्रोत्साहत कीता। इत्थें जेहड़ा संगीत विकसत होआ उसगी हवेली संगीत दा नांऽ दित्ता गेआ। हवेली संगीत ध्रुपद दी गै इक विधा ऐ जेहड़ी कीर्तन थमां प्रभावत ऐ। एह कीर्तन मंदरें इच कीता जंदा ऐ।

श्री नाथ दे शंगार लेई पिछवाईयें दा बी प्रमुख थाहर ऐ। पिछवाई इक तरह दा पर्दा हुन्दा ऐ जेहड़ा मूर्ति दे पिछले हिस्से इच टंगेआ जंदा ऐ।

मंदर दे दर्शन करियै अस थोड़ा चिर नाथद्वारा कस्बे इच बी फिरे। एह असेंगी मता पिछड़े दा शैहर बझोआ। इस शैहर दी सैर करियै अस उदयपुर लेई निकले। पंजाह किलोमीटर दा सफर इक घंटे इच करियै अस त्रकालें उदयपुर पुज्जे।

उदयपुर

उदयपुर भारत दे मशहूर पर्यटन स्थलें इच इक ऐ। इस नगर दी स्थापना सन 1559 ई० इच महाराणा उदय सिंह नै कीती ही। इसदी स्थिति $23^{\circ}.46$ थमां $26^{\circ}.20$ उतरी अक्षांश ते 73° थमां $74^{\circ}.35$ पूर्वी देशान्तर दे मझाटै ऐ। समुन्दर तल थमां इसदी उंचाई 577 मीटर आंकी गेदी ऐ।

उदयपुर मुगल-काल इच बी इक सुतैंतर राज्य बने दा रेहा। उदयसिंह दे पिता महाराणा प्रताप नै पूरी उमर मुगलें कन्ने टाकरा लैत्ता पर उन्दी अधीनता नेई मन्नी। उदयपुर रियास्त दे खीरले राजा भूपाल सिंह हे। ओह 30 मार्च 1949 तोड़ी इस राज्य दे महाराज प्रमुख बने दे रेह। इस तित्थ दे बाद इस

राज्य दा विलय राजस्थान प्रदेश इच होआ।

मध्यकाली नगरें आहला लेखा उदयपुर बी त्रुं कन्धें कन्ने घिरे दा शैहर हा। इसदी चौथी बक्खी पिछोला झील ही। इस नगर दे 12 दरवाजे हे जिन्दे नांऽ-चांदपोल, सूरजपोल, उदिया पोल, किशन पोल, अम्बापोल, ब्रह्मपोल, हाथी पोल, जल बुर्ज, रमणपोल, सीतापोल, देहली गेट ते दण्डपोल हे। गलांदे न पिछोला झील दा निर्माण कुसै बंजारै करोआया हा। इससै झील दे तट उप्पर एह नगर बसेआ।

अस सारे थमां पैहले फतेह सागर झील दिक्खन गे। इस झील दा निर्माण महाराणा जयसिंह नै सन 1678 ई० इच करोआया हा। उन्दे बाद महाराणा फतेह सिंह नै छे लक्ख रपेऽ खर्च कीते ते इसगी नमां रूप दित्ता। उन्दे नांऽ उप्पर गै इसदा नांऽ फतेह सागर झील प्रचलन इच आया। झील इच इक टापू ऐ। उत्थें नेहरु पार्क बने दा ऐ। इत्थें इक सौर वैध शाला बी ऐ। झील दे टापू इच नेहरु पार्क सैलानियें लेई इक आकर्शन ऐ। इत्थें केई कलात्मक छतरियां न।

फतेहपुर झील दे पिच्छे इक उच्ची फ्हाड़ी दी चोटी उप्पर सज्जन मैहल बने दा ऐ। इसगी मानसून मैहल बी गलांदे न। इस मैहल दा निर्माण महाराणा सज्जन सिंह नै करोआया हा। अस एह मैहल दिक्खियै महाराणा प्रताप स्मारक दिक्खन गे। एह बी फतेहपुर झील दे कंठे पर ऐ। महाराणा उदय सिंह नै पैहलें इत्थें गै अपने लेई मोती मैहल बनोआयां हा। इस मैहल कोल गै महाराणा प्रताप दी चेत्तक घोड़े उप्पर सवार कांस्य मूर्ति ऐ जिसदी स्थापना 1962 इच महाराणा प्रताप स्मारक समिति नै कीती ही। स्मारक तोड़ी पुज्जने लेई सीढ़ियां चढ़ना पौंदियां न। इत्थूआं दा पूरा उदयपुर शैहर लब्धदा ऐ। इत्थें हकीम खां सूरी, भामाशाह, भीलराजा ते झाला मान दियां मूर्तां बी स्थापत न। एह सारे महाराणा प्रताप दे सैहजोगी हे। इत्थें इक राकगार्डन, वीर भवन ते भामाशाह बाग बी ऐ। संजा इत्थें ध्वनि ते प्रकाश कार्यक्रम बी आयोजत हुन्दे ऐ।

इसदे बाद अस राज मैहल दिक्खन गे। मैहलै दी गास छूंहदी मीनारें, खिड़कियें दरवाजें ते झरोखें गी दिक्खियै अस मते रहाने होए। एह मैहल दऊं हिस्सैं इच ऐ-मर्दाना मैहल ते जनाना मैहल। मर्दाना मैहल दे अन्दर शीश

मैहल, कृष्ण मैहल, मदन विलास, किशन विलास, मोती मैहल, बगैरा भवन न। रानी मैहल बी स्थापत्य दी नज़र कन्ने मता सुन्हाकड़ा ऐ। इस मैहल कन्ने गै राज्य सरकार दा संग्रैहालय ऐ।

मेरे लेई इस शैहर इच मुक्ख आकर्शन हा - भारतीय लोक कला मंडप। इत्थें भारती लोक कलाएं दे संरक्षण लेई मता किश कीता जा करदा ऐ। असें इत्'थें शिल्प ग्राम बी दिक्खेआ। भूपाल नोबल्स म्यूजियम, उदयपुर म्यूजियम, संजय पार्क, राजीव गांधी उद्यान, नेहरु बाल उद्यान, पंडित दीन दयाल उपाध्याय पार्क, माणिक्यलाल वर्मा पार्क, गुलाब बाग, सुखाड़िया सर्कल ते सहेलियों दे बाड़ी इत्थूआं दे खास आकर्शन न।

अस उदयपुर फिरे-दुरे ते पही त्रकालें त्रै बजे उत्थूआं दा दुरे। अस अट्ठ बजे दे करीब अहमदाबाद पुज्जे। मेरे लेई एह जातरा मती सुखद रेही।


०००




यात्रा के लिए प्रस्थान




शोध यात्रा के लिए प्रस्थान करते लेखक




विक्टोरिया स्मारक कोलकता




प्र० शिव निर्मोही पत्नी श्रीमती अजसूया के साथ केदारनाथ धाम के बाजार में घूमते हुए। उनके दाहिने ओर मंदिर है तथा उत्तर में हिमाच्छादित




महाराणा प्रताप स्मारक, उदयपुर
लेखक पोते के साथ (दिसम्बर - 2005)



महाराणा प्रताप स्मारक, उदयपुर



राजस्थान के राजमहल में डा० भारत-भूषण और ज्ञानखंड के
विद्वान प्रभुनारायण विद्यार्थी के साथ शिव निर्मोही




पैगांग झील-लद्दाख




लेखक भारती दासज विश्वविद्यालय के प्रांगण में डोगरी
लेखकों के साथ




लेखक कोणार्क मंदिर में वर्ष : 1988




पैगांग झील - लद्दाख



गिरजा का मंदिर, परिसर (जूनागढ़ - गुजरात)



राज रानी मंदिर, भुवनेश्वर (१९८५ ई०)





रामचन्द्रन की समाधि स्थल पर
डा० देवराज वाली के साथ शिव निर्मोही



स्थान: मद्रास

वर्ष : 1990



पंजाबी विश्वविद्यालय में लेखक(पटियाला)

13. पालिताना जातरा

गुजरात विद्यापीठ दे जैन संभाग इच जैन मंदरें दी जानकारी हासल करन गेआ तां उत्थूआं दी विभाग अध्यक्षा नै मिगी पालिताना दी जातरा दा सुझाऽ दित्ता। उ'नें गलाया जे जैन-धर्म मन्नने आहलें दी एह् आस्था रेही ऐ जे देवतें दा निवास फ्हाड़ी शिखरें उप्पर हुन्दा ऐ। पालिताना इच शत्रुंजय नांऽ दा फ्हाड़ ऐ उसदे शिखर उप्पर बी जैन मंदर न तुस उन्दा बी अवलोकन करो।

पैहली मार्च 2009 गी ऐतवार हा। जागतै गी बी छुट्टी ही। उस कन्ने गल्ल कीती। ओह् मन्नी गेआ। अस सारे कार उप्पर बैठे ते सवेरे-सवेरे पालिताना लेई टुरी पे। अस भावनगर बक्खी चले। पालिताना अहमदाबाद थमां कोई 150 कि.मी. दूर हा इस लेई आधार शिविर तोड़ी पुज्जदे असेंगी कोई त्रै घंटे लगगे। साढ़े रस्ते इच लोथल बी आया। ओह् असें पैहलें दिक्खी लैते दा हा इस लेई अस उत्थें नेई गे।

आधार शिविर दा महौल पूरा कटड़ा आह्ला लेखा हा। बजार दे दोनें बक्खी होटल, गेस्ट हाऊस, सराई ते जातरा कन्ने सरबन्धित हट्टियां हियां। असें इक ढाबे इच खाना खादा। बजार दा चक्कर लाया ते चढ़ाई चढ़ने लेई तेआर होई गे। उप्पर जाने लेई मदद आस्तै उत्थें बी कटड़ा आह्ला लेखा पिट्ठू, पालकी आहले ते छिक्के आहले मजूद हे। मेरा निक्का पोतरा इक साल दा हा। मेरी नूंह नै उसगी दादी कन्ने छिक्के उप्पर ब्हालेआ। छिक्का दऊं मजूरें चुक्केआ ते ओह् चढ़ाई चढ़न लगगे। अस बी चढ़ाई चढ़न लगगे। जि'यां कटड़ा थमां वैष्णो देवी जाने लेई ढक्की ऐ ते ढक्की इच पत्थर लगगे दे न ठीक इ'यां गै उत्थें बी दऊं मीटर चौड़ी पत्थर दे स्टैप देइयै ढक्की बनी दी ही। इस ढक्की गी त्र'ऊं हिस्से इच बंडे दा हा। इक हिस्सा नंगे पैरें चलने आस्तै हा। दूआ हिस्सा पालकी जां छिक्का चुक्कने आहलें लेई हा। त्रि'या हिस्सा पैरें चप्पल लाइयै चलने आहलें आस्तै हा। शिखर उप्पर जाने लेई सड़क दा प्रबन्ध नेई

हा। तीरथ दे प्रबन्ध कर्ताएं दा मत हा जे सड़क पुज्जने कन्ने तीरथ दी पवित्तरता भंग हुन्दी ऐ।

शिविर थमां शिखर अन्दाजन सत्त किलोमीटर दूर हा। इ'यां रस्ते इच पानी दी व्यवस्था ही। पीने लेई छाह् बी उपलब्ध ही। बिच-बिच चाह् पानी लेई हट्टियां बी हियां।

असें चढ़ना शुरु कीता तां ब'रखा शुरु होई गोई। जातरु ब'रखा इच बी चलदे रेह। असें उन्दा अनुकरण कीता। जि'यां वैशणो देवी दे रस्ते इच अद्ध कुआरी मंदर ऐ इ'यां गै ढक्की दे अद्धे इच शक्ति माता दा इक मंदर हा। मते लोक उत्थें गे। अस बी गे। असें मत्था टेकेआ ते आई गे। जि'यां हाथी-मत्थे दी चढ़ाई ऐ इ'यां गै उत्थें बी सिद्धी चढ़ाई ही। एह् चढ़ाई चढ़दे साह फुल्लन लगा। चढ़ाई मती नेई ही इस लेई थकौन खास नेई होई। अस बल्लें-बल्लें चलदे त्रै बजे दे करीब उप्पर पुज्जे। उप्पर पुज्जने लेई जातरुएं गी त्रै ज्हार सीढ़ियां चढ़ना पौंदियां न। अस सारियां सीढ़ियां चढ़ियै उप्पर पुज्जे।

मंदर प्रवेश लेई दक्खन-उन्मुख इक उच्ची ड्योढी ही। असें ड्योढी लंघी ते मंदर परिसर दे अन्दर चली गे। अन्दर दा दक्ख मता गै दिव्य ते अलौकिक बझोंदा हा। जातरियें दे चलने लेई इक विथि ही ते उस विथि दे उत्तर बक्खी मंदर समेत केई भवन हे। इसदे दक्खन पाससै उच्ची दीवार ही। उस कन्ने किश निर्माण कम्म बी होऐ दा हा।

असें विथि टप्पी किश सिद्धियां चढ़ियां ते केई भवनें दा अवलोकन करदे मुख मंदर इच पुज्जे। मुख मंदर दी योजना इच इक महामंडप ते गर्भगृह हा। गर्भगृह मंडप थमां उच्चा हा। गर्भगृह दे अन्दर जैन धर्म दे पैहले तीर्थाकर आदि नाथ ऋषभ देव दी उतिष्ठ-अवस्था इच मूर्ति ही। इस मूर्ति दे पिच्छें प्रभा मंडल हा। प्रभा मंडल दे कन्ने गै वाद्य यंत्र बने दे हे जेहड़े उपलब्धि दी खुशी दे प्रतीक हे।

जैन धर्म दी एह् मान्यता ऐ जे पैहले तीर्थाकर नै इस प्हाड़ दे शिखर उप्पर घोर तप कीता हा। उ'नेंगी इत्थें गै रोशनी हासल होई ही जिसदा प्रचार बाद इच उ'नें देस दे कोने-कोने इच कीता। जैनिएं लेई एह् थाहर इन्ना गै

पावन ऐ जिन्ना बौद्ध-अनुजाइयें लेई बौद्ध गया ऐ। लक्खां श्रद्धालु इस तीर्थ दी जातरा उप्पर आँदे न।

मुख मंदर कछ नौ होर बड्डे मंदर न जिन्दे इच जैन तीर्थाकरें दियां मूर्तियां संस्थापित न। इ'नें मंदरें तोड़ी पुज्जने लेई सत्त सौ पौड़ियां होर चढनै पौड़ियां न।

पालिताना दे बड्डे मंदर पौने किलोमीटर इच फैले दे न। इत्थें कुल मंदरें दी तदाद नौ सौ दे करीब ऐ। फाड़ दा शिखर इ'नें मंदरें कन्ने भरोचे दा ऐ। विद्वानें दा गलाना ऐ जे एह मंदर 11वीं सदी थमां लेइयै 16 वीं सदी तोड़ी दे न। इ'दे निर्माण इच पंज सौ साल लगगे।

पालीताना भाव नगर थमां 55 कि.मी. दूर ऐ। सन 1947 थमां पैहले पालीताना इक निक्की जेही रियासत ही जिसदा विलय बाद इच गुजरात राज्य इच होआ।

इस तीर्थ दा इक नांऽ पिथादिराज बी ऐ। इत्थें अगेरपीर दा बी इक स्थान ऐ। उत्थें बी मते लोक श्रद्धा-भाव कन्ने मत्था टेकन जंदे न।

इस तीर्थ उप्पर रात्रि निवास वर्जित ऐ। इस लेई सारे जातरी त्रकालां पौने थमां पैहले-पैहले मूल शिविर इच परतोई आँदे न।

अस बी उत्थुआं दा परतोई आए। असें रात पालिताना इच इक पंजाबी होटल इच गुजारी।

भाव नगर :-पालिताना थमां असें सवेरे अट्ठ बजे प्रस्थान कीता। हुन साढ़ी नमीं मंजिल भावनगर शैहर हा। पालिताना थमां जेहड़ी सड़क भावनगर गी जंदी ही ओह पक्की ते सिद्धी ही। उत्थें पुज्जने इच असेंगी कुल डेढ़ घंटे दा समां लग्गा। असें नगर इच बाहरली सड़क थमां प्रवेश कीता।

भावनगर इक बन्दरगाह बी ऐ। शैहर दे बाहरी हिस्से इच असें खड़ोते दे मते ट्रक दिक्खे जिन्दे इच किश जम्मू-कश्मीर दे बी हे। असें शैहर दी अन्दरली सड़क थमां प्रवेश कीता तां असेंगी इक शैल सुन्हाकड़ा शैहर दिक्खने गी लब्भा। हुन इस शैहर दा नमीकरण होई गेदा ऐ। शैहर इक खुल्ले समतल

मदान इच स्थित ऐ इस लेई इसदा चमुखा बकास होआ करदा ऐ। अस राज मैहल दिक्खन बी गे। सन 1947 थमां पैहले भावनगर बी ब्रिटिश सरकार दे अधीन इक निक्का राज्य हा। असें शैहर दी सैर कीती। एह मता साफ सुथरा शैहर हा।

निष्कलंक महादेव

भावनगर शैहर दिक्खने दे बाद अस निष्कलंक महादेव दा तीरथ-स्थान दिक्खन गे। भावनगर थमां समुन्दर लगभग 25 किलोमीटर दूर ऐ। रस्ते इच इ'यां ते असें केई गां ते मोड़े दिक्खे पर उस खेत्तर इच असेंगी कोई खास रौस नेई बझोई। इलाका किश-किश रेतला हा इस लेई रुक्ख-बूहटे असेंगी टामें-टामें गै लब्धे। खीर अस समुन्दर दे कंठै पुज्जे।

समुन्दर थमां कोई पौना किलोमीटर दूर समुन्दर इच इक निक्का टापू हा। तीर्थ स्थान उस्सै टापू इच हा। टापू तोड़ी पुज्जने लेई असेंगी समुन्दर इच पैदल चलना हा। सवेरे-सवेरे समुन्दर इच पानी घट्ट हा। इ'यां उत्थें पानी दपैहरीं चढ़ना शुरु हुन्दा ते फही त्रकालें तोड़ी चढ़दा रौहन्दा। फही रातीं ढलना शुरु होई जंदा। इस लेई जातरी सवेरे-सवेरे उत्थें जन्दे न ते बारां बजने थमां पैहले-पैहले परतोई औंदे न।

अस समुन्दर इच उतरे तां शुरु-शुरु इच गिट्टै-गिट्टै तोड़ी पानी हा। फही पानी पिन्नियें तोड़ी आया। अस टप्पदे गे ते खीर टापू इच पुज्जी गे। उत्थें भगवान शिव दा लिंग ते चिट्टे झंडे हे। लोक शिवलिंग दी ते झंडे दी पूजा करा करदे हे। इस शिवलिंग गी गै निष्कलंक महादेव गलांदे न।

जनश्रुति ऐ जे पांडव दशाश्वमेध यज्ञ करने परैन्त प्रायश्चित करन इत्थें आए। उ'नें तप कीता तां उन्दे काले झंडे सफेद होई गे। इ'यां गै काले मन आहले लोक इत्थें बेहियै जे तप करन तां उन्दे मनै दी मैल मिटी जन्दी ऐ ते ओह निर्मल होई जन्दे न।

असें भगवान निष्कलंक महादेव दे दर्शन कीते। अस थोढ़ा अगें गे तां समुन्दर ठाठां मारा करदा हा। असें समुन्दर दर्शन वी कीता ते टापू थमां परतोई आए। मेरे लेई एह जातरा इक नमां अनुभव ही।

14. बृज मंडल जातरा

27 दिसम्बर 1998 गी में साहित्य अकादमी दिल्ली दे दफ्तर इक जरुरी मीटिंग इच शामिल होना हा। में अपने जाने दी सूचना अपनी श्रीमती होरें गी दिती तां ओह बी तेआर होई गेइयां। अ'ऊं कटड़ा गेआ ते बस दियां दऊं टिकटां लेई आया। इक टिकट उन्दे लेई ते इक अपनी।

26 दिसम्बर गी अस त्रकालें दिल्ली लेई रवाना होए। साढ़ी बस वाया चंडीगढ़ जानी ही। पंजाब पुज्जे तां कोहरा गै कोहरा हा। चंडीगढ़ पुज्जदे गै लोऽ होई गेई। साढ़ी मीटिंग सवेरे 11 बजे ही। हरियाणा इच बी कोहरा हा। असें चंडीगढ़ बी कोहरे इच गै डुब्बे दा दिक्खेआ।

खीर अ'ऊं 12.50 बजे दिल्ली पुज्जा। आटोरिक्शा कीता ते साहित्य अकादमी दे दफ्तर पुज्जा। मेरे जाने थमां पैहले इक सज्जन आए दे हे। उ'नें मेरा इन्तजार 12 बजे तक्कर कीता ते फही नराश होइयै चली गे। त्रिए साहब पुज्जे गै नेई। में इक्कले अपना कम्म निपटाय़ा ते साहित्य अकादेमी दे दफ्तर थमां फारिग होइयै चांदनी चौक आया। उत्थूआं अस आटो करियै कालू खां आए। उत्थूआं दा मथुरा लेई बसां उपलब्ध हियां। असें टिकट लैती तां बस उप्पर बेही गे। उत्थें असेंगी जम्मू दे मनोहर लाल वकील बी मिली गे। उन्दे कन्ने होर बी किश लोक हे। अस दिल्ली थमां 5 बजे चले ते अट्ठ बजे मथुरा पुज्जे। असेंगी द्वारिकाधीश मंदर कछ गै गेस्ट हाऊस इच इक कमरा मिलेआ। असें उत्थें गै डेरा जमाया। रातीं दी रुट्टी खाईयै अस किश चिर फिरे टुरे ते फही सेही गे। सवेरे अस तेआर होइयै सारें थमां पैहलें द्वारिकाधीश मंदर दे दर्शन करन गे।

द्वारिकाधीश मंदर :-मथुरा इच भगवान श्री कृष्ण गी समर्पित एह सारे थमां भव्य ते विशाल मंदर ऐ। एह मंदर इक गली इच ऐ ते उच्चे थड़े उप्पर निर्मित ऐ। मंदर तोड़ी पुज्जने लेई पोड़ियां न। मंदर दी योजना इच महा मण्डप

ते गर्भगृह ऐ। गर्भगृह दे अन्दर द्वारिकाधीश दी काले रंगै दी मूर्ति स्थापत ऐ जेहड़ी कला दी दृष्टि कन्ने बेजोड़ ऐ। गलांदे न जे एह मंदर उस जगह निर्मित ऐ जित्थें श्री कृष्ण दी राजगद्दी ही। इत्थें संजा सवरे आरती इच सैकड़ लोक शामिल हुन्दे न।

जन्मभूम :-द्वारिकाधीश थमां अस चले तां बजार इच असें होर बी केई निक्के बड़दे मंदर दिक्खे। यमुना दा बी परिदृश्य दिक्खेया। उस इच तरदियां नौकां बी दिक्खियां। फही अस रिक्शे उप्पर बैठे ते जन्मभूम दिक्खने गी चले। सन 1969 इच बी में एह थाहर दिक्खेआ हा पर हुन इसदा रूप रंग गै बदली गेदा हा। पराने मंदर दे थाहर नमां मंदर हा। नमां मंदर नमीं शैली इच ऐ। संगमरमर कन्ने बने दा ऐ। एह मंदर बी उच्चे थड़े उप्पर ऐ। इत्थें पोढ़ियां चढ़ियै उप्पर पुज्जन हुन्दा ऐ। इसदा मंडप बड़ा विशाल ऐ। कन्धें पर गीता दे श्लोक अंकत न। गलांदे न जे श्रीकृष्ण दा जन्म इसै थाहर होआ हा। इत्थें गै कंस दी जेल ही। इस मंदर कन्ने गै इक मस्जिद ऐ। इसदियां कन्धां इस मंदर कन्ने जुड़दियां न। किश गलांदे जे जित्थे मस्जिद ऐ उस कछ गै जन्मभूम ही।

असें मथुरा दा गै आटोरिक्षा कीता ते जाई पुज्जे वृन्दावन। जेहड़े कृष्ण भक्त न जां हिन्दू धर्म कन्ने जुड़े दे न ओह इस थाहर गी मता पावन मित्थदे न। ओह इसदे इक-इक कण गी बन्दे न। साढ़ा परिवार बी कृष्ण भक्त रेहा। मेरे पिता जी दे गुरु बाबा जगन्नाथ दास जी बी निम्बार्क सम्प्रदाय कन्ने जुड़े दे हे। मेरे पिता जी बी निम्बार्क सम्प्रदाय इच हे। पर मेरी स्थिति बक्खरी ही ते मेरी पत्नी दी बक्खरी। अ'ऊं इत्थें इक शोधकर्ता दे रुप इच आए दा हा ते मेरी पत्नी पूरी श्रद्धा कन्ने इक भक्तन दे रुप इच आई दी ही।

वृन्दावन दे मंदर :- इ'यां ते वृन्दावन इच मंदरें दी तदाद सैकड़ें इच ऐ। केई आश्रम ते मठ न। सारै पुज्जना मेरे लेई मुमकन नेई हा। अ'ऊं उत्थें जि'नें मंदरें इच पुज्जा ओह हे :-

1. गोविन्द देवी मंदर
2. राधा वल्लभ मंदर
3. गोपीनाथ मंदर

4. युगल-किशोर मंदर

5. मदन मोहन मंदर

एह सारे मंदर 16वीं ते 17वीं सदी दे बछकार बने दे बझोन्दे न। इ'नें मंदरें दा स्थापत्य बी बक्खरा ऐ। इ'नें मंदरें दा वास्तु विन्यास इस्लाम शैली थमां प्रभावत बझोन्दा ऐ।

गोविन्द देवी मंदर :- एह मंदर बी वृन्दावन इच ऐ। एह मंदर मिगी विशाल ते भव्य बझोआ। गलांदे न इसदा निर्माण सन 1590 इच कीता गेआ हा पर औरंगजेब दे शासन काल इच इसी नष्ट करी दिता गेआ। हुन इसदा महामंडप गै बचे दा ऐ। मूल मंदर दे थाहर हून जेहड़ा मंदर ऐ ओह 177 फुट लम्मा ते 105 फुट चौड़ा ऐ। इस मंदर दी छत योजना मुस्लिम वास्तु थमां प्रभावत ऐ। एह उच्ची ते मेहराबी ऐ। मुस्लिम पूजा भवन आह्ला लेखा इस इच मूर्तियां नेई दे बराबर न।

युगल-किशोर मंदर :- इस मंदर दी योजना बी मती नौखी ऐ। इसदा व्यास 35 फुट ऐ। इसदे अन्दर 17 फुट दा वर्गाकार गर्भगृह ऐ। बाहर दा एह आयताकार ऐ पर इसदा गर्भगृह वर्गाकार ऐ। सभाकक्ष ते गर्भगृह दे बिच्च कन्ध ऐ। इसदे शिखर दा आधार-भाग अट्ठ पल्लवदार ऐ। इसदा मुखद्वार पूर्व मुखी ऐ जिस उपर इस्लाम शैली दे अलंकरण न। इ'नें मंदरें दा अवलोकन करियै बझोआ जे 17वीं सदी इच इस खेतर इच हिन्दू ते मुस्लिम स्थापत्य इच समन्वय होन लगी पेदा हा।

असें वृन्दावन इच किश होर मंदर बी दिक्खे जिन्दे इच रामानुज सम्प्रदाय दा खम्भें आह्ला मंदर बी हा। एह दक्षिणी शैली इच हा। पही अस बांके-बिहारी मंदर, हरे रामा हरे कृष्णा आहलें दा मंदर, राधा जी दा मंदर, शाह दा मंदर ते किश होर मंदर बी दिक्खन गे।

यमुना नदी दे पच्छमी तट उपर असें इक थाहर पराने मैहलें जां भवनें दे अवशेश दिक्खे। गलांदे न जे क्रांतिकारी इत्थें रौहन्दे हे। अस निम्बार्क सम्प्रदाय दे मंदरें इच बी फिरे, कुंजगलियें इच बी फिरे। असें जमुना नदी दे रम्य दक्ख बी दिक्खे।

में वृन्दावन थमां निम्बार्क सम्प्रदाय दियां किश कताबां बी खरीदियां।
असें वृन्दावन दी प्रदक्खना बी लैत्ती ते रस्ते इच कृपालु महाराज दा आश्रम
बी दिक्खेआ।

अस किश चिर वृन्दावन इच फिरे टुरे ते पही मथुरा आई गे।

असें मथुरा दा बस पकड़ी ते जयपुर लेई खाना होई गे। हुन साढ़ी
अगली मंजिल महातीर्थ पुश्कर-राज ही।

ooo

15. पुश्कर जातरा

28 दिसम्बर 1998 गी अस बाद दपैहर मथुरा थमां चले ते ढलदी संजा अस जयपुर पुज्जे। बस अड्डे पुज्जदे गै असें अजमेर दी बस दा पता कीता। बस नै राती अट्ठ बजे प्रस्थान करना हा। साढ़े कछ किश टैम हा। अस रिकशे इच बैठे ते गुलाबी नगरी दी सुन्दरता दा अवलोकन करन बजार इच गे। रिकशे आहले नै असेंगी हवा मैहल तोड़ी लेत्ता ते फही ओह् असेंगी बस अड्डे छोड़ी गेआ। बस चलने दा समां बी होई गेदा हा। असें टिकटां लैतियां ते बसै इच सुआर होई गे। बस ठीक अट्ठ बजे चली ते उसनै रातीं दे बारां बजे असें गी अजमेर तुआरी दिता। असें बस अड्डे कछ गै इक गेस्ट हाऊस इच कमरा कराये पर लैत्ता ते सेई गे।

29 दिसम्बर गी अस सवैरे-सवैरे उट्ठे, तेआर होए ते बस अड्डे दी तपाश इच बजार इच आए। असेंगी पुश्कर राज लेई बजार थमां गै बस मिली गई। अजमेर थमां पुश्कर सिरफ 11 किलोमीटर दूर हा।

अजमेर ते पुश्कर दे दरम्यान जेहड़ा सफर हा ओह् मता गै रमणीक हा। अस खिड़की थमां मन-मोहने दक्ख दिक्खदे-दिक्खदे अद्धे घंटे इच पुश्कर राज बी पुज्जी गे।

अस बस थमां उतरे ते सरोवर दे दर्शन करन चली पे। सरोवर कोल गै हा। इसदा दक्ख मिगी मता दिव्य बझोआ। एह् सरोवर लगभग इक किलोमीटर इच परिव्याप्त हा। इस इच 52 घाट बने दे हे। हर घाट दा नांऽ बक्खरा-बक्खरा हा जि 'यां जोधपुर घाट, नाथ कोट घाट, बूंदी घाट, स्वरूप घाट, कोटा घाट, चौड़ी पेड़ी घाट, इन्द्रेश्वर घाट, करणी घाट, मुक्ति घाट, परशुरामघाट, ब्रह्मघाट, शास्त्री घाट, यज्ञघाट, भरतपुर घाट, गेरु घाट, जनक घाट, चीर घाट, रामघाट, गनघोर घाट, बद्री घाट, सरकरी घाट, विश्रामघाट, नृसिंह घाट, मूरली घाट, बराहघाट, वंशीघाट, महादेव घाट, इन्द्रघाट, चन्द्र घाट,

छत्री घाट, बंगला घाट, किशनगढ़ घाट, पाटन की पोल घाट, सप्त ऋषि घाट, बगैरा। हर घाट कन्ने धर्मशालां बनी दियां हियां। पराशर ब्राह्मण इत्थूआं दे पंडे हे।

असें बी मुक्तिघाट इच स्नान कीता ते दुनियां भर इच इको इक ब्रह्मा जी दे मंदर इच दर्शन करने लेई ब्रह्म घाट थमां होंदे मंदर दे परिसर इच पुज्जे।

एह मंदर वास्तुकला दी दृष्टि कन्ने राजस्थानी मारवाड़ी शैली इच बझोंदा हा। इसदी योजना मती गै साददी ही। उप्पर चढ़ने लेई पौड़िया हियां। अगें मंदर, मंदर दे गर्भगृह इच स्थापत ब्रह्मा जी दी मूर्ति। एह मूर्ति मिगी किश बक्खरी पर विशिष्ट बझोई। साढ़ा पंडा इक स्कूल टीचर हा। अ 'ऊं' बी टीचर हा। उसनै मेरा मता लिहाज कीता। मेरे थमां मनासब दान-दक्खना लेई। पूजा बी उससै करोआई। उसनै मते विस्तार कन्नें इस तीर्थ दा धार्मिक, सांस्कृतिक ते इतिहासक महत्त्व मिगी समझाया। उसनै गलाया जे ब्रह्मा देवता नै अपने हत्थ दा पुष्प (फुल्ल) इत्थें सुट्टेआ, इससै लेई इस थाहर दा नांऽ पेआ पुष्प+कर = पुष्पकर। फही पुष्पकर थमां पुष्कर शब्द विकसत होआ। इ 'यां' पुष्कर बी त्रै न जेष्ठ पुष्कर, मध्य पुष्कर ते कनिष्ठ पुष्कर। एह तीर्थ ज्येष्ठ पुष्कर ऐ। मध्य पुष्कर ते ज्येष्ठ पुष्कर गया कुंड दे कोल न। इत्थें देसै भर दे लोक सारा साल ओंदे न पर मती भीड़ कतक म्हीनें हुन्दी ऐ। इस म्हीनें शुक्ला दे खीरले पंज ध्याड़े जातरियें लेई मते पावन मित्थे जन्दे न। गुरु गोबिन्द सिंह जी महाराज बी इत्थें आए हे। महात्मा 'गांधी' जी दी भस्म जिस घाट उप्पर प्रवाही गेई ही उसगी हून गांधीघाट गलांदे न।

इस तीर्थ इच स्नान करने लेई ज्हारां बद्धे जातरी हर रोज ओंदे न। उन्दे रौहने लेई इत्थें दर्जनें दे स्थाबें सराई ते होटल न। इत्थें 27 बड्डियां धर्मशालां न जिन्दे इच सिंधी धर्मशाला, गुजराती धर्मशाला, बंगाली धर्मशाला, मून्दड़े दी धर्मशाला, खंडेलवाला धर्मशाला, भगवानदास दी धर्मशाला, विश्वनाथ दी धर्मशाला, महाराष्ट्रीय धर्मशाला, शेखावटी धर्मशाला, पारखें दी धर्मशाला, यादवें दी धर्मशाला बगैरा।

इत्थें जि 'यां' घाट राजें म्हाराजें बनवाये इ 'यां' गै सेठ साहुकारें धर्मशालां बनोआइयां।

पुश्कर राज दी पुराणक-कथा इ'यां ऐ जे ब्रह्मा जी नै इस थाहर इक बड्डा यज्ञ कीता। उन्दी धर्मपत्नी सावित्री चिरें पुज्जी तां उसदे थाहर देवतें गायत्री गी ब्रह्मा दी पत्नी बनाइयै यज्ञ इच बिठाई दिता। सावित्री किश चिर बाद उत्थें पुज्जी तां अपने थाहर गायत्री गी दिक्खियै जली-भुज्जी गई। उसनै ब्रह्मा गी श्राप दिता जे उन्दा मंदर पुश्कर गी छोड़ियै होर दूऐ थाहर नई होग। इन्नां आक्खियै ओह फ्हाड़ी उप्पर चढ़ी गई। जिस फ्हाड़ी उप्पर ओह चढ़ी ही उत्थें उसदा मंदर ऐ। पुश्कर इच लगभग चार सौ मंदर न पर मुख पंज गै ते ओह न :- ब्रह्मा जी दा मंदर, बाराह जी दा मंदर, अटपटेश्वर जी दा मंदर, पराना रंगनाथ मंदर ते नमां रंगनाथ मंदर। रंगनाथ दक्खनी शैली दा मंदर ऐ। आऊं एह मंदर दिक्खियै मता प्रभावत होआ।

पुश्कर दी जातरा करियै अस अजमेर आए। अजमेर पुज्जदे गै सारें थमां पैहलें अस दरगाह शरीफ गे।

दरगाह शरीफ :- एह दरगाह पूरे उपमहाद्वीप इच मशहूर ऐ। इसदे दर्शन करन भारत दे इलावा पाकिस्तान ते बंगला देस थमां बी अकीदतमंद आँदे न। इत्थें ख्वाजा मोहिउद्दीन चिश्ती दा मकबरा ऐ। एह हिन्दू ते मुसलमानें लेई अकीदे दा केन्द्र ऐ। ख्वाजा साहब गी गरीब नवाज बी गलांदे न। ओह सन 1192 ई० इच सुलतान शहाबुद्दीन गौरी कन्ने भारत आए हे ते फ्हाी ओह इत्थें गै बसी गे हे। ओह इक पुज्जे दे फकीर हे इस लेई ओह अपने जीवन इच गै मशहूर होई गे।

अस दरगाह जान लगे तां रस्ते इच असेंगी इस दरगाह दा इक सेवादर मिली गेआ। उसनै साढ़ा मार्ग-दर्शन कीता। मेरी पत्नी नै उत्थें इक चादर ते फुल्ल चाढ़े।

दरगाह परिसर इच इक बड्डी मस्जिद ऐ ते इक निक्की मस्जिद ऐ। बड्डी अकबर नै बनोआई ही ते निक्की जहाँगीर नै। इत्थें इक बड्डा कक्ष ऐ जिसगी महफिल खाना गलांदे न। इक प्रवेश द्वार ऐ। इसगी बुलन्दखाना आक्खदे न।

अजमेर शैहर :- अजमेर मिगी मता गै साफ सुथरा शैहर बझोआं। एह शैहर एरावली फ्हाड़ दी अजय मेरु फ्हाड़ी शाखाएं कन्ने घिरे दा ऐ। एह शैहर

समुन्दर तल थमां 243 मीटर उच्चा ऐ। गलांदे न जे सतमीं सदी इच राजा अजयपाल नै एह शैहर बसाया हा। एह शैहर 1193 ई० तोड़ी चौहानें दी राजधानी रेहा। पृथ्वीराज चौहान इत्थूं दा खीरला राजा हा। मुहम्मद गौरी नै उसी लड़ाई इच हराया ते इस शैहर उप्पर अधिकार करी लैत्ता। पर अमीर तैमूर नै इस शैहर गी लुट्टेआ गै नेई इसदा रूप बी विकृत करी दित्ता। अजमेर उजड़ी जन गोआ।

राणा कुम्भा नै इस नगर गी सन 1470 इच अपने अधिकार इच लैत्ता। 1531 तोड़ी ऐ नगर राणा दे अधिकार इच रेहा। 1531 दे बाद एह शैहर मुस्लिम शासकें दे अधीन रेहा। मारबाड़ दे मालदेव राठौर नै सन 1556 ई० इच इस उप्पर अधिकार कीता ते इत्थें फौजी छावनी कैम कीती। इ'यां एह शैहर हिन्दू ते मुस्लिम संस्कृति दा रला-मिला केन्दर बझोंदा ऐ। इत्थूआं दा स्थापत्य बी सांझा ऐ।

तारागढ़ दा किला :-अजमेर इच पुरातत्व म्हतत्व दे जेहड़े थाहर न उन्दे इच इक तारागढ़ दा किला ऐ। एह किला दरगाह कन्ने खड़ोती दी फ्हाड़ी दे शिखर उप्पर ऐ। गलांदे न जे एह सतमीं सदी दा ऐ। इसदा निर्माता राजा अजय पाल चौहान हा। टुट्टी-फुट्टी हालत इच अज्ज बी एह अपने थाहर खड़ोते दा ऐ। एह सड़क थमां अट्ठ सौ फुट उच्ची फ्हाड़ी उप्पर स्थित ऐ।

अना सागर झील :-एह झील बी मिगी मती आकर्शक बझोई। दऊं फ्हाड़ियें दे बछकार स्थित एह झील इक मैन-मोहक दक्ख पेश करदी ऐ। इस झील दे कंढे इक बाग ऐ। असें बाग इच बेहियै इस झील दा अवलोकन कीता। झील दे मझाटै इक निक्का टापू बी हा। उत्थें पुज्जने लेई नौकां बी हियां पर अस उत्थें नेई गे। अस एह झील दिक्खियै सड़क उप्पर आई गे। उत्थूआं दा आटोरिक्सा पकड़ेआ ते ढाई दिन का झोंपड़ा दिक्खन निकले।

ढाई दिन का झोंपड़ा :-दुनियां भर दे कला-पारखियें इतिहास-कारें, पुरातत्व वेताएं लेई एह भवन इक शोध दा विशे रेहा ऐ। एह भवन कुतुब मीनार थमां बी मता उच्चा ऐ। कुतुब मीनार इच कुल 240 खम्भे न। हर खम्भा दऊं स्तम्भें गी जोड़ियै बने दा ऐ। पर इसदे 235 खम्भे न ते इक-इक खम्भें गी त्रै स्तम्भ लगे दे न। कला पारखियें दा मत ऐ जे एह स्तम्भ मंदर त्रिोड़ियै इत्थें

जोड़े गेदे न। एह स्तम्भ मते गै शैल न। इन्दे इच नारी मूर्ता अंकत न।

कला पारखियें दा मत ऐ जे इ'नें स्तम्भें दा निर्माण काल दसवीं जां 11वीं सदी रेहा होग। एह स्तम्भ धारी-धार नेई होइयै अट्ठ पहलदार न। अजमेर इच दिक्खने गी होर बी मते थाहर हे। इत्थें महर्षि स्वामी दयानन्द सरस्वती विश्व विद्यालय बी दिक्खने लैक हा। मेरी मर्जी दिगम्बर मंदर दिक्खने दी बी ही। पर अस हर जगह नेई पुज्जी सके। उस दिन असें रुट्टी बी चिरें खादी। असेंगी अपना गेस्ट हाऊस तुप्पने इच बी मुश्कल आई। अस उत्थें रातीं बड़े हे ते न्हैरै सतें सबेला गै निकले हे। गेस्ट हाऊस दा नांऽ बी भुल्ली गेदे हे। फही बी तुक लांदे-लांदे स्हेई ठकानै पुज्जी गे। असें उत्थूं दा अपने झोले चुक्के ते बस अड्डे आई गे।

साढ़ी गंडी अजें पैहे बचे दे हे। असें सोचेआ फिरन टुरन रोज नेई औन हुन्दा, जे आई गै गे आं तां चलो इक अद्ध थाहर होर दिक्खी लैन्ने आं। अस बस अड्डे पर बैठे गै हे जे इक कन्डेक्टर अवाजा देन लगा चलो चितौड़गढ़ चलो चितौड़गढ़। असें बी आल-माल नेई कीती, टिकट लैत्ती ते चितौड़गढ़ दी बस उप्पर बेही गे।

०००

16. चित्तौड़गढ़ जातरा

अजमेर थमां चित्तौड़गढ़ 191 किलोमीटर दूर हा। अस 4 बजे दे करीब चले। साढ़ा अंदाजा हा जे असें रातीं उत्थें अट्ठ बजे पुज्जना ऐ। अस ठीक अट्ठ बजे गै पुज्जे। चित्तौड़गढ़ दा किला इक फ़ाड़ी टीले उप्पर हां। उत्थें रातीं जाना बेकार हा। असें रात इक गेस्ट हाऊस इच गुजारी। कराया 120 रपेऽ गै अदा कीता। सवेरे जि'यां गै लोऽ होई। आटो रिक्शा कीता ते चित्तौड़गढ़ दा किला दिक्खन निकली पे।

30 दिसम्बर दा ध्याड़ा मेरे लेई बी इक तारीखी दिन हा। में बचपुनें थमां गै जिस किले दा इतिहास मन-चित्त लाइयै सुने दा हा अज्ज उस किले गी प्रतक्ख दिक्खने दा मिगी मौका मिलेआ। शौर्य, वीरता, देश भक्ति ते बलिदान दी अनूठी मसाल एह किला, दुनियां भर दे किलें इच इक खास म्हत्तव रखदा ऐ तां गै इस लेई गलाया गेदा ऐ :-

‘गढ़ तो चित्तौड़गढ़ और सब गढ़ैया।’

अस किले इच पुज्जे तां गाइड बी मिली गेआ। उसनै अपना भाशन शुरू कीता इस किले दा निर्माण मौर्यवंशी राजा चित्रगुप्त नै सतवीं सदी इच करोआया हा। उसनै इसदा नांऽ अपने नांऽ उप्पर चित्रकूट रक्खेआ। चित्रकूट दा गै अपभ्रंश चित्तौड़ ऐ। सन 738 ई० इच गुहिल दे वंशज बाप्पा रावल नै मौर्यवंश दे खी'रले शासक मान मोरी गी हराइयै इसगी अपने अधिकार इच लैता। फ़ही 9वीं सदी थमां लेइयै 16वीं सदी तोड़ी एह किला सिसोदियां राजपूतें दी राजधानी रेहा। इस किलें नै केई जुद्ध दिक्खे, केई लड़ाइयां दिक्खयां, केई झड़पां दिक्खयां, केई जौहर दिक्खे, केई बारी इसदी धरती लहू कन्ने रंगोई। इस किले दे दर्शन करना मेरे लेई इक सौभाग्य हा।

गाइड असेंगी सारें थमां पैहले रावत वाघसिंह दा स्मारक दस्सन लेई

गेआ। रावत सन 1535 ई० इच गुजरात दे सुलतान बहादुरशाह दी फौज कन्ने लड़दे शहीद होए हे। स्मारक दिक्खयै अस किले दी पैहली ड्योढ़ी पाडन पोल पुज्जे। एह ड्योढ़ी इस किले दा प्रवेश द्वार ऐ। इसदे बाद अस भैरों पोल दे थल्ले दा लंगे। एह किले दी दूई ड्योढ़ी ही। सन 1534 ई० इच सोलंकी भैरोदास इत्थें गुजरात दी सेना दा मुकाबला करदा शहीद होआ हा। इसदे अगें जयपाल ते कल्ला दियां छतरियां न। एह दोऐ जोधे मुगल-सम्राट् अकबर दी फौज दा मुकाबला करदे शहीद होए हे। इन्दे अगें हनुमान पोल ऐ। एह किले दा त्रि'या दरवाजा ऐ। इत्थें हनुमान दी मूर्ति दिक्खने जोग ऐ। किले दा चौथा दरवाजा गणेश पोल, पंजमां दरवाजा जोड़ला पोल, छेमां दरवाजा लक्ष्मण पोल ते सतमां दरवाजा रामपोल ऐ। खी'रले दरवाजे कोल गै भगवान राम दा मंदर ऐ। एह मंदर स्थापत्य दी दृष्टि कन्ने अद्वितीय ऐ। मंदर दे अगें दऊं रस्ते न। उत्तर आहले रस्ते इच चित्तौड़गढ़ दी बस्ती ऐ। इत्थें अज्ज बी पंज जहार लोक रौहन्दे न। दूआ रस्ता दक्खन बक्खी जंदा ऐ। किले दे अवशेश इसै बक्खी उपलब्ध न। रामपोल थमां सौ फुट्ट दे फासले उपपर 'पता' दा स्मारक ऐ। पता 1768 ई० इच लड़ाई इच शहीद होआ हा। इसदे अगें तुलजा भवानी दा मंदर ऐ। इस मंदर दा निर्माण सन 1536-40 इच दासी पुत्तर बनवीर नै करोआया हा। इसदे बाद बनवीर दी कन्ध ऐ। सन 1536 ई० इच दासी पुत्तर बनवीर नै छल कन्ने महाराणा विक्रमादित्य दा वध करियै चित्तौड़ गी अपने अधिकार इच लैने दे बाद इस दीवार दा निर्माण करोआया हा। इस दीवार दे पच्छमी सिरे पर इक बुर्ज ऐ। इसदी बनावट पेचीदा ऐ। आखदे न जे इत्थें नौ लक्ख रपेऽ दा खजाना रक्खेआ गेआ हा। इसै लेई इसदा नांऽ नवलक्ख पेआ। इस थमां थोढ़ी दूर अगें पातालेश्वर महादेव दा मंदर ऐ। इस मंदर दा निर्माण सन 1565 ई० इच होआ हा। इस मंदर दा स्थापत्य उन्नत ऐ। इसदे थोढ़ी दूर अगें भामाशाह दी भज्जी-टुट्टी हवेली ऐ। इस कन्ने गै आल्हा काबरा दी हवेली ऐ। भामाशाह अपनी दानवीरता लेई मशहूर हा।

इस किले दे अन्दर शृंगार चंबरी दे दक्खन इच महाराणा सांगा दा देवरा ऐ। इस मंदर दा निर्माण महाराणा सांगा नै भगवान देव नारायण दी आराधना लेई करोआया हा। किले दे अगले हिस्से इच फतह प्रकाश नांऽ दा मैहल ऐ। इसदा निर्माण फतेह सिंह नै करोआया हा।

चित्तौड़गढ़ किले दे अन्दर शृंगार चंबरी दी मूर्तियें दी कला दिक्खने जोग ऐ। इत्थूआं दा इक शिलालेख बी मिलेआ हा जिस थमां एह पता चलदा ऐ जे इत्थें इक जैन मंदर हा। मुगलें दे हमलें इच उसगी नुक्सान पुज्जा ते ओह ढेई पेआ। इसदे बाद असें महाराणा कुम्भा दा मैहल भग्नावस्था इच दिक्खेआ। इस मैहल दे प्रवेशद्वार गी त्रिपोलिया आखदे न। मैहल दे अन्दर सूरज गोखड़ा, जनाना मैहल, कंचर पदा मैहल, दीवान-ए-आम ते शिव मंदर न। कुम्भा दा एह मैहल चित्तौड़गढ़ दा गौरव मिथेआ जंदा ऐ। इसदी खुदाई कीती गई तां इत्थें केई तैह्खाने ते इक सुरंग निकली। एह सुरंग गौमुख तोड़ी जंदी ऐ।

‘फतह प्रकाश’ कछ गै असें मोती बज़ार दे खंडहर बी दिक्खे। गलांदे न जे इत्थें जौहरियें दियां हट्टियां हियां। इसदे बाद असें सतवीरा देवरा दिक्खेआ। इत्थें 27 देवरियां न।

अस पही कुम्भा श्याम दा मंदर दिक्खन बी गे। इस मंदर दा निर्माण 1449 ई० इच महाराणा कुम्भा नै करोआया हा। एह मंदर भगवान विष्णु गी समर्पित ऐ। इस मंदर दे कछ गै मीरा दा मंदर ऐ। एह मंदर निक्का ऐ। इस दे सामनै इक छतरी ऐ। इस इच मीरा दे गुरु स्वामी रेदास दे चरण-चि'न अंकत न। पही अस विजय स्तम्भ दिक्खन गे। एह स्मारक 47 वर्ग फुट्ट इच ऐ। इसदा आधार 10 फुट्ट ऐ। एह 122 फुट्ट उच्चा स्मारक ऐ। इसदियां नौ मंजिलां न। इस उप्पर चढ़ने आस्तै 157 सीढ़ियां न। इसदे निर्माण उप्पर 90 लक्ख रपेऽ खर्च आया ते बनने इच सत्त बरि लागे। इसदे अन्दर पौराणक देवी-देवतें दियां मूर्तियां जड़ी दियां न। इस स्तम्भ दे कन्ने गै समिद्वेश्वर महादेव दा मंदर ऐ। किश गलांदे न जे इसदा निर्माण राजा भोज नौ 11वीं सदी इच करोआया हा। सन 1428 ई० इच महाराणा मोकल नै इसदी मरम्मत करोआई जिस कारण इसदा नांऽ ‘मोकल जी दा मंदर’ मशहूर होआ। इसदे गर्भगृह दे थल्ले इक शिवलिंग ऐ ते कन्हे इच शिव दी विशाल आकार दी त्रिमूर्ति जड़ी दी ऐ।

विजय स्तम्भ ते समिद्वेश्वर मंदर दे बश्कार इक चौड़ा मदान ऐ। एह चोनें पास्सेआ दीवार कन्ने घिरे दा ऐ। इसगी महासती जां जौहर स्थल गलांदे न। इत्थें रानी कर्मवती नै तेरां ज्हार वीरांगनाएं कन्ने जौहर कीता हा।

महासती मदान कन्ने गै गौमुख कुण्ड ऐ। इत्थें पानी दा चश्मा ऐ। इसगी तीर्थ तुल्य मिथेआ जंदा ऐ। इस थमां किश दूर हाथी कुंड ते खातन बाबड़ी ऐ।

गोकुल थमां अस माता कालिका दे मंदर गे। एह मंदर गुहिल वंशी राजें दी देन ऐ। गलांदे न जे एह पैहलें इक सूर्य मंदर हा। मुगलें दे हमलें कन्ने नश्ट होआ तां इत्थें कालिका दी मूर्ति स्थापत कीती गई। मंदर दी कन्धे, खम्भें ते छतै उप्पर खुदाई दा कम्म कमाल दा ऐ। इसदे उत्तर-पूर्व इच इक जलकुण्ड ऐ। इसगी सूरज कुण्ड गलांदे न।

सूरज कुण्ड थमां कोई दो सौ मीटर दूर पदमनी रानी दा मैहल ऐ। एह मैहल इक सरोवर दे कंठे ऐ। इक निक्का मैहल सरोवर दे अन्दर बी बने दा ऐ। इस कन्ने गै इक मरदाना मैहल ऐ। इसदे इक गोल कमरे इच शीशे लग्गे दे न जिस इच रानी दे मैहल इच खड़ोते दे व्यक्ति दा बिम्ब इ'नें शीशें इच पोंदा ऐ। गलांदे न जे अलाउद्दीन खिलजी नै इ'नें शीशें चा गै पदमनी दा बिम्ब दिक्खेआ हा।

पदमनी मैहल दे दक्खन इच खातन रानी दे मैहलें दे खंडहर न। खातन रानी महाराणा क्षेत्र सिंह दी उपपत्नी ही। इस मैहल थमां थोड़ी दूर इक कारागार ऐ जिसी भाक्सी गलांदे न। मालवा दे सुलतान महमूद गी इससै कारागार इच रक्खेआ गेआ हा। इस थमां अगें चत्रंग तलाऽ ऐ। इस तलाऽ कछ बीका खोह नांऽ दा बुर्ज ऐ। बुर्ज थमां किश छिंडै राज टीला ऐ। गलांदे न जे पैहले राजें गी इत्थें गै 'तिलक' लांदे हे।

चित्तौड़गढ़ किले दें दक्खन इच जेहड़ा बुर्ज ऐ उसगी चित्तौड़ी बुर्ज गलांदे न। इस बुर्ज दे 150 फुट्ट थल्ले इक फाड़ी टीला ऐ। आखदे न जे मुगलें इस टीले थमां गै चित्तौड़गढ़ उप्पर हमला कीता हा। इस टीले दे उत्तर इच दो गुम्बज होर न जि'नेंगी गोरा-बादल दे घुमटे आखदे न। एह दोऐ जोद्धे पदमनी दी रक्षा लेई शहीद होए हे।

इ'नें घुमटें दे अगें इक हवेली दे खंडहर मिलदे न। इस थमां अगें भीमतल कुंड ऐ। उस थमां थोड़ी दूर मंदर ऐ। मंदर थमां अगें सूरजपोल ते चूड़ावत साईदास दा स्मारक ऐ। चूड़ावत सन 1568 ई० इच मुगल सेना कन्ने

लड़दा शहीद होआ हा। सूरज पोल दे पच्छम इच नील कंठ महादेव दा मंदर ऐ। इस मंदर दे उत्तर इच इक भव्य जैन कीर्ति स्तम्भ ऐ। एह 75 फुट्ट उच्चा ऐ ते सत्त मंजिला ऐ। इसदा निर्माण चौहदमी सदी इच होआ। इस उप्पर चढ़ने लेई 54 पौड़ियां न। इसदे अन्दर जैन तीर्थकारें दियां मूर्तियां प्रदर्शित न। कीर्ति स्तम्भ कछ गै महावीर ज्यामी ते चार भुजा दे मंदर न जेहड़ें मते आकर्शक न।

इस किले इच रत्नसिंह दे मैहलें दे अवशेश बी बिखरे दे पेदे न। इन्हें मैहलें कछ बाण माता ते अन्नपूर्णा दे मंदर न। बाण माता दे मंदर दे हाते इच राघवदेव दी छतरी ऐ। इसदे कछ गै रत्नेश्वर तलाऽ ऐ तलाऽ दे कंठै रत्नेश्वर महादेव दा मंदर ऐ।

जमीन थमां 500 फुट्ट ते सतह समुन्दर थमां 1350 फुट्ट इस किले गी दिक्खने गी असें पंज घंटे लग्गे। एह किला 3.51 किलोमीटर लम्मा ते कुतै-कुतै अद्धा जां इक किलोमीटर चौड़ा ऐ। फ्हाड़ी दा घेरा लगभग 12 कि.मी. ऐ। एह 609 एकड़ भूमि इच फैले दा ऐ।

खीर इच असें पुरातत्व संग्राहलय इच मूर्तियां ते किश परानियां चीजां दिक्खियां। अस एह किला दिक्खियै मते खुश होए। पर हून एह किला वीरान हा। इसदे खंडहर अज्ज बी अपने गौरवमय अतीत दी कहानी सनांदे न।

अस थल्लै ढले। चितौड़गढ़ थमां असें जयपुर लेई बस पकड़ी। अस बाया भिलवाड़ा हुन्दे रातीं अट्ठ बजे जयपुर पुज्जे। उत्थूआं दा अस लुधियाना ते फ्ही लुधियाना थमां जम्मू ते जम्मू थमां पैथल आए।

चितौड़गढ़ दे जेहड़ें बिम्ब जातरा दरान मेरे दमाग इच बने ओह अज्ज बी कैम न।

०००

17. जयपुर जातरा

देशै दा गुलाबी शैहर जयपुर सैलानियें लेई आकर्शन दा केन्द्र मित्थेआ जन्दा ऐ। इस शैहर दे शलैपे दे बारे इच में अपने साथियें थमां मती चर्चा सुनी दी ही। इसदे बारे इच में कताबें इच बी मता किश पढ़े दा हा। मेरे मनै इच बी एह शैहर दिक्खने दी ललक ही। खी'र मेरी अभिलाशा पूरी होई। मिगी इंडियन सोसायटी फार बुद्धिस्ट स्टडी संस्था नै 'जम्मू में बुद्धमत' विशे उप्पर पेपर पढ़ने लेई जयपुर आमंत्रित कीता। उत्थें एह संस्था अपना सलाना सम्मेलन अयोजत करा दी ही। एह सम्मेलन त्रै रोज़ा हा ते इसदा उद्घाटन 3 अक्टूबर 2004 गी होना हा।

अ'ऊं निश्चत तिथि ते समें उप्पर जम्मू थमां चलेआ। पूजा ट्रेन इच बैठा ते दिल्ली थमां हुन्दा इरावली दे फ़ाड़े दे कुदरती शलैपे गी दिक्खदे होई कोई 11 बजे जयपुर पुज्जा। उत्थें इक जैन भवन इच साढ़े रौहने दा प्रबन्ध कीता गेदा हा। अ'ऊं रेलवे स्टेशन दा सिद्धा आटोरिक्षा करियै जैन-भवन पुज्जा। उत्थें इक सौ दे लगभग प्रतिनिधि पैहलें गै पुज्जी गेदे हे। इन्दे इच जम्मू दे बी किश लोक हे जिन्दे इच जम्मू यूनिवर्सिटी दे डॉ० लाभ, डॉ० अनीता बलौरिया दे अलावा ललित गुप्ता, डॉ० सुपमा गुप्ता ते प्रो० भारत भूषण मेरे पन्थानु हे।

मिगी रौहने लेई जेहड़ा कमरा मिलेआ उस इच झारखंड दे प्रभुनारायण विद्यार्थी हे। ओह इक सुलझे दे विद्वान हे। बुद्धमत उप्पर उन्दी पकड़ ही। ओह राहुल सांस्कृत्यायन हुन्दे परम भक्त हे। उ'नें गै मिगी डॉ० राज कुमारी सिन्हा हुन्दे कन्ने मिलाया। ओह डोरन्डा कॉलेज रांची इच दर्शन शास्त्र विभाग दियां अध्यक्षा हियां। बौद्ध-दर्शन ते इस्लाम उप्पर उन्दी पकड़ ही। दूआ उत्थें करीब पूरे भारत दे प्रतिनिधि पुज्जे दे हे। उन्दे इच मते सारें दा सरबन्ध दर्शन शास्त्र कन्ने हा।

सम्मेलन इच वक्ताएं गी बोलने लेई मता घट्ट समां मिलेआ, पेपर वाचकें जो बी गलाया, मते संखेप इच गलाया। मते पेपर नागार्जुन, नागसेन दी कताब मिलिन्द पनोह, बौद्ध-साहित्य, बौद्ध धर्म दी प्रधान शाखां ते सम्प्रदाय, बौद्ध-शिक्षण, बौद्ध कला, बौद्ध म्हतत्व दे थाहरें उप्पर पढ़े गे। मिमी 'डुंगर इच बौद्धमत' विशे उप्पर पेपर पढ़ेआ।

4 अक्तूबर गी दपैहरी अ'ऊं ते प्रभुनारायण 'विद्यार्थी' रुट्टी खाइयै बाहर आए ते असें इक आटोरिक्षा कीता ते जयपुर दिक्खन निकले। आटोरिक्षा आह्ला इक सरोखड़ गाइड निकलेआ। ओह रिक्शा चलांदा जा ते कन्ने-कन्ने बजार, मंदर, धर्मशालां ते मैहलें दे नांऽ बी दसदा जा। ओह असेंगी राज मैहल दस्सन लेई गेआ। अन्दर जाने लेई टिकट ही। असें टिकटां लेइआं ते मैहल दिक्खन गे। में इ'ने मैहलें दी तारीफ मती सुनी दी ही पर उ'नेंगी दिक्खने दा मौका मिगी पैहली बारी मिलेआ। अस मैहल दे अन्दर गे। हुन एह मैहल इक संग्रहालय बनी गेदे हे। इक नुमायशघर हा जित्थें रानियें कन्ने सरबन्धित चीजां, चित्तर, फोटो वगैरा प्रदर्शित हे। इक इतिहास दे विद्यार्थी लेई एह संग्रहालय उसदे शोध दा विशे बी बनी सकदा ऐ। पर अम्म पर्यटकें लेई एह थाहर मैग मपाटे लेई गै हा। मते लोक इत्थें कन्टीन इच राजस्थानी व्यंजनें दा मजा लै करदे हे।

अस संग्रहालय थमां निकले तां यंत्र-मंत्र दिक्खन गे। इ'यै जेहा भवन असें दिल्ली बी दिक्खे दा हा इस लेई नमां पन किश नेई बझोआ। हवा मैहल जरूर दिक्खने जोग हा। सन 1799 इच एह मैहल बनेआ हा। एह इ'यां मुख बजार दे मझाटै ऐ। इसदा स्थापत्य हर इक गी प्रभावत करदा ऐ।

अस राम निवास बाग दिक्खन बी गे। एह बाग सन 1868 ई० इच महाराजा रामसिंह नै विकसत कीता हा। इस इच इक चिड़िया घर बी ऐ। इक इत्थें होर संग्रहालय बी ऐ जिसदा नांऽ अल्वर्ट हाल म्युजियम ऐ। इत्थें राजस्थानी कला कन्ने सम्बन्धित वस्तुआं रक्खी गेदियां न। इस भवन दा शिलान्यास सन 1876 इच कीता गेआ हा। इत्थें दिक्खने लेई राम बाग मैहल बी ऐ पर एह हुन इक होटल इच बदली दित्ता गेदा ऐ।

जयपुर दा दूआ कोई मता लम्मा चौड़ा इतिहास बी नेई ऐ। राजकुमार

जयसिंह नै सन 1727 इच इस नगर दी योजना देसी ते बदेसी वास्तुकारें थमां तेआर करोआई ते पही इसदा बकास शुरु कीता। इस नगर दियां परानियां कंधां एह सिद्ध करदियां न जे शुरु इच एह इक किलाबंद शैहर हा।

जयपुर दे बाहरी हिस्सें इच मिगी बोहलियां, मोहरे ते सिम्ब लम्बे। ओह डुगर दी लोक कला कन्ने मते मिलदे हे। पंज अक्तूबर गी संयोजकें असेंगी जयपुर दे इर्द-गिर्द दे केई थाहरें दी सैर कराई। मेरा साथ झारखंड दे डॉ० प्रभु नारायण विद्यार्थी हुन्दे कन्ने जुड़ेआ। अस दोऐ इस जातरा इच बसै उप्पर कन्ने-कन्ने बैठे। संयोजक असेंगी सारे थमां पैहले त्रिवेणी संगम लेई गे।

त्रिवेणी संगम :-मिगी एह थाहर राजस्थान प्रदेश दा इक तीर्थ स्थान सेही होआ। इत्थें साढ़ी मलाटी संत शिरोमणि श्री नारायण दास जी कन्ने कराई गेई। ओह रामनन्द मार्गीय शाखा दे शैद प्रदेश प्रमुख हे। इक बड्डे हाल इच संयोजकें असेंगी ब्हालेआ। थोढ़े चिरें बाद श्री नारायणदास होर बी आई गे। उन्दी उपस्थिति इच उत्थें इक समारोह होआ जेहड़ा महन्त होरें गी गै समर्पित हा। वक्ताएं उन्दा गुण-गान कीता। इ'यां मिगी दस्सेआ गेआ जे गुरुदेव रामानन्द संस्कृत विश्व-विद्यालय जयपुर दे निर्माण इच महन्त हुन्दा आर्थिक योगदान काबले-तारीफ हा। किश लोकें उ'नेंगी प्रशस्ति-पत्र भेंट कीते। में उ'नेंगी अपनियां किश कताबां भेंट कीतियां। असें दपैहरीं दी रुट्टी बी उत्थूं गै खादी। अस आश्रम इच टुरे-फिरे। केई कक्ष दिक्खे। उत्थूं दा वातावरण अध्यात्मक हा। इत्थें केई गौशालां बी हियां जिन्दे इच सैकड़ें दी तदाद इच गंवा हियां। इत्थें दऊं त्रै निक्के-निक्के नाले बी हे। शैद उन्दा संगम इस्सै थाहर होए दा ऐ। ध्यान ते पूजा-पाठ लेई एह इक उपयुक्त थाहर ऐ।

अम्बेर किला :-त्रिवेणी संगम दे दर्शन करने दे बाद अस अम्बेर किला दिक्खन गे। एह जयपुर थमां 11 किलोमीटर दूर हा। इसदा पराना नांऽ धुनधार हा। इ'यै थाहर जयपुर थमां पैहले इस राज दी राजधानी हा। गलांदे न जे अम्बिकेश्वर थमां 'अम्बेर' नांऽ विकसत ऐ। इत्थें जेहड़ा किला ते मैहल न गलांदे न जे ओह 11वीं सदी दे न। मुगल काल इच बी इस किले ते मैहलें दा बकास हुन्दा रेहा। इसदे स्थापत्य उप्पर राजपूत शैली दे कन्ने-कन्ने मुगल शैली दा बी असर ऐ। इत्थें जेहड़ा विशाल मैहल ऐ उसदे निर्माण दा कम्म राजा मानसिंह नै 17वीं सदी इच शुरु कीता। उसगी सौ साल बाद सवाई

जयसिंह नै पूरा कीता। इत्थें असें म्युजियम, सूरज-पोल, चांद पोल, सिंह पोल, काली मंदर, दीवान-ए आम, गणेश पोल, सौहाग मंदर, यश मंदर, जगत शिरोमणी जी मंदर दे दर्शन कीते ते पौड़ियां ढलियै थल्लै आई गे। थल्लै असें किश पुरावशेश दिक्खे जिन्दे इच शिलालेख बी हे।

नाहर गढ़ किला :-एह किला जयपुर दी गै इक खड़ोती दी फ़ाड़ी दे शिखर उप्पर निर्मित ऐ। टीला जमीन थमां 600 फुट उच्चा ऐ। उस्सै उप्पर एह किला ऐ। इसगी सुदर्शन गढ़ बी गलांदे न। इसदा निर्माण सन 1734 ई० इच सवाई जयसिंह नै करोआया हा। असें एह किला पृथ्वीराज चौहान सड़क थमां दिक्खेआ। हुन एह किला वीरान पेदा ऐ।

जय महल :-एह जयपुर शैहर थमां 7 कि.मी. दूर ऐ। इसदा निर्माण जयपुर दे राजें हवा खोरी लेई करोआया हा। इसगी गर्मियें इच अराम करने दे मकसद कन्ने बनोआया।

संस्कृत-विश्वविद्यालय :-संयोजक असेंगी संस्कृत विश्वविद्यालय परिसर इच लेई आए। विश्व-विद्यालय इच निर्माण दा कम्म चला करदा हा। एह विश्व विद्यालय जयपुर थमां कोई दस किलोमीटर दूरी पर हा। इसदे मुख भवन दे ललाट पर लिखे दा हा - रामानन्द संस्कृत विश्वविद्यालय। इस विश्व विद्यालय दे कुलपति साढ़े गै कन्ने हे। उ'नें असेंगी विश्वविद्यालय परिसर इच घुमाया-फिराया। पुस्तकालय दस्सेआ, कक्ष दस्से, नमें बना करदे भवन दस्से। अस इत्थें त्रै घंटे रुके। दपैहरी दी रुट्टी असें इत्थें गै खादी।

श्री संजय शर्मा संग्रहालय एवं शोध संस्थान :-सम्मेलन इच जयपुर दे मते विद्वान आमंत्रत हे। उन्दे इच इक कलानाथ शास्त्री बी हे। अ'ऊं उन्दी शकसियत थमां मता प्रभावत होआ। ओह सचमुच इक प्रकांड विद्वान हे। दूए विद्वान राजेन्द्र भट्ट हे। उन्दा मान-सम्मान हिन्दी साहित्य सम्मेलन प्रयाग नै कीता तां अ'ऊं उस इच बी शामिल होआ हा। इक विद्वान आनन्द शर्मा होर हे। ओह पत्रकार हे। उ'नें गै मेरी मलाटी श्री संजय शर्मा संग्रहालय एवं शोध संस्थान दे संयोजक श्री राम कृपालु शर्मा हुन्दे कन्ने कराई। अ'ऊं उन्दे साद्धे उप्पर चौड़ा रास्ता, ठठेरों दी गली इच स्थित उन्दा संग्रहालय दिक्खन गेआ। एह संग्रहालय दुमंजिला हा। इसदे भूतल कक्ष इच बक्ख-बक्ख सम्प्रदायें, पंथें,

राजें-महाराजें दियां चरण पादुकां (खड़ावां) धनुषवाण, तरकश, तीर, दिव्य-
 अस्त्र प्रदर्शित हे। फही इ 'यां गै गरुड़ दीप, राजलक्ष्मी दीप बी उत्थें रक्खे गेदे
 हे। चौपड़, शतरंज, दसकौड़ा, सर्प सीढ़ी बगैरा खेदें दी समगरी बी उत्थें
 रक्खी गेदी ही। फही उ 'नें मिगी चित्र विभाग, वस्त्र विभाग, शिल्प विभाग
 दस्सेआ। खी 'र ओह मिगी पांडुलिपि विभाग इच लेई गे। इत्थें में इक
 पांडुलिपि दिक्खी जिसदा शीर्षक हा-'त्रिकूट रहस्य' एह पोथी संस्कृत इच ही।
 इसदे लेखक जनार्दन शर्मा हे जेहड़े महिपुरा गां दे रौहने आहले हे। उ 'नें एह
 ग्रंथ सन 1849 इच लिखेआ हा। इत्थें वैष्णो देवी तीर्थ स्थान कन्ने जुड़े दा
 इक होर ग्रंथ बी हा जिसदा नांइ हा - त्रिपुर तापिणी उपनिषद, एह ग्रंथ
 गोस्वामी शिवानन्द भट्ट दा हा ते इसदा रचनाकाल हा - 1856 वि०। में
 इन्दियां फोटो कापियां मंगियां तां उ 'नें मिगी टाली दिता। पर इन्ना संकेत जरुर
 दिता जे गवर्नर जम्मू-कश्मीर श्री माता वैष्णो-देवी स्थापना बोर्ड लेई जे इन्दियां
 कापियां मंगन तां उ 'नेंगी संग्रहालय भेजी सकदा ऐ।

अ 'ऊं उत्थूआं दा बस अड्डै आया। मेरी हुन अगली पड़ां मथुरा-
 वृन्दावन ही। उत्थूआं दा में निम्बार्क-साहित्य कठेरना हा कि जे अ 'ऊं अपने
 पिता दे गुरु बावा जगन्नाथ दास हुन्दी जीवनी लिखने दा मन बनाई बैठे दा
 हा। उन्दा सरबन्ध निम्बार्क सम्प्रदाय कन्ने हा।

में मथुरा दी बस पकड़ी, जयपुर गी अलविदा आक्खी ते अपनी जातरा
 उपर टुरी पेआ.....

०००

18: काशी जातरा

काशी दिक्खने ते उत्थें पढ़ने दे सुखने अ'ऊं बचपुने थमां गै लैन्दा हा। पर घरेलु स्थिति ठीक नेई ही, आर्थक तंगी बी ही इस लेई में सरकारी स्कूल थमां सतमीं पास कीती। पही किश ऐसा चक्कर चलेआ जे साढ़ा परोआर पेंथल छोड़ियै मक्खू कालोनी जाई बसेआ। में तंगी इच बी पढ़ाई जारी रक्खी ते सन 1954 ई० इच फिरोजपुर थमां मैट्रिक ते सन 1956 ई० इच पंजाब यूनिवर्सिटी थमां प्रभाकर कीती ते जम्मू-कश्मीर सरकार दे मैहकमा तालीम इच हिन्दी टीचर नियुक्त होआ।

पढ़ाई कन्ने लगाऽ हा इस लेई पढ़दा बी रेहा ते पढ़ांदा बी रेहा। सन 1971 इच में एम.ए. कीती ते सन 1976 इच में कॉलेज इच लेक्चरार नियुक्त होआ। कॉलेज टीचर बनने दे बाद बी मेरे अन्दर काशी इच पढ़ने दी तमन्ना बनी दी रेही।

खी'र चानचक्क इ'यां होआ जे विश्व विद्यालय अनुदान आयोग दी इक योजना दे अर्न्तगत हिन्दू विश्व विद्यालय बनारस इच त्र'ऊं हफ्तें दे नवीनीकरण कोर्स लेई मेरा नांऽ चनोई गोआ।

अ'ऊं 14 फरवरी 1990 गी हिमगिरि ट्रेन उप्पर सुआर होआ ते 16 फरवरी गी सवेरे-सवेरे यूनिवर्सिटी परिसर इच दाखल होआ। साढ़े रौहने दा इन्तजाम प्रबन्धकें विश्व विद्यालय दे होस्टल इच कीते दा हा। मिगी उत्थें जन्दे गै बैङ्क मिली गोआ। उस्सै ध्याड़ै साढ़ा कोर्स बी शुरु होई गोआ। साढ़े कोर्स दे संयोजक डॉ० शुक देव सिंह हे। ओह मते गै सुलझे दे विद्वान हे। उ'नें दिनें डॉ० रघुनाथ सिंह रस्तोगी यूनिवर्सिटी दे कुलपति हे। अस प्रशिक्षण लैन चाली टीचर बक्ख-बक्ख कॉलेजें थमां आए दे हे। जम्मू-कश्मीर थमां अ'ऊं इकला गै हा। बाकी दे साथी उत्तर-प्रदेश ते मध्य प्रदेश थमां हे।

साढ़ा प्रशिक्षण सवेरे दस बजे शुरू हुन्दा ते चार बजे तक चलदा हा। छुट्टी दे बाद अस सारे बेहले होई जंदे हे। मेरे मते साथी काशी थमां परिचित हे इस लेई उन्दे लेई काशी दिक्खने दी कोई खास खाहिश नेई ही। ओह होस्टल इच गै रौहना पसंद करदे हे। मेरे लेई काशी इक नमां शैहर हा। इस लेई अ'ऊं पढ़ने दे कन्ने-कन्ने इस शैहर दे म्हत्तव पूर्ण थाहरें दा अवलोकन बी करना चाहदा हा जिन्दा जिकर में कताबें इच पढ़े दा हा।

इ'यां साढ़े देशै दा बच्चा-बच्चा जानदा ऐ जे काशी भारती संस्कृति दा केन्द्र रेहा ऐ। इस पवित्तर शैहर दा उल्लेख पौराणिक ग्रंथें इच बार-बार होए दा ऐ। एह शैहर बी समें-समें सिर सुकड़दा ते फैलदा रेहा ऐ। गलांदे न जे पुरानी काशी उत्थें बसी ही जित्थें गंगा ते गोमती दा संगम ऐ। संगम कछ गै मार्कण्डेय महादेव दा पराना मंदर अज्ज बी ऐ। फही बाद इच एह शैहर बल्लें-बल्लें दक्खन बक्खी सरकन लगा। महात्मा बुद्ध जदूं इस शैहर आए तदूं एह शैहर विद्या दा केन्द्र बनी चुके दा हा। इत्थें शैव धर्म दा बोल-बाला हा। उस समें इस शैहरै दा नांऽ काशिकापुरी हा। फही बिगड़दे-बिगड़दे काशी प्रचलन इच आया। सतमी सदी इच हयुन्सांग इस शैहर आया तां इत्थें 30 बौद्ध-बिहार ते त्रै सौ पौराणिक देवी-देवतें दे मंदर हे। इत्थें जिन्ने बी देश जां विदेश दे सैलानी आए, उ'नें इक मत कन्ने एह स्वीकार कीता जे काशी शैवमत दा गढ़ हा।

इस शैहरै नै केई दौर दिक्खे। समृद्धि दा दौर बी दिक्खेआ ते शत्रुएं दे प्रहार बी बर्दाश्त कीते। 11वीं सदी इच महमूद गजनवी नै ते बा'रमीं सदी इच मुहम्मद गोरी दे सेनापति कुतुबदीन नै इत्थें जेहड़ी ध्वंसलीला रची उस कन्ने एह शैहर लहू-लुहान होई गेआ। इस लेई मुगलकाल बी अभिशाप गै सिद्ध होआ। विनाश लीला नै इसदे रुप गी विकृत करी दिता। पर फही बी एह शैहर नष्ट होने दे बावजूद बी जीवित रेहा। अज्ज बी जीवित ऐ। देशै दा एह शैहर इक गौरव स्थल ऐ। इस शैहरै दा चप्पा-चप्पा अ'ऊं दिक्खना चाहदा हा। मेरी इच्छा दी पूर्ति मेरे गै इक सहजोगी डॉ० जितेन्द्रनाथ मिश्र होरें पूरी कीती। ओह ईश्वरी गंगा इच रौहन्दे हे। डी.ए.बी. कॉलेज बनारस इच पढ़ादे हे ते साढ़े कन्ने गै प्रशिक्षण लै करदे हे। असेंगी जि'यां गै छुट्टी हुन्दी ओह मिगी कन्ने लैंदे ते बनारस दी सैर करान लेई जन्दे। मेरे कन्ने इटावा दे डॉ० विद्या कान्त

तिवारी अमेठी दे डॉ० अनुज प्रताप सिंह ते शामली दे डॉ० राकेश शर्मा होर बी चली पौंदे हे।

इक दिन डॉ० जितेन्द्र नाथ मिश्रा होरें असें चोन्नें गी कन्ने लैता ते ओह् असेंगी 'कबीर चौरा' लेई आए। एह् कबीर जी दा इक स्मारक ऐ। इत्थें कबीर जी दे चरण-चि'न्न ते इक टौपी सुरक्खत ऐ।

कबीर दे बारे इच में इ'यां ते मता किश पढ़े दा हा पर इत्थें में कबीर हुन्दे उप्पर लिखे दे ग्रँथें दा अवलोकन कीता तां अ'ऊं रूहान रेही गेआ। मते लोक उन्दे उप्पर अज्ज बी मता कम्म करा करदे न। एह् केन्द्र उन्दे लेई इक प्रेरणा स्रोत ऐ। इ'यां गलांदे न जे जित्थें एह् संस्थान ऐ कबीर दा मूल घर बी उत्थे गै हा। इत्थें कबीर जी दी गद्दी ऐ जिसदी पूजा रोज़ हुन्दी ऐ। दूऐ ध्याड़ै डॉ० मिश्रा होर असेंगी भारतेन्दु हरिश्चन्द्र हुन्दे घर लेई गे। घर महिला गै हियां। उ'नें साढ़ा निग्घा स्वागत कीता। उ'नें असेंगी अपना घर दिक्खने दी अनुमति देई दिती। अस युग पुरुष भारतेन्दु हुन्दे घर इक घंटा रेह् ते फ़ही त्रकालें अपने होस्टल इच आई गे।

त्रियै ध्याड़ै मिश्र होर असेंगी जय शंकर प्रसाद हुन्दे घर लेई गे। प्रसाद हुन्दा घर मता खुल्ला ते भव्य हा। असें उन्दे घरै दे परिसर इच स्थित ओह् शिव मंदर बी दिक्खेआ जित्थें बेहियै प्रसाद जी नै कामायनी दा सृजन कीता हा। उ'नें असेंगी उन्दी दुकान बी दस्सी। उस्सै दिन उ'नें चौखम्बा प्रकाशन दे मालकें कन्ने मिलाया।

डॉ० जितेन्द्र नाथ मिश्र होर इक दिन असेंगी अपने घर ईश्वरी गंगा बी लेई गे। उत्थें उ'नें साढ़ी मती आतर-खातिर कीती।

विश्वानाथ मंदर :-डॉ० जितेन्द्रनाथ मिश्र होरें पैहले ऐतवार दा दिन विश्वानाथ मंदर दे दर्शन लेई निश्चित कीते दा हा। उस दिन अस मते प्रतिभागी उन्दे कन्ने मंदर दिक्खन गे। ओह् असेंगी गलियें थमां घुमांदे मंदर परिसर इच लेई आए।

विश्वानाथ मंदर बा'रें ज्योतिलिंगें इच इक ऐ। इस लेई इसदा महत्त्व बी मता जैदा ऐ। इत्थें देश भर दे लोक बा'रां म्हीने दर्शन करन औंदे न।

इ'यां वर्तमान विश्वानाथ मंदर इक सामान्य कोटि दा मंदर ऐ। इसदे गर्भगृह इच जेहड़ा ज्योतिर्लिंग ऐ ओह धरती थमां थल्लै ऐ। लोक शिवलिंग उप्पर पानी चाढ़दे जन्दे न पर इसदा पानी बाहर नेई औंदा। एह मंदर लाल पत्थरें दा बने दा ऐ। इसदे दरवाजे निक्के न। दरवाजे ते दीवारें उप्पर बहुरंगी नक्काशी होई दी ऐ। मंदर दी योजना इच गर्भगृह ते प्रदक्खना पथ समाहत न। इसदा शिखर नागर शैली इच बझोंदा ऐ। शिखर उप्पर सुन्ने दी पत्री मढ़ी गेदी ऐ। आक्खदे न जे एह पत्री महाराजा रणजीत सिंह नै चढ़ाई ही। मंदर दी बाहरली कन्धै इच चौन्नें पास्सें तौकड़े बने दे न जिन्दे इच देवी-देवतें दियां मूर्तां स्थापत न। मंदर दे पिच्छें इक खूह ऐ। लोक इस खूह दी बी पूजा करदे न। इत्थें जेहड़ा नंदीगण ऐ ओह सत्तफुट उच्चा ऐ। ओह इक्कै पत्थर दा बने दा ऐ। गलांदे न जे ओह नेपाल दे महाराजा नै भेंट कीता हा।

मंदर कछ गै इक मस्जिद ऐ। उसदे दरवाजे दे सामनै नंदीगण स्थापत ऐ। गलांदे न जे मूल मंदर उत्थें गै हा। औरंगजेब दे शासनकाल इच असली मंदर दा ध्वंस होआ तां श्रद्धालुएं उसदे कछ गै वर्तमान मंदर निर्मित कीता। हून पूजा-पाठ इत्थें गै हुन्दा ऐ।

अस विश्वानाथ मंदर दे दर्शन करियै बाहर ते आए पर साढ़े मन किश भारे-भारे हे।

दूए मंदर :-डाक्टर जितेन्द्रनाथ मिश्र होर विश्वानाथ मंदर थमां असेंगी लेईयै शनिश्चर देव दे मंदर आई गे। इत्थें खास भीड़ नेई ही। फही अस अक्षयवट ते अन्नपूर्णा मंदर दिक्खन गे।

डा० मिश्र होरें असेंगी अन्नपूर्णा मंदर परिसर इच खड़ेरेया ते फही गलान लागे-काशी मंदरें दा शैहर ऐ। इत्थें गली-गली इच मंदर न। इक मंदर भैरवनाथ दा बी ऐ। चौखम्भा इच बल्लभ सम्प्रदाय दा गोपाल मंदर ऐ। इक मुकुन्दराय जी दा मंदर ऐ। इक रणछोड़ दी दा मंदर बी ऐ। एह सारे कृष्ण मंदर न। इन्दे इलावा बड़े महाराज दा मंदर, बलदेव जी दा मंदर, दाऊ जी दा मंदर, गोरखनाथ जी दा मंदर, राम मंदर, दुर्गा जी दा मंदर, वागीश्वरी देवी दा मंदर, लाट भैरव मंदर, भरत मंदर ते केई होर मंदर न। ओह मंदर अस कुसै ध्याड़े फही दिक्खी लैगे।

अज्ज अस बाबू शिवप्रसाद गुप्त हुन्दी कोठी दिक्खगे। ओह् असेंगी नगवा मुहल्ले इच लेई आए। एह् इक इतिहासक भवन हा जिसगी दिक्खन मते लोक औंदे न। अस उत्थूआं दा राजा मोती चन्द दी कोठी दिक्खन गे। उत्थें असें मोती झील नांऽ दा तलाऽ बी दिक्खेआ। असें रस्ते इच अढ़ाई कंगूरा मस्जिद बी दिक्खी जेह्ड़ी स्थापत्य दी दृष्टि कन्ने अनौखी ही।

काशी दे घाट :-डॉ० जितेन्द्र नाथ मिश्र होर करीब त्रै बजे असेंगी काशी दे घाट दस्सन लेई आए। इत्थें घाट गै घाट हे। पैह्ला घाट वरुण संगम घाट हा। दूआ राजघाट हा, त्रि'या प्रहलादघाट, चौथा त्रिलोचन घाट, पंजमा गया घाट, छेमां ब्रह्मघाट, सतमां दुर्गाघाट, अठमां पंच गंगा घाट, नौमां ओसला घाट, दसमां सिंधिया घाट, जारमां मणि कर्णिका घाट, बारमां चितांघाट, तेरमां ललिता घाट, चौदमां मान मंदर घाट, पन्द्रमां दशाश्व मेघ घाट, सोलमां अहिल्या बाई घाट, सतारमां केदार घाट, ठारमां हरिश्चन्द्र घाट, उन्नीमां विशाल घाट, बीहमां जानकी घाट ते इक्कीमां तुलसीघाट ऐ।

असें सारे घाट ते नेई दिक्खे पर गंगा दे इ'नें घाटें उप्पर नजर जरूर पाई। उत्थें असें किश लोकें गी नौका विहार करदे बी दिक्खेआ। त्रकालां पौने थमां पैह्ले-पैह्ले अस होस्टल परतोई आए। बनारस रौहन्दे में जेह्ड़े विश्व विख्यात थाहर दिक्खे उन्दे इच किश इ'यां हे :-

काशी हिन्दू विश्व विद्यालय :-

बनारस इच मिगी जिस शिक्षा केन्द्र नै सारे थमां बद्ध प्रभावत कीता ओह् हा - काशी हिन्दू विश्व-विद्यालय। मिगी बझोंदा जे कुसै बी देशै दी तकदीर बदलनी होऐ तां उस देसै दे वासियें गी शिक्षित करना जरूरी ऐ। महामना मदन मोहन मालवीय नै सन् 1916 इच जेह्ड़ा कम्म कीता, जेह्ड़ा सरस्वती मंदर खड़ेऐआ, ओह् देशै दे भागें गी बदलने दा इक साकारात्मक प्रयास हा। काशी हिन्दू विश्व विद्यालय नै सिर्फ बनारस इच गै नेई पूरे राश्ट्र इच इक बौद्धक क्रांति दा सूत्रपात कीता। अ'ऊं बनारस इच सिर्फ त्रै हफ्ते 15 फरवरी थमां लेइयै 6 मार्च 1990 तोड़ी गै रेहा पर इत्थें में जे किश दिक्खेआ उसदी ते अ'ऊं कल्पना बी नेई करी सकदा हा। पैह्ले मिगी बझोंदा हा जे बनारस भारतीय संस्कृति, दर्शन ते संस्कृत भाशा दा केन्द्र ऐ, पर इत्थें

आइयै मिगी बझोआ जे शैद गै, कोई विशे होग जिसदी पढ़ाई दा प्रबन्ध इत्थें नेई ऐ, करीब-करीब इत्थें चाली विशे पढ़ाए जंदे न। पूरे विश्वविद्यालय दा वातावरण मिगी बौद्धक बझोआ। इत्थें पढ़ाने आहले प्राचार्य उच्च कोटि दे स्कालर हे। अ'ऊं त्रै हफ्ते इस विश्व विद्यालय दे अन्दर रौहने दे बावजूद बी पूरा विश्व विद्यालय नेई दिक्खी सक्केआ। गलांदे न जे बनारस दे राजे नै इस विश्वविद्यालय दी स्थापना लेई 21 ग्रां दान इच दित्ते हे। अ'ऊं सवेरे-सवेरे सैर करन निकलदा हा तां इक बक्खी दा चलेआ दुई बक्खी इक बारी बी नेई पुज्जी सक्केआ। इक बारी विश्व विद्यालय दे हवाई जहाजें दे केन्द्र तोड़ी पुज्जा हा। उत्थें में प्रशिक्षण लैने लेई रक्खे दे त्रै-चार निक्के-बड्डे जहाज दिक्खे हे। इ'यां आक्खदे न जे इस विश्वविद्यालय दा कुल घेरा दस किलोमीटर दे करीब ऐ।

काशी हिन्दू विश्व विद्यालय थमां जम्मू दे जेहड़े विद्यार्थी शिक्षा ग्रैहण करी आए उ'नें डुग्गर प्रदेश इच बी इक अदबी ते तमदनी आन्दोलन छेड़ेआ जिसदा फायदा पूरे डुग्गर गी पुज्जेआ। इ'नें विद्यार्थियें इच प्रो० गंगा दत्त विनोद शास्त्री हुन्दा नांऽ मते आदर कन्ने लैत्ता जाई सकदा ऐ।

डॉ० संपूर्णा नन्द विश्व विद्यालय

इ'यां ते बनारस इच दर्जेनें दी तदाद इच नामीं महा-विद्यालय ते शिक्षा ते प्रशिक्षण केन्द्र न। पर काशी हिन्दू विश्व-विद्यालय दे बाद जिस शिक्षण संस्था दा नांऽ चर्चा इच ऐ ओह डॉ० संपूर्णानन्द विश्व विद्यालय ऐ। एह विश्व विद्यालय रेलवे स्टेशन दे कछ गै ऐ। इ'यां आँदे-जंदे अ'ऊं इस विश्वविद्यालय दा भवन दूर थमां गै दिक्खदा हा पर इसदैं अन्दर प्रवेश में 6 मार्च 1990 गी कीता। इस यूनिवर्सिटी दा परिसर मिगी मत्ता विस्तृत नेई बझोआ। शैद एह पैहले संस्कृत महा-विद्यालय हा ते फही बाद इच इसगी विश्व-विद्यालय दा नांऽ दित्ता गेआ। एह विश्व विद्यालय भारती संस्कृति दे अध्ययन लेई देशें दा इक मुख केन्द्र मित्थेआ जन्दा ऐ। अ'ऊं इत्थूआं दे विद्यार्थियें ते अध्यापकें कन्ने बी मिलेआ। किश अध्यापकें मिगी अपनियां पोथियां बी भेंट कीतियां।

इ'यां गुजरात-विद्यापीठ दे बाद में एह दूआ शिआ केन्द्र दिक्खेआ

जित्थें सादगी, सरलता ते बौद्धिकता परिलक्षित हुन्दी ही। इत्थें दिखावा नां विद्यार्थियें इच ते इ 'यां प्राध्यापकें इच हा। मते विद्यार्थी ते प्राचार्य खदरधारी हे। मिगी बझोआ जे एह विश्व-विद्यालय डॉ० संपूर्णानन्द दी सोच दा स्हेई-स्हेई प्रतिरूप ऐ। डॉ० संपूर्णानन्द आपूं बी इक उच्च कोटि दे विद्वान, शिक्षा शास्त्री, राजनीतिज्ञ, चिंतक ते दार्शनिक हे। ओह स्वतन्त्रता सेनानी बी हे। ओह उत्तर प्रदेश दे पैहले मुख्य मंत्री बी हे। उन्दे नांऽ उप्पर सरकार नै विश्व विद्यालय खोल्लियै उ'नेंगी सच्ची श्रद्धांजलि भेंट कीती दी ऐ।

भारत कला भवन-वाराणसी

काशी हिन्दू-विश्व विद्यालय दे परिसर इच इक गौरवमय संग्रहालय ऐ जेहड़ा सन 1950 थमां इस कन्ने जुड़े दा ऐ। असल इच 1 जनवरी 1920 ई० इच काशी इच भारतीय कला परिषद् दा एह इक हिस्सा बनेआ हा। कवीन्द्र रवीन्द्र इसदे पैहले सभापति हे। राय कृष्णदास होरें, इस संग्रहालय दी कल्पना कीती ही जिसगी उ'नें गै मूर्त रूप दिता। ओह पूरा जीवन इसदे निर्देशक रेह।

इस संग्रहालय इच लगभग इक लख कला वस्तुआं संग्रहीत न। इस इच बक्खरे-बक्खरे विभाग न जि'यां - मूर्ति-विभाग, चित्र विभाग, बगैरा इत्थें मृण मूर्तियां, सिक्के, मनके, मौहरां, ताम्रपत्र, प्रागैतिहासक उपकरण, गैहने-बन्धे, तारीखी दस्तावेज, फरमान, पांडुलिपियां बगैरा संकलत न।

इत्थें केई दीर्घा न जि'यां टल्ले, चित्र, मूर्तियां, पुरातात्विक सामग्री, साहित्य-विभाग, सज्जा-कला बगैरा बगैरा। मेरे लेई खुशी आहली गल्ल एह ही जे में इत्थें राजस्थान, गढ़वाल, कांगड़ा, पटना, बनारस दी चित्रशैली दे चित्रें कन्ने गै बसोहली शैली दे चित्र बी दिक्खे। मिगी बड़ी खुशी बझोई जे डुगार दे चित्रकारें गी बी इस कला-भवन इच समुचित थाहर दिता गेदा ऐ।

भारतीय लोक-साहित्य संस्थान :-

काशी हिन्दू विश्व विद्यालय दी मुख्य इयोढ़ी थमां इक किलोमीटर दूर भारतीय लोक-साहित्य संस्थान ऐ जिसदे संचालक डॉ० कृष्ण देव उपाध्याय हे। मेरी रुचि बी लोक-साहित्य इच ही। में उत्थें जाना बी शुरु कीता। मेरी पंछान डॉ० कृष्ण देव उपाध्याय हुन्दे कन्ने गूढ़ थमां गूढ़ हुन्दी गेई। इस संस्थान

इच मारिशस दे बी किश विद्वान मिगी मिले। इ 'यां बनारस दे बुद्धिजीवियें दा एह संस्थान इक केन्द्र हा। इत्थें मिगी मता किश सिक्खने ते जानने दा मौका मिलेआ। इस संस्थान दे निदेशक डॉ० कृष्णदेव उपाध्याय नै भारती लोक साहित्य उप्पर कताब लिखी तां उ'नें अपनी कताब इच मेरे शोध कम्म दा बी जिक्र कीता।

सारनाथ :-

साढ़ा प्रशिक्षण 6 मार्च गी समाप्त होना हा। 5 मार्च गी संयोजकें असें गी बसें उप्पर ब्हालेआ ते किश नमें थाहर दस्सन लेई गे। सारें थमां पैहले अस राम नगर इच राज मैहल दिक्खन गे। एह मैहल गंगा दे कंढे हे। हुन तोड़ी एह ठीक स्थिति इच हे। मैहल दुमंजिले हे। खलकी मंजिल इक संग्रहालय ही। इत्थें राजे-रानी दियां पालकियां, कुर्सियां, खट्वां टल्ले-कपड़े बगैरा प्रदर्शित ऐ। किश तोफां बी हियां। मिगी एह सामान्य कोटि दे मैहल बझोए।

अस एह मैहल दिक्खियै लमही ग्रां गे। एह ग्रां बनारस थमां मसां 6 कि.मी. दूर हा। इत्थें असें मुन्शी प्रेम चन्द दा स्मारक ते घर दिक्खेआ। स्मारक नांऽ मात्र दा गै हा। उत्थें प्रेमचन्द दा इक स्टेच्यू हा। उस अगें इक निक्का जेहा बेहड़ा हा। स्मारक कन्ने गै मुन्शी प्रेमचन्द हुन्दा दुमंजिला घर हा। उसदी हालत मती खस्ता ही। असें पौढ़ियां चढ़ियां थल्लै उप्पर गे। इ 'यां बझोंदा हा जे हुन उत्थें शैद कोई नेई रौहन्दा।

बौद्ध तीर्थ-सारनाथ :-

लमही ग्रां इच प्रेमचन्द हुन्दा स्मारक दिक्खियै अस सारनाथ बक्खी टुरी पे। सारनाथ बौद्ध धर्म दा इक केन्द्रीय थाहर मित्थेआ जंदा ऐ। इत्थें दुनियां भर दे बौद्ध-अनुयायी आँदे न। अस बी उत्थें पुज्जे तां एह स्थल श्रद्धालुएं कन्ने भरोचे दा हा। इत्थें दिक्खने लेई ते इ 'यां मता किश ऐ पर इक बड़्डी यादगार सारनाथ दा स्तूप ऐ। एह स्तूप इक गोल स्तम्भ दे रूप इच ऐ। एह अन्दर दा खोखला नेई, ठोस ऐ। एह उत्तरी भारत इच बौद्ध धर्म कन्ने सरबन्धित इक तारीखी यादगार ऐ। एह स्तूप कोटा स्टोन कन्ने निर्मित ऐ। अस इस स्तूप दे

अगें-पिच्छे फिरे। किश बौद्ध-भिक्षु बी हत्थें इच मालां पकड़ियै इसदे चक्कर ला करदे हे। किश गलांदे न जे इस थाहर दा पराना नांऽ ऋषि पतन हा। किश गलांदे इसि पतन हा, किश आखदे मृगदाव हा। इस थाहर दा म्हतव तदूं बधेआ जदूं महात्मा बुद्ध नै इत्थें धर्म चक्र-प्रवर्तन कीता। बौद्ध ग्रँथें इच उल्लेख मिलदा ऐ जे बुद्ध नै इत्थें 'अरिय-सच्च' (आर्य्य-सत्य) दा उपदेश दिता हा। इस थाहर दा उल्लेख परानी कताबें इच बी मिलदा ऐ। फाहियान ते हयुन्सांग बी इस तीर्थ दी जातरा पर आए हे। इत्थें दिक्खनें गी मत्ता किश ऐ जिन्दे इच इक संग्रहालय बी ऐ। इस संग्रहालय इच सिंह-शीर्ष (चऊं शोरे आहली मूर्ति) लाल पत्थर दी बुद्ध प्रतिमा, उपदेश-मुद्रा इच बुद्ध दी मूर्ति, अवलोकितेश्वर दी मूर्ति, मैत्रेय दी मूर्ति प्रदर्शित ऐ। इस संग्रहालय दे दूएँ खंड इच गोवर्धन चुक्के दे कृष्ण दी मूर्ति, शिव जी दी मूर्ति, केई भज्जी त्रुट्टी मूर्तियें दे अवशेश प्रदर्शित न।

संग्रहालय दे बाहर धमेक स्तूप, नमां बिहार जेहड़ा धर्मपाल नै सन 1901 इच बनोआया हा, मूल गंध-कुटी बिहार, धर्मपाल दी समाधि, त्रै बोधिवृक्ष, ते धर्मपाल दी मूर्ति दिक्खने जोग ऐ।

इत्थें इक भव्य शिव मंदर, तिब्बतीय मंदर, महो बोधि धर्मार्थ औषधालय, सरकारी धर्मशाला, महाबोधि विद्यालय, सारनाथ विश्व विद्यालय, चीनी बुद्ध मंदर, आर्य्य धर्मसंघ धर्मशाला, मूलगंध-कुटी-बिहार पुस्तकालय, जैनियें दी धर्मशाला, ब्रह्मीय धर्मशाला, बगैरा मते आकर्शक भवन न।

सारनाथ दी जातरा करियै अस बनारस आई गे। 6 मार्च गी साढ़ा प्रशिक्षण दा कोर्स पूरा होआ 7 मार्च गी अ'ऊं बनारस थमां चेतें दी गंड चुक्कियै ट्रेन उप्पर बैठा ते फही 9 मार्च गी जम्मू पुज्जी गेआ।

०००

19. मगध जातरा

में तारीख दी कताबें इच मगध दा मता नांऽ सुने दा हा। पौराणक साहित्य इच बी मगध इक शक्तिशाली जनपद दे रुप इच वर्णित ऐ। इ'यां महाभारत इच बी उल्लेख मिलदा ऐ जे जरासंध मगध जनपद दा राजा हा। बौद्ध-साहित्य इच मगध दा वर्णन बार-बार होए दा ऐ। महात्मा बुद्ध गी मगध दी राजधानी राजगृह मती गै प्यारी ही। ओह इत्थें केई बारी आए। मगध दे राजें बी बौद्ध धर्म दे प्रचार ते प्रसार लेई पूरा योगदान दिता।

अ'ऊं नवीनीकरण दा कोर्स करन बनारस आया तां मेरे मनै इच बी एह ख्याल बार-बार आया जे पैंथल थमां उट्टिठयै मगध दी सैर लेई निकलना मेरे लेई सौखा नेई ऐ। अ'ऊं बनारस सबब्बी आए दा आं। मेरे कछ गै मगध दा ओह खेत्तर ऐ जित्थें बौद्ध स्मारकें दी भरमार ऐ। मेरा एह सौभाग्य होग जे अ'ऊं इन्दा अवलोकन बी करी लैं।

मेरी पत्नी दी बी एह मर्जी ही जे बनारस गेदे मिंगी समां कडिठयै गया जी बी जाना चाहिदा तां जे अ'ऊं अपने पुरखें दा पिण्ड-दान बी करी आमां।

फरवरी महीने दे खीर'ले ऐतवार दी छुट्टी उपर में गया जी जाने दा मन बनाई लेआ। में सोचेआ जे इस जातरा कन्ने इक तीर ते दऊं शकार होई जाडन। अ'ऊं अपने पुरखें दे रिन थमां मुक्त बी होई जाड ते कन्ने-कन्ने मगध दी जातरा बी करी आँग।

बौद्ध गया दी जातरा

में अपने साथियें थमां बौद्ध गया दी जानकारी हासल कीती। शनिवारें छुट्टी दे बाद अ'ऊं रेलवे-स्टेशन गेआ। गया जी दी टिकट लैती ते ट्रेन उपर बेही गेआ। सीट कोई बी खाल्ली नेई ही इस लेई में टी.टी कन्नें गै उसदी

सीट शेयर कीती। मिगी रूहारगी बझोई जे इक बजे दे करीब अ'ऊं गया जी पुज्जी गोआं। में रेलवे स्टेशन थमां गै डोर मैट्री दी टिकट लैती ते इक हाल इच सेई गोआ। सवरे उट्ठदे गै रिक्शा कीता। फाल्गु नदी गोआ ते अपने सुर्गवासी पिता हुन्दा पिण्डदान करियै बाहर आया। मिगी इक निक्की गड्डी मिली अ'ऊं उस उप्पर चढ़ियै तौले गै बौद्ध गया पुज्जी गोआ।

बौद्ध गया पराने मगध राज्य दे अन्तर्गत हा। एह् थाहर गया थमां 11 कि.मी. दूर ऐ। एह् तीर्थ निरंजना नदी दे तट कन्ने स्थित ऐ। इसदा पराना नांउ उरुविल्व हा। अ'ऊं इत्थें बुद्ध भगवान दा मंदर दिक्खन आए दा हा, इस लेई तौला-तौला उत्थें पुज्जा। मेरे औने थमां बी पैहले इत्थें देश-विदेश दे मते श्रद्धालु पुज्जी गेदे हे। जापानी, सिंहली, कोरियाई, तिब्बती बक्ख-बक्ख देसें थमां आए दे हे। इत्थें उन्दियां बक्खरी-बक्खरी धर्मशालां न। हर धर्मशाला दा स्थापत्य उन्दे देस दी तरजमानी करदा ऐ, उत्थें हिन्दू बी मते हे। ओह बी अपने ढंगै कन्ने पूजा करा दें हे। इ'यां बी हिन्दू बुद्ध गी भगवान विष्णु दा दसमां अवतार मित्थदे न।

जेहड़ा मंदर में दिक्खेआ ओह कोई मता पराना नेई बझोदा हा। इ'यां गलांदे न जे त्री सदी ईसा पूर्व अशोक नै इत्थें इक मठ ते मंदर दा निर्माण कीता हा। किश गलांदे न अशोक दे बाद लंका दे राजा मेघवर्ण नै बोधि वृक्ष दे उत्तर इच बी इक मठ दा निर्माण कीता हा, हयुन्सांग सतमीं सदी इच इत्थें आया तां उसनै बोधि वृक्ष दे अगें-पिच्छें मंदर, स्तूप ते चैत्य ठीक हालात इच दिक्खे हे। 12वीं सदी इच मुसलमानें दे हमले दे कारण इस मंदर गी नुक्सान पुज्जा। सन 1811 ई० इच इक जातरी बुकनन हमिलटन नै इसगी विनष्ट स्थिति इच दिक्खेआ हा। सन् 1876 इच वर्मा दे राजा नै भारत सरकार थमां इत्थें मंदर बनाने दी इजाजत मंगी। पर सरकार दे लोक निर्माण मैहकमें ने इस मंदर दा आपूं जीर्ण-उद्धार कीता। हुन मंदर दे गर्भगृह इच बैठे दे भगवान बुद्ध दी विशाल मूर्ति ऐ। बोध गया मंदर दे बारे इच इक कला पारखी नै लिखे दा ऐ, एह् गवै दी पूछल रूपी उच्ची मीनार दे समान ऐ जिसदे उप्पर कलगी पैंछियें दे परें आंहगर ते मुकुट जैसी खूबसूरती मजूद ऐ।

मंदर दे पच्छिम इच बोधि वृक्ष ऐ। इत्थें गै बुद्ध नै पूर्व वक्खी मूंह करियें

तपस्या कीती ते दिव्य ज्ञान हासल कीता। बोधिवृक्ष कन्ने सप्त स्थान मन्ने जंदे न - बोधिवृक्ष, अनिमिश्लोचन स्तूप, चंकामना, रत्नाधर, राजायतन वृक्ष, अजपाल वृक्ष ते मुचहिन्द झील। एह झील में मंदर थमां इक किलोमीटर दूर दिक्खी।

बोधी सरोवर :-अ'ऊं मंदर दे दर्शन करियै बोधी सरोवर बी गेआ। उत्थें इक तलाऽ हा। बुद्ध नै तपस्या करने थमां पैहलें उत्थें स्नान कीता हा।

में मंदर दे अगें-पिच्छें किश खुदे दे पत्थर बी दिक्खे। गलांदे न जे ओह अशोक दे समें दे न।

बौद्ध मंदर दिक्खियै में रिक्शा कीता ते मगध यूनिवर्सिटी दिक्खन गेआ। ऐतवार हा यूनिवर्सिटी बंद ही। उत्थें फिरेआ टुरेआ ते गया जी दे बस अड्डे उप्पर आया।

राज गिरि :-मिगी गया जी थमां राजगिरि दी बस इच सीट मिली गई। अ'ऊं राजगिरि लेई चली पेआ। एह पराना शैहर पटना थमां 101 किलोमीटर दक्खन पूर्व इच फ्हाड़ियें कन्ने घिरे दा हा। अ'ऊं इत्थें दपैहरी इक बजे दे करीब पुज्जा। बस अड्डे कछ गै टुरिस्ट विभाग दा दफ्तर हा। ऐतवार दे कारण उत्थें इक अधिकारी गै बैठे दा हा। उसनै मिगी इक कताब पढ़ने गी दित्ती ते गलान लगा जे 'राजगृह' दी सैर शैल चालीं करो।

में कताब दिक्खी तां उस इच लिखे दा हा जे महाभारत काल इच राजगिरि जरासन्ध दी राजधानी ही। महात्मा बुद्ध दे काल इच एह नगर राजा बिंबसार दी राजधानी ही। बिम्बसार मगध दा राजा हा। फाहियान ने लिखे दा ऐ जे पुरानी राजधानी फ्हाड़ी उप्पर ही। बिम्बसार दे पुत्तर अजातशत्रु नै उसगी फ्हाड़े दे थल्लै बसाया। अजातशत्रु दे पुत्तर उदय नै राजधानी राजगृह थमां पाटलिपुर इच कायम कीती। तदूं थमां एह शैहर उपेक्षा दा शकार ऐ।

राजगिरि जैन ते बौद्ध धर्म दा केन्द्र रेहा इस लेई इसदा भाएं इतिहासक म्हत्तव घटी गेआ पर धार्मिक ते सांस्कृतिक म्हत्तव बने दा रेहा जेहड़ा अज्ज तक कैम ऐ। इत्थें मुसलमान संत श्री मखदुम शाह शर्फुद्दीन नै सन 1234 ई० इच भृंग कुंड कछ बा'रां साल तपस्या कीती ही इस लेई राजगिरि मुसलमाने लेई बी इक तीर्थ ऐ। राजगिरि दे इर्द-गिर्द जैन, बौद्ध, हिन्दू धर्म कन्ने जुड़े

दे केई थाहर न। रत्नगिरि फ्हाड़ इच श्वेताम्बर चौमुखी मंदर ऐ। इत्थें शांतिनाथ पार्श्वनाथ, वासुपूज्य ते नेमिनाथ दियां खड़ामां न। इत्थें इक पराना ते इक नमां मंदर बी ऐ। उद्यगिरि फ्हाड़ उप्पर इक श्वेताम्बर मंदर ऐ। स्वर्ण गिरि फ्हाड़ उप्पर आदिनाथ दा मंदर ऐ। इत्थें दो मंदर दिगम्बर शाखा दे न। इ'यां गै बै भारगिरि फ्हाड़ उप्पर पंज श्वेताम्बर मंदर न। इत्थें इक सप्तपर्णी गुफा बी ऐ।

इ'यां गै राजगिरि बौद्ध धर्म दा बी इक प्रधान केन्दर हा। महात्मा बुद्ध नै इत्थें बुद्धधर्म दे प्रचार लेई मते साल गुजारे। ओह मता चिर गृध्रकूट इच रहे। ओह इस थाहर दे मते प्रशंसक हे। उ'नें आक्खेआ हा-मता शैल ऐ राजगृह, रमणीक ऐ गृध्रकूट, रम्य ऐ गौतम-न्यग्रोध.....। ओह सचमुच इस जगह गी मता पसंद करदे हे।

महात्मा बुद्ध दे निर्वाण ते बाद अजात शत्रु नै उन्दी अस्थिरं दा इक हिस्सा इत्थें आंदा ते उंदे चैत्य स्तूप बनाया। इस्सै राजे नै सप्त पीर्ण गुफा दे सामनै इक विशाल मंडप बनोआया हा।

अज्ज मते सैलानी राजगिरि दे दर्शन करन ओंदे न। गाइड उ'नेंगी वेणुवन, करन्द तलाऽ, महावीर चरण चौरा, पीपल गुफा, सप्त पर्णी गुफा, प्राचीन जैन मंदर, महादेव मंदर, मनियार मठ, सोन भंडार गुफा, रणभूमि, बिम्बिसार जेल, आम्रकुंज, मर्द कुच्छी, गृध्र कूट, विश्व शांति स्तूप दस्सदे न। हुन उप्पर पुज्जने लेई कोई दिक्कत नेई ऐ। इक रस्से दा मार्ग ऐ। (रज्जू मार्ग) जिसदी लम्बाई 2200 फुट ऐ। इस इच 114 कुर्सियां लग्गीं दियां न। उप्पर जाने गी सत्त मिनट लगदे न।

मेरे लेई पूरा राजगिरि दा इलाका दिक्खना मुमकन नेई हा। में रथचक्र, संखलिपि दे अक्खर, संस्कार भूमि, वाणगंगा, साइल्कोपिअन दीवार, अजात शत्रु दा कोट, मखदूम कुण्ड, जापान बौद्ध मंदर, विश्णु मंदर ते रामकृष्ण सेवा मठ उप्पर सरसरी नजर मारी ते थल्लै आई गोआ। सड़क कछ गै गर्म पानी दा कुण्ड हा। अ'ऊं उत्थें न्हाता ते नालन्दा लेई चली पेआ।

नालन्दा :-राजगिरि थमां नालन्दा 11 कि.मी. हा। मिगी इक गड्डी लब्धी उसनै मिगी नालन्दा कछ तुआरेआ। अ'ऊं कोई डेढ कि.मी. पैदल

चलेआ। अगें मेरे सामनै नालन्दा दे खण्डहर हे जिन्दे बारे इच में स्कूल पढ़े
गै मता किश सुने दा हा।

इतिहासकार मनदे न छेमी ई. पू थमां 12वीं सदी तोड़ी नालन्दा इक
मशहूर थाहर रेहा। भगवान बुद्ध दे प्यारे शिष्य सारिपुत दा जन्म नालन्दा कछ
नालक गां इच होआ। उसदा जन्म जिस कमरे इच होआ। उससै कमरे इच उसनै
शरीर छोड़ेआ। इ'यां उसदा एह कमरा इक तीर्थ बनी गेआ। इसै नगर इच बुद्ध
दे चले लेप सेठ ते उपालि रौहन्दे हे। जैन धर्म दे प्रवर्तक निगन्थनाथ दा जन्म
बी नालन्दा कछ होआ हा। इत्थें बेशुमार हिन्दू मंदर बी हे। महात्मा बुद्ध गी
नालन्दा मता गै प्यारा हा। उ'नें इस शैहर दी मती तारीफ कीती ही।

नालन्दा दी पन्थान इक विश्व विद्यालय दे रूप इच बी ही। एह विश्व
विद्यालय असल इच महायानी बौद्धें दा गढ़ हा। इस विश्व विद्यालय इच
जेहड़े आचार्य पढ़ांदे हे ओह महापंडित ते अपने-अपने बिशे इच माहिर हे।
इत्थें जेहड़े आचार्य पढ़ांदे हे उन्दे इच आचार्य नागार्जुन, शीलभद्र, आर्यदेव,
सन्तरक्षित, वसुबन्धु, दिग्नाग, धर्मकीर्ति, कमलशील ते दीपकर मते गै मशहूर
हे। इस विश्व विद्यालय इच दस ज्हार विद्यार्थी पढ़े हे ते डेढ़ हजार
अध्यापक उ'नेंगी पढ़ादे हे। इत्थें पढ़ाई लेई विद्यार्थी, ब्रह्मा, स्याम, जावा,
सुमात्रा थमां बी ओंदे हे।

इस थाहर मते उच्चे-उच्चे भवन हे। इक बड़ी बड़्डी लाईब्रेरी ही जिस
इच ज्हारां कताबां हियां।

नालन्दा दा जिकर चीनी जातरियें बी कीते दा ऐ।

ह्वान सांग नै जदूं नालन्दा दी जातरा कीती ही तां उसनै इत्थें 80 फुट
उच्ची तांबे दी बुद्ध मूर्ति दिक्खी ही जिसगी अशोक दे वंशज पूर्ण वर्मन नै
बनोआया हा। कन्नौज दे राजा हर्ष वर्धन नै इत्थें इक पित्तल दा बिहार
बनोआया हा। नालन्दा इच हवांग सांग दा निग्घा स्वागत होआ हा। इत्थें उसनै
तन्त्र विद्या सिक्खी ही। उसदे बाद चीन थमां इतिसंग 673 ई० इच भारत आया
तां उसनै केई बरि नालन्दा इच पढ़ाई कीती ही। पही इस खेत्तर इच 8वीं सदी
थमां 12वीं सदी तोड़ी पूर्व भारत दे पालवंशी राजें राज कीता तां बी नालन्दा

दा गौरव बने दा रेहा। राजा देवपाल दे शासन काल इच इत्थें हिन्देशिया, जावा ते सुमात्रा दे राजें केई बिहार बनोआए हे।

आखदे न जे मुहम्मद बख्तियार खिलजी नै मगध दे इक शैहर गी फूकेआ हा। इतिहासकारें दा मत ऐ जे ओह नगर नालन्दा गै हा। खिलजी नै नालन्दा दे पुस्तकालय गी जेहड़ी अगग लाई ओह छे म्हीने लगातार सुलगदी रेही। इसदे बाद एह शैहर बरबाद होई गेआ।

सन 1812 ई० इच बकानन हैमिल्टन नै बड़गांव दा चक्कर लाया तां नालन्दा थाहर थमां बौद्ध ते ब्राह्मण मूर्तियां मिलियां। इसदा पता कनिंघम गी लगा तां उसनै 1860 दे करीब इस थाहर दी खुदाई करोआई तां धरती थल्लै छप्पे दा एह शैहर नमुदार होई गेआ। अज्ज दुनियां भर दे पर्यटक इस थाहर गी दिक्खन ओंदे न। अ'ऊं बी इक विद्यार्थी दे रुप इच इत्थें पुज्जा। में खुदाई दा थाहर दिक्खेआ। मठे दियां कन्था दिक्खियां, मुख मंदर दे खंडहर दिक्खे। बिहारें दे अवशेश दिक्खे, कन्थां ते नालियां दिक्खियां, दक्खन बक्खी इक बहुमंजले मकान दी खड़ोदी दियां दीवारां दिक्खियां। अ'ऊं नालन्दा टुरेआ-फिरेआ। खंडहरें दे उप्पर थल्लै चढ़ेआ। उसलै मेरे इलावा उत्थें होर कोई नेई हा। अ'ऊं फिरदा-फरान्दा परतियै सड़कै बक्खी आया। किश मकानें दी कन्थें उप्पर में लिखे दा पढ़ेया-नालंदा-विश्वविद्यालय।

नव नालंदा पालि संस्थान :-नालंदा दा संग्रहालय ऐतवार दे कारण बंद हा। में दूर-दूर तोड़ी स्तूप ते बिहारें दे नशान दिक्खे ते नव नालंदा पालि संस्थान दा भवन बी दिक्खेआ। इत्थें 50 छात्र पालि भाशा ते बौद्ध-साहित्य दा अध्ययन करदे न इक चीनी मंदर स्टेशन कछ बी हा।

बिहार शरीफ :-मिगी इक बस मिली। उसनै मिगी बिहार-शरीफ तुआरेआ। इत्थें इक निक्का हारा बजार ते इक मजार हा। में बिहार शरीफ थमां पटने लेई बस पकड़ी। बस चली तां थोड़ा-थोड़ा न्हेरा पौन लगी पेदा हा। में बस उप्पर गै बैठे-बैठे पटना शैहर दे किश दक्ख दिक्खे। चौड़ियां ते खुल्लियां सड़का। उच्चे-उच्चे बहुमंजले मकान। सड़कें दे कंठै लम्में-लम्में बजार। खी'र अ'ऊं बस अड़्डा पुज्जा तां बनारस लेई कोई बस उपलब्ध नेई ही। पता

कीता ट्रेन नै रातीं 11 बजे मुगल-सराय तोड़ी जाना हा। अ'ऊं रिक्शा करियै रेलवे स्टेशन पुज्जा। टिकट लेई ते गड्डी दा इन्तजार करन लगा। ट्रेन ठीक 11 बजे प्लेट फार्म पर लगी। अ'ऊं जनरल डब्बे इच बेही गोआ। भीड़ मती जैदा नेई ही। मिगी बोहने लेई जगह मिली गई। सवेरे 4 बजे अ'ऊं 'मुगल सराय' पुज्जा। स्टेशन थमां बस अड्डै आया। मिगी बनारस लेई बस मिली गई। छे बजे अ'ऊं बनारस दे बस अड्डै ते सत्त बजे दे करीब हिन्दू विश्व-विद्यालय दे उस होस्टल इच पुज्जा जित्थें मेरा बैड्ड लगे दा हा। अ'ऊं अन्दर बढेआ तां दिक्खिया मेरे साथी अजें नींदर फंडा करदे हे।

०००

20. प्रयाग जातवा

मेरी पत्नी अनुसूया रानी दी एह शिकायत रेही ऐ जे अ'ऊं आपूं ते सारा साल थैल्ला चुक्कियै थाहर कुथाहरें फिरदा रौहन्ना ते उसगी में घर गलांs पाइयै बद्धे दा ऐ। उसदी शिकायत जायज बी ही। उसनै मेरे कन्ने बाहरै दे बड़े घट्ट चक्कर लाए।

2006 दी जनवरी गी लोहड़ी दे बाद मेरा दिल्ली जाने दा कार्यक्रम बनेआ तां मेरी पत्नी नै अनुरोध भरे लैहजे इच आक्खेआ-माघ मेले उप्पर मते लोक संगम स्नान उप्पर जा करदे न। तुसें दिल्ली जाना गै ऐ। तुस मिगी प्रयाग राज दा चक्कर लुआई आओ। अ'ऊं बी संगम स्नान करी लैड।

अ'ऊं बी किश दिन बेहला हा। में उसगी तेआरी करने लेई गलाया। ओह तैयार होई गई। असें पैथल थमां 29 जनवरी 2006 गी प्रस्थान कीता। 30 जनवरी गी अस ट्रेन राहें सवेले-सवेले नमीं दिल्ली पुज्जी गे। में अपनी पांडुलिपि 'किशतवाड : संस्कृति और परम्परा' आर्थिक मदद लेई केन्द्रीय हिन्दी निदेशालय दे दफ्तर जमा करोआनी ही। दफ्तर रामकृष्ण पुरम इच हा। इक बारी अ'ऊं उत्थें गेदा बी हा। फही बी दफ्तर दी तपैश करदे मिगी औख आई। मते जतन कीते, खीर दफ्तर लब्धी गेआ। में अपनी कताब दफ्तर इच जमा करोआई ते फही रसीद लेइयै थल्लै सड़क पर आई गेआ।

सड़क थमां असें बस पकड़ी ते लाल किले कोल उतरे। उत्थें किश चिं फिरे दुरे, चांदनी चौक रुट्टी खादी ते फही चौक उप्पर आई गे। असें इक आटो पकड़ेआ ते उत्तर-प्रदेश जाने आहली बसें दे अड्डे पर पुज्जी गे।

अड्डे पर पता कीता। इलाहाबाद (प्रयाग) लेई कोई सिद्धी बस नेई ही। किश लोकें असेंगी सलाह दिती जे अस कानपुर दी बस पकड़चै ते फही उत्थूआं दा इलाहाबाद जाचै। खैर होर कोई चारा बी नेई हा। अस बसै पर बेही

गे। त्रकालां पौन लगिगयां तां बस बी चली पेई। अ 'ऊं' रस्ते इच लाटुएं दी लोई इच शैहरें दे नांऽ पढ़दा रेहा। खी'र बस अलीगढ़ पुज्जी तां उत्थें ओह किश चिर रुकी। में अलीगढ़ दा मता नांऽ सुने दा हा। अ 'ऊं' ताई तुआई किश चिर फिरेआ पर बगैर निक्की-बड़्डी हट्टियें दे मिगी किश नेई लब्भा। मेरे कछ गै इक सैलानी चाह पिया करदा हा। उनै मेरा मन पता नेई कियां पढ़ेआ ते फही मिगी मुखातिब होइयै गलान लगा-अलीगढ़ सवाय मुस्लिम यूनिवर्सिटी ते होर किश बी दिक्खने लायक नेई ऐ। कन्डेक्टर नै चाह पोंदे गै सीटी मारी। अस तौले-तौले उट्ठे ते अपनी-अपनी सीटें उप्पर बेही गे। बस चली पेई। किश-किश नींदर बी औन लगी। अक्खां बंद कीतियां ते सेई गेआ। रातीं इक बजे बस फही इक बड़्डे बस अड़्डे पर आइयै खड़ोती। अ 'ऊं' थल्लै उतरेआ ते इक फड़ी आहले गी पुच्छेआ - 'एह केहड़ा थाहर ऐ।' एह कन्नौज ऐ। में कन्नौज दा नांऽ सुनेआ तां मिगी जयचन्द दा नांऽ चेत्ता आया। मुहम्मद गौरी दा साथी। जिसगी इतिहासकारें देशै दा गद्दार मननेआ। में उसदे बारे इच पैहलें बी तारीख दी कताबां पढ़दे मता सोचेआ हा। मिगी तदूं बी इ'यै बझोंदा हा। जे परिस्थितिएं उसगी गद्दार बनाया। फही में इक स्थानी हट्टी आहलें गी पुच्छेआ - इत्थें कोई पराना तारीखी थाहर ऐ ? उसनै गलाया-फाड़ी उप्पर इक भज्जा नुट्टा किला ऐ। पर उत्थें हुन कोई नेई जन्दा। लोक उसगी जयचन्द दा किला गलांदे न। मेरे दमाग इच फही चार तारीखी किरदार घुम्पन लगे-पृथ्वीराज चौहान, जयचन्द, संयोगिता ते मुहम्मद गौरी। फही पृथ्वी राज रासो दे ओह प्रसंग घुम्में जेहड़े में साहिय रत्न दी तेआरी लेई पढ़े हे।

खैर इत्थें बस अद्धा घंटा रुक्की ते फही कानपुर लेई चली पेई। अस सवेरे त्रै बजे कानपुर दे बस अड़्डे पुज्जे। असें थैल्ले चुक्के ते थल्लै आई गे। इलाहबाद दी बस लेई पुच्छेआ तां इक बोलेआ पिच्छलै मोड़ जाओ। अस चली पे। इक किलोमीटर चले तां इक मोड़ उप्पर मते लोक खड़ोते दे दिक्खे। पुच्छेआ तां ओह बी इलाहबाद जा करदे हे। इक बस आई। अस सारे उस पर बैठे। बस चली पेई। उस रातीं धुंध मती ही। किश सीत बी हा। सवेरे-सवेरे अस प्रतापगढ़ थमां लंघे। इत्थें इक स्वतन्त्रता सेनानी हे। ओह मिगी मते पत्र लिखदे हे। अस उत्थूआं दा लंघे तां पता नेई ओह मिगी की मता चेत्ते आए।

खीर प्रयागराज साढ़ी बस सवेरे नौ बजे दे करीब इलाहबाद पुज्जी। में पैहलें बी सन 1989 इच इलाहबाद शैहर दिक्खे दा हा, पत्नी गी शैहर दिक्खे दा शौक नेई हा। पही बी रिक्शे आह्ला असेंगी आनन्द-भवन, भरद्वाज वाटिका थमां घुमान्दा ते बजारें इचा फेरदा संगम घाट लेई आया। अ'ऊं पैहली बारी इलाहबाद आया तां बैंक कॉलोनी डॉ० रघुवंश होरें गी मिलन बी गेआ हा, हिन्दी साहित्य सम्मेलन दे मंत्री श्रीधर शास्त्री होरें गी बी मिलेआ हा। हाईकोर्ट बी दिक्खेआ हा। महादेवी वर्मा दा कॉलेज बी दिक्खेआ हा पर एतगी अस बजारो-बज़ार संगम घाट पुज्जी गे।

संगम घाट दा दक्ख पैहले थमां मता बक्खरा हा। हुन संगम दे कंढै तम्बू गै तम्बू हे। उत्थें माघ स्नानी डेरे लाइयै लेटे दे हे। साधु-संतें दियां टोलियां घाट कछ गै डेरे जमाइयै बैठी दियां हियां। किश वदेशी लोक बी टैह्ला फिरा करदे हे। इ'यां बझोंदा हा जे इक नमां शैहर इत्थें नमोदार होई गेदा ऐ। घाट उप्पर किशियां गै किशियां हियां। इक घाट पर सरकारी कराया हा। दूए घाट उप्पर मछुआरे मनमानी करा दे हे। रिक्शे आहलें कन्ने बझोंदा हा उन्दी सांठ-गांठ ही। उ'नें संगम उप्पर लेई जाने दा कराया साढ़े थमां दो सौ रपेऽ बसूल कीता। अस मछुए उप्पर बेही गे ते ओह असेंगी उत्थें लेई आया जित्थें गंगा ते यमुना दा संगम हुन्दा ऐ। उत्थें गंगा दा पानी किश-किश चिट्ठा ते यमुना दा पानी हल्का-हल्का काला बझोंदा ऐ। संगम कोल गै इक लकड़ी दा पुल बने दा हा। अस उस पुल गी पकड़ियै न्हाते। पानी लक्क-लक्क गै हा। पुल उप्पर बेहियै मते पण्डे अपने जजमानें थमां पूजा-पाठ करोआ करदे हे।

इक पंडा जोरें-जोरें स्नान करने आहलें गी एह श्लोक सुना करदा हा :-

माघ मासे स्टन्यापः किंचित्समम्युदिते रवौ

महा पात किनं चापि कं पतंत पुनि महि।

प्रयाग इच गंगा-यमुना दा जल माघ म्हीनै कल-कल करदा आक्खे करदा ऐ जे अद्धे उदित सूरज (ब्रह्म म्दुरत) इच आइयै जेहड़ा प्राणी इत्थें गोता ला तां अस महा पापी प्राणियें गी बी पवित्तर करी देगे।

दूआ पंडा बोला दा हा :-

प्रयागे माघ मासे तु ग्यहं स्नान स्यपद् भवेत्

नाश्व मेघ सहस्रेण तत्कलं लभदे भुवि॥

यनि तीरथ राज प्रयाग इच माघ म्हीनै त्रै ध्याडे

स्नान करने कन्ने जेहड़ा फल हासल हुन्दा ऐ

ओह इस धरती इच इक ज्हार अश्वेघ यज्ञ करने कन्ने बी हासल नेई होई सकदा।

पण्डे मैत्तर पढ़ी जारदे हे ते जातरियें गी अपनी-अपनी बक्खी खिच्ची जारदे हे। पुल उप्पर अस बी गे। पण्डे गी दक्खना दिती ते पही घाट उप्पर परतोई आए।

संगम घाट कोल गै इक गुफा ही। उस इच मतियां परानियां मूर्तां हियां। एह मूर्तां में पैहले बी दिक्खियां हियां ते हून बी दिक्खियां। एह मूर्तियां कला दी दृष्टि कन्ने भामें उत्कृष्ट नेई न पर इन्दा सांस्कृतक ते धार्मक महत्त्व मता जैदा ऐ। असें पंक्ति इच जेहड़ियां मूर्तियां दिक्खियां ओह हियां- धर्मराज, अन्नपूर्णा, लक्ष्मी, गणेश, बाल मुकुन्द, सत्य नारायण, भैरव, ललिता, गंगा जी, कार्तिकेय जी, नृसिंह, सरस्वती, विश्णु, यमुना, दत्तात्रेय, मार्कण्डेय, गोरख, जामवन्त, सूर्यदेव, अनुसूया, देव-व्यास, वरुण, कुबेर, अग्नि, दुर्वासा, राम-लक्ष्मण, शेष नाग, ते यम काल बगैरा। एह मूर्तियां प्राचीन न। गलांदे न बादशाह अकबर नै इ 'न' मूर्तियें दा निर्माण अपनी हिन्दू रानी दे आक्खने उप्पर करोआया हा। इत्थें अक्षयवट दे दर्शन दा बी मता महत्त्व ऐ।

संगम कछ गै इक तारीखी स्मारक होर बी ऐ। ओह इक किला ऐ। एह यमुना दे तट कन्ने बने दा ऐ। एह इक मजबूत किला ऐ। इसदा स्थापत्य अनौखा ऐ। एह किला जमीन दे अन्दर जमीन दे बराबर बनाया गेदा ऐ। यमुना दरिया बक्खी जरुर उच्ची दीवार ऐ। अजादी थमां पैहले इस किले इच अंग्रेजी फौज रौहन्दी ही। इत्थें गोला-बारूद बी बनदा हा। पर हुन किले दे अन्दर जाने दी आम लोकें गी इजाजत नेई ऐ।

प्रयाग इच इक बैनी माधव दा मंदर बी ऐ। ओह् असें रिक्शा उप्पर चढ़े दे गै दिक्खेआ।

इ 'यां संगम घाट कोल गै महावीर दी इक विशाल मूर्ति ऐ जेहड़ी जमीन उप्पर सिद्धी लेटी दी ऐ।

प्रयाग इच मते तीर्थ जातरु वासुकी सर्पराज मंदर, शिव कचैहरी मंदर, अलोपी देवी मंदर, कल्याणी देवी मंदर बी जन्दे न पर असें दूर थमां गै उ'नेंगी मत्था टेकेआ।

मेरी पत्नी दी मर्जी शैहर दिक्खने दी बजाय काशीं ते अयोध्या दिक्खने दी ही। इस लेई अस उत्थूआं दा निकले ते बस अड्डे पर आई गे।

ooo

21. अयोध्या जातरा

पैहली फरवरी 2006 गी असें इलाहबाद थमां अयोध्या लेई प्रस्थान कीता। इ 'यां किश बसां इलाहबाद थमां सिद्धियां अयोध्या बी जंदियां हियां पर मेरी पत्नी दी इच्छा विश्वानाथ मंदर दे दर्शन करने दी ही इस लेई अस उत्थूआं दा बनारस आई गे। बनारस अस त्रकालें पुज्जे। असें विश्वनाथ मंदर कछ गै इक गेस्ट हाऊस इच कमरा लैता ते विश्वानाथ मंदर दे दर्शन करन चली पे। में पत्नी गी मंदर परिसर इच घुमाया फिराया ते फही उसगी अश्वमेघ घाट लेई गेआ। उत्थें उसनै गंगा माता दी पूजा कीती। अस थोढ़ै चिर बजार घूमे-फिरे फही रुट्टी खादी ते सेई गे।

साढ़ा सवरे दा कार्यक्रम अयोध्या लेई प्रस्थान करने दा हा। इ 'यां में अपनी पत्नी कन्ने काशी घुम्मने-फिरने दी बी गल्ल कीती पर उसदी रुचि देवदर्शन इच ही।

2 फरवरी 2006 गी अस सवरे-सवरे तेआर होए। आटोरिक्षा कीता ते बस अड्डे आई गे। बनारस थमां अयोध्या लेई बस जा करदी ही। असें टिकटां लेइयां ते बस उप्पर सवार होई गे। बनारस थमां अयोध्या दे रस्ते इच असें केई निक्के बड्डे शैहर ते नगरोटे दिक्खे। इक जगह असें द 'ऊं जुड़े दे शैहर दिक्खे। पुलै दे रुआर शाहजहांपुर हा ते पुलै दे पार अकबर पुरा। इ 'नें दोनै शैहरें दी जीवन शैली इच मुस्लिम संस्कृति झलकदी ही। स्कूल पढ़ने आहलियां कुड़ियां बी असें भुर्के इच दिक्खियां। मकानें दा स्थापत्य बी मुस्लिम वास्तु थमां प्रभावत हा।

खी 'र नौ घंटे दी जातरा करियै अस त्रकालें अयोध्या पुज्जे। बस अड्डे थमां अस सिद्धे गुजराती धर्मशाला गे। असें रात उत्थें गै कट्टी। सवरे-सवरे अस अयोध्या दे दर्शन लेई निकले।

सारे थमां पैहले अस हनुमान गढ़ी दे दर्शन करन गे। एह पवित्तर थाहर इक उच्चे टिब्बे उपपर निर्मित ऐ। उपपर चढ़ने लेई सोपान पथ बने दा ऐ। इत्थें हनुमान जी दी इक विशाल मूर्ति ऐ। एह मूर्ति हनुमान दे उपासकें लेई मती दिव्य ऐ। मंदर कन्ने केई कोठरियां न जिन्दे इच साधु संत रौहन्दे न। इस मंदर दा प्रबन्ध महन्त हुन्दे हत्थ इच ऐ। इत्थें भगवान दा प्रसाद उपलब्ध ऐ। इस थमां अगें किश दूर सुग्रीव ते अंगद दे टीले न।

हनुमान गढ़ी दे दर्शन करियै अस राम जन्म भूमि दे दर्शन करन गे। फरवरी 1990 इच बी अ'ऊं बनारस थमां जन्म भूमि दे दर्शन करन आया हा। में तदूं जे किश दिक्खेआ हा हून सब किस उस थमां उल्ट हा। अ'ऊं हनुमान गढ़ी दा जिस रस्तै इत्थें पुज्जा हा ओह् रस्ता खाल्ली-खाल्ली हा। बिच-बिच घर-कोठे ते मंदर लब्धदे हे। अ'ऊं इक निक्का टिब्बा चढ़ियै राम जन्म भूमि पुज्जा हा। तदूं में जेहड़ा राम मंदर दिक्खेआ हा ओह् त्र'ऊं कक्षें इच समाहित हा। मझाटले कक्ष इच इक सिंहासन उपपर राम-परिवार दियां मूर्तियां प्रतिष्ठित हियां। जिस भवन इच एह् मंदर हा उसदा स्थापत्य आम मंदर स्थापत्य थमां मता बक्खरा हा। तदूं अ'ऊं त्रोन्ने कक्षें इच बेरोकटोक फिरेआ हा। फही अ'ऊं मंदर थमां बाहर आया तां में मंदर दे ललाट पर इक शिलालेख बी दिक्खेआ हा। मंदर थमां किश दूर तदूं में ओह् थाहर बी दिक्खेआ जित्थें नमें मंदर दा शिलान्यास कीता गेदा हा। पर एह् सब सोलां साल पैहलें दी तस्वीर ही। हून सन 2006 इच अयोध्या दी तस्वीर गै बदली गेदी ही। जित्थें जन्म भूमि दे अन्दर राम लल्ला दा मंदर हा ओह् हून पूरी चाल्ली ध्वंस हा। इ'यां सिंहासन आहले थाहर इक अस्थायी मंदर बनाया गेदा हा। जित्थें राम परोआर दियां मूर्तियां प्रतिष्ठित हियां। पुराने भवन परिसर इच खुदाई कीती गेदी ही। खुदाई आहले थाहर उच्चियां-उच्चियां कनाता लाइयै इसगी खट्टेआ गेदा हा।

अस मंदर दर्शन करन गे तां उत्थें मसां पंज-सत्त दर्शनार्थी गै पुज्जे दे हे। ओह् दर्शन करियै 'जय श्री राम' दा घोश करदे परतोआ करदे हे।

राम जन्म भूमि आहला थाहर पिछले दऊं दहाकें थमां अखबारें दी सुरखियें इच रेहा। इस थाहर जो बी घटित होआ उसदियां तस्वीरां सारे लोकें दिक्खियां। में बी दिक्खियां। अज्ज बी अ'ऊं इसदी नमीं तस्वीर दिक्खा करदा हा ते सोचा करदा हा जे साढ़े इच सच्चै गी स्वीकार करने दी हिम्मत की

नेई ऐ। अस धर्म, सम्प्रदाय जां पथ दे नांऽ उप्पर इन्ने संकीर्ण की होई जन्ने आं। असेंगी अपना गै पंथ श्रेष्ठ ते दूएँ दा निकृष्ट की बझोंदा ऐ ? अस सारे जे इक ईश्वर गी मन्नने आं ते फही उसदे नांऽ उप्पर तोड़-फोड़ ते खून खराबा की ?

मिगी बझोआ जे किश धर्माचार्ये साढ़े समाज गी प्रदूषित करी दिते दा ऐ। उ'नें पूरी इन्सानियत गी खंडित करी दिते दा ऐ। जि'नें सम्प्रदायें दे आगूएँ अपने सम्प्रदाय दे दायरे गी बधाने लेई जोर जबरदस्ती कीती, दूएँ दियां नशानियां मटाने दी कोशश कीती ओह कुसै बी दृष्टि कन्ने इन्सानियत दे पुजारी नेई मिथे जाई सकदे। जि'नें शासकें अपनी प्रजा गी धर्म दे आधार उप्पर बक्खरी-बक्खरी नज़र कन्ने दिक्खेआ ओह हाकम नेई मानवता दे दुश्मन हे।

केई बारी साढ़े धार्मक थाहर सियासत दा बी केन्द्र बनदे न। मिगी बी बझोआ जे अयोध्या इच स्थित राम लल्ला दा एह मंदर बी सियासत दे घेरे इच आंहदा गोआ। इस कन्ने इक गै धर्म दे लोक बक्ख-बक्ख सियासी सोच दी बजह कन्ने बक्ख-बक्ख खेमें इच बंडोई गे। किश सियासी अगग तमाशा दिक्खने आहलें बी लाई जिसदा नतीजा एह निकलेआ जे करोड़ें लोकें दी आस्था दा एह केन्द्र कोर्ट कचैहरियें दा मसला बनी गोआ। जे इक सम्प्रदाय दे प्रार्थना स्थल दे बकास लेई दूएँ सम्प्रदाय दे लोक सैहजोग देन तां मिगी बझोंदा इस कन्ने खुड़बो-खुड़बी खत्म होई सकदी ऐ ते इन्सानी भाईचारे दा भाव पनपी सकदा ऐ।

खैर अ'ऊँ इस पूजा स्थल दे अतीत ते वर्तमान उप्पर सोचदा-सोचदा सड़क दे कंढे आई गोआ। उत्थें किश फड़ियें आहले कताबां ते इस स्थान कन्ने सरबन्धित कैसटां बेचा करदे हे। मेरी पत्नी नै बी कैसेटां खरीदियां। फही पत्नी नै मिगी अगें बधने लेई गलाया। ओह चांहदी ही जे अस तौले-तौले सरयू नदी दे दर्शन बी करी लैचे।

इ'यां बी अयोध्या इच साढ़े दिक्खने लेई मते थाहर हे। अस सीता रसोई दिक्खन गे। फही उत्थूआं दा अस इक सड़क बक्खी मुड़े ते कनक मैहल, कोप भवन, रंग मैहल, साक्षी गोपाल, तुलसी चौरा, सुरसरि रानी दा मंदर, नरहन

रानी दा मंदर, राजा गोपी चन्द, गोविन्द दास दे मंदर, राज द्वार, पंच मंदर, राग कचैहरी वाल्मीकि रामायण मंदर, बिड़ला मंदर दिक्खदे-दिक्खदे सरयू नदी दे तट उप्पर आई पुज्जे। सरयू नदी दे तट कन्ने स्नान करने लेई बी मते घाट बने दे हे जिन्दे इच कृष्ण मोचन घाट, सहस्र धारा घाट, लक्ष्मण घाट, स्वर्ग द्वारा घाट, गंगा मैहल घाट, शिवालय घाट, जटाई घाट, अहिल्या बाई घाट, धरेहरा घाट ते नया घाट ते जानकी घाट मुख हे। असें परतियै नदी इच स्नान कीता ते बस अड्डे आई गे।

अयोध्या दा वर्णन में मतियें कताबें इच पढ़े दा हा। पूरे देशै इच सत्त पुरियें इच इक अयोध्या बी ऐ। बाकी पुरियां न - मथुरा, हरिद्वार, काशी, कांची, उज्जैन ते द्वारिका पुरी। मिगी बझोआ जे इक समां ऐसा जरूर रेहा होग जदूं एह पुरी ऐश्वर्य ते समृद्धि दा केन्द्र रेही होग। इ'यां एह राजा इक्ष्वाकु, मान्धाता, अम्बरीष, त्रिशंकु, हरिश्चन्द्र, सगर, दिलीप, भागीरथ, रघु ते दशरथ दी राजधानी ही। श्री रामचन्द्र जी महाराज दी राजधानी बी इ'यै पुरी ही तां गै इसगी राम जी दी पुरी गलांदे न।

अयोध्या थमां परतोने दे दऊं रस्ते हे। इक फैजाबाद थमां बस जां रेल पकड़ियै दिल्ली औना ते दूआ अयोध्या थमां बस पकड़ियै लखनऊ औना ते फही लखनऊ थमां दिल्ली औना। फैजाबाद अयोध्या थमां 7 किलोमीटर हा ते लखनऊ 140 किलोमीटर में लखनऊ दी गै बस पकड़ी। त्रकालें अस लखनऊ पुज्जे, उत्थूआं दा दिल्ली लेई बस पकड़ी ते दूरे दिन दिल्ली पुज्जी गे। दिल्ली किश चिर टुरे फिरे ते फही दिल्ली थमां रातीं दी बस पकड़ियै जम्मु आए ते फही जम्मु थमां घर। मिगी एह जातरा मती सुखद बझोई।


०००




लिंगराज मंदिर भुवनेश्वर




वासणा मुअज्जम खान का मकबरा (15वीं शताब्दी)




बाटैनिकल गार्डन, ऊटी







मण्डी का एक दृश्य



प्राचीन मंदिर - विलासपुर (हिमाचल प्रदेश)



विक्टोरिया मैमोरियल,कोलकाता (सामने का दृश्य)




विक्टोरिया मैमोरियल,कोलकाता (दक्षिण तोरण)



विक्टोरिया मैमोरियल, कोलकाता (विजय की देवी)



पशुपतिनाथ मंदिर काठमंडू



स्वामी विवेकानन्द स्मारक, कन्याकुमारी



मंदिर और स्तूप, नालन्दा



मुन्शी प्रेमचन्द का लमही में स्थित घर





राष्ट्रपति निवास, शिमला



पराजने रंग नाथ जी मंदिर, पष्कर

22. उज्जैन जातवा

वि० सम्वत् 2061 ते ईसा 2004 ई० इच सिंहस्थें दा कुंभ महापर्व उज्जैन इच आयोजत होना हा। मेरी पत्नी दी कुंभ महापर्व उप्पर शिप्रा नदी इच स्नान करने दी मती इच्छा ही। उज्जैन दे बारे इच में इतिहास दी पोथियें इच मता किश पढ़े दा हा। अशोक दे पुत्तर महेन्द्र दी जन्म भूम बी उज्जैन ही। महेन्द्र नै गै अपनी भैन संघमित्रा गी कन्ने लैत्ता ते श्रीलंका इच बौद्ध-धर्म दा प्रचार कीता। गलांदे न जे अशोक थमां बी चार सौ साल पैहले इत्थें इक बौद्ध-विहार हा जेहड़ा हुन लुप्त ऐ। महाकवि कालिदास नै मेघदूत दी रचना इत्थें गै कीती ही। महाराजा विक्रमादित्य दी राजधानी इत्थे उज्जयिनी ही। इत्थें माण्डु दे राजा नै राज कीता। बाज बहादुर नै राज कीता। इल्लुतमिश नै उज्जैन दी विनाश लीला दिक्खी। महाराजा जयसिंह नै मंदरें दा निर्माण करोआया। फही मराठें इत्थे राज कीता ते खीर इच सिंधिया राजें दा शासन काल आया तां उन्हे उज्जैन दे थाहर ग्वालियर गी सन 1810 इच अपनी राजधानी बनाया। बस इत्थूआं दा गै उज्जैन दी चमक-दमक खत्म होई ते एह उजड़े दा शैहर बझोन लगा।

एह शैहर मेरे लेई इक आकर्शन हा, इक शोध स्थल हा। इतिहास दा प्रतीक हा। गौरव दी नशानी हा। मेरी पत्नी लेई इक तीरथ हा, इक मोक्ष स्थल हा, इक पावन देव स्थान हा। साढ़े दोनें दे लक्ष्य भामें बक्खरे-बक्खरे हे पर उत्थें पुज्जने दा उद्देश दोनें दा हा।

12 अप्रैल 2004 गी असें दोनें अपने-अपने थैल्ले चुक्के ते पैंथल थमां जम्मू पुज्जे। उत्थूआं दा असें बस पकड़ी ते 13 अप्रैल गी हरिद्वार पुज्जे। गंगा स्नान कीता ते त्रै बजे दिल्ली लेई ट्रेन उप्पर बैठे ते निज़ामुद्दीन स्टेशन उप्पर उतरे। तौले-तौले भोपाल लेई दऊं टिकटां खरीदियां ते जनरल डब्बे इच बेही गे। डब्बा खचाखच भरोचे दा हा। बड़ी मुश्कलें थल्लै बौहने लेई थाहर

मिलेआ। मेरी पत्नी इस महौल इच घाबरी गई। उसगी किश जनानियां ठेह करा दियां हियां ते आरकां मारा दियां हियां। में उसी समझाया भगवान महाकालेश्वर तेरी परीक्षा लै करदे न। घाबर नेई। शान्त होइयै बेही जा। पर झांसी तोड़ी धक-मधका चलदा रेहा। इत्थें किश सुआरिया उतरियां तां बोहने लेई सीट थोई। खीर सवेंरे 9 बजे दे करीब अस भोपाल पुज्जे। मेरी मती मर्जी ही जे लागे हत्थ अस भोपाल शैहर बी दिक्खी लैचै पर पत्नी नेई मन्नी। पैहले कुंभ स्नान फही दूए थाहरें दा ध्यान। में बी जिद्द नेई कीती। उज्जैन लेई बस जा करदी ही अस उस उप्पर बेही गे। भोपाल थमां उज्जैन पुज्जने इच असेंगी त्रै घंटे लागे। रस्ते इच असें केई झीलां दिक्खियां। बझोआ जे लोक सच्च गलांदे न जे भोपाल झीलें दा शैहर ऐ।

उज्जैन अस बस अड्डे पुज्जे तां रिक्शा कीता ते स्नान करन शिप्रा नदी पाससै गे। नदी दे कंठै घाट बने दे हे। असें टल्ले तुआरे ते न्हाई धोई बाहर आई गे। शिप्रा मिगी मती गै प्रदूषत नदी बझोई। इस नदी दा पानी सैल्ला हा। असें रिक्शा कीता ते महा कालेश्वर मंदर दिक्खन चले। असें बजारें थमां लंघे। उज्जैन दा बजार दिक्खियै मेरी कल्पना दे बिम्ब त्रुट्टन लागे। इक उजड़े-पुजड़े दा शैहर। परानियां इमारतां निक्कियां-निक्कियां हट्टियां, तंग बजार, तंग गलियां। केह इ'यै शैहर राजा विक्रमादित्य दी राजधानी हा। कालीदास नै इत्थें बेहियै मेघदूत लिखेआ हा। केह इ'यै हिन्दुएं दा पावन तीर्थ ऐ। सतें पुरियें इच इक उज्जैन ऐ। फही इसदी एह दुर्दशा। 51 पीठें इच इक उज्जैन बी ऐ। फही इत्थें इन्ना उजाड़, इन्ना सुनापन। अ'ऊं दूरदर्शन इच दिक्खदा ते सुनदा हा - महाकाल की नगरी उज्जैन। इस त्रुट्टे-भज्जे दे शैहर गी दिक्खियै मिगी मता दुक्ख होआ। अस इक मंदर कछ पुज्जे तां रिक्शे आह्ला खड़ोई गेआ ते गलान लगा-बाबू जी, चार धाम आ गये हैं। आगे इजाजत नहीं। अस उत्थें उतरे। चार धाम मंदर दे दर्शन कीते। कालेश्वर महादेव दी पूजा लेई पत्नी नै सामग्री खरीदी ते फही अस उत्थें पैदल पुज्जे।

महाकालेश्वर मंदर

एह मंदर पवित्तर क्षिप्रा नदी थमां किश दूर रुद्र सागर दे कोल निर्मित ऐ। इसदा प्रांगण बड़ा खुल्ला ऐ। इत्थें होर बी मते मंदर न। ज्यार्तिर्लिंग इक बड्डे कक्ष कन्ने बने दे गर्भगृह इच संस्थापत ऐ। गर्भगृह इच द'ऊं बड्डे दिये

जि 'नेंगी नन्दा दीप गलांदे न ओह इत्थें लगातार जलदे रौहन्दे न। इसदे त्रौनें बक्खी श्री गणेश, पार्वती ते कार्तिकेय दी ठोस चांदी दियां मूर्ता न। इसदे गर्भगृह इच सौ किलो चांदी दे बने दे रुद्र यंत्र दी प्रतिष्ठा कीती गेदी ऐ। इत्थें सवेरे चार बजे भस्म आरती हुन्दी ऐ जिस इच मते लोक हिस्सा लैंदे न।

सपाहियें असेंगी बड्डे कक्ष तोड़ी गै जाने दी अनुमति दित्ती। असें उत्थूआं दा गै महा-कालेश्वर ज्योर्तिलिंग गी मत्था टेकेआ ते मंदर थमां बाहर आई गे। शास्त्रीय कताबें इच लिखे दा ऐ जे उज्जैन कुंभ पर्व दे मुख स्नान लेई सिंहस्थ बृहस्पति, मेषस्थ सूर्य, वैसाख म्हीना, शुक्ल पक्ख, पूर्णिमा तिथि तुला राशि इच चन्द्रमा, स्वाती नक्षत्र, व्यतिपात योग, सोमवार ते अवन्ती दा क्षेत्र होना जरूरी ऐ। इ 'नें दसें योगें इच जिस दिन ज्यदा योग होन उस ध्याड़ें कुंभ पर्व प्रधान (शाही) स्नान करने दा निजम ऐ। उज्जैन इच पैहला स्नान मेष संक्रांति गी, दूआ वसाख कृष्ण मस्सेआ गी ते त्रि'आ बसाख पूर्णिया गी हुन्दा ऐ। असें स्नान कीते दा हा। महाकालेश्वर मंदर बी मत्था टेकेआ ते पही अस उज्जैन दे किश होर थाहर दिक्खन गे। असें राजा विक्रमादित्य दे किले दा दरवाजा, राजा भर्तृहरि दी गुफा, सांदीपन ऋषि दा आश्रम, सिद्धवट, गणेश वेधशाला, हरसिद्धि देवी दा मंदर, श्री राम मंदर, गोपाल मंदर, काल भैरव, श्री मंगलनाथ, नवग्रह मंदर ते प्रशांति धाम बगैरा दिक्खें ते बस अड्डे उप्पर आई गे। उज्जैन थमां असें इन्दौर लेई बस पकड़ी ते रातीं दे अट्ठ बजे अस इन्दौर पुज्जे। उत्थें इक होटल इच असें इक कमरा कराये पर लैत्ता। रात असें उत्थें गै कट्ठी। सवेरे तेआर होए ते बस अड्डे पुज्जे। उत्थूआं दा असें बस पकड़ी ते ओंकारेश्वर ज्योर्तिलिंग दे दर्शन करने लेई चली पे। तौले गै साढ़ी बस फाड़ी सड़क उप्पर द्रौढ़न लगी। असेंगी इक दे बाद इक कुदरती छलैपे दे दक्ख लब्धन लगे। इस कन्ने साढ़ियें अक्खियें इच आनन्द दियां लैहरां हिलोरे लैन लगियां।

ओंकारेश्वर महादेव

अस इन्दौर जिले गी पार करियै निम्बाड़ जिले इच दाखल होए। एह पूरा इलाका फाड़ी ते जंगली हा। में इक कताब निम्बाड़ी संस्कृति उप्पर पढ़ी दी ही। उसदा रंग मिगी इत्थें बझोन लगा। अस दस बजे दे करीब माधान्त पुज्जे पही नर्मदा नदी इच स्नान करियै पुल पार कीता। पुल पार किश सीढ़ियां

चढ़ियां। इक गुफा बी दिक्खी पही किश पौड़ियां होर चढ़ियां ते मंदर परिसर इच पुज्जी गे। उत्थूआं दा अस मंदर दे अन्दर गे। मंदर दे गर्भगृह इच काले रंगे दे शिवलिंग हे, असें लिंग उप्पर प्रथा दे मताबक जल-अभिषेक कीता। लिंग गोलाकार हा। इ'यां बझोंदा हा जे एह प्राकृतक ऐ। एह धरातल थमां उप्पर उट्ठे दा हा ते अनगढ़ बझोंदा हा। इस लिंग दे पिच्छें इक सफेद पत्थर इच पार्वती दी मूर्ति ही।

दन्तकथा ऐ जे पुराणक काल इच राजा मांधाता नै इत्थें घोर तप कीता। उस उप्पर खुश होइयै शिव जी नै उसी इत्थें दर्शन दिते। तदू थमां इत्थें महादेव दी निरन्तर पूजा होआ करदी ऐ।

मंदर इच ज्योर्तिलिंग दे दर्शन करियै अस थल्लै आए। उत्थें इक निक्का बजार हा। असें उत्थें न्हारी कीती ते पही नर्मदा इच नौका-विहार करने गी चली गे। इक घंटा नौका-विहार करियै अस परतोई आए। नर्मदा दे कंढै असें होर बी केई पराने मंदर दिक्खे जिन्दे इच इक महादेव दा मंदर बी हा। एह बी इक पराना मंदर बझोंदा हा।

ओंकारेश्वर पुज्जने लेई इक रस्ता रतलाम थमां बी ऐ। रतलाम ओंकारेश्वर थमां 213 किलोमीटर दूर ऐ।

इन्दौर :-ओंकारेश्वर ज्योर्तिलिंग दे दर्शन करियै अस वापस इन्दौर आए। इत्थूआं दा असें अहमदाबाद जाना हा। अहमदाबाद लेई असेंगी रातीं दी बस मिली। बस चलने इच अज्जे किश चिर हा। इस लेई असें इन्दौर शैहर दा चक्कर लाया। एह शैहर असेंगी मता साफ-सुथरा ते व्यवस्थित बझोआ। पराना बजार किश तंग बी हा पर नमां बजार खुल्ला हा। इन्दौर मालवा खेतर दा इक मुख केन्द्र रेहा ऐ। इत्थें मंदर स्थापत्य दी बी इक बक्खरी शैली रेही ऐ। इन्दौर दा सौंदर्य दिक्खियै अस मते प्रभावत होए। अस फिरी टुरियै बस अड्डे उप्पर आए। बस जाने लेई तेआर ही। अस बस पर बैठे। बस ठीक अट्ठ बजे चली ते उसनै सवेरे पंज बजे असेंगी अहमदाबाद पुजाया। अस अहमदाबाद किश दिन अपने जागतै कछ रेह। पही ट्रेन उप्पर चढ़े ते जम्मू आई गे। जम्मू थमां बस पकड़ी ते पैथल पुज्जी गे।

मेरे लेई एह इक यादगारी जातरा ही।

23. उत्तरांचल जातरा

सन् 2001 इच बरसान्त दे बाद जि'यां गै सितम्बर महीना शुरु होआ, साढ़े किश जानु-पन्छानु उधमपुर थमां बस करियै केदारनाथ-बद्रीनाथ दी जातरा पर गे। मेरी पत्नी दी बी बड़ी मर्जी ही जे अस बी साथें-साथें एह तीरथ-जातरा करी लैचै। इतराज मिगी बी नेई हा पर खौदल इच दिक्खन सुनन किश घट्ट हुन्दा ऐ इस लेई अ'ऊं इकले जाना पसंद करनां। उ'यां बी अ'ऊं सितम्बर महीनै बेह्ला गै हा। 8 सितम्बर गी अस दोऐ जम्मू गे, बस स्टैंड थमां हरिद्वार दी टिकट लैत्ती। उ'नें दिनें कोई पर्व त्योहार नेई हा। खास भीड़ बी नेई ही। इस लेई बस पूरी नेई भरोची। किश सुआरियां पठानकोट दियां बी बैठियां। अस पठानकोट पुज्जे तां किश-किश न्हेरा पेई गेदा हा। बस उत्थें मता चिर नेई रुकी। अस बी बस थमां नेई उतरे। फही अस जलन्धर, लुधियाना, अम्बाला, सहारनपुर थमां हुन्दे सवेरे-सवेरे हरिद्वार पुज्जे। बाकी सुआरियें कन्ने अस बी थल्लै उतरे। असें रिक्शा कीता ते 'हरकी पौड़ी' स्नान करन चली गे। स्नान के बाद असें गंगा माता दे मंदर मत्था टेकेआ आरती इच हिस्सा लैत्ता ते फही कछ गै न्हारी खाइयै ऋषिकेश लेई गड्डी पकड़ी ते दस बजे थमां पैहले-पैहले उत्थें पुज्जी गे।

ऋषिकेश :-

असें लक्ष्मन झूला पार कीता। एह पुल गलांदे न जे पैहलै रस्सियें दा हा। जातरी इस पुल दी रस्सियें गी पकड़ियै लटकोई जंदे हे ते फही बड़ी मुश्कलें पार पुज्जदे हे। पर सन 1924 ई० इच हाड़ आया ते उस कन्ने ओह पुल रुढ़ी गेआ। फही सरकार नै एह नमां पुल बनाया। एह पुल गंगा नदी दी सतह थमां कोई 70 फुट उच्चा ते 450 फुट लम्मा ऐ। गलांदे न जे मेघनाथ दा बध करने दे बाद लक्ष्मण गी ब्रह्म हत्या दा पाप लगा तां उसनै मुक्ति पाने लेई इत्थें गंगा दे कंठै तपस्या कीती। उसदे चेत्ते इच गै इस थाहर दा नांs

लक्ष्मन घाट पेआ। शिवानन्द आश्रम साढ़े रस्ते आया। एह केई मंजिला हा। अस आश्रम बी गे मूर्तियें दे दर्शनें कीते ते फही थल्लै आए। हुन साढ़े लेई दिक्खने आसतै स्वर्गाश्रम हा। एह लक्ष्मण झूले थमां डेढ़ किलोमीटर अगें हा। इसदी स्थापना बावा आत्म प्रकाश होरें कीती ही। इत्थें केई गुफां न जिन्दे इच साधु-संत निवास करदे न। इक निश्चत समें उप्पर संत अपने हिस्से दा खाना लैन थल्लै औंदे न ते फही अपनी-अपनी गुफें इच चली जन्दे न। मेरे लेई एह आश्रम पैहलें बी आकर्शन दा केन्द्र नेई रेहा। हून बी नेई हा। बस सैर सपाटा गै हा। अस किश चिर ऋषिकेश घुम्मे फिरे। उत्थें साढ़े आह्ला लेखा होर बी मते लोक फिरा टुरा करदे हे। किश मंदर मत्था टेका दे हे ते किश साधु संतें थमां शीर्वाद हासल करा दे हे। मते लोक काली कमली आहले होटल इच खाने पीने गी जटोए दे हे। असें बी रुट्टी उत्थें गै खादी। हत्थ साफ कीते ते बाहर आए।

उत्थें असें गी बदेशी बी मते लब्धे जेहड़े ताई-तुआई फिरा करदे हे। अस इक हट्टी चढ़े। उसदी हट्टी दे अंदर किश बदेशी चरस दा मज़ा लै करदे हे। चरम दे सूटे लांदियां में बदेशी कुड़ियां बी दिक्खिआं। ओह चरस दी तपाश इच हट्टी-हट्टी फिरै दियां हियां।

अस गंगा दे कंढै बी फिरे ते फही पुल टप्पियै बस अड्डै आए। केदारनाथ दा नांऽ लेइयै इक कंडैक्टर बाजां मारा करदा हा। अस उस बक्खी गे। उसनै काऊंटर बक्खी शा'रा कीता। में दऊं टिकटां लेईअं ते फही अस अपनी सीटें उप्पर बेही गे। साढ़े कन्ने मतियां सुआरियां हिमाचल प्रदेश दियां हियां। उन्दे इच इक रिटायर तसीलदार बी हा। ओह अपने भनेह ते उसदी लाड़ी कन्ने जातरा पर जा करदा हा। साढ़ा उस कन्ने साथ बनी गेआ।

बस ठीक त्रै बजे भर दपैहरीं गौरी कुंड लेई चली। असेंगी एह दस्सी दिता गेदा हा जे बस रातीं कुसै होर थाहर रुकग। इ'यां उत्थें एह निजम ऐ जे रातीं अट्ठ बजे दे बाद गड्डियां चलाने दी इजाजत नेई ऐ।

ऋषिकेश थमां बीह किलोमीटर तोड़ी ते असेंगी बिच-बिच बस्तियां लब्धियां पर उसदे बाद फाड़ें दा सिलसिला शुरु होई गेआ। फाड़ गै फाड़, उच्चे फाड़ जंगलें कन्ने भरोचे दे फाड़। फाड़े थमां बगदे निक्के-निक्के नाले।

चट्टानें कन्ने टकरांदियां जलधारां ते पही आबशार। इक थमां इक बधियै दक्ख। साढ़े आहली बस फाड़ चढ़ी पही फाड़ उतरी। कदें-कदें बिजली दे लाटुएं दी लोऽ लगै तां बझोंदा हा जे इत्थें जरूर कोई ग्रां-दुकान जां मंदर ऐ। बल्लें-बल्लें न्हेरा बी पौन लगा। गड्डी दी लाइट दी लौऽ कन्ने सड़क ते लब्भै पर सज्जै खब्बै किश नेई लब्भै। कुदै-कुदै पानी बगने दी छेड़ ची सनोचै। खीर ढलाई दे बाद इक निक्का जेहा कस्बा आया। ड्राइवर नै गड्डी गी ब्रेक लाई ते खड़ोई गेआ। कन्डेक्टर नै घोशना कीती हुन गड्डी अगें नेई जाग। सारियां सुआरियां सवैरें सत्त बजे बस पर पुज्जी जान। अस बस थमां थल्लै उतरे। इक बोर्ड पर ग्रां दा नांऽ पढ़ेआ लिखेदा हा- रुद्र प्रयाग। उत्थें इक निक्का हारा बजार बी हा। बजार दे कन्ने सज्जै खब्बै निक्के बड़्डे होटल, गेस्ट हाऊस बी हे। साढ़े कन्ने हिमाचल दे जेहड़ें तसीलदार हे ओह इक गेस्ट हाऊस इच गे ते साढ़े लेई बी इक कमरा बुक कराई आए जिसदा कराया 80 रपेऽ हा। असें रुद्र प्रयाग रातीं दी रुट्टी खादी ते सेई गे। सवैरे तौले-तौले उट्टे ते संगम स्नान लेई गे। रुद्र प्रयाग थाहर अलकनन्दा ते मंदाकिनी दा संगम ऐ। किश होर नाले बी इत्थें मिलदे न। संगम कछ गै रुद्रदेव महादेव जी दा मंदर ऐ। मते लोक मंदर इच बी जा करदे हे। अस बी गे। उप्पर आए। थैल्ले चुक्के, न्हारी कीती ते बस उप्पर बेही गे। बस नदी दे कंढै-कंढै चली पेई। इ'यां रुद्र प्रयाग बी मिगी मता आकर्शक थाहर बझोआ। इत्थें में सच्चिदानन्द महाराज दे नांऽ दी इक पाठशाला दा बोर्ड दिक्खेआ ते इक बोर्ड कॉलेज दा बी पढ़ेआ। मता सन्दोख बझोआ जे बच्चें दे पढ़ने लेई शिक्षा केन्द्र हैन।

साढ़े आहली बस नदी दे कंढै चलदी-चलदी अगस्त मुनि ग्रां इच पुज्जी। ग्रां ते मता बड़्डा नेई हा पर डिग्री कॉलेज दा भवन बड़्डा हा। में अन्दाजा लाई लेआ जे एह ग्रां कश्यप मुनि दी तपोभूमि रेहा होग तां इसदा नांऽ उन्दे नांऽ उप्पर पेआ। इत्थें बी इक मंदर दे दर्शन होए पता चलेआ उसदा नांऽ साणेश्वर महाराज ऐ। इस पावन थाहर दे अगें किश चढ़ाई ही। बस दी रफ्तार किश घटी। अगें बंधे तां इक होर कस्बा नजर आया। नांऽ पढ़ेआ-लिखे दा हा गुप्त-काशी। इस थाहर मंदर ते जलकुण्ड बी हे पर खास गल्ल एह ही जे इत्थें मंदर दे पुजारी शैव-ब्राह्मण हे। ओह दक्खन दे हे। उत्तर ते दक्खन दा एह मेल मिगी मता सुखद बझोआ। में इस गल्लै पर बी मता

सोचेआ जे डुग्गर इच बी शैव पुजारी न। शिव मंदरें दा चढ़ावा उ'यै स्वीकार करदे न। उन्दा दक्खन दे शैव ब्राह्मणें कन्ने कोई सरबन्ध ते नेई ? खैर अ'ऊं सोचदा रेहा ते गड्डी अगें चलदी गई। रस्ते इच नारायण कोटि नांऽ दा इक थाहर आया। इसगी नारायण खेत्तर नी गलांदे न। इत्थें भगवान विष्णु ते लक्ष्मी नारायण दी बड्डी मूर्ति स्थापत ऐ। इक वीरभद्र महादेव दा ते इक सत्य नारायण जी दा मंदर ऐ। सैर सपाटे लेई एह इक उपयुक्त थाहर ऐ। इसदे अगें मां जगदम्बा दा खेत्तर आया। उस थमां अगें परशुराम ते जमदग्नि दा आश्रम आया फही सोन प्रयाग आया। उसदे थोड़े दूर अगें त्रियुगी नारायण दा मंदर हा। गलांदे न जे पार्वती ते शिव दा ब्याह सती दाह दे बाद इत्थें गै होआ हा पर अस मान तलाई मित्थने आं जेहड़ी सुद्ध महादेव कछ ऐ। इ'यां हिमाचल इच बी इक थाहर ऐ। उत्थें बी शिव ते गौरजां दे ब्याह दी कथा प्रचलन इच ऐ। मिगी बझोआ पूरा पच्छमी हिमालय संस्कृति दी द्रष्टि कन्ने इक ऐ। लाबा इक ऐ। खान-लान इक ऐ। बोल्ली बी मती रलदी-मिलदी ऐ। अ'ऊं सोचदा रेहा, गड्डी चलदी रेई। खीर इक थाहर गड्डी रुकी तां सुआरियां उतरन लगियां। कंडेक्टर जोरै कन्ने करलाया-गौरी कुंड। अस बी उतरे। इक गेस्ट हाऊस इच कमरा कराये पर लैता ते अगें प्रस्थान दी तैयारी शुरु कीती। हिमाचल दे साथी बी साढ़े आहले गेस्ट हाऊस इच गै रुके।

इक बज्जे करदा हा। दपैहर बी ही पर उत्थें गर्मी दा सेक नेई हा। असें उप्पर चढ़ने दा फैसला लैता ते चढ़ाई चढ़न लगे। गौरी कुंड ते कटड़ा वैशणो आहली चढ़ाई मिगी ईक्के जनेही बझोई। इक्के जेहा वातावरण। उ'यै घोड़े-बैंतर, पालकी दी सवारी। असें पैदल चलने दा मन बनाया। हिमाचली साथी बी पैदल चले। अस थोड़े अगें चले तां इक थाहर आया। उसदा नांऽ हा - चीरबासा। इत्थें जनानियां ते मर्द कप्पड़े दान करदे न। उस थमां अगें रामबाड़ा आया। इत्थें हट्टियां बी हियां। असें इत्थें गै चाह पीती। इसदे बाद खड़ी चढ़ाई ही। मेरी पत्नी थक्की गेदी ही। असें इत्थूआं दा घोड़े कीते ते गरुड़िया घाट चढ़ी देवदर्शिनी दे कछ-कछ पुज्जे। रस्ते इच बरखा ब'रन लगी तां साढ़े टल्ले त्रपिन्न होई गे। इ'यां रस्ते इच गलांदे हे जे हनुमान दी गुफा ते रामानन्द जी दा उपासना केन्द्र बी हा पर अस उत्थें नेई पुज्जे। देव-दर्शिनी थमां असें केदारनाथ जी दे दर्शन कीते ते फही किश चिर बाद इक निक्का मदान टप्पियै अस केदारनाथ धाम पुज्जी गे। उत्थें हर राज्य दे बक्खरे-बक्खरे पंडे हे। अस

अपने पंडे कछ गे। उसनै असेंगी इक कमरा दिता जित्थें पलंग बिछे दा हा। असें रजाई लेई ते थोढ़े चिर लेई सेई गे। फही अस त्रकालें उट्ठे। बजार फिरे दुरे, रुट्टी खादी ते फही सेई गे।

दूए ध्याडै 10 सितम्बर गी असें गर्म पानी इच स्नान कीता। गर्म पानी असेंगी पंडे उपलब्ध कराया। उसदे परैन्त अस केदारनाथ मंदर दे दर्शन करन टुरी पे। इस मंदर दा स्थापत्य पच्छमी हिमालय इच निर्मित मंदरें थमां बक्ख बझोआ। इ'यां मंदर दे बाहर इक खुल्ला प्रांगण हा जिस इच नंदीगण दी भव्य मूर्ति स्थापत ही। मंदर दा बाहरला हिस्सा कलात्मक हा। इसदे प्रवेशद्वार दा उपपरला हिस्सा त्रिकोणात्मक हा। शैद इस करियै जे हिमपात दे कारण मंदरै दी छतै गी नुकसान नेई पुजै। मंदर दे गर्भगृह इच जेहड़ा ज्योर्तिलिंग स्थापत ऐ ओह त्रिकोण रूप इच इक पर्वत खंड ऐ। उस कन्ने गै गोरजा माता बी विराजमान न। मंदर दे अन्दर पंज पांडव बी बने दे न जिन्दे लेई गलाया जन्दा ऐ जे उ'नें इत्थें हत्या दा पछोताऽ कीता हा। इन्दे अलावा उषा-अनिरुद्ध ते कृष्ण दियां मूर्ती बी हैन जिस थमां एह बझोंदा जे महाभारत काल दा इस मंदर कन्ने कोई सरबन्ध ऐ। इ'यां गलांदे न जे एह मंदर मता पुराना ऐ। आदि शंकराचार्य जी इत्थें आए हे। गलांदे न उन्दे जीवन काल इच बी इसदा पुर्न-निर्माण होआ हा। पर वर्तमान मंदर दा स्थापत्य दिक्खियै इ'यै बझोंदा ऐ जे इसदा मजूदा ढांचा त्रै सौ साल थमां पुराना नेई ऐ।

इस मंदर इच परिक्रमा दी व्यवस्था ऐ। मंदर दे बाहर परिक्रमा करदे अमृतकुण्ड, ईशान कुंड, हंस कुंड, रेतस कुंड दे दर्शन बी हुन्दे न। अस परिक्रमा करियै बाहर आए। फही अस शंकराचार्य दे मंदर गे। उस इच शंकराचार्य दी मूर्त स्थापत ऐ।

अ'ऊं किश चिर लेई केदारनाथ इच स्थित इक खुल्ले थाहर आइयै खड़ोई गेआ। समुन्दर तल थमां 3581 मीटर उच्चे इस खेत्तर दा प्राकृतक परिवेश मिगी मता मोहक लगा। सितम्बर महीनै बी इस खेत्तर दे फाड़े दे शिखर बर्फ दी चादरें इच लपटोए दे हे। फाड़े थमां पानी दियां जेहड़ियां चिट्ठी सफेद धारां उपपर दा थल्लै अ'वै करदियां हियां उ'नेंगी दिक्खियै बझोंदा हा जे प्रकृति अपने बाल खलारियै मस्ती दा नन्द लुट्टै करदी ऐ। इत्थें इक निक्का बजार बी हा। अस उत्थें न्हारी करन गे। दुकान थमां बाहर निकले

तां पंडा होर मिली पे। उन्दे थमां पुच्छेआ इस थमां अगगे केह ऐ ? ओह बोले :-कछ गै भुकण्डा भैरव दा थाहर ऐ, हँस कुंड ऐ, रेशेवर महादेव ऐ। वासुकी ताल ऐ। पैया ताल ऐ, काग भुसण्डी दा थाहर ऐ, मोक्ष ताल ऐ, रोहिणी ताल ऐ, शिव अमर धाम ऐ, चोर वाड़ी ताल ऐ, मोक्षद्वार ऐ, उसनै बी छड़े उन्दे नांऽ गै सुनाए। इ'यां गलांदे न जे कोई-कोई साधु गै उत्थें पुज्जदा ऐ।

असें इक बारी फही केदारनाथ धाम गी प्रणाम कीता। थैल्ले चुक्के ते दपैहरौं गौरी कुंड बापस आए।

गौरी कुंड :- एह थाहर केदारनाथ जातरा दा आधार शिविर ऐ। इत्थें केई गेस्ट हाऊस ते हट्टियां न। केदारनाथ लेई पैदल जातरा असें इत्थूआं दा गै शुरु कीती ही। हून गलांदे न जे सूमों राम वाड़ा तोड़ी जा करदी ऐ।

गौरी कुंड दा खास महत्त्व एह ऐ जे इत्थें गर्म ते ठंडे पानी दे चश्में न। जि'नें लोकें गी गँठिया होऐ ओह इत्थें स्नान करन तां ठीक होई जंदे न।

इस थाहर दे लेई इक कथानक रुढ़ि एह ऐ जे शिव गी प्राप्त करने लेई गौरजा नै इत्थे तप कीता हा। इस कोल गै इक त्रियुगी नारायण नांऽ दा थाहर ऐ, उत्थें शिव ते गौरजां दा ब्याह सम्पन्न होआ हा।

बद्रीनाथ लेई प्रस्थान :- 11 सितम्बर गी असें गौरी कुंड थमां बद्रीनारायण लेई प्रस्थान कीता। अस इक मेटाडोर इच बैठे। साढ़े कन्नं सोलां सुआरियां हियां। किश चिर अस उस्सै रस्तै चले जिस रस्ते थमां आए हे फही पुंल टप्पने दे बाद सड़क खिंडी गई। मेरी सीट कन्ने गै गोपेश्वर दा इक पंडा बैठे दा हा। ओह मिगी रस्ते इच उंगली चुक्कियै बक्खरे-बक्खरे थाहरे बक्खी इशारा करांदा जा। थाहर ते मिगी लब्धदे नेई हे पर उन्दी जानकारी जरूर मिलदी ही। उसनै गड़्डी इच बैठे दे गै सिद्धपीठ काली मठ दा नांऽ लैत्ता ते गलाया जे इत्थें काली दा मंदर ऐ। कछ गै कविष्ठा ऐ जित्थें कालीदास नै जन्म लैत्ता हा। इस मंदर दे पुजारी भट्ट ब्राह्मण न। इत्थें गौड़ ब्राह्मण बी रौहन्दे न। तंत्र विद्या जानदे न। उसने काली शिला, रांसी रांस माई, मद महेश्वर, अखी मठ ते फही चोपता दा नांऽ लैत्ता। इत्थें साढ़ी गड़्डी किश चिर लेई रुक्की। सारे जातरु बाहर निकले। अस बी बाहर आए। मेरे कन्ने पंडा होर बी आए। चाह

पींदे ओह फही बोले - इत्थूआं दा इक पगडंडी तुंगनाथ मंदर गी जंदी ऐ। मते जातरी उत्थें बी जन्दे न। मान्यता एह ऐ जे केदारनाथ दे पंज थाहर न। शिवलिंग केदारनाथ ऐ। तुंगनाथ बांह (बाजु) ऐ। रुद्रनाथ मूंह ऐ, मदमहेश्वर इच नाभि ऐ। कल्पेश्वर इच जटां न। जेहड़े इ 'नें पंजे दे दर्शन करन उ 'नेंगी पूरा फल मिलदा ऐ। गड्डी चली ते फही अस मते अगें आए तां पंडा होर गलान लगे इत्थूआं दा अनुसूया धाम गी रस्ता जंदा ऐ, उत्थूआं दा रुद्रनाथ धाम गी रस्ता जंदा ऐ। अस थोढ़े होर अगें आए ते इक निक्का शैहर बी नज़र इच चढ़ेआ-पंडा होर बोले इ 'यै गोपेश्वर ऐ। इत्थें गै भगवान गोपीनाथ जी दा मंदर ऐ।

गोपेश्वर दे बारे इच में बी मता किश पढ़े दा हा। जि 'यां सुद्ध महादेव मंदर इच त्रिशूल गड्ढे दा ऐ इ 'यां गै इत्थें बी मंदर दे अंदर इक त्रिशूल ऐ जिस इच सुद्ध महादेव दे त्रिशूल आह्ला लेखा गै भुवि नाग ते गणपति नाग दे नांऽ अंकत न। मिगी बझोआ जे इ 'नें दोन्नें शिलालेखें उप्पर गहन शोध दी लोड़ ऐ।

पंडा होर ते गोपेश्वर उतरी गे। अस पुल पार करियै चमोली पुज्जे। उत्थें बी इक द'ऊं मठ दिक्खे। फही अस जोशी मठ पुज्जे। एह बड़डा शैहर बझोआ। इत्थें भगवान नरसिंह जी दा इक पवित्तर स्थान ऐ। ओह मनुक्ख ते शेर रूप इच न। जोशी मठ इच स्यालै बद्रीनाथ धाम दे कर्मचारी ते अधिष्ठाता कबाड़ बंद करियै आई जंदे न। जोशी मठ थमां अस दरिया दे कंढै-कंढै अगगे बधे। दरिया दे पार साथी गलान लगे हेमकुण्ड साहब दे दर्शन हुन्दे न। उत्थें किश चिर गुरु गोबिन्द सिंह जी रेह हे। उत्थें हुन इक गुरुद्वारा ऐ। उसदे अगें फुल्लें दी घाटी ऐ, पर अस उत्थें बी नेई गे। अगें चले तां देव दर्शनी थाहर आया। इत्थें गै बद्रीधाम दे पैहले दर्शन होए। इत्थूआं दा अगगे चले तां अस बद्रीधाम पुज्जी गे।

बद्रीधाम :- भारत दा एह पवित्तर तीरथ हिमालय प्हाड़ इच स्थित ऐ। एह थाहर नर ते नारायण प्हाड़ शृंखलां कन्ने घिरे दा ऐ। समुन्दर तल थमां इसदी उंचाई 3133 मीटर ऐ। एह अलकनन्दा दरिया दे कंढै स्थित ऐ। जे ऋषिकेश दा सिद्धे बद्रीधाम औना होऐ तां एह तीरथ 285 किलोमीटर दूर ऐ।

अस बट्टीनाथ कोई त्रै बजे पुज्जे। उत्थें असें इक निक्का जेहा फाड़ी शैहर दिक्खेआ जेहड़ा इक किलोमीटर तोड़ी फैले दा हा। इत्थें केई भवन, धर्मशालां ते होटल न। इ'यां प्रथा तीरथ परोहतें दे भवन इच ठैहरने दी ऐ। असें जम्मू-कश्मीर दा पंडा तुप्पेआ ते ओह् असेंगी इक किलोमीटर दूर इक दुमंजिले भवन इच लेई गेआ। उसनै असेंगी खलकी मंजिल इच इक कमरा खोल्ली दिता। पूरी मंजिल इच साढ़े इलावा होर कोई नेई हा। असें टल्ले बदले ते दर्शन करने गी चली पे।

बट्टीनाथ जी दा मंदर अलका नदी दे सज्जै कंढै हा। अस इक निक्का बाजार टप्पियै अगगे बधे, पुल पार कीता ते मंदर परिसर इच पुज्जी गे। मंदर दे थल्लै गरम पानी दा चश्मा हा। अ'ऊं उसदे पानी इच न्हाता। मेरी पत्नी नै बी स्नान कीता ते फही अस दर्शन करने गी अगगें बधे ते पौड़ियां चढ़ियै उप्पर गे। पैहले में मंदर गी बाहरै थमां दिक्खेआ।

एह मंदर उतरांचल दे दूए मंदरें आहला लेखा स्थानी कत्यूरी शैली इच निर्मित ऐ। एह इक भव्य मंदर ऐ। इसदा मुख द्वार पूर्व बक्खी ऐ। मुख द्वार मता गै कलात्मक ऐ। इसदा उप्परला सिरा बी शिखर युक्त ऐ। मंदर दे अन्दर श्री भगवान बट्टीनाथ जी दी चतुर्भुजी मूर्ति स्थापत ऐ जेहड़ी काले रंग इच ऐ। मूर्ति गी पीले वस्त्रें ते गैहनें-बन्धें कन्ने सजाया गेदा ऐ। मूर्ति दे मुकुट इच इक मता कीमती हीरा जड़े दा ऐ जिसदी आभा कन्ने गर्भगृह अलौकित रौहन्दा ऐ। मूर्तियां इक सिंहासन उप्पर प्रतिष्ठित न। इत्थें जेहड़ियां मूर्तियां दर्शन लेई रक्खी दियां न ओह् न - लक्ष्मी, नर नारायण, नारद, गणेश, गरुड़, कुबेर ते उद्वव दी मूर्ति।

मंदर परिक्रमा इच बी पांडवें ते केई होर देवी-देवतें दियां मूर्तां न। अस मंदर मत्था टेक्कियै थल्लै आए। फही असें तीर्थ पुरोहत कन्ने ऋषिधारा, कूर्मधारा, प्रहलाद धारा, बगैरा दे दर्शन कीते। पंडा होरें असेंगी ब्रह्म-कुण्ड, गौरी कुण्ड ते सूर्य कुण्ड बी दस्सेआ। फही असें नारद-शिला, गरुड़ शिला, नरसिंह शिला, बारह शिला ते मार्कण्ड शिला बी दिक्खी। बाद इच पंडा असेंगी ब्रह्म-कपाल लेई गेआ उत्थें उसनै असेंगी पितरें लेई पिण्ड तर्पण करने गी गलाया।

किश चिर बाद पण्डे नै असेंगी आक्खेआ - तुस बसुधारा बी जाई सकदे ओ, उत्थे इक आबशार ऐ। इत्थूआं दा ओह् थाहर किश दूर ऐ। मनि भद्रपुर त्रै किलोमीटर ऐ। इत्थें गणेश गुफा ऐ। व्यास ते सरस्वती इत्थें मिलदियां न इस लेई इस थाहर गी केशव प्रयाग गलांदे न। दिक्खने जोग थाहर माणा ग्रां बी ऐ। एह् थोढ़ी दूर ऐ। मेरी मर्जी माणा ग्रां दिक्खने दी ही पर सेहत ठीक नेई होने करी अ'ऊं जाई नेई सकेआ।

उस्सै ध्याडै 12 सितम्बर गी अस परतियै न्हाई धोइयै मंदर दर्शन करन गे। उत्थें भीड़ मती नेई ही। पंडा होर बी साढ़े कन्ने नेई हे। असें दर्शन कीते ते न्हारी खाईयै बस अड्डै आए। ऋषिकेश लेई इक निक्की गड्डी जा करदी ही। अस उस्सै पर बैठे। रात असें श्रीनगर कट्टी। उत्थें बी फिरे टुरे ते गढ़वाल विश्व विद्यालय दा भवन बी दिक्खेआ।

13 सितम्बर गी अस सवेरे-सवेरे गड्डी उप्पर बैठे। 11 बजे अस ऋषिकेश ते 12 बजे हरिद्वार पुज्जे। हरिद्वार अस किश चिर गै रुके। रातीं दी बस पकड़ी ते 14 सितम्बर गी जम्मू पुज्जी गे। उत्थूआं दा उस्सै दिन अस पैथल आई गे।

इस जातरा इच में हिमालय प्हाड़ दे जेह्दे साक्षात् दर्शन कीते उसदे बिम्ब अज्ज बी मेरे दमाग इच हैन।

०००

24. मन्सूरी जातरा

सन 2004 इच मनमांस आए। मेरी पत्नी नै ग्रां दी जनानियें दा अनुसरण करदे होई छे ऐतवारें आप शम्भु दे मंदरें इच जाइयै दिये बाले ते पही उन्दा मोख कीता। ग्रां दियां किश जनानियां गंगा न्हौन हरिद्वार बी गेइआं, एह खबर मेरी लाड़ी दे कन्नें तोड़ी बी पुज्जी गेई। उसनै बी गंगा स्नान करने दा ऐसा रट्टा लाया जे खीर मिगी हाम्मी भरनी गै पेई।

अ'ऊं पैहले कटड़ा गेआ। उत्थूआं दा इक सरकारी बस हरिद्वार जंंदी ही। उस इच सीट नेई लब्धी पर जम्मू थमां हरिद्वार लेई टिकट मिली गेई। अस जम्मू पुज्जे। उत्थें मता रश हा। बसां अ'वै जारदियां हियां। पर जिस बस उप्पर असें जाना हा ओह, अज्जें नेई आई। त्रकालां पौन लगियां। खीर रौला पेआ जे बस आई गेई। अस बी थैल्ले चुक्कियै द्रोड़े। अपनी सीट मल्ली ते धड़ाम कीते उस उप्पर पेई गे। बस तौले गै चली पेई। इसदे बाद अस, पठानकोट, लुधियाना, अम्बाला, सहारनपुर ते पही सवरे अट्ठ बजे कनखल कछ पुज्जे। उत्थें पुलस नै साढ़ी बस रोकी लैत्ती। अगें जाने दी इजाजत नेई ही। अस बी उतरी पे। इक नै सलाह दिती जे तुन्दा हरकी पौड़ी पुज्जना मुश्कल ऐ। तुस दूए घाट स्नान करो। रिक्शा पकड़ो ते निकली जाओ।

असें बी रिक्शा पकड़ेआ ते चली पे। अगें पही असेंगी रोकी लैत्ता गेआ। हुक्म होआ रिक्शे दी इजाजत नेई पैदल जाओ। अस पैदल चली पे। मेरे पिच्छे-पिच्छे मेरी लाड़ी बी घसटोन लगी। कोई त्रै किलोमीटर चले तां घाट आया। उत्थें सुनमसान ही। पही बी अस न्हाते-धोते पुल टप्पेआ ते हरकी पौड़ी पुज्जे। उत्थें रश मता हा। असें इक-इक नै टल्ले खोल्ले नदी इच स्नान कीता ते बाहर आई गे। पत्नी गी दान पुण्य दा चेत्ता आया। उ'नै किश मंगतें गी किश साधुएं गी आलू पूड़ियां बंडिया ते गंगा मंदर जाइयै किश पशाकां चाढ़ियां ते परतोई आई। पही गलान लगी मेरा स्नान, ध्यान दान पुण्य होई गेआ हुन

चलो न्हारी खन्नेआं। हरकी पौड़ी कछ गै हलवाईयें दी हट्टियां हियां। असें उत्थें गै दऊं-दऊं पूड़ियां खादिआं। हुन साढ़ा अगला कार्यक्रम सैर सपाटे दा हा। असें सारें थमां पैहलें मन्सा देवी जाने दा मन बनाया। रस्ते इच माया देवी दा मंदर आया। ओह बजारै दे कोल हा। अस पैहलें उत्थें गे। मत्था टेकेआ। इ'यां सुने दा हा जे माया देवी हरिद्वार दी अधिष्ठात्री देवी ऐ। इसदे नांऽ उप्पर गै हरिद्वार गी मायापुरी गलांदे न। फही उत्थूआं दा पुछदे पुछांदे उत्थें पुज्जे जित्थूं दा उड्डन खटोले लेई टिकटां मिलनियां हियां। अस टिकटां लेइयै खटोले उप्पर बैठे ते उप्पर पुज्जी गे।

मन्सा देवी दा मंदर शिवालिक पर्वत शृंखला दे इक शिखर उप्पर ऐ। उत्थें पुज्जदे गै अस सभनें थमां पैहले मंदर मत्था टेकन गे। मन्दर दे गर्भगृह इच जरत्कारू दी पत्नी सप्पें दी रानी माता मन्सा दी मूर्त स्थापत ऐ इस मूर्त इच मन्सा देवी दियां पंज बाहमां ते त्रै मूंह दस्से गेदे न। देवी अट्ठें नागें उप्पर स्थापत ऐ। अस मत्था टेकियै बाहर आए। शिखर थमां असें हरिद्वार दे बक्ख-बक्ख दक्ख दिक्खे। शैहर दिक्खेआ, गंगा नदी दिक्खी, मंदर दिक्खे। इक मंदर होर उच्चे टिब्बे उप्पर दिक्खेआ। ओह नागर शैली दा मंदर हा। लोकें सनाया जे एह चंडी माता दा मंदर ऐ। उत्थें जाने लेई बी उड्डन खटोला दी व्यवस्था ही पर असें दूर थमां गै मत्था टेकेआ। इक मंदर इत्थें अंजना देवी दा बी ऐ।

अस मन्सादेवी थमां थल्लै आए रिक्शा कीता ते विल्केश्वर महादेव मंदर दिक्खन गे। इ'यां गै इक मंदर असें पैहलें दक्ष महादेव दा कनखल दिक्खेआ हा।

साढ़े कछ अज्जे मता टैम हा। दपैहरीं दी रुट्टी असें खानी नेई ही इस लेई अस सप्त ऋषि आश्रम दिक्खन गे। अ'ऊं पैहली बारी अपने पिता हुन्दी अस्थियां लेइयै हरिद्वार आया हा तां बी अ'ऊं इत्थें पुज्जा हा। इत्थें गंगा सत्ते धाराएं इच प्रवाहमान ऐ। इससै लेई इस थाहर दा नांऽ सप्त सरोवर जां सप्त ऋषि ऐ।

रिक्शे आहले नै असेंगी सती कुंड बी दस्सेआ। एह उ'यै कुण्ड हा जिस इच दक्ष प्रजापति नै यज्ञ करोआया हा ते फही अपने पति भगवान शिव दी बेइज्जती बर्दाश्त नेई होने दे कारण देवी पार्वती इस इच छाल मारियै यज्ञ दी

आहुति बनी ही। असें रस्ते इच इक नमां वैष्णो देवी दा मंदर ते सप्त सरोवर दिक्खेआ। प्ही अस भीम गौड़ा दिक्खन गे। इत्थें इक कुण्ड ऐ जिसगी भीम दे नांऽ कन्ने जोड़ेआ जंदा ऐ।

एह कुण्ड दिक्खियै अस भारत माता दा मंदर दिक्खन गे। एह मंदर मिगी मता पसंद आया। इस इच पूरे भारत दी तस्वीर पेश कीती गेदी ऐ। एह मंदर अट्ठ मंजिला ऐ। इसदा निर्माण सन 1983 ई० इच होआ हा।

गुरुद्वारा :-हरिद्वार इच त्री पातशाही दा इक भव्य गुरुद्वारा ऐ। एह सती घाट गंगा दे कंठे उप्पर ऐ। इत्थें सिक्ख गुरु अमरदास जी नै कठन तप कीते दा ऐ। ओह इत्थें 23 बारी आए। उ'नें सती प्रथा दा बरोध कीता। इस गुरुद्वारे गी बाबा दरगाह सिंह दा डेरा बी गलांदे न। इत्थें गद्दी परम्परा चला करदी ऐ।

शांतिकुंज :-इस थाहर गी किश लोक गायत्री तीर्थ बी गलांदे न। इस संस्थान दी स्थापना आचार्य श्रीराम शर्मा नै सन 1971 इच कीती ही। एह संस्थान भारतीय संस्कृति दे प्रचार-प्रसार लेई प्रतिबद्ध ऐ। इस संस्थान दी हुन अपनी इक यूनिवर्सिटी बी ऐ। इत्थें इक अखंड जोत जलाई गेदी ऐ। इस संस्थान दे प्रचारक देश ते बदेश इच भारती संस्कृति दा दिग्दर्शन करांदे न। असें इत्थूआं दा किश कताबां बी खरीदियां।

पतंजलि योग आश्रम :-योग-गुरु रामदेव पास्सेआ संचालत एह संस्थान मूल रूप इच योग-साधना दा केन्दर मित्थेआ जंदा ऐ। एह बी इक बड्डा संस्थान ऐ जित्थें योग दे कन्ने-कन्ने आयुर्वेद चिकित्सा पद्धति दा प्रचार कीता जंदा ऐ। इत्थें असें योग गुरु हुन्दे दर्शन कीते।

जम्मू-यात्री भवन :-में एह भवन हरकी पौड़ी थमां पुल पार करने दे बाद ऋषिकेश गी जाने आहली सड़क दे कंठे दिक्खेआ हा। इत्थें जातरियें दे रौहने-ब्हौने दी ठीक-ठीक व्यवस्था ऐ। एह जम्मू दे दानियें पास्सेआ संचालित ऐ।

मन्सूरी :-हरिद्वार थमां मन्सूरी जाने दा मन अस पैहलें गै बनाई चुक्के दे हे। भारत दे पर्यटन स्थलें इच मन्सूरी दा बक्खरा गै नांऽ ऐ। इसगी सैलानियें

‘ਫ਼ਾਡੇਂ ਦੀ ਰਾਨੀ’ ਆਖਿਓਏ ਇਸਦਾ ਗੌਰਵ ਹੋਰ ਮਤਾ ਬਧਾਯਾ। ਅੰਗ੍ਰੇਜ਼ ਸਰਕਾਰ ਦੇ ਸ਼ਾਸਨ ਕਾਲ ਚ ਵੀ ਇਸਗੀ ਮਤਾ ਮਹੱਤਵ ਦਿੱਤਾ ਗਿਆ। ਇਸਦਾ ਬਕਾਸ ਵੀ ਅੰਗ੍ਰੇਜ਼ ਸਰਕਾਰ ਨੇ ਗੈਂ ਸ਼ੁਰੂ ਕੀਤਾ।

29 ਅਗਸਤ 2004 ਦਾ ਧਿਆਏ ਮੇਰੇ ਲੇਏਂ ਵੀ ਮਤਾ ਸ਼ੁਭ ਹਾ। ਅ‘ਓਂ ਅਪਨੀ ਪਤਨੀ ਗੀ ਲੇਏਏਂ ਸਵੇਰੇ-ਸਵੇਰੇ ਦੇਹਰਾਦੂਨ ਦੇ ਬਸ ਅਡਫੇ ਉਪਰ ਆਯਾ। ਅਸ ਦੋਏ ਬਸ ਉਪਰ ਬੈਠੇ ਤੇ ਬਸ ਦੇਹਰਾਦੂਨ ਲੇਏਂ ਰਵਾਨਾ ਹੋਏਂ ਗੇਏਂ। ਹਰਿਦੁਆਰ ਤੇ ਦੇਹਰਾਦੂਨ ਦੇ ਬਸਕਾਰ ਅਸੇਂ ਉ‘ਏਂ ਕੁਦਰਤੀ ਨਜ਼ਾਰੇ ਦਿਖਵੇ ਜੇਹਡੇ ਅਸ ਚਨੈਨੀ ਥਮਾਂ ਮਾਨ ਤਲਾਏਂ ਜੰਦੇ ਦਿਖਵੇ ਆਂ। ਫ਼ਾਡੀ ਇਲਾਕਾ, ਫ਼ਾਡੀ ਭਾ, ਜੰਗਲ, ਪੈਂਓ ਤੇ ਚਰਾਗਾਹੇਂ ਚ ਚਰਦੇ ਡੰਗਰ। ਅਸੇਂਗੀ ਪਤਾ ਗੈਂ ਨੇਏਂ ਲਗਾ ਜੇ ਅਸ ਇਨੇ ਤੌਲੇ ਦੇਹਰਾਦੂਨ ਕਿ‘ਧਾਂ ਪੁਜ਼ੀ ਗੇ। ਪਹੀ ਦੇਹਰਾਦੂਨ ਥਮਾਂ ਮੰਸੂਰੀ ਲੇਏਂ ਪ੍ਰਸਥਾਨ। ਉ‘ਏਂ ਜੇਹਾ ਫ਼ਾਡੀ ਸਫਰ ਜਨੇਹਾ ਚਨੈਨੀ ਥਮਾਂ ਪਤਨੀ ਟੌਪ ਦਾ ਏ। ਇਕ ਥਮਾਂ ਬਦਥ ਇਕ ਕੁਦਰਤੀ ਨਜ਼ਾਰੇ, ਦਿਲਕਸ਼ ਦਿਖਵੇ, ਫ਼ਾਡੇ ਚ ਫੰਗ ਫੈਲਾਏਏਂ ਉਡਫੇ ਬਦਦਲ। ਅਸ ਚਫਾਏ ਚਫਦੇ ਗੇ ਤੇ ਮੌਸਮ ਦਾ ਮਜ਼ਾ ਵੀ ਲੈਂਦੇ ਗੇ। ਰਸਤੇ ਇਕ ਝੀਲ ਵੀ ਦਿਖਵੀ, ਓਹ ਕਿਸ ਥਲ੍ਹੈ ਹੀ, ਉਥੇਂ ਨੇਏਂ ਪੁਜ਼ੇ ਤਾਂ ਖੀਰ ਮੰਸੂਰੀ ਦੇ ਬਸ ਅਡਫੇ ਆਏਂ ਉਤਰੇ। ਇਕ ਕਮਰਾ ਕਰਾਏ ਪਰ ਲੈਤਾ ਤੇ ਨਿਕਲੀ ਪੇ ਸੈਰ ਕਰਨ।

ਪਤਨੀ ਟੌਪ ਆਹਲਾ ਲੇਖਾ ਇਥੇਂ ਵੀ ਹੋਟਲ, ਗੇਸਟ ਹਾਊਸ ਤੇ ਲੌਂਜ ਗੈਂ ਲੌਂਜ ਹੇ। ਇਕ ਬਜ਼ਾਰ ਵੀ ਹਾ ਜਿਸਦਾ ਨਾਂਸ ਹਾ ਮਾਲਰੋਡ, ਸੈਲਾਨੀ ਸਡਕ ਉਪਰ ਧੂਮਾ-ਫਿਰਾ ਕਰਦੇ ਹੇ। ਮੌਸਮ ਕਿਸ਼ ਬਦਲੋਖਾ ਹਾ, ਬਿਚ-ਬਿਚ ਹਲਕੀ ਫੁੰਗਾ ਵੀ ਪੌਂਦਿਆਂ ਹਿਧਾਂ ਪਰ ਪਹੀ ਵੀ ਧੁਮਨੇ ਚ ਮਜ਼ਾ ਗੈਂ ਮਜ਼ਾ ਬਝੌਂਦਾ ਹਾ।

ਮੇਰੇ ਲੇਏਂ ਮੰਸੂਰੀ ਚ ਆਕਰਸ਼ਨ ਦਾ ਕੇਂਦਰ ਅੰਗ੍ਰੇਜ਼ੇ ਦੇ ਸਮੇਂ ਦੀ ਇਕ ਪਰਾਨੀ ਲਾਏਂਬਰੀ ਹੀ। ਏਹ ਦੁਮੰਜਲੀ ਹੀ। ਇਥੇਂ ਕਮਰੇ-ਕਮਰੇ ਚ ਫਿਰਨੇ ਤੇ ਕਤਾਬਾਂ ਫਰੋਲਨੇ ਚ ਮਿਗੀ ਬਖ਼ਸ਼ਾ ਗੈਂ ਆਨੰਦ ਮਿਲੇਆ। ਅਸ ਰਾਤੀਂ ਦੇ ਦਸ ਬਜੇ ਤੋਡੀ ਮੰਸੂਰੀ ਦੀ ਸੈਰ ਕਰਦੇ ਰੇਹ। ਰਸਤੇ ਚ ਅਸੇਂਗੀ ਜੰਮੂ ਦੇ ਵੀ ਕਿਸ਼ ਵਿਦਧਾਰੀ ਲਭੇ ਜੇਹਡੇ ਇਥੇਂ ਪ੍ਰਸ਼ਿਕਸ਼ਣ ਲੈ ਕਰਦੇ ਹੇ। ਉ‘ਧਾਂ ਵੀ ਇਥੇਂ ਅਮੀਰ ਬਚੇਂ ਲੇਏਂ ਮਤੇ ਉਚੇ ਤੇ ਮੈਂਹੰਗੇ। ਸ਼ਿਕਸ਼ਾ-ਸੰਸਥਾਨ ਨ। ਸਵੇਰੇ ਅਸ ਨਹਾਰੀ ਕਰਿਏਂ ਬਸ ਉਪਰ ਬੈਠੇ ਤੇ ਦੇਹਰਾਦੂਨ ਆਏਂ ਗੇ।

ਦੇਹਰਾਦੂਨ :-ਅਜ਼ ਏਹ ਸ਼ੈਹਰ ਉਤਰਾਖੰਡ ਦੀ ਰਾਜਧਾਨੀ ਏ। ਇਸਦਾ ਬਕਾਸ ਨਮਾਂ ਪ੍ਰਦੇਸ਼ ਬਨਨੇ ਦੇ ਬਾਦ ਮਤੀ ਤੇਜੀ ਕਨੇ ਹੋਆ ਏ। ਇ‘ਧਾਂ ਏਹ ਕੋਏਂ ਮਤਾ ਪਰਾਨਾ ਸ਼ੈਹਰ ਵੀ ਨੇਏਂ ਏ। ਸਨ 1676 ਈ० ਚ ਇਥੇਂ ਸਿਕਖ ਗੁਰੂ ਹਰਿ ਰਾਧ ਜੀ ਦੇ ਪੁਤਰ

गुरु रामराय आए तां गढ़वाल दे राजा फतेहशाह नै उन्दा भव्य स्वागत कीता। उ'नें गुरु जी गी रौहने लेई इस दून इच त्रै गां खुड़बुड़ा, चामासारी ते राजपुर भेंट इच दित्ते। गुरु जी ने इत्थें जेहड़ा गुरुद्वारा स्थापत कीता उसदा नांऽ पेआ-डेरा-दूण। बस इस थमां गै एह थाहर देहरादून नांऽ कन्नै मशहूर होआ।

अज्ज देहरादून इक विशाल शहर ऐ। इत्थें केई केन्दरी संस्थान न। इस दा बकास दिन-दिन होआ करदा ऐ।

देहरादून नै अपने जीवन काल इच केई उत्थान ते पतन दिक्खे दे न। सन 1804 ई० इच गोरखें इस उप्पर हमला कीता तां गढ़वाल दे राजा प्रद्युम्न शाह लड़ाई इच शहीद होई गे। फही ऐ सारा इलाका गोरखें दे अधिकार इच आई गेआ। फही अंग्रेजी सेना नै 30 नवम्बर 1814 ई० इच गोरखा सेना गी इत्थूआं दा खदेड़ी दित्ता ते म्हेशां लेई अमन कैम करने लेई इत्थें इक छावनी कैम कीती। बाद इच इत्थें सेना दा इक प्रशिक्षण केन्द्र बी स्थापत होआ।

देहरादून कोल गै इक कसबा कर्णपुर ऐ। हुन एह देहरादून दा गै इक हिस्सा ऐ। इस कसबे गी रानी कर्णावती नै बसाया हा। इस्सै कसबे इच पतने राजमैहल हे जित्थें गर्मियें इच राज परिवार दे लोक रौहन्दे हे। एह पूरा इलाका पैहले गढ़वाल राजा दे अधीन हा। इसदा इन्तजाम इक फौजदार दे अधीन हा। मेरी कोशिश देहरादून डोगरी लेखक जितेन ठाकुर हुन्दे कन्ने मिलने दी ही पर साढ़ी मलाटी नेई होई सकी। अस उस्सै दिन देहरादून थमां सहारनपुर आए ते फही उत्थूआं दा जम्मू ते जम्मू थमां घर पुज्जे। मेरे लेई एह जातरा मती उद्देशपूर्ण रेही।

०००

25. कुमाऊं जातरा

एह इक संजोग हा जे मिगी अपने बड्डे जमातरे योगेन्द्र दा साथ देने लेई जिला पिथौरागढ़ दे डीडी हाट कसबे इच जाना पेआ। होआ इ'यां जे मेरे जमातरे दी मां गायत्री देवी अपने निक्के पुत्तर कमल कछ मिरच कल्याण पुर गेदी ही। कमल भारत तिब्बत सीमा बल इच डीडीहाट थाहर तैनात हा। स्याला शुरु होने आह्ला हा इस लेई कमल दी मां गी जगानु आहनना जरूरी हा।

अ'ऊं ते मेरा जमातरा 4 अक्तूबर 2007 गी संजा रेल उप्पर बैठे ते पही सवेरे-सवेरे अस मुरादाबाद पुज्जी गे। उत्थूआं दा असें बस पकड़ी ते 2 बजे हल्द्वानी पुज्जे।

हल्द्वानी :- एह इक निक्का जेहा शैहर ऐ। इसगी कुमाऊं मंडल दा प्रवेश द्वार मित्थेआ जंदा ऐ। इत्थें इक निक्का जेहा बजार ऐ। डिग्री कॉलेज ऐ। केई सरकारी ते गैर सरकारी स्कूल न। इत्थें निक्के बड्डे दफ्तर बी हैन। इक दफ्तर भारत-तिब्बत सीमा बल दा बी ऐ। इस दफ्तर कन्ने इक गेस्ट हाऊस ऐ। अस कमल दे रिश्तेदार हे, इस लेई असेंगी रौहने लेई इक कमरा मिली गोआ। जित्थें अस रुके उस जगह दा नांऽ काठ गोदाम हा। एह सैनकें लेई आवागमन दा केन्द्र बी हा। साढ़े कन्ने साम्बा दा इक सपाई योगेन्द्र सिंह बी हा। ओह बी डीडी हाट जा करदा हा। अस जि'यां गै कमरे इच अराम करने गी पलंग उप्पर लेटे ता कमल दा साढ़े नांऽ सनेहा आया जे अस मैहकमें दी बस पर सोमवारें अट्ठ अक्तूबर गी डीडीहाट औचै।

नैनी ताल :- डीडीहाट जाने इच अज्जें दऊं दिन हे। इक गेस्ट हाऊस इच लेटना मिगी पसंद नेई हा। इस लेई में 6 अक्तूबर गी नैनीताल जाने दा मन बनाया। में जमातरे गी कन्नै लैत्ता ते सवेरे-सवेरे गै नैनीताल लेई रवाना होई गोआ। नैनीताल लेई हल्द्वानी दा जेहड़ी सड़क जंदी ही उसदे दक्ख बी चनैनी पत्नी टॉप सड़क आह्ला लेखा गै हे। चढ़ाई, मोड़, सड़क दे कंढै बूहटे,

बिच-बिच ग्राई घर ते निक्कियां निक्कियां चाह पानी दियां हट्टियां। अस दस बजे दे चले दे 12 बजे नैनीताल पुज्जे।

इत्थें पुजदे गै में सारे थमां पैहलें झील दा अवलोकन कीता। एह झील मिगी मानसर झील जनेही गै बझोई पर बकास दी दृष्टि कन्ने इसगी सरकार नै मता संवारे दा हा। झील दिक्खदे गै मिगी जेहड़ा अलोकिक आनन्द बझोआ उसगी मेरे लेई कलमबद्ध करना मुमकन नेई।

नैनीताल झील समुन्दर तल थमां 1938 मीटर उच्ची ऐ। इसदी लम्बाई 1358 मीटर चड़ाई 458 मीटर ते गैहराई 15 थमां लेइयै 156 मीटर तोड़ी ऐ। इसदे पूर्व उत्तर इच इक बजार ऐ। हट्टियें दे उपपर केई मंजले होटल ते गेस्ट हाऊस न। पर्यटकें दे चलने फिरने लेई दोहरियां सड़कां न। इत्थें केई सरकारी दफ्तर न। हाईकोर्ट दा भवन बी ऐ। नैनीताल कछ गै कुमाऊं विश्वविद्यालय ऐ।

इस विश्वविद्यालय इच हिन्दी विभाग दियां डॉ० नीरजा टंडन मेरे कन्ने हिन्दू विश्व विद्यालय बनारस इच त्र'ऊं हफ्ते दा स्पैशल प्रशिक्षण लैन आइयां हियां। एह गल्ल फरवरी 1989 दी ऐ। मेरी मती मर्जी उन्दे कन्ने मिलने दी बी ही। पर मिली नेई सकेआ। मिगी उ'यां उन्दे किश विद्यार्थी जरूर मिले जि'नें सनाया जे ओह अज्जकल विभाग दी अध्यक्षा न।

ताल दा चक्कर लांदे लांदे अस टूरिस्ट अप्सर दे दफ्तर गे तां उत्थें साढ़ी मुलाकात कुमाऊं संस्कृति दे प्रकांड विदवान के.के. जोशी हुन्दे कन्ने होई। ओह विद्वता इच मिगी फाड़ी संस्कृति दे विश्वकोश बझोऐ। उ'नें असेंगी कुमाऊं दी जनजातियें दी जानकारी दिती। उ'नें मिगी सुझाऽ दिता जे मिगी खड़वाल, जौनसारी, जाड, भोटिया, राजी, बोक्सा, थारु, जनजातियें उपपर कम्म करना लोड़चदा ऐ। में उ'नेंगी गलाया जे डॉ० शिवानन्द नौटियाल नै इन्दे उपपर कम्म कीते दा ऐ। जे होई सकेआ तां अ'ऊं डुंगर दी जनजातियें उपपर कताब जरूर लिखंड। अ'ऊं उन्दा धनवाद करियै परतियै ताल दे कंठे आईयै उसदे सौंदर्य दा अवलोकन करन लगा। फही उसदा चक्कर लान लगा।

नैनीताल दा चक्कर लांदे में दिक्खेआ जे एह बी द'ऊं हिस्से इच बंडोए दा ऐ। इक हिस्से गी तल्ली ताल ते दूए गी मल्ली ताल गलांदे न। मल्ली

ताल मती रौनक ही। उत्थें देवी दा मंदर हा। लोक मंदर मत्था टेकन जा करदे हे।

मिगी नैनी ताल दी प्रदक्खना लैंदे कोई दऊं घंटे लगे। फही असें इक होटल इच रुट्टी खादी ते गोविंद वल्लभ पंत चिड़िया घर दिक्खन चली पे। इत्थें जेहड़े जनौर हे ओह साढ़े बी हैन पर किश पेंछी बक्खरे बी बझोए। चिड़िया घर इक फ्हाड़ी उप्पर ऐ। असें इत्थें खड़ोइयै पूरे नैनीताल दे प्राकृतक दक्ख दिक्खे।

नैनी ताल गी अवाद करने दा श्रेय इक अंग्रेज पी. बैरन गी जंदा ऐ। उसनै नूरसिंह थमां नैनीताल दा इलाका मुल्लें खरीदेआ फही उसनै सैलानिएं लेई बा'रां बंगले बनोआए। इ'नें बंगले दा नांऽ उसनै पिलग्रिम रक्खेआ। एह सारें थमां पराने भवन न।

सन 1842 इच उत्तर प्रदेश दे गवर्नर लेई बी इत्थें इक भव्य भवन बनेआ। फही सरकारी सचिवालय बी बनेआ। गर्मियें इच सरकारी कम्म काज इत्थें गै होन लगा तां इस थाहरै दा म्हत्तव बी बधेआ।

अज्ज नैनीताल उतरांचल प्रदेश दा गै नेई पूरे विश्व दे सैलानियें लेई आकर्शन दा केन्द्र ऐ।

असें त्रकालें बस पकड़ी ते काठ गोदाम आई गे।

7 अक्टूबर गी ऐतवार हा। अ'ऊं जै खाल्ली हा। मेरा मन रानीखेत दी सैर करने दा हा। रानी खेत काठ गोदाम थमां 40 कि.मी. दूर हा। एह बी इक अंग्रेजै दी खोज ही। सन् 1869 ई० इच इस नगर दी स्थापना होई। लार्ड मेयो गी एह थाहर मता पसंद हा। मिगी समें सिर बस नेई थ्होई इस लेई अ'ऊं रानी खेत नेई जाई सकेआ।

उस दिन अ'ऊं हल्द्वानी गै फिरेआ टुरेआ। एह बी इक सुन्हाकड़ा शैहर ऐ। सन 1834 ई० इच कमिश्नर ट्रेल नै इसी बसाया हा। अस पूरे शैहर फिरे। स्टेडियम इच बी गे। इक समाज सेवक अंसारी हुन्दे कन्ने बी मिले। इक सियासी नेता मा० सतपाल महाशय हुन्दा स्वागत समारोह बी दिक्खेआ।

मिगी इत्थें इक कमी एह खली जे में इत्थें अदबी चर्चा नेई सुनी। मते लोक पैसा कमाने दे चक्कर इच लगगे दे बझोए। बपारी वर्ग मता सम्पन्न दिक्खेआ।

8 अक्तूबर गी साढ़ा डीडिहाट लेई प्रस्थान हा। बस दफ्तर दे सामनै खड़ोती दी ही। अस तेआर होए ते बस इच आइयै बेही गे। बस भारत-तिब्बत सेना पुलीस दी ही इस लेई जवानें दे रिश्तेदारें गी गै इस इच बौहने दी अनुमति ही। अस बी रिश्तेदारें इच हे।

ठीक अट्ठ बजे ड्राइवर नै गड्डी स्टार्ट कीती। बस इच मसां बीह सवारियां हियां। काठ गोदाम थमां डीडिहाट 250 किलोमीटर दूर हा। सफर फ्हाड़ी हा, इस लेई बझोआ जे असें पुज्जदे रात पेई जानी ऐ।

गड्डी चली पेई। रस्ता फ्हाड़ी, फ्हाड़ी दे दोनें बक्खी जंगल जाड़, कुदै-कुदै निक्के-निक्के नाले ते आवशार। पैंछियें दे सुरीले सुर बी सनोचन ते जंगलें इच चरा दे डंगर बी लब्धन। सारा म्हौल डुग्गर आह्ला लेखा गै हा। रस्ता मता गै रौंसला हा। कुदरती शलैपा चौन्ने बक्खी खिलरे दा हा। इक दक्ख हटदा तां दूआ आई जंदा, बस दक्ख गै दक्ख, सुन्दरता दा खुल्ला प्रदर्शन।

साढ़ी बस फ्हाड़ी सड़क उप्पर द्रौढ़दी-द्रौढ़दी रानी बाग पुज्जी तां मेरे कन्ने जेहड़ा इक साथी बैठे दा हा ओह करलाया-ओह दिक्खो रानी। असल इच ओह रानी नेई इक चट्टान, ही जिस लेई गलांदे न जे ओह राजा पृथ्वी पाल दी पत्नी दा शैल पत्थर ऐ। एह पत्थर अज्ज बी रंग बिरंगा ऐ। इस इच राजा पृथ्वी पाल ते रानी दे प्यार दी कहानी छप्पी दी ऐ। रानी दा नांऽ शैल चित्रा हा। राजे नै रानी दे चेते इच कछ गै चित्रेश्वर महादेव दा मंदर बनोआए दा ऐ।

रानी बाग थमां दऊं किलो मीटर अगें इक दोराहा आया। इत्थूआं दा इक सड़क नैनीताल गी ते दूई भीम ताल गी जंदी ऐ।

भीम ताल :-साढ़ी गड्डी भीमताल सड़क पाससै मुड़ी। अस नौ बजे दे करीब भीमताल पुज्जे। इत्थें बी इक झील ही। कुमाऊं इच झील गी ताल गलांदे न। एह झील भीमाकार ऐ शैल इससै कारण इसदा नांऽ भीमताल पेआ।

किश लोक इसदा सरबन्ध पांडव पुत्तर भीम कन्ने बी जोड़दे न।

भीमताल मती गै आकर्शक ते मोहक झील ऐ। एह 448 मीटर लम्मी 175 मीटर चौड़ी ते 15 थमां 20 मीटर गैहरी ऐ। इसदे कंढै भीमेश्वर महादेव दा मंदर ऐ।

भुवाली :-भीमताल दा अवलोकन करियै अस गड्डी उप्पर बेही गे। अस तौले गै भुवाली पुज्जी गे। एह बी कुमाऊं दा इक सैर-सपाटे आह्ला थाहर ऐ। दिक्खने इच मता सुन्हाकड़ा ऐ। इस थाहर दी मशहूरी दा इक कारण ज्योलीकोट इच बने दा टी.बी. सेनिटोरियम हस्पताल ऐ। एह बटोत आह्ला लेखा निक्का जेहा शैहर ऐ। इसदे अगें-पिच्छें जिन्ने बी फ़ाड़ न ओह चीड़ें दे बूहटें कन्ने लदोये दे न। इत्थूआं दी आबोहवा सेहत लेई मुफीद ऐ। एह कुमाऊं दा इक केन्दरी स्थल ऐ। इत्थूआं दा केई शैहरें लेई बसां चलदियां न। इ'यां ते इत्थें केई स्कूल न पर मशहूरी सैनिक स्कूल दी ऐ। इत्थें सैलानियें लेई केई गेस्ट हाऊस ते होटल न। जेहड़े सैलानी नल दम्यन्ती ताल, साल ताल दिक्खन जंदे न ओह इत्थें गै ठैहरदे न।

भुवाली कछ गै रामगढ़ ऐ। एह थाहर साहित्यकारें दी पसंद रेहा ऐ। विश्व कवि रवीन्द्र नाथ टैगोर, जवाहर लाल नेहरु, आचार्य नरेन्द्र देव, महादेवी वर्मा नेह साहित्यकार ते बचारक इत्थें निवास करी चुक्के दे न। टैगोर टॉप नेह बंगले अज्ज बी असेंगी उन्दा चेत्ता करांदे न।

अल्मोड़ा :-भुवाली थमां अल्मोड़ा सिरफ 55 किलोमीटर दूर हा। अस 12 बजे दे करीब अल्मोड़ा पुज्जी गे। रस्ते इच असें केई निक्के-निक्के ग्रां, घर, हट्टियां ते जंगल-जाड़ दिक्खे। अल्मोड़ा पुज्जे तां असेंगी किश बक्खरा गै म्हौल ते दक्ख बझोआ। एह इक फ़ाड़ी उप्पर बसे दा शैहर ऐ। इसदा बज़ार सीढ़ीनुमां ऐ। बज़ार दे दौन्नें बक्खी निक्कियां-निक्कियां गलियां ते दोमंजले त्रै मंजले मकान न। एह नगर समुन्दर तल थमां 1646 मीटर उच्चां ऐ। पूरा शैहर फ़ाड़ी उप्पर फैले दा ऐ।

अल्मोड़ा दे बजार दा नांऽ लाला बजार ऐ। इस शैहर दे पूर्व इच खगमरा नांऽ दा इक किला ऐ। पर हुन इसगी लाल मंडी किला गलांदे न। इत्थें बजार

इच नंदा देवी दा इक भव्य मंदर ऐ। इसदे इलावा कसार देवी मंदर ते चितई मंदर इस शैहर दी शान न। अल्मोड़ा कछ गै कटार मल दा सूर्यमंदर, विनसर इच महादेव मंदर बी मते मशहूर न। पर अस उत्थें नेई पुज्जी सके।

असें इक रेस्टोरेंट इच खाना खादा ते फही डीडी हाट लेई रवाना होई गे। अल्मोड़ा थमां डीडी हाट गी दऊं सड़का जंदियां न। इक पिथौरागढ़ गी ते दुई धार चूला गी। धारचूला आहली सड़क सैनिकें लेई सुरक्खत मिथी जन्दी ऐ। साढ़ी बस बी इस शड़कै पर द्रौड़न लगी। एह शड़क मती सुन-मसान ही। फही बी असें रस्ते इच बैरीनाग, ते थल नेह् निक्के निक्के केई ग्रां दिक्खे। बैरी-नाग दे लोक रंग रूप इच किश बक्खरे बझोए। उन्दा रंग किश-किश सौला ते कद लम्मा हा।

थल थमां इक सड़क नागेश्वर गी जन्दी ही। एह् बी इक तीरथ ऐ। पर अस उत्थें नेई गे। साढ़ी गड्डी जंगल-जाड़े, फ्हाड़े बिच्चा दा कुतै तंग ते कुतै खुल्ली सड़कै पर द्रौढ़दी, हिचकोले खंदी त्रकालें सत्त बजे दे करीब डीडी हाट पुज्जी। भारत-तिब्बत सैनिक शिविर डीडीहाट थमां पंज किलोमीटर दूर हा। इस लेई अस पैहलें उत्थें गै पुज्जे। कमल नै मेरे रौहने लेई इक सरकारी गेस्ट हाऊस इच प्रबन्ध कीते दा हा। अ'ऊं उत्थें चली गेआ। में रातीं दी रुट्टी खादी ते सेई गेआ।

मिरथी-कल्याणपुर :- एह् इक निक्का जेहा कसबा हा। इत्थें गै भारत-तिब्बत सैनिक बल दा कैम्प हा। इत्थें केई क्वार्टर बने दे हे जिन्दे इच सपाहियें ते अफसरें दे परोआर रौहन्दे हे। इत्थें डोगरा सैनिक बी हे। किश साम्बा दे हे ते किश रेशम घर जम्मू दे हे। अ'ऊं रातीं गै उन्दे कन्ने मिली चुक्के दा हा।

अ'ऊं सवरे उट्ठेआ ते टैहलन लगा तां मेरे दिक्खदे-दिक्खदे गै सूरज दियां किरणां त्रिशूल ते नंदा देवी दी फ्हाड़ियें दे किंगरें इच फैली गेइयां। इ'नें किंगरें दी बरफ सनैहरे रंगें इच रंगोई दी बझोन लगी। मिगी इत्थें फ्हाड़े दे त्रै लम्मे-लम्मे सिलसिले नज़र आए। हिमालय दी विशालता दा ऐहसास बी मिगी पैहली बारी होआ। 337 किलोमीटर लम्मे हिमालय दी इक झलक में

इत्थें बी दिक्खी। जित्थें तोड़ी मेरी नज़र गई इक थमां इक सुन्हाकड़ा दक्ख हा। कुदरत दा एह गुआड़ दिक्खियै अ'ऊं रूहान रेही गोआ। इक घंटा टैह्ल मस्ती दे बाद अ'ऊं अपने कमरे इच परतोआ, न्हाता धोता चाह पीती ते टल्ले लाइयै गेस्ट हाऊस थमां बाहर आया।

मिगी लैन कमल ते मेरा जमातरा अ'वै करदे हे। कमल मिगी अपने दफ्तर लेई गोआ। सारे थमां पैहले उसनै मिगी मेंढर दे इक सपाही कन्ने मलाया। उत्थें इक अफसर रेशम घर दा हा, अ'ऊं उस कन्ने बी मिलेआ। में उत्थूआं दी लाईब्रेरी बी दिक्खी। जम्मू-कश्मीर उप्पर बी उत्थें किश कताबां हियां।

उत्थें गै मिगी उमीद सिंह रुहेला मिलेआ। ओह इक अदबी माहनू हा। उसनै मिगी डीडी हाट दे बारे इच मतियां जानकारीयां दितियां।

कैम्प इच इक केन्दरी विद्यालय बी हा। अ'ऊं उत्थें बी गोआ। प्रिंसिपल ते स्टाफ कन्ने मिलेआ, उत्थें उसलै 392 विद्यार्थी पढ़ा करदे हे।

डीडीहाट :-अ'ऊं कमल कन्ने कैम्प थमां बाहर आया। इक मैटाडोर डीडीहाट जा करदी ही। अ'ऊं, कमल ते मेरा जमातरा मैटाडोर इच बैठे ते डीडीहाट पन्दरें मिनटें इच पुज्जी गे।

डीडीहाट पिथौरा गढ़ जिले दा इक तसील हैड क्वार्टर ऐ। एह कुमाऊं मंडल इच सारें थमां दूर उपनगर ऐ। इसदी कुल आबादी 2001 इच 4806 ही। इ'यां पूरे ब्लाक दी अबादी 35632 ही। अनुसूचित जाति दे लोकें दी तैदाद 8520 ते जनजाति दे लोकें दी संख्या 396 ही।

इत्थें इक निक्का बज़ार हा। कमल नै मिगी दैनिक जागरण दे पत्रकार संजु पंत कन्ने मलाया। उस कछ में मतियां कताबां दिक्खियां। इक कताब हिमालयी सौका : सांस्कृतिक धरोहर भाग 1, 2, 3 बी ही। एह कताब तिब्बत दी सीमा दे कन्ने-कन्ने बसे दे कुमाऊं बासिएं दी जीवन शैली उप्पर ही। मिगी संजु पंत नै डा० प्रभात उत्प्रेती मदन लाल भट्ट ते सोहन लाल उत्प्रेती दे शोध कम्में दी जानकारी बी दित्ती।

अस बरसांत दे बाद डीडी हाट गे हे। उत्थें मतियें बरखें कन्ने मता

नुक्सान होए दा हा। लोक अपने-अपने घर-कोठें दी मरम्मत दे कम्म इच जटोए दे हे। अस' मेटा डोर उप्पर बैठे ते डीडी हाट थमां मिरची आई गे।

धार-चूला :- दपैहरी दी रुट्टी खाने दे बाद अस धार चूला लेई रवाना होए। असेंगी कल्याणपुर थमां बस मिली। कल्याणपुर मिरची थमां दऊं किलोमीटर दूर हा। अस उत्थें तोड़ी पैदल गे। कल्याणपुर बी इक निक्का कसबा हा। उत्थें इक डिग्री कॉलेज बी हा।

कल्याणपुर थमां असेंगी सरकारी बस मिली। अस अस्कोट, बेड़ा बेटा, ऊचाकोट थमां हुन्दे होई जौल-जीवी पुज्जे। जौल-जीवी ओह् थाहर ऐ जित्थें काली नदी भारत ते नेपाल दी सीमा बनांदी ऐ। काली नदी दे रुआर भारत ते पार नेपाल ऐ। जौल-जीवी बी इक निक्का नगरोटा ऐ। इत्थें काली नदी उप्पर इक पुल ऐ। अस पुल पार करन लगे ता उत्थें असेंगी रंगेल सिंह नांऽ दा संतरी मिलेआ। ओह् रामसू दा हा। अस उस कन्ने मिलियै मते खुश होए। असें पुल पार कीता ते नेपाल सीमा दे अन्दर दाखल होए। पुल पार नेपालियें दियां सत्त-अट्ठ हट्टियां हियां। मतियां हट्टियां शराब दियां हियां। मता समान चीनी हा। असें पुल पार कीता ते परतियें जौल जीवी आई गे। जौल जीवी इच इक देवी दा मंदर ऐ। इत्थें हर बरै इक मेला लगदा ऐ जिस इच नेपाल, तिब्बत ते पिथौरा गढ़ दे बपारी हिस्सा लैंदे न। इस थाहर दा सांस्कृतक म्हत्त्व बी ऐ। इत्थें काली नदी ते गौरी नदी दा संगम ऐ। धार चूला जीवी थमां त्रीह् किलोमीटर दूर ऐ। इत्थें तोड़ी साढ़ियां बसां जंदियां न। धार चूला कुमाऊं खेत्तर दा इक बकास खंड बी ऐ। इसदी आबादी 2001 इच 51026 ही।

इन्दे इच 8637 अनुसूचित ते 6572 जनजातियें दे लोक हे। जनजातियें इच मुख् भोटिया न। इ'नेंगी इत्थें शौक्य ते जौहारी बी गलांदे न। इन्दा सरबन्ध तिब्बत कन्ने मित्थेआ जन्दा ऐ। इन्दा खान-पीन ते लाबा बाकियें थमां बक्खरा ऐ। मरद लम्मा कोट, पजामा ते फ्हाड़ी टोपी पांदे न ते जनानियां इक लम्मा कोट जनेहा पांदियां न जिसगी चुंग गलांदे न। इन्दा धर्म हिन्दू ऐ। इत्थें ब्राह्मणें इच जोशी, पंत, अवस्थी ते उपाध्याय मुख् न। उपाध्याये दे मते घर नेपाली ग्राएं इच बी हैन। इत्थें मास शराब दा खाने इच प्रजोग हुन्दा ऐ। नारी शोशन

साढ़े फ़ाड़ी इलाके आह्ला लेखा गै ऐ। जनानियें गी घाह दे बड्डे-बड्डे गड्डे चुक्कियै फ़ाड़ चढ़दे में बी दिक्खेआ।

धारचूला सड़क थमां गै इक पगडंडी मांगली नाले बक्खी खिंडदी ऐ। फ़ही इ'यै पगडंडी मानसरोवर बक्खी जंदी ऐ।

जेहड़े जातरी मानसरोवर जंदे न उन्दी जातरा दा प्रबन्ध भारत-तिब्बत सीमा पुलस ते कुमाऊं बकास मंडल मिलियै करदे न। भारत दी सीमा दे तैहत् केई चौकियां न जिन्दे इच बूंदी, गूंजी, काला पानी, नावी, डांगे बगैरा मुख न। जातरी लिप्पूलेक पास थमां होंदे तिब्बत दे शैहर तखलाकोट इच दाखल हुन्दे न ते फ़ही उत्थूआं दा गड्डिडएँ इच बेहियै मानसरोवर जंदे न। मेरे लेई गूंजी तोड़ी जाने दी सुविधा ही पर में नेई जाई सकेआ। पर उ'यां उत्थूआं दा ओम पर्वत दे प्रतक्ख दर्शन हुन्दे न।

जौल-जीवी थमां खीरली बस छे बजे चलदी ही। अस बस पर बैठे ते मिरची पुज्जी गे।

मिरची में द'ऊं ध्याड़े टुरने-फिरने ते दिक्खने-सुन्नने इच गुजारे। मेरे जमातरे ते उसदी माता नै उत्थें अजें किश दिन रौहना हा पर मिगी कोई कम्म नेई हा। इस लेई में बापस परतोने दा मन बनाया।

11 अक्तूबर गी में सवेरे-सवेरे पिथौरागढ़ दी गड्डी पकड़ी ते मिरची गी अलविदा आक्खेआ ते परतोई पेआ।

पिथौरागढ़ :-

मरची कल्याणपुर थमां पिथौरागढ़ पंजाह किलोमीटर हा। अस जिस सूमो उप्पर बैठे दे हे ओह् ग्रां-ग्रां इच रुकै करदी ही। सवारियां चढ़ा करदियां हियां ते उतरा करदियां हि'यां। मिगी जि'नें बी लोक लब्धे उन्दा रंग गोरा हा। शक्ल सूरत विम्हागी बझोंदी ही। उत्थें जेहड़ी बी सवारी चढ़दी उसदे कन्नें इच द्रुब हुन्दी। अ'ऊं समझी गेआ जे एह् शुभ-जातरा दे उद्देश्य लेई ऐ। अ'ऊं स्थानी लोकें कन्ने गप्प-छप्प लांदा रेहा। ठीक दस बजे साढ़ी सूमो पिथौरागढ़ पुज्जी।

पिथौरागढ़ इक फ़ाड़ी टिल्ले उप्पर बसे दा इक निक्का जेहा शैहर ऐ। इस दी बनौट साम्बा कन्ने मिलदी जुलदी ऐ। सड़क थमां उप्पर चढ़ने ते ढलने लेई सीढ़ियां न। पर जेहड़ा नमां शैहर सड़क दे कंढै बसा करदा ऐ उसदी रूप रेखा बक्खरी ऐ।

पैहले अ'ऊं पुराने पिथौरागढ़ इच फिरेआ। उत्थें इक निक्का बज़ार हा। अ'ऊं चलदा-चलदा कचैहरी जाई पुज्जा ते फ़ही उत्थूआं दा सूचना-विभाग दे दफ़्तर गेआ। उ'नें मिगी पिथौरागढ़ उप्पर इक कताब भेंट कीती।

में स्थानी विद्वानें कन्ने बी भेंट कीती। उ'नें मिगी सनाया जे इस शैहर दा पराना नांऽ सोर घाटी हा। सोर दा अर्थ सरोवर ऐ। गलांदे न जे जित्थें एह शैहर ऐ पैहले उत्थें सत्त सरोवर हे। फ़ही सरोवर सुक्के ते इक नमीं पठारी भूमि नमोदार होई जिस कारण इस थाहर दा नांऽ पिथौरागढ़ मशहूर होआ।

किश लोकेँ दा गलाना ऐ जे एह शैहर राय पिथौरा दी राजधानी हा। राय पिथौरा दा असली नांऽ पृथ्वीशाह हा। उसदा बनाए दा इत्थें इक किला हा। उसदे गोरखें कन्ने केई बारी टाकरे होए।

पिथौरागढ़ कमाऊं मंडल दा इक जिला बी ऐ। सन.2001 इच इस जिले दी अबादी 44964 ही। मिगी सूचना अधिकारी नै सनाया जे जिला पिथौरागढ़ दे अट्ठ खंड मुनस्यारी, धारचूला, बैरीनाग, डीडीडहाट, कनाली ठना, गंगोली हाट, विठा ते मूनाकोट न, इस जिले दा खेत्तरफल 7218 वर्ग किलोमीटर ऐ। अबाद ग्रां 1635 न। जिले इच छे डिग्री कॉलेज 128 हाई स्कूल, 265 सीनियर बेसिक स्कूल ते 1202 यूनियर स्कूल न। साक्षर लोकेँ दी तैदाद सिरफ 2.10 लक्ख ऐ।

टनकपुर :-अ'ऊं कोई चार घंटे पिथौरागढ़ घुम्मेआ फिरेआ। में स्थानी लेखकेँ कन्ने मिलने दा जतन ते कीता पर मलाटी नेई होई। अ'ऊं थल्लै उतरेआ ते बस अड्डे पर आया। हुन में टनकपुर जाने दा मन बनाया। एह खेत्तर मेरे आस्तै नमां हा।

पिथौरागढ़ थमां टनकपुर 151 किलोमीटर दूर हा। एह बी पूरा फ़ाड़ी इलाका हा। सड़क दे दोनें बक्खी कुतै डडल, कुदै खिसकदियां चट्टानां, कुतै

पटोई दी सड़क कुतै जंगल कुतै जाड़ हे। बिच-बिच मते गै शैल कुदरती दक्ख बी हे। गड्डी फ्हाड़ी थमां थल्लै औंदी तां झाइवर बिच-बिच ब्रेक मारदा फ्ही चढ़ाई औंदी तां रफ्तार घटांदा। खैर प्रकृति दे अनोखे दक्ख दिक्खदे-दिक्खदे पैहलें अस एब माऊंट ते फ्ही लौहा घाट पुज्जे। रस्ते इच इक पढ़े लिखे दे इक सज्जन बी चढ़े। ओह मेरे कश बैठे तां में उन्दा नांऽ पुच्छेआ। उनें अपना नांऽ राजेन्द्र प्रसाद काण्डपाथ दस्सेआ। पेशे थमां ओह वकील ऐ। साहित्य इच उन्दी रुचि ही। लोक संस्कृति दे पारखी हे। ओह कुमाऊं विकास निगम इच बी हे। मिगी गलान लगे जे मिगी पिंडारी दे ग्लेशियर दिक्खने लोड़चदे हे। फ्ही उ'नें सनाया जे ओह अल्मोड़ा दे न। उन्दे पुरखे जाखनदेवी दे पुजारी हे। उंदे पिता कविवर सुमित्रा नन्दन पंत हुन्दे दोस्त हे। लोहागढ़ थमां 9 किलोमीटर दूर मायवती दा अद्वैत आश्रम हा। इसदी स्थापना स्वामी विवेकानन्द होरें कीती ही। अस उत्थूआं दा फ्हाड़ी मोड़ चढ़दे उतरदे चम्पावत पुज्जे।

चम्पावत :-एह इक निक्का जेहा शैहर हा। इ'यां बझोंदा हा जे इत्थूआं दा अगला रस्ता पढ़रा ऐ। एह शैहर पिथौरागढ़ थमां 76 कि.मी. दूर हा। समुन्दर तल थमां इसदी बुलन्दी 1615 मीटर ही। गलांदे न जे इस नगर दी स्थापना 14वीं सदी इच होई ही। इत्थें चम्पा देवी दा मंदर हा इस लेई देवी दे नांऽ उप्पर इस दा नांऽ चम्पावत मशहूर होआ। चन्द्रवंशी कुमाऊं दे राजें मता चिर इसगी अपनी राजधानी बनाया। एह इक मता गै रमणीक शैहर ऐ। पर्यटक इत्थें सैर करन औंदे न। इत्थें दिक्खने लेई बालेश्वर मंदर समूह, रत्नेश्वर, दुर्गामाता दा मंदर, नागनाथ दा मंदर समूह ते पराने राज मैहलें दे खंडहर ते पराना किला ऐ।

गलांदे न जे इस नगर कछ भगवान विश्णु दा कूर्मावतार होआ हा जिस कारण इस खेत्तर दा नांऽ कूर्माचल पेआ ते फ्ही बिगड़दा-बिगड़दा कुमाऊं होई गेआ।

इस खेत्तर दी भाशा कुमाऊनी ऐ। कुमाऊनी दा लोक साहित्य मता समृद्ध ऐ। डॉ० कृष्णानन्द जोशी नै 'कुमाऊनी लोक-साहित्य' नांऽ दा ग्रैंथ लिखे दा ऐ जेहड़ा इस खेत्तर दी लोक संस्कृति दा विश्वकोश ऐ। कुमाऊनी इच धार्मिक लोकगीत, संस्कार गीत, किरसानी सरबन्धी गीत, रितु सरबन्धी गीत, उत्सव गीत, मेलें दे गीत ते जोड़ गीत उपलब्ध न। इत्थें लोकनाचें दे बी केई रूप

न जि'यां दूरिड़, छोलिया, डंडयाला, चम्फूली बगैरा, कुमाऊं इच मेले गी कौतिक गलांदे न। इस अंचल इच पजांह थमां बद्ध कौतिक आयोजत हुन्दे न जिन्दे इच मानेश्वर दा कौतिक, गिर कौतिक, काशीपुर दा कौतिक मते मश्हूर न। इ'यां गै अस्सुं म्हीनै इत्थें खतरुवा दा त्याहार, मकर संक्रांति दा त्याहार, सोन म्हीनै हरियाली दा त्याहार मनांदे न। गणेश चौदेआ, हरताल, ऋषि पंचमी, नंत चौदेआ ते वट सावित्री इत्थूआं दे जनाने त्याहार न।

अ'ऊं कुमाऊं दी समृद्ध लोक संस्कृति उपर मनन करा गै करदा हा जे साढ़ी बस त्रकालें सत्त बजे टनकपुर पुज्जी। उत्थें बी इक निक्का बजार हा। में उत्थें रुट्टी खादी ते हरिद्वार आहली बसा पर बेही गेआ। 12 अक्तूबर गी अ'ऊं हरिद्वार पुज्जा। उस दिन मस्सेआ ही। में हर की पौड़ी जाइयै स्नान कीता ते बस अड्डे पर आया। मिगी जम्मू लेई बस मिली। अ'ऊं 13 अक्तूबर गी जम्मू सवेरे ते संजा पैंथल पुज्जा। मेरे लेई एह नेई भुल्लने आहली जातरा ही।

०००

26. शिमला जातरा

जून 1998 इच हिन्दी साहित्य सम्मेलन प्रयाग नै सोलन इच सालाना सम्मेलन आयोजत करना हा। उस सम्मेलन इच शमुलियत लेई श्रीधर शास्त्री होरें मिगी बी साददा भेजेआ। सोलन लेई में मते लोकें थमां सुने दा हा जे एह दिक्खने जोग थाहर ऐ। मिगी बी बझोआ जे मौका मिला करदा ऐ तां पैदा लैना चाईदा ऐ।

उ'नें दिनें अ'ऊं रिटायर बी हा। मेरे कोल कोई खास कम्म बी नेई हा। में जम्मू थमां चंडीगढ़ लेई बस पकड़ी ते चार बजे अ'ऊं उत्थें पुज्जी गोआ। अड्डे उप्पर गै पुच्छ गिच्छ कीती। 5 बजे सोलन लेई बस ही। अ'ऊं बस पर बेही गोआ। अ'ऊं त्रकालें सोलन पुज्जा ते नगर पालिका दे दफ्तर गोआ। चिट्ठी दे मताबक कार्यक्रम उत्थें गै आयोजत होना हा। उत्थें अ'ऊं इक अधिकारी कन्ने मिलेआ। उसनै गलाया जे बुकिंग कल थमां ऐ। अज्ज तुस कुसै गेस्ट हाऊस इच रात गुजारो। अ'ऊं उत्थूआं दा परतोन लगा तां मिगी उत्थें गै प्रत्यूप गुलेरी होर मिली गे। ओह बी सम्मेलन इच हिस्सा लैन आए दे हे। अधिकारी नै उ'नें गी बी इ'यै जवाब दिता।

गुलेरी हुन्दी ममेर भैन सोलन गै रौहन्दी ही। उ'नें मिगी कन्ने लैता ते भैन दे घर गे। उन्दी भैन उ'नेंगी दिक्खियै मती खुश होई। रातीं दी रुट्टी असें उन्दे घर गै खादी। उ'नें इक बैठक इच मिगी सुआलेआ। गुलेरी ते उन्दी भैन ते भनोआ रातीं इक बजे तक्कर गप्प-छप्प मारदे रेह। दूऐ दिन असें न्हारी कीती ते सम्मेलन आहले थाहर पुज्जी गे।

सारे थमां पैहले असें अपना पंजीकरण कराया। उ'नें मेरे रौहने लेई जिस कमरे प्रबन्ध कीता उत्थें त्रै साहित्यकार पैहलें गै डटे दे हे। ओह उत्तर प्रदेश दे हे। अ'ऊं बी उन्दे कमरे इच दड़ी गोआ।

11 बजे दे करीब सम्मेलन शुरू होआ। उ'नें दिनें शान्ता कुमार हुन्दा हिमाचल इच मता नांऽ हा। ओह् सम्मेलन दे मुख परौहने हे। सोलन दे गै इक विद्रोही हे। ओह् अधिकार पत्रिका दे सम्पादक हे। कार्यक्रम दा संचालन उ'यै करै दे हे।

उद्घाटन समारोह मता प्रभावशाली रेहा। मुख अतिथि दा भाशन बी ठीक-ठीक हा। सम्मेलन दा आयोजन इक बड़्डे हाल इच होआ। करीब-करीब सौ प्रतिनिधि शामिल होए। हिमाचल प्रदेश दी भाशा, कला ते संस्कृति अकैंदमी नै उत्थें पुस्तक मेला बी अयोजत कीते दा हा। उत्थें मिगी हिमाचली लोक-साहित्य, इतिहास ते कला कन्ने सरबन्धित मतियां कताबा दिक्खने दा मौका मिलेआ। हिमाचल दे भाशा-विभाग दियां मधु होर बी सम्मेलन इच हिस्सा लै करदियां हियां। उ'नें अपने मैहकमें दी पत्रिका विपाशा लेई बी केई गाहक बनाये जिन्दे इच इक अ'ऊं बी हा। सम्मेलन इच जयदेव किरण बी आए दे हे। मेरा उन्दे कन्ने जम्मू परिचे होआ। सुदर्शन विशिष्ट होर बी सम्मेलन इच शामिल होए। दूऐ दिन डॉ० वंशीराम होर बी आए। उ'नें मिगी शिमला औने दा निमंत्रण दिता।

मेरा सोलन औने दा मकसद सम्मेलन इच हिस्सा लैने दे इलावा सोलन दी सैर करना बी हा। अ'ऊं सवेरे संजा बजार दा चक्कर लांदा गै हा, इतिहासक भवन दिक्खन बी जान लगा।

इ'यां मिगी बझोआ जे सोलन दा म्हत्तव इक पर्यटन स्थल' दे रूप इज मता ऐ। गर्मियें इच इत्थें मौसम सुहाना रौहन्दा इस लेई मदानी इलाके थमां अमीर लोक उमस ते गर्मी दी तपश थमां बचने लेई सोलन औंदे न। इस्सै गल्ला इत्थें होटल ते गेस्ट हाऊस मते न। फही बी जिन्ना छलैपा पैहलगाम दा ऐ इन्ना सोलन दा नेई। सरकारी ते गैर सरकारी स्कूल ते कॉलेज दी भरमार कन्ने इत्थें विद्यार्थियें दा मेला लागे दा गै रौहन्दा ऐ। कन्ने गै पर्यटकें दी बजह कन्ने इत्थें रौनक बनी दी रौहन्दी ऐ। इ'यां इत्थूआं दा प्राकृतक परिदृश्य मता गै लुभावना ऐ। इ'यां में बड़्डे-बड़्डे होटल दिक्खे पर चेल पैव्सेस होटल मिगी मता सुन्हाकड़ा बझोआ।

अ'ऊं त्रै रातीं सोलन रेहा फही में सवेरे-सवेरे चंडीगढ़-शिमला सड़क

थमां इक टैक्सी पकड़ी ते शिमला आई गोआ। मेरे कन्ने दऊं प्रतिनिधि होर बी बैठे। ओह बी सेमीनार दे समापन दे बाद शिमला घुम्मन जा करदे हे। सोलन थमां शिमला मता दूर नेई हा, अस द'ऊं घंटे इच शिमला पुज्जी गो।

मेरे कन्ने जेहड़े प्रतिनिधि आए दे हे ओह बरेली दे हे। उन्दे किश साथी शिमला रौहन्दे हे। ओह मिगी बी कन्ने लेइयै सारें थमां पैहले रेलवे-भवन कछ इक क्वार्टर इच गो। उत्थें मिश्र होर रौहन्दे हे ओह सेहत मैहकमे इच हे। मिगी उन्दा पूरा नांS चेता नेई, इ'यां उन्दे साथी उ'नेंगी मिश्रा जी नांS कन्ने कुआला दे हे। ओह उत्थें मता चिर नेई रुके। चाह पीती ते पही समर-हिल्ज इच आए। हिमाचल विश्व विद्यालय दे मते विभाग इत्थें गै कार्यरत न। इस यूनिवर्सिटी दी खासियत एह ऐ जे इत्थें जेहड़े भवन न ओह ढलान इच न। इ'यां इक विभाग थमां दूए विभाग तोड़ी जाना होऐ तां सीढ़ियां चढ़ना ते उतरना पौंदियां न। मेरे साथी सारे थमां पैहले संस्कृत विभाग इच गो। उत्थें उ'नें दिनें डॉ० राजेन्द्र मिश्र होर विभाग दे अध्यक्ष हे। ओह इन्डोनेशिया दे इक टापू 'वाली' इच संस्कृत दे प्रोफेसर रेही चुके दे हे। उ'नें साढ़े कन्ने वाली द्वीप उप्पर मती चर्चा कीती। प्रो० मिश्रा हुन्दा गलाना हा जे उत्थें हिन्दू मते रौहन्दे न इस लेई लोकें दा मार्ग-दर्शन करने, आस्तै भारत दे संतें गी उत्थें जाना लोड़चदा ऐ। अस उन्दे थमां विदा होइयै एजुकेशन डिपार्टमेंट इच आए। इत्थें जम्मू दे डॉ० भारत-भूषण रीडर दे पद उप्पर हे। मेरे पंछानु हे। अस दमैं कठुआ कॉलेज इकट्ठे हे। में उन्दे कन्ने बी गप्प-छप्प लाई। हिस्टरी विभाग दे डॉ० चेतन सिंह हुन्दे कन्ने पटियाला मलाटी होई दी ही। उन्दे कन्ने बी पन्छान ही। ओह नेई मिले। अस यूनिवर्सिटी थमां निकले ते माल रोड़ आए। इत्थूआं दा मेरे साथी बिछुड़ी गो। मिगी हिमाचल-भाशा कला ते संस्कृति अकादमी दे दफ्तर जाना हा। ओह संगरमल भवन इच हा। अ'ऊं इकला गै पता पुछदा-पुछदा माल रोड़ उप्पर चली पेआ। में यूनिवर्सिटी थमां निकलदे ते माल रोड़ औंदे रस्ते इच 'आकाशवाणी' शिमला दा बोर्ड दिक्खेआ। डॉ० के.सी. दूबे उ'नें दिनें उत्थें निर्देशक हे। ओह जम्मू दे हे। मेरी उन्दे कन्ने शैल पंछान ही। मेरी मर्जी उन्दे कन्ने मिलने दी बी ही पर कुसै कारण उन्दे कन्ने मलाटी नेई होई। माल-रोड़ में जम्मू-कश्मीर बैंक दी इक शाखा दिक्खी अन्दर गोआ तां उत्थें दऊं जागंत जम्मू दे मिले। उ'नें मिगी चाह पिलाई। अ'ऊं चाह पीयै टुरी पेआ।

अकादमी दा दफ्तर तुप्पेने इच उ'यां मिगी खास औख नेई आई। अ'ऊं दफ्तर दे अन्दर गोआ। उत्थें में अकादमी दे केई विभाग दिक्खे। उन्दे भाशा-विभाग इच बी केई बक्खरे-बक्खरे कक्ष हे। उत्थें लहौल, स्पिति, किन्नर लेई बक्खरे-बक्खरे कक्ष हे। इक-इक कक्ष इच त्रै-त्रै चार-चार कर्मचारी हे। महिला कर्मचारिएं दी तदाद मती ही। अ'ऊं इत्थे मते लोकें कन्ने मिलेआ। अ'ऊं विशिष्ट हुन्दे कन्ने बी मिलेआ। उ'नें मिगी गलाया जे मेरे रौहने दा प्रबन्ध लेखक भवन इच कीता गेदा ऐ। अ'ऊं लेखक भवन इच आई गोआ। उस दिन अ'ऊं उत्थें इकला गै हा।

कोई त्रै बजे डॉ० बंशीलाल शर्मा होर मिगी मिलन आए। मेरे थैल्ले बस अड्डे कछ क्लाक रोम इच हे। ओह मेरे कन्ने चली पे। अस खल्लें-खल्लें इक तंग बजार थमां हुन्दे बस अड्डे पुज्जे। उत्थें पदम सिंह होर पैहले गै खड़ोते दे हे। ओह उत्थें क्षेत्रीय निदेशक हे। ओह पैथल दे हे। उ'नें अखबार इच पढ़े दा हा जे सोलन सम्मेलन इच जम्मू थमां अ'ऊं अवै करनां। उ'नें अन्दाजा लाया ते सम्मेलन दे बाद मेरा शिमला औना निश्चत ऐ। ओह पैहलें लेखक भवन गे। उ'नेंगी मेरा पता चलेआ जे अ'ऊं बस अड्डे जा करना तां ओह मिगी लैन इत्थें आए।

पद्म सिंह नै मिगी अपनी गड्डी बठाया ते शिमला दा इक-इक कोना दस्सेआ। ओह मिगी वायसराय दा भवन दस्सन बी लेई गे जेहड़ा हुन शैद संग्रहालय हा। शिमला दी सुन्दरता कश्मीर आह्ला लेखा विश्व परसिद्ध ऐ, इस लेई मिगी इस शैहर दा शलैपा कोई चवात् नेई बझोआ। पद्म सिंह नै मिगी शिमला घुमाया फराया ते फही ओह मिगी इक होटल लेई आए जित्थें असें रुट्टी खादी। तरकालें ओ मिगी अपने डेरा लेई आए। जेहड़ा शैहर थमां पंज किलोमीटर दूर हा। रातीं अ'ऊं उन्दे कच्छ रेहा। सवेरे उन्दे कन्ने बस अड्डे पुज्जा। में विलासपुर दी बस पकड़ी। शिमला थमां विदा होआ ते 12 बजे दे करीब विलासपुर पुज्जा। विलासपुर थमां कुल्लू गी बस जा करदी ही। अ'ऊं उस उप्पर बैठा। सुन्दर नगर बिच्चें हुन्दा त्रकालें कुल्लू पुज्जा। मिगी बस अड्डे कछ गै इक कमरा पंजाह रपेऽ कराये उप्पर मिलेआ। अ'ऊं रातीं उत्थें गै सुत्ता। सवेरे-सवेरे न्हारी खाने दे बाद अ'ऊं ढालपुर गोआ ते मौलूराम ठाकुर हुन्दा घर तुप्पेआ। ओह घर गै हे। इक प्रकांड विद्वान दे रूप इच लोक

उ'नेंगी जानदे हे। में उन्दियां त्रै कताबां पढ़ी दियां हियां में उन्दी कताब हिमाचल में पूजित देवी देवता थमां प्रभावत होइयै 'डुंगर के लोक देवता' कताब लिखी ही। उ'नें मिगी विद्या शर्मा हुन्दा घर बी दूर थमां दस्सेआ जेहड़ा व्यास दे पार इक टिब्बु उप्पर हा। उन्दी नौकरी उ'नें दिनें मण्डी ही।

अ'ऊं किश चिर कुल्लु बजार इच फिरेआ टुरेआ ते फही बस पकड़ी ते मण्डी आया। में उत्थें विद्या शर्मा हुन्दा दफ्तर तुप्पेआ। उस दिन इलैक्शन ही। वोटिंग चला दी ही। इस लेई मेरी उन्दे कन्ने मुलाकात नेई होई। अ'ऊं भूतेश्वर मंदर दे दर्शन करियै बस अड्डै आया। मिगी उत्थूआं दा पालमपुर लेई बस मिली तां अ'ऊं उस उप्पर बैठा। पालमपुर कछ गै इक कसबा भबरवा हा। उत्थें पैथल दा इक जागत रवि कुमार केनरा बैंक इच नियुक्त हा। रातीं अ'ऊं उस कछ रेहा। सवेरे अ'ऊं परतियै पालमपुर आया ते फही उत्थूआं दा ज्वाला जी पुज्जा। में इक बारी फही उत्थें मत्था टेकेआ ते कांगड़े दी बस उप्पर बेही गोआ। कांगड़ा थमां अ'ऊं वाया नूरपुर पठानकोट पुज्जा फही उत्थूआं दा बस पकड़ी ते जम्मू आया। जम्मू थमां में कटड़े दी बस पकड़ी ते फही सतें सवेले पैथल आई गोआ।

मेरी इक हफ्ते दी एह जातरा मती दौड़ भज्ज आहली ही।

०००

27. मणि महेश जातरा

सन 1998 इच, मेरे हत्थ इक कताब आई जिसदा सिरलेख हा - चम्बा जिले का इतिहास ? इस दे लेखक हे - मंगत राम वर्मा, चम्बा उप्पर में होर बी कताबां पढ़ी दियां हियां। इ'यां बी चम्बे ते डुग्गर दी भाशा, संस्कृति ते जीवन पद्धति इच कोई फर्क बी नेई ऐ। अस सारे चम्बा गी डुग्गर दा गै इक अंग मिथदे आए आं। मिंजरें दा मेला चम्बे इच बी प्रचलन इच ऐ ते डुग्गर इच बी ऐ। देवी-देवते, आस्थां, रीति-रिवाज बी इक्के जेह न। आपूं बिचे रिश्तेदारियां बी हैन। चम्बे दियां राजकुमारियां जम्मू दे मैहलें इच आइयां ते जम्मू दियां राजकुमारियां चम्बे दे मैहलें इच गेइयां। चम्बा दा इतिहास पढ़ियै मिगी बड़ोन लगा जे हुन अ'ऊं इस स्थिति इच आं जे किश ध्याड़े घरै दे बाहर रेही सकनां।

अगस्त 1998 इच अखबारें इच मणी महेश जातरा दी चर्चा होन लगी तां में मन बनाया जे मिगी हुन रुकना नेई चाहिदा। जातरा करने कन्ने इक ते मिगी चम्बा जनपद दा सांस्कृतिक अध्ययन करने दा मौका मिलग ते दूआ फैदा एह बी हा जे इक नमें थाहर दी जानकारी मिलग। मेरे घरै कन्ने गै मा० रत्न गोपाल खजूरिया होर रौहन्दे न। मेरी फाड़ी जातराएं इच ओह मेरा पूरा साथ दिन्दे न। मेरे कन्ने उ'नें पाडर दी जातरा कीती ही, वासुकि कुण्ड बी ओह गे हे। में उन्दे कन्ने मणि-महेश जातरा दी गल्ल कीती तां ओह तेआर होई गे। असें स्हाब लाया जे असेंगी ठौकरें दे ब्रत थमां पंज दिन पैहलें पेंथल थमां निकलना पौग। अस तैआर होई गे ते निश्चत तिथि उप्पर ग्रां थमां चले। पैहले जम्मू ते फही पठानकोट पुज्जे। इ'यां कटड़े थमां बी चम्बा लेई बस चलदी ही पर अस उसगी नेई पकड़ी सक्के।

पठानकोट थमां असेंगी चम्बे लेई बस त्रै बजे दी मिली। अस बस पर बेही गे। बस बी चली पेई। अस पैहलें चम्बा गेदे नेई हे इस लेई बस दा रूट

असेंगी पता नेई हा। किश चिर इ 'यां बझोआ जे अस पठानकोट दे अगें-पिच्छें फिरा करने आं पर बस उत्तर बक्खी मुड़ी तां सेही कीता जे शैद इ 'यै चम्बा दा रूट ऐ। सड़क दे कंढै असें किश गैर सरकारी स्कूलें दे बोर्ड पढ़े, उन्दे नांऽ पैहलें बी सुने दे हे। बस अगें गी जान लग्गी तां बझोआ जे अस जम्मू-आहला लेखा फ़ाड़ी इलाके थमां लंघा करने आं। रातीं अट्ठ बजे दे बाद न्हेरा जन पेई गेआ तां असें बारी दा शीशा बंद कीता ते सुस्तान लग्गी पे। पही बस कुदै चढ़ाई चढ़दी, कुदै उतरदी। इ 'यां चलदे-चलदे रातीं दे बा 'रां बज्जी गे। नींदर कन्ने अक्खियां बी घटोन लग्गियां। पर बसै दी छेड़ कन्ने खुल्लियै नींदर बी नेई आई। इ 'यां गै अद्ध सुत्ते इक बजे अस चम्बा बस अड्डे पर पुज्जे। बस थमां उतरे। अगें-पिच्छे बड़े होटल हे। ओह 250 रपेऽ रात कटने दा कराया मंगा दे हे। खीर गली इच इक गेस्ट हाऊस मिली गेआ। उसनै साढ़े थमां 15 रपेऽ प्रति खट्ट कराया मंगेआ। असें कराया अदा कीता ते रातीं उत्थें गै सुत्ते।

सवेरे उट्ठे न्हाते-धोते थैल्ले चुक्के ते बस अड्डे आई गे। असेंगी भरमौर लेई अट्ठ बजे दी बस मिली। असें आल-माल नेई कीती। टिकटां लेइआं ते बस दी सीटें उप्पर बेही गे। बस ठीक अट्ठ बजे चली ते इक बजे भरमौर पुज्जी। मते लोक बस थमां उतरदे गै जातरा पर चली पे। असें उन्दा अनुसरण कीता ते अस बी उन्दे पिच्छे-पिच्छे चलन लगे। रस्ता किश-किश औखा बी हा। बिच-बिच चढ़ाई बी ही। अस चढ़दे गे ते रातीं 7 बजे धनछो पुज्जी गे। उत्थें इक निक्का बजार हा। रौहने दी व्यवस्था बी ही।

इक ढाबे आहले नै साढ़े थमां बीह-बीह रपेऽ लैत्ते ते सोनै लेई बैंच दित्ते। उन्दे उप्पर पट्टु बिछे दे हे। असें रुट्टी खादी ते सेई गे। सवेरे उट्ठे थैल्ले चुक्के ते तेआर होई गे।

धनछो मिगी मता गै रमणीक थाहर बझोआ। उत्थें खुल्ला थाहर हा। सवेरे दिक्खेआ तां चौन्नै बक्खी टैंट गै टैंट हे। निक्कियां बड्डियां हट्टियां सज्जी दियां हियां। न्होने लेई नाड़ दा पानी हा। अस उत्थें न्हाते न्हारी खादी ते जाने लेई तेआर होई गे। कछ गै इक निक्का शिव मंदर हा, उत्थें बी मत्था टेकन गे।

धनछो गी केई लोक धणछो धाम बी बोलदे न ते इसगी बी इक तीरथ मनदे न। इत्थें खास गल्ल एह ऐ जे इत्थें बुड्ढल उपनदी दा पानी पंदरां सौ फुट (करीब डेढ़ किलोमीटर) उंचाई थमां थल्लै डिग्गदा ऐ। जल दियां फुहारां दूर-दूर तोड़ी जंदियां न। मते लोक जल-प्रपात दे थल्लै न्होदे बी हैन। जित्थें अस रुके दे हे उत्थूआं दा एह जल-प्रपात कोई इक किलोमीटर दूर हा। अस उत्थें नेई गे। आबशार दा नजारा असें दूर थमां गै दिक्खेआ।

धनछो थमां अगें सिद्धी चढ़ाई ही। एह चढ़ाई किश मुश्कल बी ही। अस चढ़ाई चढ़दे गे। रस्ते इच कुदै-कुदै हट्टियां बी हियां। जि'यां-जि'यां अस उपपर चढ़न लगे साढ़ा साह बी फुल्लन लगा। मते लोक उपपर थल्लै अ'वै जारदे हे। अस बी चली पे। में किश लतें थमां विकलांगें गी सोट्टी दे स्हारै चढ़ाई चढ़दे दिक्खेआ। फही इक थाहर ग्लेशियर बी टप्पना पेआ। बर्फ कट्टियै जातरुएं लेई रस्ता बनाये दा हा। रस्ता मसां त्रै फुट्ट हा। ग्लेशियर कोई त्रीह फुट्ट लम्मा हा इस लेई सम्भली सम्भली पैर रखने पे। उसदे थल्लै डुगा डडल हा।

रस्तै बरखा बी पेई। किश लोक बरखा दिक्खन गौरी कुंड रुके किश शिव करोत्री अ'ऊं रस्ते इच गै फसी गेआ। बरखा मेरे उपपर ब'रदी रेही। अ'ऊं चढ़ाई चढ़दा रेहा। खीर शिव करोत्री पुज्जी गेआ। उत्थें इक हट्टी बढी गेआ। गर्म-गर्म चाह पीती, कंबल लेआ ते लेटी गेआ। अद्धे घंटे दे बाद जिस्म किश गर्म होआ तां तम्बू दे बाहर आया। उत्थें मतियां हट्टियां गोरखें दियां हियां। ओह बरखा इच ताश खेढै करदे हे। तम्बू दे अन्दर उ'नें अगं बी बाल्ली दी ही। मिम्मी किश चिर अग सेकी। शिव करोती थमां किश चढ़ाई ही। में चढ़ाई चढ़ी ते मणि महेश दे ढल कछ पुज्जी गेआ। इत्थें पुज्जदे गै में दिक्खेआ मेरे साथी रत्न गोपाल खजूरिया होर ढल इच स्नान करियै बाहर निकला करदे हे। मिम्मी टल्ले खोल्ले ते ढल इच स्नान कीता उसलै ब'रखा किश खड़ोई गेदी ही।

ढल दे कंडै इक शिला ही ते उसदे अगें-पिच्छे केई झंडे झूला करदे हे। लोक उत्थें मत्था टेका करदे हे। मिम्मी मत्था टेकेआ। पुच्छेआ तां इक नै गलाया जे इ'यै मणि-महेश न।

गद्दी जनजाति दे लोक मणि महेश गी अपना अधिष्ठाता मनदे न। ओह इत्थें मती तैदाद इच औंदे न। उन्दे इच इत्थें भिड्डु दी बलि देने दी प्रथा ऐ।

में गद्दियें दे इक टोल कन्ने ढल (सरोवर) दी प्रदक्खना लेई। प्रदक्खना पथ पत्थरें दा हा। सरोवर कोई बड्डा नेई हा। मेरा अन्दाजा ऐ जे एह 2 कनाल दे खेत्तर फल इच व्याप्त होग। मणि महेश तीर्थ धौलाधार पर्वत शृंखला इच 18568 फुट दी उंचाई उप्पर स्थित ऐ। इस सरोवर दी खोज गलांदे न मता चिर पैहले इक गद्दी नै कीती ही।

मणि महेश तीर्थ नै मिगी मता प्रभावत कीता। में इस तीर्थ दे प्रति लोकें दी अटूट श्रद्धा दिक्खी। अस दर्शन करियै शिव करोत्री आए। उत्थें खाना खाद्दा ते फही थल्लै गौरी कुंड आए। उत्थें जनानियें दे झुंड दे झुंड कुंड इच स्नान लेई जा करदे हे। इस कुंड दा पानी गर्म ऐ। गलांदे न जे बांझ महिला इस कुंड इच न्हौन तां उन्दे घर सन्तान हुन्दी ऐ। अस गौरी कुंड गी टप्पियै धनछो पुज्जे। त्रकालां पवा करदियां हियां। अस रातीं उसै ढाबे पर रेह जित्थें असें पिछली रात कट्टी ही।

सवरे अस थल्लै ढले। छड़ी नै उसे रोज उप्पर जाना हा। असेंगी छड़ी दे पिच्छें-पिच्छें मर्द ते जनानियें दे केई टोल लब्धे जेहड़े चढ़ाई चढ़ी जा करदे हे। किश लोकें अपने सिरें उप्पर लम्में-लम्में टोप लाए दे हे ओह शैद देवता दे चेल्ले जां पड़ीन हे। अस थोड़े चिर हड़सर बसां लेई रुके। इत्थें बी इक शिव मंदर हा। असें मंदर मत्था टेकेआ ते 11 बजे भरमौर पुज्जे।

भरमौर :-वर्तमान भरमौर पुराने चम्बा राज्य दी राजधानी ही। इसदा मूल नांऽ ब्रह्मपुर हा। एह नांऽ गलांदे न जे देवी ब्रह्माणी दे नांऽ उप्पर पेदा ऐ। देवी दा मंदर भरमौर थमां दऊं किलोमीटर दूर जीर्ण-शीर्ण हालत इच ऐ। इत्थें इक जलकुंड ऐ। मणि महेश दी जातरा उप्पर जाने आहले श्रद्धालु पैहले इत्थें स्नान करदे हैं ते फही उप्पर जंदे हे। ब्रह्मपुर इच मता पराना राज थड़ा रेहा ऐ। ह्युन्सांग नै इसदी चर्चा कीती दी ऐ ते इसगी इक फ़ाड़ी राज्य गलाए दा ऐ। इसदे गुआंढै इच कुल्लू, जालन्धर ते टक्क देश लिखे दे न।

तारीख दी कताबें इच इस राज दे राजें दे नांऽ मिलदे न। मेरु वर्मन गी इस राज्य दा पैहला राजा मित्थेआ जंदा ऐ जिसदा समां 6मीं सदी हा। उसदे वंशजें कोई छे सौ साल इत्थें राज कीता। उन्दे इच किश मशहूर राजें दे नांऽ हे - अजय वर्मन, (760) स्वर्ण वर्मन (780 ई०) लक्ष्मी वर्मन (800 ई०) मूशवर्मन (820 ई०) उसदे बाद साहिल वर्मन (920 ई०) नै इत्थें राज कीता। उसदी इक कुड़ी ही जिसदा नांऽ चम्पा हा। राजे नै इस कुड़ी दे नांऽ उप्पर इक नमां शैहर बसाया जिसदा नांऽ रक्खेआ :- चम्पापुर। बाद इच एह चंबा नांऽ कन्ने मशहूर होआ। राजा साहिल वर्मन नै बाद इच ब्रह्मपुर थमां अपनी राजधानी चम्बा इच स्थानान्तरित कीती।

वर्मन राजे ते उन्दे बाद दे किश राजें दे शासन काल इच भरमौर इच केई मंदर बने जिन्दे इच सिरमौर मणि महेश दा मंदर ऐ। इस मंदर कछ गै लखना देवी दा मंदर ऐ जेहड़ा इक काठ मंदर ऐ। गलांदे न जे एह सारें थमां पराना लक्कड़ी दा मंदर ऐ। इत्थें शिखर शैली दा इक मंदर नरसिंह जी दा ऐ। इस मंदर इच स्थापत मूर्ति रानी त्रिभुवन रेखा नै स्थापित करोआई ही। इक मंदर इत्थें गणेश दा बी ऐ। भरमौर खेतर इच चुरासी सिद्धें दे निक्के-निक्के 84 मंदर न। इक नागा बावा कृष्ण गिरि जी दी समाधि ऐ। भरमौर ते डुग्गर दे गद्दिएं दी जीवन शैली इक्कै जेही ऐ।

चम्बा :- अस भरमौर थमां इक बजे दे बाद चम्बा लेई चले। रस्ते इच असें त्रिलोचन महादेव दा मंदर दिक्खेआ। इक मंदर छतराड़ी ग्रां इच शक्ति दा ऐ। अस खास चम्बा पुज्जे तां उत्थें असें नमें ते पुराने राज मैहल दिक्खे। चम्बे दा चौगान दिक्खेआ। असेंगी चम्पावती मंदर नै बी मता प्रभावत कीता। इत्थें देवी चम्पावती गी महिषमर्दिनी दे रूप इच्च चित्रित कीता गेदा ऐ। चम्बा दे पूर्व इच इक फ़ाड़ी उप्पर रानी सूही दा मंदर ऐ। रानी सूही दी लोक गाथा डुग्गर इच बी गाई जंदी ऐ।

चम्बा शैहर इच मता प्रभावशाली, भव्य ते विशाल मंदर श्री लक्ष्मी नारायण जी दा ऐ। जि'यां जम्मू इच रघुनाथ मंदर जम्मू दी शान ऐ उ'यां गै लक्ष्मी नारायण मंदर चम्बा दी शान ऐ। इन्दे अलावा इत्थें इक मंदर बंसी गोपाल दा ऐ, इक मंदर ब्रजेश्वरी देवी दा ऐ। इक मंदर चर्पटनाथ दा ऐ।

चम्बा दे राज वंश इच 'दशनामी अखाड़ा' दी परम्परा बी रेही ऐ। इत्थें पैहलें एह अखाड़ा रंगमैहल थाहरै कोल हा हुन नखरोला इच ऐ।

अस चम्बै फिर टुरे ते पही दूऐ ध्याड़ै असें सेवेर-सवेरे चम्बा थमां कटड़ा दी बस पकड़ी ते वाया डल्हौजी पैहलें पठानकोट, पही जम्मू, परैन्त कटड़ा पुज्जे। कटड़ा थमां अस मेटाडोर उप्पर बेहियै पैथल आए।

पश्चिमी हिमालय खेत्तर दी एह जातरा मेरे लेई मती ज्ञानबद्धक सिद्ध होई।

०००

28. कुल्लू-मन्नाली जातरा

मिगी इन्दिरा गांधी राष्ट्रीय मानव संग्रहालय भोपाल पास्सेआ सांचा-विद्या ते पारम्परित लोक विद्या दे सरबन्ध इच इक सेमीनार इच हिस्सा लैने दा साद्धा आया। एह सेमीनार 21 थमां 23 जनवरी 2002 गी चिंतपूर्णी इच आयोजत होना हा।

चिंतपूर्णी इक शक्तिपीठ ऐ। उत्थें जाने लेई मेरी पत्नी बी तेआर होई गई। अस पैथल थमां 20 जनवरी गी सवेरे-सवेरे चले ते उसै ध्याडै त्रकालें चिंतपूर्णी पुज्जी गे। साढ़े ठैहरने दा प्रबन्ध चिंतपूर्णी ट्रस्ट दे गेस्ट हाऊस इच कीता गोदा हा। इस सेमीनार इच हिस्सा लैने आस्तै उत्तराखंड दे जोतषी हिमाचल दे संगीतकार विज्ञानक ते लामा आए दे हे। जम्मू-कश्मीर थमां अ'ऊं इकला हा। सेमीनार इच जि'नें विशे उप्पर परिचर्चा होई ओह हे - भूत-प्रेत, मसान, जादू, झड़ियां, जोतष ते लामावाद। सेमीनार दा समां हा सवेरे दस बजे थमां लेइयै संजा दे चार बजे तक।

मेरी पत्नी दी सेमीनार इच खास रुचि-नेई ही इस लेई ओह सवेरे-संजा चिंतपूर्णी दे दरबार इच हाजरी भरन रोज जंदी ही। बिच-बिच अ'ऊं बी उस कन्ने जंदा हा। उसनै बजार थमां इक कताब खरीदी दी ही। उस इच ज्वाला जी पीठ दा पूरा ब्योरा लिखे दा हा, इस लेई उसी मेरे थमां किश पुच्छने दी लोड़ नेई पेई।

23 जनवरी गी सेमीनार दा समापन होआ। इस सेमीनार दे संयोजक हे-डॉ० बंशीराम शर्मा। 24 जनवरी गी असें सारें अपने-अपने थैल्ले चुक्के ते गेस्ट हाऊस दे बाहर आई गे। संगीत दी प्रो० विद्या होर अपने पति कन्ने इस सेमीनार इच हिस्सा लैन आई दियां हियां। उन्दे पति इक विज्ञानक हे। ओह शिमला थमां आए दे हे। ओह अपनी कार लेई आए दे हे। उ'नेंगी पता हा

जे अस कुल्लू जा करने आं। उ'नें असेंगी अनुरोध कीता जे अस उन्दी कार उप्पर विलासपुर तोड़ी चलचै। असें उन्दा अनुरोध मन्नी लैता। अस उन्दे कन्ने कार उप्पर बेही गे। अस चिंतपूर्णी थमां पैहलें ज्वाला जी आए। अस सारें इत्थें मत्था टेकने लेई उतरे ते माता दे दरबार गे। अ'ऊं ज्वाला जी पैहलें बी चार बारी आए दा हा। में इस शक्ति स्थल दा इक-इक कोना दिक्खे दा हा। इस लेई अस इत्थें मता चिर नेई रुके।

ज्वाला जी थमां साढ़ी अगली पड़ाऽ विलासपुर शैहर हा। कार दा ड्राइवर रस्ते दा वाकिफ हा। इस लेई ओह अपनी मर्जी कन्ने कार दी रफ्तार कदें घटांदा ते कदें बदांथा हा।

रस्ते इच असें इक दऊं थाहरें चाह् बी पीती। उ'यां बी ठंडु दे दिन हे, चाह् पीने कन्ने किश गरमैश मसूस होई।

चिंतपूर्णी थमां लेइयै विलासपुर तोड़ी दा सारा रस्ता असेंगी मता रौसला बझोआ। अस गप्पां लांदे-लांदे कुसलै विलासपुर पुज्जे पता गै नेई लगा।

उ'नें असेंगी विलासपुर तुआरेआ। असें इक दूए गी अलविदा गलाया। ओह शिमला बक्खी चली गे ते अस विलासपुर अड्डे थमां मंडी आहली बस पकड़ियै संजा दे चार बजे दे करीब मंडी पुज्जी गे।

मंडी शैहर मेरी पसंद दा हा। इत्थें अस किश चिर रुके ते दरिया दे दक्ख दिक्खन लगे। जि'यां तवी दरिया दे कंढै मंदर न उ'यां गै मंडी इच बी व्यास नदी दे कंढै मंदर न। असें मंडी दा पुल पार कीता ते पारले बस अड्डै आई गे।

मंडी थमां असें अगें रिवाल्सर जाना हा। इस लेई असें उत्थूआं दा गै बस पकड़ी ते रिवाल्सर लेई रवाना होई गे। इत्थें बस इच गै मिगी अपनी इक शिश्या मिली। ओह शिवालिक कॉलेज उधमपुर बी.एड दी छात्रा ही। शैद उसदा नांऽ शोभा हा। उसदी मां जम्मू दी ही। उसनै मिगी मंडी रुकने लेई गलाया पर अस नेई रुके ते संजा 5 बजे रिवाल्सर पुज्जे।

रिवाल्सर :-लामावाद दे प्रवर्तक पदम-सम्भव दे सन्दर्भ इच में रिवाल्सर

झील दे बारे इच सोमसी पत्रिका इच केई लेख पढ़े दे हे। गलांदे न पद्म-सम्भव नै कुल्लू दी राज कुमारी कन्ने इत्थें केई दिन गुजारे हे। उ'नेंगी इत्थें केई सिद्धियां होइआं हिआं। ओह परम-ज्ञान हासल करने दे बाद गै तिब्बत गे हे ते उत्थें उ'नें अपने नमें पंथ दा प्रचार ते प्रसार कीता। रिवाल्सर झील दे कण्ठै इक भव्य गुम्पा बी बने दा ऐ जिसगी दिक्खन अस दमैं गे। असें रिवाल्सर झील दी प्रदक्खना बी लेई ते इसदे कंठै बने दे मंदर बी दिक्खे। इत्थें जातरियें लेई गेस्ट हाऊस उपलब्ध न। असें इक कमरा कराये पर लैत्ता ते असें रात उत्थें गै कट्टी। कमरे दा कराया 70 रपे\$ हा।

में त्रकालें लाटु दी लोई इच बी झील दा नजारा दिक्खेआ। मिगी बझोआ जे इस झील दा लोड़चदा बकास हिमाचल सरकार नेई करी सकी। अस सवैरे न्हाते धोते ते बस अड्डै आए। हुन साढ़ी अगली पड़ां\$ मणीकरण ही। में इस थाहर दा मता नां\$ सुने दा हा। बस दे कंडेक्टर नै मिगी मंडी-कुल्लू सड़क इच इक निक्के नेह बस अड्डे भूंतर उप्पर तुआरेआ ते गलाया इत्थुआं दा मणि करन लेई बस लब्धी जाग। उत्थूआं दा सच्चें असेंगी बस लब्धी गई।

मणिकरण :-भूंतर थमां मणीकरण 35 किलोमीटर दूर हा। अस उत्थें इक घंटे दे अन्दर पुज्जी गे। एह तीर्थ स्थान पार्वती नदी दे कंठै स्थित हा। समुन्दर तल थमां इसदी उच्चाई 1650 मीटर ही। इस तीर्थ स्थान दा सरबन्ध स्थानी विद्वान माता पार्वती दे कन्न दी मणि कन्ने जोड़दे न। केई इसगी हरिहर तीर्थ बी गलांदे न।

इस तीर्थ स्थान दी मशूहरी दा मुख् कारण इत्थें स्थित गर्म-पानी दे चश्में न। एह चश्में चार किलोमीटर दे खेत्तर इच फैले दे न। इत्थें पानी दा तापमान 88 थमां 94 डिग्री सैलसियस ऐ। इस पानी इच चौल बी बनी जंदे न ते दाल बी गली जंदी ऐ। विज्ञानकें दे मताबक इस पानी इच रेडियम दी मात्रा ऐ।

इस घाटी इच जरी, कसोल ते पुगला मते रमणीक थाहर न। इस घाटी थमां हरिन्द्र पर्वत दे दर्शन हुन्दे न। उस पर्वत उप्पर ब्रह्म सरोवर ऐ ते उत्थूआं दा ब्रह्म नदी निकलदी ऐ जिसदा संगम पार्वती नदी कन्ने मणीकरण तीर्थ इच हुन्दा ऐ।

मणीकरण इच इक पराना राम मंदर ऐ। एह शिखर शैली इच ऐ। गलांदे न जे इस मंदर दा निर्माण सन 1635 ई० इच राजा जगत सिंह नै करोआया हा। सन 1889 ई० इच इस मंदर दी मुरम्मत राजा दलीप सिंह नै करोआई। इस मंदर कन्ने गै हनुमान मंदर ऐ। इत्थें राजा जगत सिंह दी मूर्ति रक्खी दी ऐ।

मणीकरण इच श्री नारायण हरि गुरुद्वारा बी ऐ। इसदा निर्माण सन 1940 इच शुरु होआ हा। गुरुद्वारा पुज्जने लेई पुल पार करना पौंदा ऐ। अस गुरुद्वारा दिक्खन गे तां उत्थें गै न्हाते हे।

मणीकरण असेंगी जम्मू दे पाधे बी मिले। ओह हुन उत्थें स्थाई रूपै इच बसे दे न।

अस मणीकरण थमां बस पकड़ियै कुल्लू आई गे।

मनाली :-मणीकरण थमां कुल्लू 45 किलोमीटर हा। अस त्रै बजे गै कुल्लू पुज्जी गे। में कुल्लू इक बारी पैहले बी दिक्खे दा हा। इस लेई असें मनाली जाने दा मन बनाया। इक बस मनाली जा करदी ही। असें उसै उप्पर बेही गे ते करीब पंज बजे मनाली पुज्जे। बस अड्डे कछ गै इक होटल हा। रश मता नेई हा। 125 रपेंड कन्ने कमरा मिलेआ। असें कमरा मल्लेआ ते फही बजार फिरन निकले। मनाली नमां विकसत शैहर ऐ। लाल चन्द प्रार्थी होर प्रधान मंत्री जवाहर लाल नेहरु होरें गी इत्थें लेइयै आए तां इस जगह दा म्हत्तव बी बधेआ। बजार खास बड्डा नेई हा। कोठियां ते होटल मते हे। घर कोठे घट्ट लब्धे। जि'यां कश्मीर इच पैहलगाम सैलानियें दा शैहर ऐ इ'यां गै मनाली बी सैलानियें दा थाहर ऐ।

अस रातीं सुते। कमरे इच टी.वी. हा। मेरा शौक खबरां सुनने तोड़ी गै ऐ। खबरां सुनियां, ते रजाई लैत्ती ते सेईं गे। सवरे सारे थमां पैहले हिडम्बा माता दा मंदर दिक्खन गे। लकड़ी दा एह मंदर पैगोडा शैली इच ऐ। इसदा शिखर त्र'ऊं ढलाईं इच ऐ। इस जनेह किश मंदर जम्मू दे फाड़ी इलाके इच बी हैन। असें मनु मंदर दिक्खने दा बी मन बनाया। रस्ता पुच्छदे-पुच्छदे उत्थें पुज्जी गे। मेरी मती मर्जी रोहतांग जाने दी बी ही। किश गड्डियां जा करदियां

हियां पर अस नेई जाई सक्के। बाद इच लेह् थमां मनाली औंदे में रोहतांग दिक्खेआ तां मता प्रभावत होआ। बार-बार मनाली दे बजारें ते गलियें इच फिरनां मिगी चंगा नेई लगा। में नगर दा मता नांऽ सुने दा हा, इस लेई अस नगर लेई रवाना होए।

नगर :- अस मनाली थमां सवेरे 10 बजे परतोए। अज्ज 25 जनवरी ही। असेंगी अजें तौल बी नेई ही। में लाल चन्द प्रार्थी हुन्दी कताब 'कुलूत देश की कहानी' पढ़ी दी ही। इक कताब मिगी महाशय सत्यपाल भटनागर होरें बी भेजी ही। शीर्षक हा-कुल्लू का इतिहास एवं संस्कृति। इ 'नें दोन्नें 'नगर' दी मती चर्चा कीती दी ही ते इसगी कुल्लू राज्य दी परानी राजधानी मन्ने दा हा। अस मनाली ते कुल्लू दे मझाटै इक निक्के शैहर इच उतरे ते फही उत्थूआं दा मेटाडोर पकड़ियै नगर पुज्जे। 'नगर' गी शैहर गलाना मनासब नेई। मिगी ओह इक ग्रां जनेहा गै बझोआ पर इत्थें मते सैलानी पुराने राज मैहल, किला ते निकोलोई रोरिख दे संग्रैहालय गी दिक्खन जंदे न। असें बी उ 'यां गै कीता। राज मैहल इच मिगी कोई आकर्शन नेई बझोआ। एह इक जागीरदार दी हवेली बझोई। एह बी दऊं हिस्से इच ही। इक हिस्सा उप्पर ते दूआ थल्लै हा। उत्थें किश परानियां चीजां बी प्रदर्शत हियां। बझोआ जे एह अमर मैहल आह्ला लेखा कोई संग्रैहालय ऐ।

असें नगर दा किला बी दिक्खेआ। गलांदे न जे इसदा निर्माण राजा सिद्ध सिंह नै करोआया हा। इसी बनाने लेई लकड़ी ते पत्थर दा प्रजोग होए दा ऐ। एह किला त्रैमंजिला ऐ। इसदे अन्दर जमीन दोज कमरे बी हैन। सन 1905 दे भूंचाल इच इसगी कोई नुक्सान नेई पुज्जेआ। इस थमां एह बझोंदा हा जे पराने वास्तुकार मते स्याने हे। एह तारीखी भवन सन 1978 इच इक होटल बनेया। अस इस किले इच थोढ़ा चिर फिरे दुरे ते फही निकोलाई रोरिख दा संग्रैहालय दिक्खन चली गे।

निकोलाई रोरिख :- नगर इच निकोलाई रोरिख दी आर्ट गैलरी मती मशहूर ऐ। असें इत्थें उन्दी आर्ट गैलरी, लाईब्रेरी ते समाधि दिक्खी।

निकोलाई दी गैलरी इच 45 पेटिगस मुखौटे, लकड़ी ते पत्थर उप्पर कीती गेदी खुदाई दे नमूने, शिव पार्वती, गुगा पीर, गणेश, विष्णु, दुर्गा दियां

मूर्ता प्रदर्शित न। इ'यां उ'नें अपने जीवन काल इच 7000 तैल चित्तर ते टैम्पर बनाये हे।

निकोलाई रूस दे हे। उन्दा जन्म 1874 ई० इच पीटस वर्ग (रूस) इच होआ। ओह् 1928 इच भारत आए। नगर दा एह् थाहर उ'नेंगी पसंद आया। उ'नें नगर इच हाल स्टेट मण्डी राजे थमां खरीदी। अरु स्वाति हिमालय अध्ययन संस्थान दी स्थापना कीती। 13 सितम्बर 1947 गी उ'नें इत्थें शरीर छोड़ेआ। उन्दी समाधि उप्पर लिखेदा ऐ :-

“भारत के महान मित्र महर्षि निकोलाई रोरिख का पार्थिव शरीर, 15 दिसम्बर 1947 को यहाँ अन्तिम संस्कार किया गया ओम राम।”

रोरिख आर्ट गैलरी थमां अस पैदल नगर तोड़ी आए। लाल चंद प्रार्थी हुन्दा घर बी इस ग्रां इच हा। उन्दा इक जागत इत्थें गै रौहन्दा हा। मेरी मर्जी उस कन्ने मिलने दी बी ही। पर बस आई ते अस बैठे ते ओह् असेंगी दरिया दे कंढे लेई आई। साढ़े सामनै हुन दरिया दे पार कुल्लू शैहर हा।

कुल्लू :-कुल्लू सैलानियें लेई इक आकर्शन ऐ। कश्मीर दे बाद सारें थमां जैदा सैलानी इत्थें सैर सपाटा करन औंदे न। कुल्लू अजादी थमां पैहले इक अलग स्टेट बी ही। उस रियासत दे राजवंशें दा मता गै लम्मा इतिहास ऐ। कुल्लू दी संस्कृति बी गौरवमयी रेही ऐ। एह् शैहर साहित्य, कला, दर्शन ते अध्यात्मकता दा केन्द्र रेहा ऐ। इस खेत्तर दियां अपनियां अनूठियां परम्परा रेहियां न। इत्थूआं दा कुदरती शलैपा बेजोड़ ऐ। शैद इ'यै कारण ऐ जे इत्थें दुनियां भर दे कला पारखी, शोध कर्ता, इतिहासकार ते मानव शास्त्री औंदे गै रौहन्दे न। अ'ऊं इत्थें इक बारी पैहलें बी सोलन शिमला थमां हुन्दा आया हा ते इस शैहर दे प्रख्यात विद्वान मौलूराम ठाकुर होरें गी मिलन गेआ हा।

इस बारी मेरा मकसद कुसै कन्ने बी मिलने दा नेई हा। अ'ऊं अपनी पत्नी अनुसूया होरें गी मंदर दर्शन लेई आया हा। इस लेई में कुल्लू इच उ'नें गी मते मंदर गै दस्से।

सारें थमां पैहले में दरिया दा पुल पार कीता ते शैहर बक्खी आया। पुल पार करदे गै में उ'नेंगी इक मंदर समूह दे दर्शन कराए ते फही अस थैल्ले

चुक्कियै बजार दा पूरा चक्कर लांदे-लांदे बस अड्डे पाससै आए। कुल्लु दा बजार बी इक किलोमीटर लम्मा बझोआ। इत्थें नमें ते पराने दोनैं शैलियें दे भवन लब्धे। बजार इच 'अखाड़ा बजार' दा नांऽ मता सुनेआ। बस स्टैंड सामान्य बझोआ, उत्थें अट्ठ-दस बसां गै खड़ोती दियां हियां। इक बजार बस अड्डे दे पार बी हा। उत्थें जाने लेई इक निक्की ढक्की बी ही। उसदे अगें ढालपुर। ढालपुर कन्ने दशैहरे दा मदान।

कुल्लु दा दशैहरा :-असेंगी ते कुल्लू दा दशैहरा दिक्खने दा मौका ते नेई मिलेआ पर मौलूराम ठाकुर होरें दशैहरे दा मदान दस्सदे गलाया जे कुल्लु दा दशैहरा अस्सुं म्हीने दी दसमीं गी शुरु हुन्दा ऐ। उस दिन भारत इच एह त्याहार समाप्त हुन्दा ऐ। इत्थें नांऽ कोई राम लीला हुन्दी ऐ ते नांऽ गै रावण, मेघनाथ ते कुम्भकरण ते पुतले फूके जंदे न। इत्थें राजकुल दी देवी हिडिम्बा दे मनाली थमां औने दे बाद दशैहरा शुरु हुन्दा ऐ। देवी दा सुआगत राजे दा प्रतिनिधि करदा ऐ। राम गी देवतें दा देवता मिस्थियै पूजेआ जंदा ऐ। हिडिम्बा गी राज भवन इच रक्खेआ जंदा ऐ। उत्थें उन्दी मजूदगी इच राजा शस्त्र पूजा करदा ऐ। फही रघुनाथ मंदर थमां नारसिंह दा घोड़ा सजाया जंदा ऐ। राजा उसदी पूजा करदा ऐ। फही राम मूर्ति गी पालकी इच सजाया जंदा ऐ। उसदे बाद शोभा जातरा कड़्ही जंदी ऐ जिस इच सारे थमां अगें-अगें नारसिंह दा घोड़ा उसदे पिच्छें बजन्तरी दियां टोलियां, रघुनाथ जी दी पालकी, राजा दी पालकी, राजगुरु दी पालकी हुन्दी ऐ। हिडिम्बा, जमदग्नि, त्रिपुरा-सुन्दरी, बिजली महादेव ढालपुर रघुनाथ जी कन्ने चलदे न। शोभा जातरा त्रै बजे निकलदी ऐ। देवतें दे रथें दे पिच्छें-पिच्छें श्रद्धालु चलदे न। शोभा जातरा डेढ़ घंटे इच ढालपुर पुज्जदी ऐ। इत्थें बारें पेहियें दा रथ सज्जे दा हुन्दा ऐ। उस उप्पर मूर्ति सजांदे न। दऊं रस्सें दी मदद कन्ने रथ खिच्चदे न फही उसगी शिविर तोड़ी लेई जन्दे न। उत्थें मूर्ति गी छे दिन रक्खेआ जंदा ऐ। जिस शिविर इच मूर्ति हुन्दी ऐ उसगी रघुनाथ शिविर गलांदे न। राजा बी शिविर इच गै रौहन्दा ऐ। दिनें उत्थें आरती ते रातीं चन्द्रौली नाच हुन्दा ऐ। छेमै ध्याड़ै देवता दरबार हुन्दा ऐ। उस दिन कन्या पूजन ते कन्ने-कन्ने उ'नें पशुएं दा पूजन बी कीता जंदा ऐ जिन्दी बलि देनी हुन्दी ऐ। खीरलै ध्याड़ै राम मूर्ति गी रथ उप्पर रक्खियै ढालपुर आंदा जंदा ऐ। रथ दे अगें हिडिम्बा हुन्दी ऐ। उसगी पंजें पशुएं दी

बलि दित्ती जन्दी ऐ-ओह पशु न-भैंसा, सूअर, मछली मुर्गा ते केकड़ा। बलियां लेइयै देवी हिडिम्बा बापस चली जंदी ऐ। रातीं व्यास नदी दे कंढै कंडें दा ढेर लाइयै उसी अगग लांदे न। बस इ'यै लंका दहन दा प्रतीक ऐ। उ'यां त्र'ऊं किलटें गी रावण, कुम्भकरण ते मेघनाथ दा प्रतीक मिथियै अगग बी लाई जंदी ऐ।

खीर राम दा रथ मूल थाहर आंहदा जंदा ऐ। बापसी उप्पर सीता दी मूर्त बी रक्खी जंदी ऐ। पही शोभा जातरा कन्ने राम-सीता दियां मूर्तां मंदर आहनदे न। मंदर इच रघुनाथ जी दी मूर्ति गी कमलासन उप्पर प्रतिष्ठित करियै आरती करदे ते भोग लांदे न। पही दशैहरे थमां फागली तोड़ी कुल्लू इच कोई मेला नेई हुन्दा ऐ।

अस कुल्लू दे रघुनाथ मंदर बी गे ते केई दूए होर मंदर बी दिक्खे। इत्थें असेंगी मंदरें दियां दऊं शैलियां लब्धियां-शिखर शैली ते खश शैली। कुल्लू खेत्तर इच शिखर शैली दे मंदर थल्ले दा चौकोर ते उप्पर थमां गुम्बद बझोंदे न। इन्दे इच मंडप दी व्यवस्था नेई हुन्दी। प्रवेशद्वार दे सज्जै खब्बै गंगा ते यमुना दियां आकृतियां हुन्दियां न। कुल्लू इच रघुनाथ मंदर शिखर शैली दा ऐ। इ'यां गै असें मणिकरण जेहड़ा राम मंदर ते रघुनाथ मंदर, नगर इच चतुर्भुज मंदर ते लक्ष्मी नारायण मंदर दिक्खे हे ओह शिखर शैली दे मंदर हे।

खस शैली दे मंदर त्र'ऊं श्रेणियें इच न :- ढालवां छत्त शैली, मेरु पैगोड़ा शैली ते ढालवां मेरु संयोजन शैली। असें नगर थाहर त्रिपुरा सुन्दरी दा जेहड़ा त्र'ऊं छत्तें आह्ला मंदर दिक्खेआ हा ओह पैगोड़ा शैली इच हा, मनाली दा हडिम्बा मंदर बी इस्सै शैली इच हा।

डुगगर दे फाड़ी इलाकें इच पैगोड़ा शैली दे कुदै-कुदै मंदर हैंन, इ'यां मते मंदर शिखर शैली इच न।

असें कुल्लू इच पशमीना शाल दियां मतियां हट्टियां दिक्खियां। इक शाल मेरी लाड़ी नै बी खरीदेआ। अस राज मैहल दिक्खन बी गे। उसदे कछ गै संस्कृत-विद्यालय हा जित्थें जम्मू दे डा० गंगादत्त विनोद प्रिंसिपल हे।

कुल्लू खेत्तर इच इ'यां होर बी दिक्खने लायक मते थाहर हे। मेरी मर्जी

मलाणा जाने दी बी ही। ओह मणिकरण कछ गै हा। पर अ'ऊं उत्थें नेई पुज्जा। विद्या शर्मा होरें विजलेश्वर महादेव दा नां५ बी लैत्ता हा। अ'ऊं उत्थें बी नेई गेआ। में निरमण्ड दी 'बूढ़ी दिवाली' बी नेई दिक्खी जिस इच रातीं लोक बक्खरी-बक्खरी दिशाएं थमां मशालां हत्थ पकड़ियै औंदे न ते इक थाहर इकट्ठे होंदे न। एह दिवाली माघ महीने दी मस्सेआ गी मनांदे न। इस कन्ने गै रलदा-मिलदा इक त्याहार सुद्ध-महादेव इच बी मनाया जंदा ऐ। इ'यां बी में दिक्खेआ जे कुल्लू ते डुग्गर इच मतियां सांझा न। जातरां सांझिआ न। नाग संस्कृति सांझी ऐ। उत्सव सांझे न। लोक देवते सांझे न। में कुल्लू दी धरती गी नमस्कार कीता। बस उप्पर बैठा ते रातीं मंडी आई गेआ।

मंडी :- 26 जनवरी दा सूरज में मंडी इच गै दिक्खेआ। इत्थें बी अस दरिया दे कंढै इक गेस्ट हाऊस इच रेह। उत्थें असें सवेरे-सवेरे भूतेश्वर महादेव दे दर्शन कीते। इत्थें इक बारी अ'ऊं पैहलें बी आया हा। एह मंदर मंडी दा गौरव मित्थेआ जंदा ऐ इस लेई मंडी दिक्खन जेहड़ा बी औंदा इस मंदर दे दर्शन जरूर करदा ऐ। मेरी पत्नी बी मंदर दे अन्दर गई। भूतेश्वर महादेव दे दर्शन करियै मती खुश होई। मंदर शिखर शैली इच हा। प्रदक्षिणा-पथ बी हा। उसनै मंदर दी परिक्रमा कीती। तौंकड़े इच रक्खी दियां अन्दर बाहर मूर्ता दिक्खियां। मंदर दा प्रांगण मता खुल्ला हा। शिवरात्रि गी इत्थें भव्य मेला लगदा ऐ। मंडी दे अधिष्ठाता भूतेश्वर महादेव गी गै मित्थेआ जंदा हा। पर मंडी दे राजा सूरजसेन दे घर कोई संतान नेई होई तां उसनै इत्थें माधोराय दा मंदर बनोआया ते अपना राज उ'नेंगी अर्पित करियै उन्दे प्रतिनिधि दे रूप इच शासन कीता। अस बी माधोराय दा मंदर दिक्खन गे। शिखर शैली दे इस मंदर इच मुरली मनोहर दी मूर्ति ऐ जिसगी 1648 ई० इच भीमा सोनार थमां ओंहदा हा। मिगी इत्थें नाथ पंथियें दा बी मता प्रभाव बझोआ। मंडी इच गोरखनाथ, मच्छन्दनाथ, भैरवनाथ, नार सिंह, कैलू, हनुमान, गुग्गा, गूगरी दी पत्थरें दी बनी दियां मूर्ता पूजियां जंदियां न।

में मण्डी दे लोकें कन्ने डोगरी इच गल्ल-कत्थ कीती। उ'नें मंडियाली इच जबाव दिते। मिगी उ'नेंगी समझने इच ते उ'नेंगी मिगी समझने इच कोई दिक्कत नेई आई।

मिगी अपनी ते उन्दी जीवन शैली वेश-भूषा, रैहत-बैहत इच कोई फर्क नेई बझोआ। मिगी लगा अ'ऊं मण्डी दा आं ते मण्डी आहले मेरे न।

जि'यां जम्मू इच तवी दे कंढै-कंढै मंदर न इ'यां गै मंडी व्यास दे कंढै-कंढै मंदर गै मंदर न। में उन्दी गिनतरी कीती ओह 49 हे जिन्दे इच 24 शिवालय हे। शिव दे पुत्तर बालकनाथ मंडी दे विशेष देवता न। साढ़े ते मण्डी दे लोकें दे लोक-विश्वास बी मते मिलदे-जुलदे न। इत्थें बी लोक डैनें उप्पर जकीन करदे न। इत्थें इक डैणियें दी धार ऐ। गलांदे न उत्थें देवतें ते डैनें दा जुद्ध चलदा रौहन्दा ऐ। मंडी इच दिक्खने लेई मता किश हा। राज मैहल, किला, कचैहरी। पर हुन साढ़ी अगली पड़ाऽ वैजनाथ दे मंदर ही। इस लेई अस बस पर बैठे ते बैजनाथ मंदर दिक्खन चली पे।

बैजनाथ मंदर :-असेंगी मण्डी थमां बैजनाथ पुज्जदे दऊं घंटे लागे। इ'यां एह मंदर कांगड़े थमां सिरफ 36 कि.मी. दूर ऐ। पराने जमाने इच मंदर नदी-नालें दे कंढै बनाए जंदे हे। एह मंदर बी बिनवा उपनदी दे कंढै निर्मित ऐ। गलांदे न जे इस थाहर दा पराना नांऽ कीरग्राम हा। इत्थें दऊं भ्रा रौहन्दे हे इक दा नांऽ बैजनाथ ते दूए दा नांऽ सिद्धनाथ हा। ओह दोऐ बपारी हे। उ'नें अपनी कमाई दा पैसा इ'नें मंदरें दे निर्माण उप्पर खर्च कीता। किश गलांदे न जे इ'नें मंदरें दा निर्माण 804 ई० इच ते किश गलांदे न 1204 ई० इच होआ। मिगी 1204 ठीक बझोआ ऐ।

वास्तु कला दी नज़र कनै बैजनाथ मंदर दा इक खास थाहर ऐ। इस मंदर दा आकार 51 फुट लम्मा ते 31 फुट चौड़ा ऐ। इसदा गर्भगृह वर्गाकार ऐ ते हर कन्ध अट्ठ फुट लम्मी ऐ। इसदे अन्दर इक फुट उच्चा शिव लिंग प्रतिष्ठित ऐ। इस मंदर दा अन्तराल निक्का ऐ। सभा मंडप दे बाहर च'ऊं खम्बें उप्पर आधारत इक द्वार-मण्डप बी बने दा ऐ।

इस मंदर दी बाहरली कन्धें इच शैल-सुन्हाकड़े तौकड़े बने दे न जिन्दे इच शिव, गणेश, नौ ग्रँह, दस अवतार, दस महा-विद्या दियां मूर्तियां स्थापत न। बाहरली कन्धे उप्पर बेलबूटे ते जमैट्री दियां शैल आकृतियां अंकित न। इसदे प्रांगण इच नन्दी दी मूर्ति ऐ।

4 अप्रैल 1905 गी कांगड़ा घाटी इच भूचाल आया तां इस मंदर गी कोई नुक्सान नेई पुज्जा। इस मंदर दे अन्दर दऊं शिलालेख बी हैन जिन्दी भाशा संस्कृत ऐ। उन्दे इच वास्तुकारें दा नांऽ बी ऐ।

एह मंदर पुरातात्विक म्हत्तब दे कारण संरक्षित न। मेरी पत्नी इ 'नें मंदरें गी दिक्खियै मती खुश होई ते फही गलान लग्गी-मड़ो इ 'यै जेह मंदर कृष्णपुर मनवाल बी हैन। इत्थूआं दे कारीगिर गै उत्थें मंदर बनान ते नेई गे हे ? उस दे सवाल दा मेरे कछ कोई जवाब नेई हा। अ'ऊं उसी कन्ने लेइयै किश चिर वाटिका इच घुम्मेआ फिरेआ ते फही अस दोऐ बस अड्डै आई गे। बस कांगड़ा जा करदी ही। अस बस पर बेही गे। अस सवा घंटे इच कांगड़ा पुज्जे।

कांगड़ा :- कांगड़ा शैहर मेरी पत्नी नै ते में पैहले बी दिक्खे दा हा। पत्नी गी एह शैहर मता पसंद हा। उसदा इस शैहर कन्ने मते लगाऽ दा कारण ब्रजेश्वरी देवी दा मंदर हा। इसगी गढ़ कांगड़े आहली माता बी गलांदे न। नगरकोट (पराना कांगड़ा) राज दी एह कुलदेवी बी मिथी जंदी ही, इस लेई कांगड़े दा राज परोआर बी इस कन्ने जुड़े दा हा। 26 जनवरी दी रात असें कांगड़ै इक गेस्ट हाऊस इच गुजारी ते 27 जनवरी गी अस एह शक्तिपीठ दिक्खन गे।

ब्रजेश्वरी देवी :-इक पौराणिक कथ दे मताबक सती दाह दे बाद सती दे शरीर गी मूँढे उप्पर रक्खियै शिव जी गुस्से इच ब्रह्माण्ड इच विचरण करन लगे तां भगवान विष्णु नै अपने सुदर्शन चक्र कन्नै सती दे शरीर दे बानुएं टुकड़े कीते। जित्थें-जित्थें ओह टुकड़े पे उत्थें-उत्थें शक्तिपीठ स्थापत होए। ब्रजेश्वरी थाहर शक्ति दा खब्बा स्तन डिगोआ। इस लेई इत्थें ब्रजेश्वरी शक्तिपीठ दी स्थापना होई। एह मिथेआ जंदा ऐ जे इस शक्तिपीठ दी जातरा करने कन्ने परोआर इच सुख, धन ते समृद्धि इच बादधा हुन्दा ऐ, मते लोक इत्थें एह मनोकामना लेइयै ओंदे न जे उन्दे दुक्ख दरिदर दूर होन। उन्दे घर बी खुशहाली आबै।

ब्रजेश्वरी देवी कन्ने सरबन्धित इक आख्यान एह बी ऐ जे राक्से दा समूल नाश करने लेई देवी नै उन्दे कन्ने जुद्ध कीता जिस कारण उ'नेंगी मतियां चोटां आईयां। देवतें उ'नें चोटे उप्पर घ्यो दा लेपन कीता। अज्ज परम्परा एह

ऐ जे मकर संक्रांति गी ब्रजेश्वरी देवी दी पिण्डी उप्पर पंज मन देसी ध्योऽ चढ़ाया जंदा ऐ।

एह मंदर कांगड़ा शैहर इच इक उच्चे टिल्ले उप्पर निर्मित ऐ। कांगड़ा खेत्तर इच होर बी केई शक्तिस्थल न जि'यां-चामुण्डा, आशापुरी, मनसा, टारना, शीतला, भद्रकाली, ब्रह्मणी, करौली बगैरा। बझोंदा ऐ जे कदें इस खेत्तर इच शाक्त सम्प्रदाय दा जोर रेह्दा ऐ।

अ'ऊं अपनी पत्नी कन्ने मंदर मत्था टेकियै बजार इच आया। इस मंदर दा खुल्ला प्रांगण ते उसदे मझाटै उच्चे चबूतरे उप्पर बने दा एह मंदर मेरी पत्नी गी ते मिगी बी इक दिव्य-भवन बझोआ।

कांगड़ा कला संग्रहालय :- ब्रजेश्वरी देवी दे दर्शन करने दे बाद अस थोड़ा चिर कांगड़ा फिरे टुरे ते पही बस पर बैठे ते कांगड़ा कला संग्रहालय दिक्खन धर्मशाला आए। दपैहरीं दी रुट्टी खाने दे बाद अस एह संग्रहालय दिक्खन गे।

इस संग्रैहालय दा उद्घाटन 17 जनवरी, 1990 गी कीता गेआ हा। एह संग्रैहालय हिमाचली विरासत दा इक संस्थान ऐ। इस संग्रैहालय इच केई कला विथिआं निर्मित न जित्थें पुरातात्विक थाहरें थमां हासल पत्थर जुग दे औजार, पत्थर दियां मूर्ता, मिट्टी दे भांडे, कुशान काल दियां इट्टां प्रदर्शित न। इस संग्रहालय इच 7वीं सदी थमां लेइयै 18वीं सदी तोड़ी दी मुखलफ धर्मे ते सम्प्रदायें कन्ने सरबन्ध रक्खने आहिल्यां मूर्ता बी हैन जिन्दे उप्पर गुप्त कालीन ते कश्मीर कालीन शैलियें दा असर ऐ। इत्थें ब्राह्मी ते खरोष्ठी लिपि दा इक शिलालेख बी ऐ जेहड़ा त्री सदी दा ऐ। इत्थें गुलेर, कांगड़ा, नूरपुर मण्डी, चम्बा, गढ़वाल, राजस्थान ते मुगल शैली दे सजीव चित्तर प्रदर्शित न। इत्थें हिमाचल दे प्राचीन मंदरें दियां मूर्तियां बी रक्खी गेदियां न। चम्बा रुमाल दे नमूने बी इत्थें मिलदे न।

असें एह संग्रैहालय 27 जनवरी गी दिक्खेआ ते पही अस तिब्बतियें दे गुम्पा ते उन्दी बस्ती दिक्खन कलमोड़गंज गे।

एह थाहर धर्मशाला थमां मसां 7 किलोमीटर दूर इक फ़ाड़ी उप्पर बसे

दा ऐ। एह तिब्बती शैहर ऐ जेहड़ा तिब्बती शरणार्थियें लेई आबाद कीता गेदा ऐ। इत्थें तिब्बती जीवन शैली अज्ज बी जीवन्त बझोंदी ऐ। अस सारें थमां पैहले तिब्बतियें दा गुम्पा दिक्खन गे। एह गुम्पा मता भव्य हा। इत्थें महात्मा बुद्ध ते पद्म सम्भव दियां विशाल मूर्तां प्रतिष्ठित हियां। एह गुम्पा बी मता विशाल ते दो मंजिला हा। पुजारी आरती लेई दीप तेआर करा दे हे।

अस किश चिर गै इत्थें टिके तौले गै धर्मशाला परतोई आए। अड्डे थमां असें पठानकोट दी बस पकड़ी। 28 जनवरी गी सवेरे-सवेरे अस पैंथल पुज्जी गे।

कुल्लू मनाली दी मेरी एह जातरा मेरे चेत्तें इच अज्ज बी ऐ।

०००

29. अमरनाथ जातरा

मेरी मां दी अमरनाथ स्वामी जी दी जातरा उप्पर जाने दी बड़ी गै मर्जी ही। खी'र उन्दी इच्छा पूरी होई। उधमपुर थमां जातरियें गी लेइयै इक बस पैहलगाम जा करदी ही। मेरी बड्डी भैन पुशपा उधमपुर गै रौहन्दी ही। उसनै साढ़े लेई त्रै सीटां बुक करोआइयां ते असेंगी पैथल स्नेहा पुजाई दिता। साढ़े प्रस्थान दी तरीक 29 जुलाई 1968 ही।

28 जुलाई गी असें संजा झोले चुक्के ते उधमपुर आई गे। मेरे कनै मेरी मां-आसोरानी, पत्नी अनुसूया देवी ते निक्की कुड़ी निधि निश्कामिनी ही। रातीं असें उधमपुर बस अड्डे कछ सराई डेरे लाए ते दूऐ दिन 29 जुलाई गी बस उप्पर बेही गे।

बस सबेलै गै टुरी पेई। बस उप्पर जिनें बी जातरु चढ़े ओह उधमपुर दे लागै-दिगै दे गै हे। असें जखैनी टप्पी तां ब'रखा शुरु होई गई। रामवन तोड़ी ब'रखा ब'रदी गै रेही। रामवन केहरा पुल होने दे कारण किश चिर जाम लगा पर तौले गै जाम खुल्ली गेआ ते अस रामसू, बनिहाल ते जवाहर टन्नल टप्पियै कश्मीर घाटी इच दाखल होई गे।

कश्मीर लेई एह मेरी पैहली जातरा ही। जि'यां गै असें घाटी इच प्रवेश कीता बझोन लगा जे अस सच्चें गै सुर्गे इच पुज्जी गे आं।

वैरी नाग :- बस इच बैठे दे गै इक सवारी नै वैरी नाग दिक्खने दी इच्छा जाहिर कीती। कंडेक्टर नै शर्त रक्खी जे हर सवारी पंज-पंज बधीक रपेऽ देयै तां बस वैरीनाग जाई सकदी ऐ। सारे मन्नी गे। ड्राइवर नै इक मोड़ कट्टेआ ते अस वैरी नाग पुज्जी गे।

वैरी नाग अस किश चिर फिरे-टुरे। चश्मा दिक्खेआ। किश लोक गलांदे न जे जेहलम दरिया दा नकास इ'यै चश्मा ऐ। किश आक्खदे नीलनाग ऐ।

खैर अस बाग इच फिरे-टुरे। बाग फुल्लें कन्नै भरोचे दा हा। उत्थें इक शिलालेख बी हा। ओह फारसी इच हा। गलांदे न जे मुगल बादशाहें गी एह थाहर मता पसंद हा। असेंगी बी वैरी नाग मता पसंद आया।

वैरी नाग थमां अस बस उप्पर बैठे ते कांजीकुंड पुज्जे। इत्थें इक निक्का जेहा बजार हा। किश बसां इत्थें खड़ोती दियां हियां। पही अस अगें बधे ते खन्नावल पुज्जे। इत्थुआं दा दऊं सड़कां खिंडियां। इक श्रीनगर गी गई ते दुई पैहलगाम गी गई। साढ़ी बस पैहलगाम बक्खी मुड़ी। असें बस इच बैठे दे गै अनन्तनाग दिक्खेआ। पैहलगाम अस रातीं दे नौ बजे पुज्जे। बस अड्डे उप्पर रुकी तां इक कुल्ली नै अवाज दित्ती 'सेवा समिति' असें आक्खेआ 'ठीक ऐ, उत्थें गै लेई चल।' उसनै साढ़ा समान चुक्केआ ते शैहर दे खी'र इच ओह असेंगी लेई आया। उत्थें किश तम्बू लगे दे हे। इक संत होर एह समिति चला करदे हे। असें नांऽ लिखवाया ते इक तम्बू दे अन्दर दड़ी गे।

30 जुलाई गी अस पैहलगाम गै फिरे-टुरे।

पैहलगाम :- एह कस्बा असें सारें गी मता पसंद आया। इत्थें केई होटल हे। इक खालसा होटल बी हा। मते जातरी होटलें इच गै ठैहरे दे हे। मते घट्ट लोक साढ़े आह्ला लेखा खुल्ले इच जां तम्बू इच हे। अस फिरदे-टुरदे थल्ले थमां लेइयै लिदर दरिया तोड़ी जन्दे हे। इ'यां बजार बड्डा नेई हा। मसां इक किलोमीटर हा। दरिया कन्ने इक फ़ाड़ी ही। फ़ाड़ी मती रौसली ही। देयारै दे बूहटें कन्ने पूरी फ़ाड़ी भरोची दी ही। उत्थें किश कोठियां बी हियां। असें उत्थें किश डोगरे बी दिक्खे। पता चलेआ जे देवराज डोगरा होर' बी उत्थें रौहन्दे न।

उन्नें दिनें पैहलगाम इच मती रौनक ही। केई जादूगिर तमाशा दस्सन उत्थें पुज्जे दे हे। किश होर लोकें बी उत्थें मज़मे लाए दे हे। अस 31 जुलाई गी बी पैहलगाम रेह।

इक अगस्त गी लोक जातरा उप्पर रवाना होए। सभनें थमां अगें-अगें छड़ी ही ते उसदे पिच्छे जातरु हे। असें इक घोड़ा भेआलिया कराये पर लैते दा हा। उसनै इक निक्का तम्बू ते साढ़ा ते साढ़े साथियें दा समान लद्दे दा

हा। असें पुल पार कीता। सड़क पद्धरी ही। अस 2 बजे चन्दनबाड़ी पुज्जी गे।

चन्दनबाड़ी :-एह मता गै सुन्हाकड़ा थाहर हा। इत्थें जातरियें लेई अस्थायी बजार सज्जे दा हा। लोकें नाले दे कंढै तम्बू लाई लेदे हे। साढ़ा तम्बू भोजपत्र दे बूहटे थल्लै हा। भोज पत्र दा बूहटा में पैहली बारी दिक्खेआ। अगले ध्याड़ें अस सत्तें-सवेले उट्टे। थैल्ले चुक्के ते पिस्सुघाटी दी चढ़ाई शुरु कीती। अगें बी अस चढ़ाईयां चढ़े दे हे, इस लेई मता दुक्ख नेई होआ। छांलां मारियां ते उप्पर पुज्जी गे। इ'यां मेरी मां किश बल्लें-बल्लें चली। चढ़ाई चढ़ी तां अगें त्रेढा रस्ता आया। उसदे थल्लै नाला हा। इ'यां बझोंदा हा जे तलैटे तां जिंद नेई। पर फही बी उस पगडंडी उप्पर आदमी चला दे हे ते घोड़े बी चला दे हे। अस इक बजे दे करीब शेशनाग झील दे कंढै पुज्जे। असें तम्बू गड्डेआ ते अंदर चली गे।

शेशनाग :-स्टोव असें कन्ने रक्खेदा हा। राशन बी कन्ने हा। मेरी मां ते लाड़ी रुट्टी बनान लगियां ते आऊं झील दिक्खन चली गेआ। झील दा परिदृश्य मिगी मता गै अलोकिक बझोआ। दक्खन बक्खी फ़ाड़ हा। फ़ाड़ै थमां ढलदियां सत्त जलधारां हियां। उ'यै लोक मानस इच बने सत नाग। उत्थें मिगी किश बकरवाल बी लब्धे जेहड़ें स्यालै पेंथल डेरा लांदे हे। इत्थें बी इक निक्का बजार सज्जे दा हा। अस रातीं शेशनाग रेह।

अगलै दिन उट्टे, स्नान कीता, न्हारी खादी ते चढ़ाई चढ़न लगगे। में कुड़ी मुंढै चुक्की दी ही इस लेई चढ़ाई चढ़दे किश औख आई। खैर शिखर उप्पर पुज्जे तां इक बोर्ड दिक्खेआ लिखेदा हा - समुन्दर तट थमां ऊंचाई 13000 फुट। किश रूहानगी बी होई जे अस इन्ने उप्पर आई गे आं। उत्थें आक्सीजन गैस दे सलैंडर बी हे। किश लोक आक्सीजन चढ़ा करदे हे। असें नज़र फेरी ते ढलाई ढलन लगी पे।

पंचतरणी :-अस 12 बजे पंच तरणी पुज्जे। उत्थें टेंट लाया। मां नै रुट्टी बनाई। में रुट्टी खादी ते दरियां बक्खी फिरने-टुरने गी चली गेआ। उत्थें मते लोक नदी पार करा करदे हे। पानी मता नेई हा पर ठंडा जरूर हा। पंचतरणी मिम्मी पार कीती। लोक-विश्वास हा जे इत्थें पार करो तां परलोक

इच पार करनी औखी नेई हुन्दी।

पंचतरणी खुल्ला मदान हा। उत्थें घोड़े बी चरा करदे हे। इक कालोनी टैंटें दी बी ही। किश टैंट अमीरें दे बी हे। उन्दे इच सोफे लगे दे हे। किश जनानियां उन्दे उप्पर लेट्टियै हुट्टन तुआरै दियां हियां।

अमरनाथ गुफा :-अगलै दिन फही जातरा शुरु होई। थोड़ी चढ़ाई चढ़ी थोड़ी ढलाई ढली ते पुज्जे इक नदी दे कढै। पूरी नदी जम्मी दी ही। उसदे थल्लै बिच-बिच पानी छलकदा बझोंदा हा। इक दऊं थाहरें पानी बी हा। असें उत्थें स्नान कीता ते गुफा दे प्रवेश द्वार दे अगें लाइन इच खड़ोई गे। लाइन मती लम्मी नेई ही तौले अन्दर बढ़ी गे। गुफा दे अन्दर उत्तर बक्खी में बर्फ दे शिवलिंग दिक्खे। उस साल शिवलिंग 2.5 मीटर दे करीब उच्चां हा। शिवलिंग गुफा दे अगें जंगला हा। इस लेई लोक जंगले कोल खड़ोइयै लिंग दे दर्शन करा दे हे। मेरी मां ते लाड़ी नै बी दर्शन कीते, मत्था टेकेआ ते खुल्ले थाहर आई गे। उत्थें बी बर्फ दियां ढेरियां हियां। पंडा होर गलान लगे एह माता पार्वती ऐ.....एह गणेश जी न। अस मत्था टेकदे गे ते अगें निकलदे गे। इक थाहर पंडा होर लोकें गी कथा सुना करदे हे..... इक दिन शिव जी नै पार्वती गी रातीं अमरकथा सनाना शुरु कीती। पार्वती सेई गोई। कबूतरें कथा सुनी ते ओह अमर होई गे। बोलो बावा भोले नाथ की जय। बावा भोलानाथ दा जैकारा असें बी लाया ते गुफा दे बाहर आई गे।

दर्शन करने दे बाद असें अपना रस्ता मल्लेआ ते त्रै बजे दे करीब पंचतरणी आई गे। साढ़े कन्ने मते लोक वापस होन लगे। पर असें रात उत्थें गै कट्टी। दूएँ दिन सवैरै थैल्ले चुक्के ते चली पे। पूरा दिन चलने दे बाद संजा चन्दन बाड़ी पुज्जे। असें ओह रात फारेस्ट मैहकमें दे इक कमरे इच गुजारी ते फही सवैरे-सवैरे गै खिट्टें पेई गे। उस दिन अस 11 बजे पैहलगाम पुज्जे। इत्थें असें परतियै सेवा-समिति दे शिविर इच गै डेरा जमाया। शिविर परिसर इच गै कुसै लंगर लाए दा हा। असें दपैहरी लंगर गै रुट्टी खादी। उस दिन अस पैहलगाम गै रेह।

असेंगी रुक्को दा साथ मिली गेदा हा। ओह ते उसदी कुड़ी साढ़े कन्ने-कन्ने गै रेहियां। अगलै दिन अस बस अड्डै गे। मट्टन दी गड्डी पकड़ी ते

दस बजे मट्टन पुज्जे। सभनें थमां पैहलें असें उत्थें जलकुंड दे दर्शन कीते। मंदर गे ते फही पंडा होरें गी मिले। ओह असेंगी अपने घर लेई गे। दपैहरी दी रुट्टी असें पंडे हुन्दे घर खादी।

मट्टन थमां मते लोक मार्तण्ड मंदर दिक्खन जा करदे हे। अस बी उन्दे पिच्छें-पिच्छें चले। मसां दऊं किलोमीटर चले तां मंदर दे दर्शन होई गे।

मार्तण्ड मंदर :- एह इक सौर मंदर ऐ। भारत इच सूर्य मंदरें दी सँख्या मती घट्ट ऐ। कश्मीर इच स्थित एह मंदर इक अजूबा मित्थेआ जंदा ऐ। इस भव्य ते विशाल मंदर दा निर्माण कश्मीर दे महान सम्राट ललिता दित्य मुक्ता पीड़ नै अठमीं सदी इच करोआया हा।

कश्मीर दा एह मंदर इक विशाल प्रांगण दे मझाटै निर्मित ऐ। एह मंदर परकोटे कन्ने घिरे दा ऐ। परकोटे दे चौनें बक्खी खम्बे न। एह परकोटा अन्दर दा 220 फुट लम्मा ते 142 फुट चौड़ा ऐ। इस इच चुरासी खम्बे न। परकोटे इच दाखल होने लेई इक प्रवेशद्वार ऐ।

इस मंदर दी योजना इच दऊं कक्ष-मुख कक्ष ते गर्भगृह न। मुख भवन चौरस ऐ। जिसदी लम्बाई 62 फुट चौड़ाई 35 फुट ते ऊंचाई 70 फुट ऐ। इसदे सामने 56 फुट चौड़ी इक बरसाती ऐ। मंदर दा गर्भगृह 18.5 फुट लम्मा ते 14 फुट चौड़ा ऐ। बरसाती दे दोनें बक्खी दऊं खास कक्ष न।

मंदर दा प्रवेश द्वार विशाल ऐ। गर्भगृह दी छत गुंबजदार ऐ।

एह सूर्य मंदर दिक्खने इच विशाल ऐ पर सामान्य आकार दा ऐ। इस मंदर गी दिक्खियै बझोंदा ऐ जे इसगी बनाने आहले शिल्पी मते गै निपुण हे।

मार्तण्ड मंदर दे प्रांगण इच असें मिट्टी दे बड्डे-बड्डे घड़े ते होर केई पुरावशेश दिक्खे।

अस एह मंदर दिक्खियै परतियै मट्टन आए। बस उप्पर बैठे ते अनन्त नाग पुज्जे। उत्थें बजार दा इक चक्कर लाया ते बस अड्डे आए। इक घंटे बाद असेंगी श्रीनगर लेई बस लब्धी। अस श्रीनगर रातीं दे अट्ठ बजे पुज्जे। बाहर मती बरखा ही। कमरा तुप्पन नेई जाई सक्के। बस अड्डै सवारियें लेई

जेहड़ा कमरा हा, उत्थें गै सुत्ते।

सवरे कमरा तुप्पेआ। श्री प्रताप-भवन इच इक कमरा मिली गेआ। रुक्को बुआ बी साढ़े कन्ने गै ठैहरी। उस दिन अस पूरे श्रीनगर फिरे। लाल चौक बी गे। असेंगी उत्थें जम्मू दे मते लोक फिरदे टुरदे लब्भे। असें इक दूए दा हाल चाल बी पुच्छेआ। मते लोक मंदरें इच गै ठैहरे दे हे। मिगी रियासी दे धनीराम होर बी मिली पे। गलान लगे जे असें रियासी दा चेची बस आंदी दी ऐ। असें कल पूरा दिन श्रीनगर दा चक्कर लाना ऐ। तुस बी साढ़े कन्ने जुड़ी जाओ। में हामी भरी। ओह दूए दिन बस लेइयै प्रताप-भवन आई गे। अस बी उन्दे कन्ने बैठे।

शंकराचार्य दे दर्शन :-अस सारें थमां पैहले शंकराचार्य दे दर्शन करन गे। मंदर इक फ़ाड़ी उप्पर हा इस लेई उप्पर चढ़ने इच किश लोकें गी दिक्कत आई। फ़ही बी अस इक घंटे इच उत्थें पुज्जी गे।

मंदर दा स्थापत्य दिक्खियै आऊं मता प्रभावत होआ। एह कश्मीर दे मंदरें थमां अलग हा। फ़ाड़ी शिखर उप्पर शिलाखंडें कन्ने निर्मित एह मंदर शिखर थमां लम्बवत बझोआ। इसदे अन्दर शिवलिंग हा। मंदर कछ गै किश निर्मितियां होर बी हियां। असें मत्था टेकेआ ते थल्लै आई गे। इ'यां गलांदे न जे शंकराचार्य जदू कश्मीर आए उन्दे चेत्ते इच एह मंदर बनेआ।

खीर भुवानी :-शंकराचार्य मंदर दिक्खियै अस खीर भवानी दा मंदर दिक्खन गे। एह मंदर श्रीनगर थमां शैद 15 कि.मी. दूर हा। मंदर परिसर इच असें प्रवेश कीता तां असेंगी अजीब जेहा सकून मसूस होआ। उत्थवां दा वातावरण अध्यात्मक हा। कश्मीरी पंत पूजा-पाठ ते हवन इच व्यस्त हे।

अस मंदर गे। मंदर इक जलकुंड इच हा। गलांदे न जे जलकुंड दा रंग बदलदा रौहन्दा ऐ। मंदर दे गर्भगृह इच देवी दी मूर्ति असेंगी मती दिव्य बझोई।

मंदर परिसर इच जातरियें दे ठैहरने लेई शैल व्यवस्था ही। असें मंदर मत्था टेकेआ ते बाहर आई गे।

झील डल्ले ते बागें दी सैर :-असें इ'यां आँदे जन्दे झील डल दे केई बारी दर्शन कीते हे पर इत्थें रुके नेई हे। अज्जं साढ़ी गड्डी इत्थें रुकी तां

अस किशती उप्पर बेहियै नेहरु पार्क दिक्खन गे। एह पार्क निक्का गै हा पर आकर्शक मता हा। अस इत्थें किश चिर बैठे ते फही परतोई आए।

इसदे बाद अस शालामार, निशात बाग ते चश्मा शाही बाग दिक्खन गे। एह बाग मुगल बादशाहें बिकसत कीते हे।

हरवान :- साढ़े कन्ने धनीराम हुन्दे इक कश्मीरी मित्तर टिक्कू होर बी हे। ओह् असेंगी हरवान लेई आए। हरवान पुरातत्व सरबन्धी थाहर हा। पुरातत्व दा मिगी तदूं ज्ञान नेई हा। पर टिक्कू होरें गी हा। ओह् गलान लगे-इत्थें खुदाई कीती तां इत्थवां दा जेहड़े अवशेश लब्धे उन्दे थमां साबत होई गेआ जे इत्थें कोई बौद्ध बिहार, चैत्य ते स्पूत हा। इत्थवां दे स्तूप दी योजना वर्गाकार ही। एह त्रैमंजिला हा। उप्पर चढ़ने लेई सीढ़ियां हियां। इसगी बनाने लेई लकड़ी, पत्थर दा प्रजोग कीता गेदा हा। इत्थें जेहड़े खम्भें मिले ओह् मौर्य कालीन खम्भें दी परम्परा दे हे। फही टिक्कू साहब नै असेंगी दस्सेआ जे इत्थें इक चैत्य दे नशान बी मिले। एह बौद्ध निर्मितियां ईसा थमां पैहली सदी दियां न। इत्थें जेहड़ियां इट्टां लब्धियां उन्दी लम्बाई 18 इंच ते चुड़ाई 12 इंच ऐ। टिक्कू होरें असेंगी आक्खेआ जे अस बारामुला कच्छ उप्कर थाहर बी जाचै। उत्थें बी बौद्ध-विहार दे नशान न।

परिहास पुर :-अस हरवान थमां परिहास पुर लेई रवाना होए। एह थाहर श्रीनगर थमां 22 कि.मी. उत्तर-पच्छिम इच हा। इत्थें असेंगी दिक्खने लेई मता किश लब्धा। इत्थें असें इक प्रस्तर खंडं दिक्खेआ जेहड़ा 16 फुट्ट लम्मा, 14 फुट्ट चौड़ा ते 5.5 फुट उच्चा हा। इसदा भाग शैद 70 टन हा। इसदे अलावा इत्थें दिक्खने गी पत्थरें दे खम्भें हे। एह् खम्भे 4.5 फुट व्यास दे हे इन्दे इच सोलां धारियां हियां। पुरावेता मनदे न जे इत्थें कोई स्तूप हा जेहड़ा 128 फुट वर्गाकार खेत्तर इच फैल्ले दा हा। इ'न्नां सुनाईयै टिक्कू होर किश चिर चुप रेह ते फही गलान लगे जे इत्थें भिक्षुएं दे रौहने लेई कक्ष हे। इक कक्ष दा बेहड़ा 235 फुट लम्मा हा। एह परकोटे कन्ने घिरे दा हा। इसदे अन्दर 26 कोष्ठ हे ते इन्दे केन्दर इच इक चैत्य हा।

परिहास पुर दी जातरा करियै अस पंडरेत्थान आए।

पंडरेत्थान दे मंदर :-टिक्कू होरें बापसी इच असेंगी पंडरेत्थान दा मंदर

बी दस्सेआ। एह ब्राह्मण शैली दा मंदर हा। एह बी इक भव्य मंदर हा। इस दी योजना वर्गाकार ही। एह मंदर 28 फुट्ट उच्चा हा। इस दी छतें इच ढलाइयां हियां। गलांदे न जे एह मंदर 12वीं सदी दा हा।

वापसी :- ठाकुरें दा वर्त कौल हा। इस लेई अस इस सुर्गभूमि गी अलवदा आकिखयै वापस होन लगे। रस्ते इच अवन्तीपुर असें सड़क दे कंढे किश मंदर दिक्खे। जातरियें ड्राइवर गी किश चिर रुकने लेई गलाया। ड्राइवर मन्नी गोआ। अस मंदर दिक्खने गी द्रौड़े।

अवंतीश्वर मंदर :- असें सारे थमां पैहले अवंतीश्वर दा मंदर दिक्खेआ। एह शिव जी गी समर्पत ऐ। इत्थें मंदर दी नीआं गै न। इआं मंदर दा प्रांगण 228 फुट लम्मा ते 200 फुट चौड़ा ऐ। पुजारी नैं दस्सेआ जे मंदर दी योजना वर्गाकार ऐ। इस दी हर भुजा 53 फुट ऐ। इसदे चौनें चूक्के इच चार कक्ष न इस लेई एह पंचायतन मंदर ऐ।

अवन्ती स्वामी दा मंदर :- एह मंदर भगवान विष्णु गी समर्पित ऐ। इस दा प्रांगण 174 फुट लम्मा ते 148 फुट चौड़ा ऐ। मुख मंदर 33 फुट वर्गाकार ऐ। एह बी इक पंचायतन मंदर ऐ। इस दी पौड़ियें दे सामनैं इक पुष्करिणी ऐ। इस दे सामनैं कीर्ति स्तम्भ ऐ। एह मंदर बी परकोटे कन्ने घिरे दा ऐ। गलांदे न जे अवन्तीवर्मन नैं इत्थें अपनी राजधानी बसाई ही। एह मंदर उस दी गै नशानी ऐ।

शंकर वर्मन दे मंदर :- खीर इच अस शंकरवर्मन दे मंदर दिक्खन गे। शंकर वर्मन नै 883 थमां 902 ई० तोड़ी कश्मीर इच राज कीता। उसनैं बी इत्थें दऊं मंदर बनवाए। इक गौरीशंकर ते दुआ सुंग घेश दा मंदर ऐ। एह बी पत्थर दे मंदर न।

अस एह मंदर दिक्खा गै करदे हे जे कंडक्टर नैं सीटी बजाई। प्ही ड्राइवर नैं बी दऊं बारी भोंपू बजाया तां अस द्रौड़े ते बस उप्पर बेही गे।

साढ़ी बस जियां-जियां अगें बद्धी गेई मेरा मन इआं गै पिच्छें गी खचोंदा गोआ। मिगी बझोआ जे कल्हण दी राजतरंगिणी दे में इस जातरा इच केई अध्याय पढ़ी लैते न।

30. मेरी लड़ाख (पैगांग) जात्तरा

जून 2006 इच में अपनी नमीं पोथी लेई इक नमां विशे चुनेआ, जिस दा सिरलेख हा-‘डुंगर इच शहीदें दे स्मारक।’ इस विशे उप्पर में शोध कम्म शुरू करी दिता। जुलाई म्हीनै में अखबारें इच पढ़ेआ जे कारगिल दे शहीदें दे चेतें इच द्रास इक सर्वधर्म यज्ञ दा आयोजन कीता जा करदा ऐ, तां मिगी अपने अन्दर थमां एह प्रेरणा मिली जे इस यज्ञ इच शामिल होइयै देश दे इ नें बलिदानी सैनिकें गी श्रद्धांजली भेंट करने लेई मिगी बी उत्थें जाना लोड़चदा ऐ। द्रास जाने दा मन ते में बनाई गै लेआ ते फ्ही अ ‘ऊं’ साथ दी तपाश करन लगा।

मिगी तौले गै सूचना मिली जे उधमपुर थमां प्रभाकर होर ते मेरा भनेआ बिधु मंगोत्रा द्रास जा करदे न तां में उन्दै कनै सम्पर्क कीता ते अपने लेई जगह रखाई लैत्ती। साढ़ा कार्यक्रम एह निर्धारित होआ जे ऐतवार 23 जुलाई गी अस उधमपुर थमां प्रस्थान करगे।

23 जुलाई गी पैंथल मती जोरदार बरखा ब’रा ‘रदी ही। में बरखै दी परवाह नेई कीती ते अपना थैला चुक्केआ ते सिज्जदा-सजांदा पैंथल दे बस अड्डे पर पुज्जी गेआ। मिगी तौले गै बस मिली गई ते अ ‘ऊं’ दस बजे अपनी भैनू दे घर पुज्जी गेआ। उत्थें मिगी सूचना मिली जे यज्ञ इच शामिलयत लेई प्रभाकर जी ते उन्दी पत्नी दे इलावा प्रभाकर हुंदा साथी पुरुषोत्तम, मेरियां दऊं भैनां पुष्पा ते शांति बी जा करदियां न। मेरा भनेआ बिधु मंगोत्रा ते ड्राइवर केवल कुमार बी साढ़े कनै न।

बिधु ने जून म्हीनै इक होर नमीं कार खरीदी ही-महेन्द्रा स्कारपियो। उस इच अट्ठें सुआरियें दे बौहने दी व्यवस्था ही। इस लेई अस सारे उससै कारै च बेही गे। कार दे छतै उप्पर समान रक्खने दी व्यवस्था नेई ही, इस लेई असें सारें अपना-अपना सामान सीटें दे उप्पर-थल्लै रक्खेआ ते बड़ी

मुश्कल कन्नै तनोई-तनाइयै बेही गे। साढ़े कन्नै प्रभाकर होर पूरे वैष्णवी हे। ओह होटलै च बनी दी रुट्टी नेई हे खंदे। इस लेई डिक्की इच गैसी स्टोव ते कुक्कर बगैरा रक्खी लैत्ते। ओह खाने-पीने दे भांडे बी कन्नै लेई गे। सौने-बौहने लेई जेहड़ी पट्टुऐ दी गंठ ही उसगी खोहलियै सीटें उप्पर बछाना गै उचित बझोआ। इस कन्नै सीटां उच्चियां होई गेइयां ते साढ़े सिर छतै कन्नै छहोन लगे।

ठीक डेढ बजे अस उधमपुर थमां निकले। घर दी महिलाएं ते बच्चें असें गी बिदाई दिती। अस हाऊसिंग कालोनी थमां निकले ते राश्ट्री मार्ग उप्पर आई गे। रस्ते इच बरखा दी फंड पौंदी रेही, इस कन्नै कार दी गति किश मद्धम गै रेही। पर जि'यां गै असें पत्नीटॉप टप्पेआ बरखा किश थम्होई गेई। बटोत पुज्जे तां मोसम साफ हा। त्रै बजे दे करीब असें होटल रुट्टी खाद्दी पर प्रभाकर होर फाकै गै रेह। उ'नें किश नेई खाद्दा। रुट्टी खाइयै अस फही कार पर बेही गे। मोसम साफ हा ते सड़क बी साफ ही, इस लेई अस पंज बजे मगरकोट पुज्जे।

मगरकोट प्रभाकर हुंदा दोस्त मूलरतन रौहदा हा। उ'नें उस लेई अबें दी पेटी आंहदी दी ही। इस लेई अस किश चिर लेई मगरकोट रुके। में उप्पर चढ़ियै बजार दा चक्कर बी लाया। सीढ़ी नुमांS इस ग्रां दा बजार बी मिगी मता नोखा बझोआ। उत्थें मिगी केई परिचित बी मिले। में उंदे थमां पोगल-परिस्तान दी संस्कृति दी जानकारी लेई। उत्थें अद्धा घैंटा रुकने दे बाद अस फही कार पर बैठे। साढ़ी कार रामसू, बनिहाल, जवाहर टनल, काजी कुंड, खन्ना बल, अवन्तीपुर ते पाम्पुर बिचा दौड़दी रातीं साढ़े अट्ठ बजे सिरीनगर पुज्जी गेई। सिरीनगर लाल मंडी थमां किश अगें इक कोठी मेरे भनेS ने अपने दफ्तर लेई कराए पर लैत्ती दी ऐ। अस उससै कोठी इच रेह। उत्थें सौने ते रौहने दी व्यवस्था मती गै शैल ही। रातीं दी रुट्टी जनानियें उत्थें गै बनाई। रुट्टी खाइयै अस सेई गे।

सवरे सैर करने गी उट्ठे तां चलदे-चलदे फ्हाड़ी चढ़ियै शंकराचार्य जाई पुज्जे। उत्थें मत्था टेकेआ ते डेरै परतोई आए।

सिरीनगर गै सूचना मिली जे कटड़ा वैष्णो देवी थमां बी केवल पाधा

हुंदी अगुवाई इच सर्व-धर्म यज्ञ इच शमूलियत लेई इक दल आवा करदा ऐ। अस उ'नेंगी बलगन लगे। ओह् दपैहरी दे दो बजे पुज्जे। अस पैहलें गै त्यार बैठे दे हे। ठीक त्रै बजे अस सिरीनगर थमां द्रास लेई खाना होए। सिरीनगर अस 19 कि.मी. दा सफर तैऽ करियै गांदरबल पुज्जे तां बरखा दा इक तफान आया ते न्हेरा-जन पेई गेआ। कार दा ड्राइवर मता हुशयार हा। ओह् न्हेरी सड़क पर बी कार दड़ांदा रेहा। उत्थुआं दा 19 कि.मी. दा सफर तैऽ करियै अस कंगन ते कंगन थमां 16 कि.मी. दी जातरा तैऽ करियै गण्ड पुज्जे। गण्ड थमां अगें सड़क मती खराब ही। रस्ते इच केई निक्कियां-निक्कियां पस्सियां आई गेदियां हियां। साढ़ी कार नमीं ही, इस लेई अस अगें गै अगें बधदे गे। कंगन थमां गण्ड दा सफर 25 किलोमीटर दा हा। इस थमां अगें गे तां मोसम साफ हा। अस सोनामर्ग पुज्जे तां बदल छंटोई गेदे हे। सोनामर्ग मिगी मता गै सन्हाकड़ा थाहर बझोआ। इत्थें इक खु'ल्ला मदान हा, जिस इच पर्यटकें लेई केई होटल ते रेस्टोरेंट हे। सोनामर्ग थमां किश अगें गे तां असें गी बलटक दे तम्बू लब्भे। बलटक दा गै इक रस्ता अमरनाथ गी जंदा ऐ। बलटक थमां बी इक सूमो साढ़े काफले इच शामिल होई गई। इ'यां त्र'ऊं कारें दा एह काफला जोजीला फ़ाड़ दी चढ़ाई चढ़न लगा।

जोजीला फ़ाड़ दे लेई में सुने दा हा जे इत्थें आक्सीजन दी मती कमी ऐ ते फ़ाड़ दी चढ़ाई बी मती औखी ऐ, पर मिगी सब किश सामान्य बझोआ। एह गल्ल बक्खरी ही जे मती बरखा दे कारण सड़क किश खराब ही, पर फ़ाड़ दे दक्खें इच अस इन्ने बज्जे दे रेह ते असें गी मोसम दी खराबी दा कोई एहसास गै नेई होआ। अस कैप्टन मोड़ कश थोड़ा चिर रुके ते फ़ही उंदे बुत गी सलूट मारियै अगें बधे। इस थाहर सड़क दे कन्नै खड़ोती दी फ़ाड़ियें दा दक्ख मता डरौना हा। इ'यां बझोआ हा जे फ़ाड़ी थमां इक पत्थर बी रलकै तां ओह् केइयें दी जान लेई सकदा हा।

कैप्टन मोड़ चढ़ेआ तां फ़ही ढलाई-जन शुरू होई। सड़क ने बी अपना रुख बदलेआ। साढ़ी कार फ़ाड़ें दे थल्लै-थल्लै कच्ची-पक्की सड़क पर दौड़न लगी। साढ़ी सड़क दे थल्लै निक्के बड़डे केई नाले असें गी प्रवाहमान लागे। केई नाले उल्टे यनि उतरोन्मुखी होइयै बगा करदे हे। केई निक्कियां-निक्कियां जल-धारां फ़ाड़ें थमां ढलकदियां बी बझोआ दियां हियां। जि'यां-

जि'यां अस अगें बधदे गे, दक्ख बी बदलोंदे गे। पैहलें असें गी किश चिर नंग-मंनूगे फ्हाड़ें दे केई सिलसिले दृष्टिगत होए, जिस थाहर पानी हा, उसदी जमीन सर-सब्ज बी बझोई ते असें गी बझोन लगा जे जिस जमीन उप्पर साढ़ी गड्डी दौड़ा करदी ऐ, ओह जमीन रंग, शक्ल ते आकार इच साढ़ी जमीन थमां केइयें गल्लें मती बक्खरी ऐ।

जोजीला थमां अस गुमरी बक्खी बधन लगे तां रस्ते इच असें केई निक्कियां-मुट्टियां हिमानियां, नंगे ते नीरस फ्हाड़ बी दिक्खे/हिमानियें ते नदियें दे अगें-पिच्छें हरे-भरे केई लम्मे-चौड़े मदान बी असें दिक्खे, जित्थें गुज्जर ते बक्करवाले दे डेरे तम्बुएं इच लगे दे हे। उंदे निक्के ते ज्याने जागत भिड्डें-बक्करियें दे बश्क नच्चा-कुद्दा दे हे ते उंदियां मौरियां सिल्वर दे मटके चुक्कियें हिमानियें थमां पानी लैन जा करदियां हियां। अस करीब छे बजे गुमरी पुज्जे। में गुमरी दा नांऽ ते बड़ा सुने दा हा, पर इत्थें मिगी गड्डियें दे खड़ोने लेई इक बड़डा ते खु'ल्ला पक्का अड्डा गै लब्भा। इत्थें साढ़ी कार गी किश चिर रोकेआ गेआ। इक सैनिक दल ने साढ़े ड्राइवर थमां किश पुच्छ-गिच्छ कीती ते फही असें गी अगें टुरने लेई गलाया। गुमरी इच सड़क दे कंढे असें चार-पंज स्मारक बी दिक्खे, जेह्दे शैद साढ़े सैनिक शहीदें दे हे। गुमरी सिरीनगर थमां 125 कि.मी. दूर हा। गुमरी थमां अस चले तां साढ़ी कार इक हिमानी दे कंढे-कंढे बनी दी सड़क पर दौड़न लगी। इत्थें सड़क किश ठीक गै ही। दऊं गड्डियां लंघी सकदियां हियां। असें गी लेह् थमां आवा'रदे केई बाहन बी लब्भे। अस गुमरी थमां कोई इक घेंटा चले हे तां रस्ते इच द्रोपदी-कुंड दिक्खने गी खड़ोई गे। कुंड सड़क थमां त्रीह मीटर दूर हा। मिगी ते एह कुंड इक डवर-जन गै बझोआ। असें सारें इस कुंड दे पानी गी हत्थें कनै स्पर्श कीता। किश साथियें इसी पवित्तर मिथियें अपने शरीर उप्पर बी त्रोंकेआ। खैर एह कोई बड़डा कुंड बी नेई हा। इक फ्हाड़ी दे थल्लै हा। फ्हाड़ी दा शिखर रुंड-मरुंडा हा। कुंड दे कश गै इक हिमानी प्रवाहत ही। कुंड दा पानी किश गर्म हा पर हिमानी दा पानी बर्फ-ठंडा हा। असें गी इस जगह दा प्राकृतिक परिदृश्य बी अति मोहक ते आकर्शक बझोआ। किश चिर विश्राम करियें अस इत्थुआं दा अगें बधे।

द्रास घाटी इच अस पुज्जे तां ठंड दे फंडुके असें गी किश मते गै तेज

बझोन लगे। इ 'यां बी द्रास दी घाटी दुनिया इच सारें थमां मती ठंडी घाटी मिथी जंदी ऐ। त्रकालें साढे अट्ठ बजे अस द्रास कसबे इच पुज्जे। गलांदे न जे पैहलें द्रास इक निक्का जेहा गै ग्रां हा, पर कब्रगिल दी लड़ाई इच एह मता गै चर्चा इच आया तां इसदी एहमियत बी बधी गई। हुन ते इत्थें सौ दे करीब दुकानां न ते केई सरकारी दफ्तर बी न। इत्थें तसील कार्यालय, खंड-विकास अधिकारी दा दफ्तर ते हायर सक्केंडरी स्कूल बी ऐ। एह कस्बा मती तेजी कन्नै विकसित होआ करदा ऐ। इत्थें हुन केई नमें होटल बी बने न, जिस कारण जातरियें दे रौहने दी इत्थें मती सुविधा ऐ। पैहलें इत्थें इक पुराना डाक बंगला गै हा। एह कस्बा सतह समुन्दर थमां 10660 फुट्ट उच्चा ऐ ते स्याले इच इसदा तापमान 40° सी थमां 50° सी तगर थल्लै आई जंदा ऐ।

द्रास गी इक सांस्कृतिक केन्द्र बी मिथेआ जंदा ऐ। इत्थुआं दी आवो-हवा ते जमीन बी नौखी ऐ। आबादी दी द्रिष्टी कन्नै इत्थें मते घर शिया मुसलमानें दे न, पर इत्थुआं दी मिली-जुली संस्कृति शोध-कर्ताएं लेई इक आकर्शन ऐ।

द्रास दा नीला मुर्ग, केई किसम दे हिरण, कठ कोला, बन-केंकड़ा, बर्फानी लोमड़ी, कस्तूरी मृग, फ्हाड़ी बक्करी, फ्हाड़ी चूहे, फ्हाड़ी खरगोश, कबूतर ते केई किसमें दियां चिड़ियां आकर्शन दा मुख केन्द्र न।

अस द्रास थोड़ा चिर गै रुके। असें गी दस्सेआ गेआ जे यज्ञशाला द्रास थमां दस किलोमीटर दूर ऐ, इस लेई अस अपने लक्ष्य बक्खी तौले गै टुरी पे। दसमें किलोमीटर उप्पर पुज्जे तां असें गी लाटुएं दी जयमाला दूर थमां गै लब्धन लगी पेई। अस समझी गे जे अस हुन अपने लक्ष्य दे कोल-कोल पुज्जी गे आं। ठीक नौ बजे साढ़ी कार यज्ञशाला कश रुकी ते अस थल्लै उतरे ते यज्ञशाला परिसर दे अन्दर गे। उत्थें असें गी केई परिचित लोक लब्धे, जिं 'दे इच मते लोक कटड़ा, उधमपुर ते जम्मू दे हे।

जम्मू थमां केई विद्वान ते शोध-कर्ता बी गेदे हे। मेरी सारें थमां पैहली भेंट जम्मू विश्व विद्यालय दे इतिहास-विभाग दे प्रो० डॉ० निर्मल सिंह हुन्दे कन्नै होई। उ 'नें मिगी केई शोध दे विद्यार्थियें कन्नै मिलाया, जिं 'दे इच इक दऊं कुड़ियां बी हियां। में यज्ञशाला दा चक्कर लाया ते पही तौले गै परतोई आया।

साढ़े सौने दा प्रबन्ध उस ग्रां दे सरपंच हाज़ी मुहम्मद अली दे घर कीता गेदा हा। अस उत्थें सौने गी चली गे।

अस जिस ग्रां इच रुके हे उसदा नांऽ भीम-भट्ट हा। इत्थें कुल्ल 30 घर हे, जिं'दे इच 21 घरें इच शीना बोल्ली जंदी ही। बल्ली बोलने आहलें दी तदाद मती घट्ट ही। इत्थें मकान गी नंग गलांदे हे ते ग्रां दे करीब सारे नंग दऊं छते हे। लोकें दी वेश-भूशा उपपर बल्ली संस्कृति दा गैहरा असर हा। ग्रां इच इक इमामबाड़ा ते इक मस्जिद ही। इत्थुआं दा पंचायत-घर पक्का हा। इत्थें घर-घर तीर कमान टंगोए दे हे। तीर चलाना इत्थुआं दे लोकें दा मिगी मुख शौक बझोआ। इत्थें तीर दो-सौ मीटर तोड़ी मार करी सकदे न। किश स्थानी युवकें अपनी तीर-अंदाजी दे करतब बी दस्से, जेहड़े साढ़े लेई मते हैरान करने आहले हे।

जित्थें अस ठैहरे दे हे उत्थें पंज-सत्त घर कश-कश गै हे। साढ़े मकान इच पंजाब केसरी दा संवाददाता बी ठैहरे दा हा। किश गैर सरकारी चैनलें दे प्रतिनिधि बी उत्थें पुज्जी गेदे हे। स्थानीय लोक-जीवन ते संस्कृति कन्ने सरबन्धित अनेक पक्खें दी उ'नें वीडियोग्राफी कीती ते फोटो ले।

हाज़ी मुहम्मद अली ने असें गी सनाया जे द्रास खेत्तर इच चार बक्खरे-बक्खरे वर्ग बसदे न, जिं'दे नांऽ शिया, सुन्नी, सूफिया ते एहलेदीज़ न। एहलेदीजें दा मुख केन्द्र मुराद बाग ऐ ते सूफिया वर्ग दे लोक खरबू, समिशा, थसगम इच बसदे न। सुन्नी भीम वट इच न ते शिया भीमवड, गोशुन, श्रोगोश, थुकियाल, पाद रा, जउ-लवउ ते पटयेन इच बसदे न। वर्ग भामें बक्खरे-बक्खरे न पर मजहबी खवादारी सारें इच सांझी ऐ। कट्टरता जां फिरकापरस्ती दा इत्थें नांऽ नेई ऐ।

उस दिन 25 जुलाई ही। सेना ने 25 जुलाई गी द्रास दी फ्हाड़ियें थमां दुश्मन गी नसाइयै पूर्ण विजय हासल कीती ही। इस लेई 25 जुलाई गी सेना विजय-दिवस दे रूप इच मनांदी ऐ। जित्थें यज्ञशाला ही उसदे ठीक सामनै विजय-स्मारक हा। एह स्मारक सेना दे नियंत्रण इच हा। सेना ने सारे लोकें गी विजय-दिवस समारोह इच शामिल होने लेई साद्दा दित्ते दा हा। सेना दा बैंड बज्जा करदा हा। मते लोक समारोह स्थल पाससै जा करदे हे, इस लेई

अस बी 'विजय स्मारक' दिक्खन गे। उत्थें असें गी मते डोगरा फौजी ते उन्दे अधिकारी लब्धे। डोगरी जवान ने असें सारें गी इक-मिक करी दित्ता। अस तौलै गै इक-दूए कन्नै घुली-मिली गे। अधिकारियें असें गी मता मान-सम्मान दित्ता। उ'नें असें गी ओह तोपां बी दस्सियां, जिं'दा इस्तेमाल कारगिल जुद्ध इच कीता गेदा हा। मेरा भनेआ विधु तोपें उप्पर बी जाई चढ़ेआ। चर्चित बोफार्स तोपें दे उपयोग दी असें गी मती जानकारी मिली। फही अस सारे विजय-स्मारक दिक्खन गे, जेहड़ा कारगिल लड़ाई इच शहीद होए दे अमर सपूतें दे चेतें इच निर्मित ऐ। एह स्मारक मता गै भव्य, गौरवमय ते दर्शनीय ऐ। इसदे शिलापट्टें पर शहीदें दे नांऽ उत्कीर्ण न। विजय-स्तम्भ दिक्खियै अस सारे यज्ञशाला इच आई गे।

सर्वधर्म लेई समर्पित एह यज्ञशाला कोई दो सौ मीटर इच परिसीमत ही। इस इच इक बड़्डी यज्ञशाला ही। इसै यज्ञशाला इच कारगिल दे शहीदें दे चेतें इच बैदक रीति दे मताबक हवन-यज्ञ कीता जारदा हा। इस यज्ञशाला दी कुंडियें इच शहीदें दे मते परिजन आहुतियां देआ करदे हे। यज्ञशाला दी बाहरली कंधें उप्पर कोई त्रीहें शहीदें दे निक्के-बड़्डे फोटो टंगोए दे हे। अ'ऊं अपने साथियें कन्नै यज्ञशाला दी परिक्रमा लैन लगा तां शहीदें दे केई परिजन मिगी बी मिले। शहीद उदयभान सिंह दे चित्तर कश उसदी मां खड़ोती दी ही। उसनै अपने शहीद पुत्तर दा परिचे दित्ता तां उसदी अक्खियां छलछलाई गेइयां। उसनै अपने दुपट्टे कन्नै अपने अत्थरूं पूंझे ते गलान लगी जे मेरा पुत्तर त्र'ऊं भैंनें दा भ्राऽ हा। अस उसदी शहादत दे भामें किन्ने बी गुण गाचै पर उसदा चेता मन थमां नेई भुलदा। में उन्दी बक्खी दिक्खेआ तां उन्दी अक्खीं दे अत्थरूं उन्दियें ग'ल्लें उप्पर टपका करदे हे। फही मिगी इक-इक करियै शहीदें दे केई परिजन मिले। अ'ऊं रंगपुर तरेवा तसील बिश्नाह, कीर पिंड तसील रणवीर सिंह पुरा, ग्रां कोटली, शाह दुल्ला, डग्याना, ग्रां कारी तसील भद्रवाह दे उ'नें लोकें कन्नै बी मिलेआ जिं'दे परिवारें दे युवक कारगिल दी लड़ाई इच शहीद होए दे हे। अ'ऊं शहीद मेजर अजय सिंह जसरोटिया दे चित्तर थमां बी मता प्रभावत होआ। उन्दा व्यक्तित्व मिगी बड़ा गौरवमय ते उदात्त बझोआ।

में मसूस कीता जे शहीदें दे परिजनें दा संताप अजें ठंडा नेई पेआ ऐ ते उ'नेंगी होर सांत्वना दी लोड़ ऐ।

यज्ञशाला कश गै गुरु ग्रंथ साहब दा पाठ बी होआ करदा हा। उत्थें बी टैंट दा इक मंडप बने दा हा। ग्रंथी उच्चे मंच उप्पर बेहिये पाठ करा करदे हे ते केई परिजन उ'नेंगी सुना करदे हे। यज्ञशाला दे सामनै इक बड्डा मंडप बने दा हा। उत्थें बी इक उच्चा मंच हा। उस मंच पर वृन्दावन थमां आई दी कीर्तन-मंडली विराजमान ही। मंडप इच कोई सौ दे करीब पंत पाठ करने इच व्यस्त बझोए।

सर्वधर्म यज्ञशाला दे संयोजक श्री बालक योगेश्वर हुंदा बी इक बक्खरा कक्ष हा। उत्थें उंदे दर्शन करन मते लोक जा करदे हे। में यज्ञशाला परिसर दे केई चक्कर लाए। उत्थें मिगी मते लोक जम्मू खेत्तर दे गै लब्धे। इंदे इच किश ओह लोक बी हे, जेहड़े बाबा बालक योगेश्वर हुंदे परम-शिशु हे। ओह यज्ञ गी सफल बनाने दे उद्देश्य कनै आए दे हे। यज्ञ इच मते शहीदें दे परिजन हे। किश लोक जम्मू थमां बाहर दे बी हे। जम्मू दे मशहूर कृष्ण जोतपी दे दऊं पोत्तरे ते उंदी मां स्नेह बी इस यज्ञशाला इच शामिल ही।

कारगिल लड़ाई दा मता असर द्रास दे इस्सै खेत्तर उप्पर पेआ हा। द्रास दी मशहूर टाइगर हिल यज्ञशाला थमां मसां पंज किलोमीटर दूर ही। सेना ने इस फ़ाड़ी तोड़ी शहीदें दे परिजन गी पुजाने दा कम्म अपने जुम्मै लैते दा हा। टाइगर-हिल दे किंगरें उप्पर विजय-दिवस आहले दिन बी बर्फ जम्मी दी ही। इस फ़ाड़ी कनै लगदियां दूइयां फ़ाड़ियां बी कारगिल लड़ाई इच रणक्षेत्र बनियां हियां। स्थानी लोकें असेंगी उ'नें आफत भरे दिनें दी दास्तान सुनाई तां साढ़े बी रोंगटे खड़ोई गे।

द्रास खेत्तर दे लोकें इच वर्णन करने योग्य में त्रै गल्लां दिक्खियां-पैहली गल्ल एह ही जे ओह पक्के देश-भक्त न। ओह इन्ने गै सच्चे हिन्दोस्तानी न, जिनें अस-तुस आं। दूई गल्ल में उंदे इच एह दिक्खी जे पढ़े-लिखे दे युवक हिन्दी बी शैल चाली पढ़ी-लिखी लैदे हे। त्री गल्ल उंदे इच में एह दिक्खी जे ओह उदारवादी हे। फिरकापरस्ती दे अंश उंदे इच मिकी नेई लब्धे। इ'यां ओह आर्थक द्रिष्टी कनै मते पिच्छड़े दे न। ओह मेहनती ते बड़े न, पर उ'दें कोल पानी लगदे खेत्तर घट्ट न। 25 जुलाई गी सेना पास्सेआ आयोजत विजय-दिवस दे मौके पर द्रास दे लोक मती संख्या इच शामिल होए, पर यज्ञशाला इच उंदी गिनतरी में बड़ी बिरली दिक्खी।

25 जुलाई गी अस इक बजे तोड़ी द्रास गै रेह। उस रोज कटड़ा, उधमपुर ते जम्मू थमां बी केई शरधालु यज्ञशाला इच शामिल होने लेई द्रास पुज्जे।

साढ़ा अगला कार्यक्रम द्रास थमां उस्सै दिन लेह पुज्जने दा हा। इस लेई अस दपैहरी 1.30 बजे द्रास थमां रवाना होए। साढ़ी अगली पडांऽ खरबु ग्रां हा, जेहड़ा द्रास थमां कोई 35 किलोमीटर दूर हा। थोड़ी दूर जाने दे बाद चढ़ाई शुरू होई ते पही शुरू होआ नंगे ते रुक्खे फाड़ें दा अनसम्ब सिलसिला। जित बक्खी बी नजर जा, फाड़ गै फाड़, किश घट्ट डरौने किश मते डरौने। अस इ'नें फाड़ें दे द्रिश दिकखदे-दिकखदे इक घेंटे इच खरबु पुज्जी गे। खरबु भामें निक्का ग्रां हा, पर जीवन-उपयोगी इत्थें सारियां चीजां उपलब्ध हियां। असें ग्रां बक्खी नजर दड़ाई तां असें गी खुमानियं कन्नै भरोचे दे केई बूहटे लब्धे। ड्राइवर ने इत्थें किश चिर कार खडेरी तां जागतं दे झुंड निक्के-निक्के डब्बें च खुमानियां भरियै साढ़ी बक्खी हांबे। अगें चार-पंज डब्बे खुमानियां खरीदियां ते अगें गी बधे। मिगी द्रास थमां खरबु दे लोक मते तरक्की-पसंद बझोए। उंदी रेहत-बैहत दिकखयै बझोआ जे उंदे इच आधुनिकता दा रंग चढ़ा करदा ऐ। इ'यां बी असें गी इत्थें किश हरियाली ते रौसलापन बझोआ। खरबु थमां 26 कि.मी. दी दूरी तैऽ करियै अस स'जां 4.30 बजे कारगिल पुज्जे। कारगिल हुन इक विकसत नगर ऐ। इसदा बजार लगभग इक कि.मी. लम्मा ऐ। बजार वरौनक ऐ। नगर इच मती आबादी शिया मुसलमानें दी ऐ। मिगी लोकें दा लाबा ते रेहन-सैहन दिकखयै बझोआ जे इत्थुआं दी स्थानी संस्कृति उपर बलती संस्कृति दी रंगत किश मती जैदा ऐ। तीर कमानें दा प्रजोग अज्ज बी स्थानीय लोकें इच प्रचलत ऐ।

कारगिल अज्ज जम्मू-कश्मीर राज्य दा इक जि'ला मुख्यालय ऐ। इत्थें केई सरकारी दफ्तर न, जिस कारण इस स्थान दा महत्त्व पैहलें थमां मता बधी गेदा ऐ।

एह जि'ला कुल 14,036 वर्ग कि.मी. इच परिव्याप्त ऐ। इस दियां दऊं तसीलां कारगिल ते जंस्कार न। इसदे सत्त विकासखंड न। इसदे अंतर्गत 129 ग्रां आंदे न जित्थें बलती, पुरखी, दरदी बौद्ध ते शीना संस्कृति दी झलक मिलदी ऐ। इत्थें इक होर पुराना कबीला बी रौहंदा ऐ, जिसगी 'यशकुन' नांऽ कन्नै

जानदे न। आक्खेआ जंदा ऐ जे एह लोक यक्षें दे वंशज न ते इंदे प्रदेश गी यागिस्तान गलाया जंदा ऐ।

गलांदे न कारगिल दा नांऽ 15 मीं सदी इच पेआ। इस थमां पैहलें इस इलाके दा नांऽ पुरिख हा ते इत्थुआं दे शासकें गी पुरिख सुल्तान गलांदे हे। एह राज्य पूरे सुरु खेत्तर इच परिव्याप्त हा। इसदी राजधानी दा नांऽ कारपोखर हा। बाद इच पुरिख राज्य बी केई निक्के-निक्के राज थढ़ें इच बंडोई गोआ, जिं'दे इच मुख्ख हे सुरु, कारचे, सोध, फोकर ते चिकतन। सन् 1834 ई० इच वजीर जोरावर सिंह ने मड़वा जितने दे बाद सारें थमां पैहलें इ'नें निक्के-निक्के राज्यें गी अपने अधिकार इच लैत्ता हा। सन् 1834-35 इच जोरावर सिंह जंस्कार, सुरु घाटी ते कारगिल इलाके गी जितने इच सफल रेहा। इ'यां कारगिल जम्मू राज्य दा तदूं थमां गै इक हिस्सा रेहा ते साढ़े इस इलाके कन्नै पौने दो सौ साल थमां बी पुराने सरबंध न।

कारगिल इच घुम्मने दा मिगी मता घट्ट समां मिलेआ। अ'ऊं थोढ़ा चिर सुरु नदी दे घाट दी अटारी उप्पर बैठा। मिगी दिक्खियै त्रै वल्ली कुड़ियां मेरे कोल आइयां ते पुच्छन लगियां-‘तुस नजुमी ओ ?’ मेरे चिट्टे टल्ले ते सिरै दे बधे दे बाल दिक्खियै शैद उ'नें एह क्याफा लाया होना। में ‘हा’ इच सिर ल्हाया तां उ'नें मेरी परीक्षा लैने लेई पुच्छेआ-एह दस्सो एह कुड़ी किस कलास इच पढ़ा करदी ऐ। में कुड़ी दी उमर दा अंदाजा लाया ते जबाब दित्ता- नौमीं। मेरा अन्दाजा स्हेई निकलेआ। उ'नेंगी यकीन होई गोआ जे अ'ऊं पक्क नजुमी आं। ओह मेरे थमां अपने भविक्ख पुच्छन लगियां पर तौले गै मेरी गड़्डी आई गेई। में अपनी सीट मल्ली ते साढ़ी गड़्डी मूलबेक ग्रां लेई दौड़न लगी। मूलबेक कारगिल थमां 32 कि.मी. दूर हा। रस्ते इच असें जंस्कर प्हाड़ दियां शृंखलां, भूरे रंगे दियां चट्टानां ते लगभग पंज किलोमीटर लम्मा इक पठार दिक्खेआ। रस्ता मता गै वीरान ते सुनसान हा। पही बी अस अगें बधदे गे ते सवा घैंटे इच मूलबेक ग्रां पुज्जी गे। इत्थें इक चट्टान गी कुरेदियै बनाई गेदी महात्मा बुद्ध दी पंजाह फुट्ट उच्ची मूर्त दिक्खियै अस बड़े हैरान होए। मूर्ति दे थल्लै नमां गुम्पा हा। इ'यां गलांदे न जे एह मूर्त कुशाण कालीन ऐ।

मूलबेक इच असें गी केई विदेशी बी मिले, जेहड़े इस मूर्त दे फोटो लै करदे हे। इत्थें केई होटल बी हे, जिं'दे इच इक उधमपुरियें दा बी हा।

असें मूर्त दे दर्शन कीते ते कोतु-ला दी चढ़ाई चढ़ने गी अगें बधे। कोतु-ला 14000 फुट्ट दी उंचाई पर हा। साढ़ी गड्डी इस उप्पर दौड़न लगी तां अस ठंडी ब्हाऽ दे फंडूके सैहन करन लगे। इत्थुआं दी मिट्टी, फाड़ें दा रंग ते वीरानगी साढ़े लेई इक चबात दी। अस एह फाड़ उतरे तां लामा युरु ग्रं पुज्जी गे। इत्थें असें इक पुराना गुम्पा ते केई गुफां दिक्खियां। इत्थें केई विदेशी बी असें गी मिले, जि'नें जुले आखियै साढ़ा अभिवादन कीता।

लामा युरु ग्रं मेरे लेई इक इतिहासक थाहर बी हा। एह ओह जगह ही जित्थें वजीर जोरावर सिंह ने लेह उप्पर हमला बोलने थमां पैहलें किश चिर लेई अपना शिविर लाया हा। केई डोगरा सैनिक उत्थें रुके हे ते उ'नें गी लामा युरु गुम्पा इच जाइयै बौद्ध सिद्धें, तांत्रकें ते योगियें दे दर्शन कीते हे।

लामा युरु ग्रं थमां अस खालत्सी लेई करीब पंज बजे रवाना होए। साढ़ा अगला रस्ता बी सुनसान ते फाड़ी हा। अस फही भूरे, मटमैले ते रंग-बिरंगे फाड़ें इच गोआची गे। रस्ते इच फाड़ गै फाड़ हे। इ'नें फाड़ें दे त्रिश मते गै डरौने ते अद्भुत हे। कुदै इ'यां बझोंदा हा जे बड्डे-बड्डे हाथी लेटे दे न ते उंदियां उभरी दियां पिट्ठां असें गी लब्धा करदियां न। अस इ'नें फाड़ें थमां किश अगें बधे तां रस्ते इच सिन्ध नदी दी इक धारा बंदोई। इक निक्की सरिता गी दिक्खियै असें गी इक नमीं जिंदगी दा एहसास होआ। फाड़ें इच असें गी अपना आप बी गोआचे-गोआचे दा बझोआ दा हा। स'जां सत्त बजे दे करीब अस कार इच ढोलके खंदे खालत्सी पुज्जे। खालत्सी जि'ला लेह दा तसील हैड क्वार्टर ऐ। इत्थें विकास खंड अधिकारी दे दफ्तर दे इलावा होर बी केई दफ्तर न। हुन इत्थें रौहने लेई होटल बी हैन ते खाना खाने लेई रेस्टोरेंट बी हैन। इत्थें दो-इक डोगरें दियां हट्टियां बी हैन। असें खालत्सी चाह पीती ते लेह लेई टुरी पे। खालत्सी थमां 33 किलोमीटर अगें मुख सड़क थमां किश दूर विश्वप्रसिद्ध आलची दा गुम्पा ऐ, न्हेरा पौने कारण अस उत्थें नेई जाई सके। साढ़ी कार अगें गै अगें गी सरकदी गई। रस्ते इच असें इक गुरद्वारा, सेना दी छावनी ते किश उच्चे लम्मे भवन बी दिक्खे, पर न्हेरा पेई जाने कारण उंदे नांऽ नेई पढ़ी सके। राती दे साढे नौ बजे असें लेह शैहर इच प्रवेश कीता तां बजार बंद होई गेदा हा। साढे ठैहरने दा प्रबन्ध सरकट-हाऊस

इच हा, इस लेई अस सिद्धे उत्थें गै पुज्जे।

सरकट-हाऊस दे इक अधिकारी ने असें गी कमरे खोहली दित्ते ते अस कमरें इच बड़ी गे। असें खाने-पीने दा प्रबन्ध सरकट-हाऊस इचें गै कीता। साढ़े सौने थमां पैहले लेह दा इक अधिकारी होर आया। उसनै पैगांग जाने दा अनुमति-पत्तर साढ़े हत्थ थम्हाई दित्ता। पैगांग लद्दाख दी इक मशहूर झील ऐ। एह पर्यटकें लेई ते खोहल्ली दित्ती गेदी ऐ, पर इत्थें जाने लेई जि'लाधीश दे कार्यालय थमां परमिट लैना जरूरी ऐ। असें फैसला लैत्ता जे अस सत्त बजे सवेरे अपनी जातरा पर रवाना होई जागे, इस लेई अस सारे सबेला गै सेई गे।

26 जुलाई गी अस सारे पंज बजे उट्टे। अपनी आदत दे मुताबक अ'ऊं भ्रमण लेई निकलेआ। सरकट-हाऊस दे सामनै गै इक फ्हाड़ी उप्पर लद्दाख दे राजें दे पुराने मैहल हे। मेरी पैहली नजर उ'नै मैहलें पर गै पेई। एह मैहल थामें टुट्टी-फुट्टी गेदे हे, पर अज्ज बी एह लेह दे स्मारकें इच मता उच्चा थाहर रखदे न। एह मैहल नौ मंजिला हा ते इसगी लद्दाख खेत्तर दा इक अजूबा आक्खेआ जाई सकदा ऐ। अ'ऊं किश चिर लेह दे उप्परले बजार इच बी घुम्मेआ-फिरेआ ते फही साढ़े छे बजे दे करीब सरकट-हाऊस पुज्जा। उत्थें मिगी जम्मू दे केई अधिकारी मिले, जेह्ड़े मेरे नांs थमां परिचित हे। मेरे सारे साथी न्हाई-धोइयै त्यार होई गेदे हे। मि'म्मी तौल-तौल कीती, कप्पड़े बदले, न्हारी खाद्दी ते कार उप्पर आइयै बेही गेआ। ठीक 7 बजे अस पैगांग झील^४ दिक्खने लेई रवाना होए। एह झील लेह थमां 133 कि.मी. दूर ही।

अस लेह बजार थमां लंघे तां असें गी विदेशी पर्यटकें दी मती भीड़ बझोई। स्थानी लोकें दी रैहत-बैहत ते लाब्बे इच बी मता फर्क बझोआ। स्थानी ते विदेशी दोऐ जीन दे कप्पड़ें इच गै लब्धे। लेह शैहर गी दिक्खियै इ'यां बझोंदा हा जे अस कुसै योरुपीय नगर इच घुम्मा करने आं। लेह दी कुड़ियां जीन दी पैंट इच मतियां चुस्त ते फुर्तीलियां बझोआ दियां हियां। लेह बजार दियां हट्टियां माल ते समान कन्नै खचा-खच भरोची दियां लब्धियां। किश हट्टियां डोगरें दियां बी हियां। इक हट्टी उप्पर डोगरा स्वीट शाप बी लखोए दा हा।

लेह इच असें केई आलीशान होटल, रेस्टोरेंट ते वार शाप्स दिक्खियां।

स्थानी लोकें दे घर जैदा दुमंजिले हे ते उं'दे इच सूर्य दी तपश लैने लेई शीशे लग्गे दे हे।

अस कार उप्पर गै बैठे दे बजार दे दक्ख दिखदे जा'रदे हे। असें गी हर उच्चे टिब्बे उप्पर बौद्ध मंदर जां गुम्पा नज़र आवा'रदा हा। थाहरें-थाहरें लामें दियां पैरामिड आकार दियां समाधियां हियां, जि'नें गी छोस्तेन गलांदे न। इंदे इलावा बजार दे बिच मणि तुंजुर (प्रार्थना चक्र) बी हे जि'न्दी बनावट ढोल जां ड्रम जैसी ही। इ'यां गै असें गुम्पा दे अग्गे-पिच्छें मणि दीवारां जां कंकणियां बी दिक्खियां।

अस लेह दे मुख बजार थमां लंगे तां अग्गे खु'ल्ला थाहर आई गोआ, जिसदे दक्खी आलीशान हट्टियां हियां। इत्थुआं दा असें खाने-पीने दा समान खरीदेआ, हट्टियें कश गै नारबू हस्पताल हा। इत्थें मरीजें दी मती आओ-जाई ही। अस किश होर अग्गे बधे तां बहुमंजले भवन नजर औन लगें। किश नमियां कालोनियां बी निर्माणाधीन हियां। इक बड़डे भवन दे कंढे बोर्ड लग्गे दा हा, जिस पर लिखे दा हा-शोध केन्द्र/अ'ऊं शोध-केन्द्र इच जाना चांहदा हा, पर समें दी तंगी कारण नेई जाई सकेआ।

लेह थमां किश अग्गे गी बधे तां मेरी नजर लम्मे-चौड़े रेतीले मैदान पर पेई, इ'नें मदानें इच बी केई नमें भवन बने दे हे। अस किश अग्गे गे तां इक होर सन्हाकड़ा मदान नजरी आया, जिस उप्पर हिन्दी इच लिखे दा हा-'सिन्धु-दर्शन स्थल', हर व'रै जून महीने इत्थें गै इक महोत्सव दा आयोजन होंदा ऐ, जिस इच देश-भर दे कलाकार हिस्सा लैंदे न।

असें इत्थें सिन्धु नदी दे दर्शन कीते ते पही नदी दै कंढे-कंढे बर्ना दी सड़क दे सज्जै-खब्वै नजर दड़ांदे अस कारु पुज्जी गे। कारु थमां इक सड़क मनाली गी गेई ते दूई सड़क टंगसे गी जंदी ही। असें पैगांग जाना हा। पैगांग टंगसे खेत्तर इच इक अति रमणीक झील ही, इस लेई ड्राइवर ने गड़डी मोड़ी ते अस पूर्व-उत्तर दक्खी अपने गंतव्य-स्थान दक्खी चली पे।

लेह थमां कारु तोड़ी साढ़ी जात्तरा मती आनन्दमयी रेही। सड़के दे दक्खै हरियाली ही। इस लेई साढ़ियां अक्खी बी तृप्त होई गेइयां।

कारु इच इक पुलीस चौकी ही। उत्थें सपाहियें साढ़ा परमिट दिक्खेआ ते फही असें गी अगें बधने दी इजाजत दित्ती। अस कारु थमां सकती बक्खी चले। सकती कारु थमां 10 कि.मी. दूर इक बौद्ध ग्रां हा। इत्थें शैहरी म्हौल दा कोई असर नेई हा। लोक परम्परागत वेश-भूशा इच लब्भे। फही एह दस किलोमीटर दा पूरा टोटा असें गी सरसब्ज बझोआ। इक टिल्लुए उप्पर असें इक किले दे नशान इक गुम्पा ते छोस्तेन दे चि'न्न बी दिक्खे। असें सकती टप्पेआ तां साढ़ी अगली पड़ां टांगसे ही। इत्थें पुज्जने लेई असें गी बड़ा लम्मा रस्ता तैऽ करना हा। सकती थमां अस अगें गे तां इक फौजी चौकी इच असें गी रुकने लेई गलाया गेआ। उत्थें असें अपने परमिट दे काकल दस्से ते फही रोहिला दी चढ़ाई चढ़न लगे। एह चढ़ाई किश मती मुश्किल ते नेई ही, पर बेजान फ़ाड़ें दे कारण वीरानगी मती बझोआ दी ही। इस फ़ाड़ी सड़क दी आकृति बी कुदै रेंगदे सप्पे आह्ला लेखा ही ते कुदै कंडोली दी बेलै आह्ला लेखा सिद्धी ही। अस उप्पर गै उप्पर चढ़दे गे। असें गी इ'यां बझोन लगा जे अस गास छूहने लेई उप्परै गी चढ़ा करने आं। खीर दस-बारां किलोमीटर दी होर चढ़ाई चढ़ियै अस रोहिला टॉप. पर पुज्जे तां दिक्खेआ इक बोर्ड लागे दा हा, जिस उप्पर लखोए दा हा-17500 फुट/असें गी बी बझोआ जे इन्ने उप्पर चढ़ी आए दे आं। इत्थें असें गी साह फुल्लने दी बी किश शकैत मसूस होई। एह शकैत असें गी द्रास कारगिल ते लेह बी मसूस होई ही, पर उत्थें थोड़ी मात्रा इच ही ते इत्थें मती ही। असें गी आपूं पता हा जे एह सब किश आक्सीजन दी कमी कारण ऐ। असें जि'यां रोहिला फ़ाड़ चढ़ेआ हा फही उ'आं गै उतरन बी लगे। उतराई इच असें गी सड़क पर कम्म करदे मजदूरें दे केई टोल लब्भे। उं'दे इच मते झारखंड, खब्बल, बंगाल ते मणिपुर दे बी हे। फ़ाड़ ढलेआ तां फही किश सरसब्ज लब्भन लगा। एह इ'यां हा जे द'ऊं फ़ाड़ें दे दरम्यान 40 थमां 50 मीटर चौड़ी इक सैल्ली पट्टी ही। इस पट्टी दे बश्कार इक हिमानी प्रवाहत ही। इस सैल्ली पट्टी इच पशमीना बक्करियें दे झुंडें दे झुंड चरा करदे हे। जोजिला टप्पेन दे बाद असें बक्करियें दे केई झुंड दिक्खे हे, पर एह झुण्ड आकार दी द्रिष्टी कन्नै किश बक्खरे गै बझोंदे हे। इत्थें याक डंगरें दे बी रेबड़ें दे रेबड़ चरा करदे हे। असें इत्थें किश निक्कियां गवां बी दिक्खियां जिं'दी शकल डुंगर दी गवें आह्ला लेखा गै ही।

फ़ाड़ ढलने दे बाद फ़ही निक्के-निक्के ग्रांएं दा सिलसिला शुरू होआ। इ'नें ग्रांएं कश गै फौजी-शिविर बी हे। अस जि'यां-जि'यां अगें जंदे गे हिमानियें दी तदाद बी बधन लगी। अस छंगाला पुज्जे तां असें गी इ'नें फ़ाड़े दे बशकार लम्में-चौड़े मैदान बी लब्धे, जेहड़े उच्चकोटि दी चरागाहें लेई मशहूर हे। रस्ते इच कुदै-कुदै निक्कियां-बड्डियां हट्टियां बी हियां। उत्थें खाने-पीने दियां बस्तां उपलब्ध हियां। असें रस्ते इच रुकियै ठंडियां बोटलां पीत्तियां, की जे ढलाई ढलने दे बाद असेंगी गर्मी बझोआ करदी ही।

अस सुल्तक-दुर बुक थमां गुजरदे होई करीब 11 बजे टंगसे पुज्जे। टंगसे पुज्जने थमां पैहलें अस दुर बुक दा करीब पंज किलोमीटर लम्मा ते दऊं ढाई किलोमीटर चौड़ा मदान दिक्खियै मते गै प्रभावत होए हे।

टंगसे असें गी इक मता साफ-सुथरा ग्रां बझोआ। इत्थें-त्रीह-पैंती हट्टियां हियां। ग्रां इच बौद्ध मंदर छोस्तन, मणि दीवार बी ही। लोकें दे मकान पक्के हे। इत्थें जातरियें लेई केई कैफेटेरिये ते रेस्टोरेंट हे। किश रेस्टोरेंट टैंटें इच हे। इत्थें लोकें दे मकान पक्के हे ते सारे लोक बौद्ध धर्म दे अनुयायी हे। टंगसे इच केई सरकारी दफ्तर बी हे। इत्थें विकास खंड अधिकारी दा दफ्तर ते प्राइमरी हैल्थ-सेंटर बी हा। शकली थमां लोक मंगोल नसल दे बझोआ दे हे।

टंगसे ब्लाक दी सीमा चीन दे बाडर गी छूंहदी ऐ। चशूल दा इलाका बी टंगसे दे अन्तर्गत ऐ। इस ब्लाक इच केई निक्के-बड्डे ग्रां न'ते ब्लाक दी जनसंख्या कुल्ल 4903 ऐ। टंगसे लेह् थमां 117 कि.मी. दूर ऐ।

अस टंगसे गी टप्पियै अगली फ़ाड़ियें पाससै बधे। इ'नें फ़ाड़ियें दे पत्थर बी असें गी बड़े अजीब-जन लगगे। एह् मते गै चमकदार हे, इ'यां सेही होंदा हा जे इंदे उप्पर तेल मलियै इ'नेंगी लशकाया गेदा ऐ। रस्ते इच जातरियें दे ठैहरने गितै तम्बू लाइयै केई गेस्ट-हाऊस खड़े गेदे हे। इक गैस्ट-हाऊस दा नांs बुड लैंड टुरिस्ट कैंप हा। इत्थें पंज-छे तम्बू हे।

इस थमां अगला रस्ता असें गी किश औखा इस करी बझोआ, की जे दपैहर भखने करी हिमानियें दा पानी बधी गेदा हा। सड़क दे रस्ते इच केई हिमानियां हियां, जि'नेंगी पार करना जरूरी हा। असें जि'यां गै मुगलाव गैस्ट-

हाऊस टप्पेआ, हिमानियें दा सिलसिला शुरू होई गेआ। इंदे कूरण सड़क इच केई व्यवधान बी आए, पर अस अगें-गै अगें बधदे गे ते ठीक 12.30 बजे पैगांग झील दे उप्परले कंठे तोड़ी पुज्जी गे। इत्थें बी इक सैनिक शिविर हा। झील दे कंठे 133 कि.मी. लम्मी सड़क पक्की ही। अस झील दे कंठे पुज्जे तां उत्थें वीडियोग्राफी होआ दी ही। झील दे कंठे-कंठे सत-अट्ठ मोटर साइकल सवार दौड़ ला करदे हे ते इक विदेशी जनानी अपने कीमती कैमरे कन्नै उंदियां तस्वीरा लै करदी ही।

झील दा परिद्रिश्श बी मता गै रमणीक ते मन-भाना हा। झील दा उतरी सिरा अनुमानतः त्रीह मीटर चौड़ा हा। इसदे उत्तर इच जेहड़ी निककी फ्हाड़ी ही, ओह लगभग 20 मीटर, पूर्व आहली फ्हाड़ी 25 मीटर ते पच्छिम आहली फ्हाड़ी कोई 30 मीटर उच्ची ही। एह झील उत्तर थमां शुरू होइयै दक्खन बक्खी फैलदी बझोआ दी ही। झील दे कंठे उप्पर समुन्दर आहला लेखा छल्ल आवा करदे हे। इस झील दा पानी इ'यां खारा हा, पर किश चिट्टे रंग दे पैछी इसदी उप्परली सतह उप्पर तैरदे बी बझोंदे हे।

आक्खेआ जंदा ऐ जे एह झील डेढ सौ किलोमीटर लम्मी ऐ। इसदी चौड़ाई बक्खरे-बक्खरे थाहरें बक्खरी बक्खरी ऐ। कुदै इक किलोमीटर ते कुदै चार थमां पंज किलोमीटर ऐ। एह साफ पानी दी झील ऐ ते दिक्खने इच नीली बझोंदी ऐ। लद्दाखी-भाशा इच इस झील दा नांउ त्शो पग्कांग ऐ, जिसदा अर्थ ऐ बड़डे सुराख आहली झील।

एह झील पर्यटकें लेई सिरफ मेरक ग्रां तोड़ी गै खोहली गेदी ऐ। इत्थें झील दे कंठे किश घर ते इक रेस्टोरेंट ऐ। इत्थें नौका-विहार दी व्यवस्था बी ऐ। पर सैनिक-अधिकारियें दी अनुमति दे बगैर नौका-विहार वर्जित ऐ। मेरक ग्रां इसदे उप्परले किनारे थमां पंज-छे किलोमीटर दूर ऐ। अगें जाने लेई सड़क कच्ची ते खराब ही, इस लेई अस मेरक तोड़ी ते नेई पुज्जे, पर झील दा परिद्रिश्श असें मते-अगें जाइयै बी दिक्खेआ। इत्थुआं दा चशूल दी दूरी 54 कि.मी ही। असें गी इस झील तोड़ी गै जाने दी अनुमति ही, इस लेई अस चशूल नेई जाई सके।

एह झील सतह समुन्दर थमां 14000 फुट्ट उचाई पर ऐ। इस लेई

आक्सीजन दी इत्थें बी कमी मसूस कीती जंदी ऐ।

चशूल तोड़ी एह झील भारत दे अधिकार इच ऐ ते उस थमां अगें एह चीन-तिब्बत दी सीमा इच ऐ। इस झील दे कंढै जंगली घोड़ें दी दौड़ मती दिलकश बझोंदी ऐ।

इस झील थमां अटूठ किलोमीटर दक्खन इच तशो रुल नांऽ दी इक कौड़े पानी दी झील होर बी ऐ। एह झील लगभग 25 किलोमीटर लम्मी ते पंज किलोमीटर चौड़ी ऐ। लद्दाख इच इक होर झील तशोमो री री बी ही, जेहड़ी सतह समुन्दर थमां 15000 फुट्ट उच्चे थाहर फ्हाड़ें कनै घिरी ऐ, पर अस इ'नें दौनें झीलें गी दिक्खे बगैर लेह परतोई आए।

डोगरा सैनिकें पैदल चलियै इ'नें झीलें उपपर अधिकार कि'यां कीता होग, मेरे लेई एह इक खतोला गै रेहा। मोटर उपपर चढ़ियै इत्थें पुज्जेने इच असें गी इन्नियां मुश्कलां आइयां तां सिरै उपपर समान ते मूँढे उपपर बन्दूक रक्खियै साढ़े पुरखें इस इलाके गी कि'यां सर कीता होग ? मेरे लेई इस सुआल दा जवाब इक गै हा-हिम्मत ते ब्हादरी। इस झील दे कंढै खड़ोइयै में अपने पुरखें दे उज्जवल ते गौरवशाली कारनामें गी चेता कीता तां मेरा मत्था आदर ते मान कनै उ'दे अगें झुकी गेआ ते अ'ऊं सोचन लगा जे जिस जाति दे लोक इन्ने पराक्रमी हे, ओह अज्ज दे दौर इच पिछड़ी की गई ?

ठीक 1.30 बजे अस झील दिक्खियै उत्थुआं दा परतोए। साढ़े लेई पही उ'ऐ सड़क, उ'ऐ फ्हाड़, उ'ऐ सरितां, उ'ऐ हिमानियां साथन हियां, जि'नें गी पिच्छें छोड़ियै अस इत्थें पुज्जे हे। जि'यां-जि'यां कार पिच्छें गी परतोआ दी ही मेरा दमाग बी डुग्गर दे उ'नें रणवांकुरें दी वीरता दे इतिहास दी तपाश इच फिरा दा हा, जि'नें जम्मू दी कंढियें ते फ्हाड़ें थमां चलियै इ'नें उच्चे किंगरें इच अपनी जित्त दे झंडे गड़डे हे।

अस कोई पंज बजे परतियै कारु पुज्जे। लेह गी परतोआ करदे हे तां रस्ते इच सेना पाससेआ लद्दाख एकता-दिवस दा आयोजन चला करदा हा। ज्हारां-बद्धे लोक इत्थें कट्ठे होए दे हे। लद्दाखी लोक-नाच, गीत ते संगीत दी धुनां साढ़े कन्नै इच बी पवा करदियां हियां। पर अस इत्थें मता चिर नेई

रुके ते ठिकसे गुम्पां दिक्खन चली पे, जेहड़ा साढ़े रस्ते इच गै पौंदा हा।
 उत्थुआं दा अस सिद्धे जोरावर दा किला दिक्खन गे। पूर्वोन्मुखी एह किला
 कोई पंच कनाल जमीन इच परिव्याप्त हा। एह मिट्टी दा किला हा। अस किले
 दे अन्दर बाहर फिरे, उसदे केई कोशठ दिक्खे, घुड़साल बी दिक्खी ते परतोई
 आए। एह किला दिक्खियै मिगी डोगरा सेना दी वीरता ते अदम्य उत्साह दा
 एहसास होआ। मिगी बड़ोआ जे लदाख जे अज्ज भारत दा इक अंग ऐ तां
 इस दा श्रेय वजीर जोरावर सिंह ते उस कन्नै विजय-अभियान पर गेदे डोगरा
 फौजियें गी जंदा ऐ।

किला दिक्खियै अस विश्राम करने लेई सरकट-हाऊस परतोए तां लेह
 इच तैनात चीफ जुडिशल अफसर श्री संजीव गुप्ता ते उधमपुर कॉलेज इच मेरे
 थमां पढ़े दे किश होर पूर्व विद्यार्थी साढ़ा इन्तज़ार करादे हे। उ'नें साढ़ा
 निग्घा सुआगत कीता। उं'दी खातिरदारी बी साढ़े लेई नेई बिस्सरने आहली ही।

स'जा अस लेह नगर दिक्खन निकले। लेह दा बाज़ार असें गी फही बड़ा
 रौनक भरोचा लगा। विदेशियें ते पर्यटकें कन्नै एह शैहर भरोचे दा हा। उस
 दिन अस रातीं चिरें सुत्ते। मिगी गूढ़ी नींदर ते पेई पर पूरी रात मिगी सुखने
 इच डोगरा फौजियें दी कदम ताल ते जोरावर सिंह दी हुंकार गै सनोचदी रेही।

27 तरीक गी असें अपने बिस्तरे ब'न्ने ते मनाली आहले रस्तै 29 जुलाई
 गी उधमपुर रातीं दे बारां बजे स्हेई-सलामत पुज्जे।

मेरे लेई एह नेई बिस्सरने आहली जातरा ही।

०००



यूनिवर्सिटी विश्वनाथ मंदिर



पशुपतिनाथ मंदिर, काठमंडू